

PHILOSOPHIA

LIBERA, P<sup>x</sup> 14. 25-

TRIPLICI EXERCITATIONUM  
*Decade proposita.*

IN QVA

ADVERSUS HVIVS TEM-  
poris Philosophos dogmata  
quædam nova discu-  
tiuntur.



AVTHORE

NATHANAEL CARPENTARIO,  
*Exoniensis Collegii, in florentissimâ  
Academia Oxoniensi, Socio.*

Editio tertia correctior.

HORAT.

— *Ridentem dicere verum  
Quid verat?*

OXONIÆ

Excudebat LEONARDUS LICH-  
FIELD Impensis THOMÆ  
ALLAM. 1636.



175:01





# GENEROSISSIMO

ADOLESCENTI D. IACOBO

Araniz Comiti, Illustrissimi Marchionis

HAMILTONII, Comitis Araniz &

Cantabrigiz, Baronis Evanniz &

Inncrdalix, summe spei

Heredi.



Væ plurimorum ambitioni tanquàm metæ præfiguntur maximæ, Ea Te (Comes Illustrissime) pro innatâ animi Tui magnitudine negligentem, tanquàm assecclæ, comitantur. Opinio nimirum hominû, & obsequium. Illud certè unicum virtutis est peculium, cui citiùs animâ excusseris, quàm famam: ut quæ

# EPISTOLA

splendorem sui nominis non a-  
 lio clauferit quam immortalita-  
 tis termino. Ea nobilitatis unica  
 felicitas, quæ non tam suadeat  
 quam imperet hominibus obser-  
 vantiam, & suâ muniat authori-  
 tate quæ suo virtus sanciverit suf-  
 fragio. Siquidem ut *Virtus* paren-  
 tum veluti prima nobilitati basis  
 constituitur: ita maximus virtu-  
 tis splendor est *Nobilitas*, quæ tan-  
 quam surculus Generoso illius  
 stemmati inseritur. Hisce te præ-  
 fidiis munitum, cum primum si-  
 nu suo complexa est mater nostra  
*Exoniensis*; nescivit plane, utrum  
 doleret magis Ruinas moenium,  
 ingratos antiquitatis characteres,  
 quam

## DEDICATORIA:

quàm generosæ sobolis denuò  
renascentis incrementis plaude-  
ret. Tandem cogitans te esse præ  
cæteris, quem fata reservassent  
ad senectutis tædium sublevan-  
dum, non potuit non gratulari  
infortuniis suis, tantæ fortunæ  
consciis. Quippe habere visa est  
ex adventu tuo, quo reliqui for-  
tasse plurimi nobis non tam ex-  
probarent paupertatem, quàm  
appellentis Nobilitatis gloriam  
inviderent. Quòd verò, relictis  
cæteris, non minùs ad ornatum  
splendidis, quàm opulentis ad  
accipiendum, nostrum tandem  
appuleris Cœnobium, fortunæ  
non imputandû puto, sed fato aut

## EPISTOLA 36

confilio. Tantum fortè indultum  
 voluit Deus hisce *Stapletoni* ædi-  
 bus, ut qui in Regis defensione  
 vitam suā clauferit, ei nunquā  
 deficerent è Regiā stirpe optima-  
 tes, qui causā susceperent, & si  
 opus fuerit, ipsam pro Rege ani-  
 mam effunderent. Quo magis i-  
 gitur Heroicæ istæ in Te virtutes  
 egerminent, & renascantur, viva-  
 ci admodum exemplo urgēis  
*Fundatoris, & Majorum*: quorum  
 Ille, simul cum suo Fratre, Regiæ  
 causæ & vitam & fortunas litavit  
 patrocinio. Hi verò (uti ex histo-  
 riis vestris liquet) animosè con-  
 tendērunt, ut Personam Regiam  
 tam domesticis Insidiatoribus,  
 quā

## DEDICATORIA.

quàm externis Hostibus libera-  
rent. Ut quæ divisim singulis æ-  
ternum fidelitatis, erga Regem  
suum, Trophæum erigerent, con-  
iunctis in Te viribus confluant &  
conspirent, ut cum Poëta loquar,

*Quæ faciunt divisa Beatum*

*In te mixta fluunt.*

Nec certè satis æstimant, si qui re-  
existiment singulares hasce do-  
res, spe potiùs quàm fructu, con-  
sequutù. Quis enim in singulis  
tam verbis quàm factis, eam non  
animadvertit indolem, quæ in  
Iuvenili corpore virilem prodat  
sapientiam: ut quam in aliis ex-  
pectaret ætatis maturioris comi-  
tem, Tux inveniat adolescentiæ  
prodro-

## EPISTOLA

prodromum. Prædicet *Zenophon* suum *Cyrum*: suum *Socrates* *Alcibiadem* admiretur: At sua nobis inventa venditant non aliorum gesta, neque cum *Sophocle*, quales essent homines nobis descripsere, sed cum *Euripide*, quales esse deberent, ut non tam Personam ex virtutibus describerent, quàm sub fictæ personæ larvâ virtutes depingerent. At qui singularem ingenii tui indolem; Heroicæ stemmatis gloriæ conjunctam; æstimaverit, non facile pronuntiabit, utrùm Nobilitas Tua virtute clarior: an virtus Nobilitatis præfidiis auctior: Ita utriusque dignitatem tuâ humanitate temperas:

## DEDICATORIA.

peras: ut non magis è Nobilium  
 stirpe, quàm ad Nobilitatem na-  
 tus videare. *Platonem* (ut refert  
 quidam) non nobilem invenit  
 Philosophia, sed fecit: longè tu  
 felicior, quàm *Virtus*, & *eruditio*,  
 & inveniunt Nobilem, & faci-  
 unt; qui præclaras tuas dotes non  
 severis institutorum monitis im-  
 presseris, sed à longâ majorum  
 prosapiâ, veluti cum lacte mater-  
 nò, hauseris. Accedit tamen, inter  
 Fortunæ serenioris auspicia, non  
 minimum, quod Præceptores  
 Tibi adsciveris, non infirmi sub-  
 sellii Pædagogulos (quos vilitate  
 mercedis, potiùs quàm meriti  
 amplitudine, vulgus æstimat) sed  
*Viros*

# EPISTOLA

D<sup>r</sup> PRI-  
DEAVX.  
M<sup>r</sup> BAY-  
LY.

*Viros* tam prudentiâ practicâ,  
quàm totâ scientiarum Panopliâ  
instructissimos, qui ceream Tibi  
Iuventutis molliem utriusq; ge-  
neris principiis attemperent: ut  
Parens Tuus Honoratissimus, in  
hoc delectu, non tam aliorum  
desiderârit, quàm suum probave-  
rit iudicium. Hûc accedit ulti-  
mò, tanquàm Coronidis loco,  
*Religionis* orthodoxæ, in quâ na-  
tus es, sinceritas, maximum H A-  
MILTONIANI Nominis De-  
cus & Præsidium. Hæc omnia  
tanti sunt apud me momenti  
(Comes Illustrissime) ut citius  
Tibi tempus virtutem corroserit,  
quàm mihi observantiam. Neq;  
tamen



DEDICATORIA.

tamen ejus me farinae profiteor  
Homuncionem, qui Mæcenates  
Fortunarum potius, quàm Meri-  
torum, metiar magnitudine. Sci-  
unt enim, qui me nōrunt, Homi-  
nem me esse apertæ *Ingenuitatis*,  
magis quàm *Ambitionis* consci-  
um, quem ne *Paupertas* quidem,  
Oratorum mater feracissima, co-  
gere unquam poterit ad adulan-  
dum. Habes (Comes Illustrissi-  
me) in hoc opusculo, quædam  
Iuvenilibus studiis accommoda-  
tiora, quæ horas tibi forsan serias  
nec meritò occupent, nec succi-  
sivas sine fructu devorent. Qui-  
bus si pro Heroicâ pectoris tui  
suavitate benignius annueris,  
tanto

# EPISTOLA

tanto me credam beneficio tibi  
obæratum, ut non superesse pu-  
tem, quod ulterius debeam. Hu-  
jus Favoris tui confusus præsidio,  
Familiæ vestræ Generosissimæ  
omnimodam precabor Incolu-  
mitatem; & in æternum vivam

*Honori Tuo*

*Omni officiorum genere  
devotissimus,*

N. CARPENTARIUS.



AD

FLORENTISSIMAM  
OXONIENSIS ACADE-  
miæ Iuventutem Præfatio.



HILOSOPHIAM Li-  
beram, ante Annū sub  
Cosmopolitani nomine  
typis editam (Ingenui  
Juvenes) in Lucem se-  
cundo non emissem,  
nisi maiorem mihi sti-  
mulum addidisset In-  
dignatio, quàm Ambi-

tio: Quippe aliquantisper apud exteros exu-  
lantem, domum mihi remisit Amicus nescio  
quis, officiosus magis quàm prudens amictu  
quodam exotico squalidam & deformem, ut  
aspectu proprium partum infelix pater exhor-  
rerem, & veluti monstrum refugerem. Hac  
tamen tanquàm levioribus Typographi erratis  
annumerassem, nisi sese hūc adunxisset quo-  
rundam, ut mitius dicam, error, ut verius for-  
san,

## Præfatio.

san, obirectatio: quorum alii Paradoxi nomen, pro opinione veritati oppositâ interpretantes, indignè tulerunt ea me inter Paradoxa recensuisse, quæ vera esse crederent: Alii omnia pro Dogmaticis æstimantes, Temeritatis nescio cuius insinulârunt nostrum cum Philosophis magni nominis Dissidium. In utriusq; generis censores, Apologiam suggerere potuit sola libri nostri Inscriptio, quæ Libertatem in singulis Philosophicam aut ostendit aut venatur: ut quam ab ejus profectam crederent cerebro, qui in nullius juratus verba, non nisi in Rationis aut factæ scripturæ criteriis sperârît certitudinē. Absit illorum Arrogantia, qui Principes philosophorum in arenam provocantes, cupiunt magnis inimicitiiis inclarescere: Multo me magis illorum miseret, qui veluti ad servitutem nati, Placita vulgaria emunt prius quàm æstimant, & pro vanis damnant quicquid novum putant. Nec certè Aristotelicorum nomine dignos arbitratus sum unquàm Canonica illius obedientia Fratres, qui sine omni delectu diglutiunt Peripati sordes: sed qui Libertatem Philosophicam ab Aristotele introductam, sancimur & custodiunt: Siquidem Aristotelem nullibi minùs inveniatùs quàm apud tales Aristotelicos; quos (opinor) Philosophus ipse, si revivisceret, tanquàm spurios abdicaret; aut saltem,

ad Lectorem.

tem, ut Degeneres, indignaretur. Videor certe  
 mihi, (quod de Homero & Poëtis finxit Pi-  
 Etor ille apud *Elianum*) vomentem intueri  
*Aristotelem*, & philosophos nostri temporis ejus  
 lambentes & devorantes vomitum: Ita Fortu-  
 nata apud omnes *Aristotelis* vicit authoritas,  
 ut asseclas & amicos, Nominis sui magnitudi-  
 ne, cogeret in sententiam; hostes vero & ad-  
 versarios conjiceret in plurimorum præjudici-  
 um. Hinc, exulanti jam pridem *Veterum Phi-*  
*losophiâ Aristotelis* placitis, fortunâ potius,  
 quam merito, inferiori, *Peripatetica* sola in  
 scholis dominatur, quâ, veluti *Medusa* capite,  
 instar lapidum intuentes, obdurescunt. Quod si  
 prodigium illud *Natura*, *Stagyrita*, simul cum  
 doctissimis operibus, suum etiam in *Philosophos*  
 hujus temporis transfudisset Genium; habuis-  
 sent fortassis in quo citius ingenuæ aliorum li-  
 bertati indulgerent, quam socordi suæ in *Phi-*  
*losophicis* servituti planderent. Quis enim ita  
 perversi Genii, qui mecum ultro non fatebitur;  
*Philosophorum Principi*, ut *Homini*, multa  
 Falsa & Erronea; ut *Ethnico & Pagano*,  
 multa Impia & Profana; ut *Primo Instau-*  
*ratori*, multa manca & Imperfecta, excidisse:  
 Hisce addite non minimam Erroris notam,  
*Philosophiam Peripateticam*, prout viget apud  
 posteros, à primavâ suâ perfectione multum  
 defecisse,

## Præfatio

defecisse, & quodlibet apud Aristotelem ex-  
 ratum, quantumlibet leviculum, multiplices  
 errorum Phalanges apud posteros peperisse: a-  
 deò ut horum scriptorum partum æstimemus,  
 non tanquam animalium è proprio semine ge-  
 nnum, quo simile semper gignit sibi si-  
 mile: sed potiùs ut Insectorum, ex putri ma-  
 teriâ, veluti totidem vesparum, ex equi gene-  
 rosi cadavere renascentium. Huic superstitioso  
 nimis Peripati cultus, liberam nostram oppo-  
 nimus Philosophiam: non splendidis magnorum  
 Nominum coloribus adornatam: sed Nudam  
 ac simplicem, Synteritatis potiùs, quàm Au-  
 thoritatis consciam: ut quæ nec Doctiorum  
 recuset Iudicium, nec Sciorum metuat Præ-  
 iudicium. Non sum ego ex eorum familiâ, qui  
 Nullos aliquid magni in Philosophicis conse-  
 quutos arbitrantur, nisi qui aut edificent, aut  
 accendant Diana Templû. Mediam quandam  
 viam prudentioribus dictabit ingenuus Can-  
 dor; ut Philosophiam Peripateticam, nec sine  
 sale devorent, nec tanquàm delicatuli respuant  
 & fastidiant. Præterea quis nescit, latere  
 quàm plurima in locupletissimo scientiarum  
 sinu, quæ non tam contra, quàm præter vulgaria  
 placita dicta videantur: quæ si quis susceperit  
 propugnanda, nec omnimodò forsan ex præ-  
 scripto Aristotelis philosophabitur, nec ta-

men

ad Lectorem.

men ejus principijs apertio Marte adversabitur. Hac omnia tanquam peculium sibi vendicant Philosophia Libera; quam fortasse plurimi amant, pauci ambiunt; & quam nonnulli, in vulgarium scriptis dum frequenter querunt, rarissime inveniunt. En vobis (Ingenui Juvenes) ex instructissimo Phisologia Hordeatio, quasdam selectas vobis spicas & specimina; quae non tam Authoris famam ambiunt, quam faciem alijs ad ampliora praferant. Neq; hac profero, ut quicquam mihi arrogem, sed ut Doctiores excitem: non puerili quodam gloriola aucupio, quod prudentiores rideant; sed scientiam promovendi studio, quam omnes adpirentur. Scio in hisce Exercitationibus nostris Temeraria quadam excuisse, de quorum veritate non ita ambigenti mihi constitit: sunt in quibus anceps haeco: Nihil mihi itaratum & certum, quod doctiorum Examini non lubens subjiciam; ut si opus fuerit, aut verum confirment, aut falsum corrigant. Nec virum sane paeniteat ingenuum, dediscere quadam serò, quae forsitan, in Juventute, non ita rectè didicerit; nec Seni saniori cedit in opprobrium, quod videat Juvenem invenisse viam, quam provelitione frustra quasi verint: siquidem in decrepita hac Mundi aetate Pueri sumus; veluti Gigantum incumbentes humeris, eorum viribus

## Præfatio

ea consequuti mysteria, qua ipsi spe potius & conjecturâ, quam fructu, complecterentur. Nec unius certè hominis opus est Philosophia, nec seculi: nec magis Industria & Rationi suas debet delicias, quàm Fortuna & Tempori. Natura enim benigna Mater est: nec tamen ita Prodigia, ut in unum transfunderet seculum, quod omnium destinaret emolumento: neq; tamen ita parca, ut seculo cuiusvis suam invideret gloriam. Quippe Philosophia eodem, quo Natura circuitu mensuratur, nec suum prius expectat, quàm Mundus exitum: si quid ergò locupletius parturierit hac Ætas nostra, hoc non præstitit quia dignior aut diligentior, licet fortasse Doctior; Non quia Ingenio Prior, sed quòd Tempore posterior: siquidem ut Adolescens Mundi Ætas Ingenio, ita Senilis Experimentiâ armatior: ut potè qua Antiquorum placitis Recentiorum adiunxerit Experimenta; & Patrum Diligentie suam æquiparavit scientiam. Singulare est hoc Dei Optimi maximi beneficium, qui primis nostris Parentibus, Experimentorum Inopiam & Librorum, vite longevitate compensaret: vite verò nostre Brevitatem, librorum & experimentorum inopia: ut neq; illis, ad scientias Inveniendum, Tempus decisset; neq; his supellex ad Propagandum. Vigeat ergò Veterum Philosophia, ita ta-



ad Lectorem.

*men ut Recentiorum non dedignetur Cultum  
& Polituram: Floreat Recentiorum Fervor  
& Industria; ita tamen ut Antiquiorum pra-  
sidiis muniatur.*

----Alterius sic

*Altera poscat opem Res, & conjuret amicè.  
Valete, Ingenui Iuvenes, & gloria Dei, Eccle-  
siae Bono, Matris Academiae Fama, & Phi-  
losophiae studio, animosius invigilate.*

Profectus vestri studiosissimus

N. CARPENTARIUS.

---

---

ELENCHVS EXERCITATIO-  
num omnium in hoc Opere pro-  
positarum.

DECADIS PRIMÆ

- Exercit. 1 *Duo tantum Entium sunt genera.*  
2 *Locus est nihil.*  
3 *Omnia elementa sunt gravia.*  
4 *Omnia fiunt ex Nihilo.*  
5 *Non datur Motus à loco in locum.*  
6 *Sensus nullo modo errare potest.*  
7 *Ignis est Humidus.*  
8 *Motus cæli non est perfectè uniformis.*  
9 *Cometa non est Meteorum Ignitum.*  
10 *Nullum Agens Naturale est Vniforme.*

DECAD. SECUNDÆ

- 1 *Transsubstantiatio est Impossibilis.*  
2 *Intelligentia non sunt cælestium orbium Motrices.*  
3 *Logica Pugno, Rhetorica Palma, non rectè à Zenone comparatur.*  
4 *Motus gravium non est simpliciter Naturalis.*  
5 *Bruta Rationis quodammodo sunt capacia.*  
6 *Idem numero corpus post corruptionem restitui posse, non contradicit principiis Nature vel Philosophia.*

7 *Datur*

- 7 Datur Vacuum.
- 8 Numerus non est Quantitas.
- 9 Non datur vera compositio.
- 10 Intellectus Agens ad Intellectionem non est necessarius.

### DECADIS TERTIÆ

- 1 Materia non communicat Extensionem Formæ.
- 2 Superficies Aqua est Conica.
- 3 Contradictio est Oppositionum Minima.
- 4 Probabile est Terram circulariter esse Mobilem.
- 5 Quaternarius Causarum Numerus non rectè assignatur.
- 6 Variatio Pixidis Nautica oritur tantùm ex Magneticâ Telluris Naturâ.
- 7 Logica secundùm Triplicem Mentis operationem non rectè distribuitur.
- 8 Nullum Accidens propriè Inheret in Subiecto.
- 9 Unius Corporis Simplicis non est Unicus Simplex Motus.
- 10 Phenomena cœlestia, rejectis orbium Hypothesibus, sex tantùm circulis salvantur.

PHI.



PHILOSOPHIÆ  
LIBERÆ

Decas Prima.

EXERCITATIO I.

*Duo tantum entium sunt genera.*



PER QUOS progres-  
sa est Pythagoreo-  
rum opinio, nescio  
dicam an superstitio,  
ut nihil perfectum  
existimarent, nisi  
quod numero dena-  
rio clauderetur. Ita  
sibi plerumq; fingit in-  
tellectus perfectionem, quam in rebus non  
invenit, adeo, ut entia de novo creare dicatur  
potius quam intelligere. Hinc superstitioni  
adharefcens Aristoteles, seu (ut alii probabi-  
lius conjectant) Architas Tarentinus, entium  
singulo-

A

singulorum sylvam in decem disposuit & co-  
 crevit classes, quas Categorias nuncupant. At  
 decem hęc capita, si quis examini subjecerit  
 scholastico, compertiet omnia (duobus solum-  
 modo exceptis) adulterina, ut entium nomen  
 non merentur; quod ut dilucidius aperia-  
 mus, procedemus eo, quem prædicamenta se-  
 quuntur, ordine, & à Quantitate primùm au-  
 spicabimur; quàm demonstrabimus non ens  
 esse sed entis modum: primò itaq; Quantitas  
 non est distinctum genus à Substantiâ, prout  
 statuunt Peripatetici; quare deficiat necesse  
 est numerus iste Categoriarum denarius. Con-  
 sequentia est extra controversiæ aleam. As-  
 sumptionem ut confirmem, pro fundamento  
 sumo certissimò, *Entia non esse multiplicanda  
 sine necessitate*, cum à natura optimâ omnium  
 opifice nihil admittatur frustraneum: At nulla  
 cogit necessitas Quantitatem admittendam  
 esse, tanquam aliud distinctum à Substantia  
 Genus. Vel enim distinctionis hujus necessi-  
 tas haberet fundamentum in reali separatio-  
 ne quantitatis à substantia, quasi à se invicem  
 potuissent aliquando separari; vel saltem in  
 diversitate conceptuum realium. Primum  
 non est admittendum: Vel enim potuisset  
 separari à substantiâ creatâ, vel increatâ. Non  
 à creatâ, una enim vel à corporeâ vel incor-  
 poreâ.

Quantitas non est  
 ens.

Ratio. 1.

poreâ. Divisio est clarissima. Minor probatur ex eo, quod quantitatem corpoream sine corpore, vel corpus sine tali quâtitate, nemo unquam potuit invenire. Licet enim mutantur aliquando quantitatis termini, ut in rarefactione & condensatione corporum, eandem tamen numero manere quantitatem, nemo, quod sciam, inficiabitur. Imò nec divinâ quidē potestate manere posse corpus sine quantitate suâ, probabitur clarissimâ demonstratione. Nam corpus sic omni quantitate destitutum, vel esset extensum, vel non. Si non, esset in puncto, & spatium non occuparet. & sic non esset corpus. Siquidem omne corpus est in loco, nec intra puncti mathematici angustias potest contineri, quum omne punctum sit magnitudinis privatio, inter quod & spatium extensum nullum admitti potest medium. Si corpus destitutum suâ quantitate extendatur, non opus esset quantitate, & ita quâtitas esset frustranea, à quo abhorret natura. Consequentia clara est, quia quantitas nullam aliam ob causam in rebus admittitur, quàm ut corpori extensionem largiatur. Deinde quantitas non removetur ab incorporeâ substantiâ, seu ab Angelo, quicquid hîc statuunt *Peripatetici*. Ubicunq; enim est partium extensio, ibi est quantitas. At in Angelis est quædam partium

A 2

extensioꝝ

extensio: Ergo. Major est clara, quia juxta *Saniores Peripateticos* extensio est formalis ratio quantitatis, quæ nullo modo ab ipsa quantitate removetur. Minor confirmatur; vel enim Angeli sunt in puncto Mathematico semper, aut ad aliquod spatium extenduntur; quia (ut supra) inter hæc medium non admittitur. Angeli autem non semper coercentur in puncto. 1. Quia hoc incogitabile, ens aliquod esse ita minutum, ut sit in puncto, quod præter privationem magnitudinis nihil habet entis realis, sed tantum intentionali intellectus designatione intelligitur. 2. Quia Angeli possunt agere ad distantiam, & se diffundere juxta spatium, quod & experientia, & omnium penè Philosophorum consensus approbat. Non potest autem actio extendi ad spatium; si essentia sit in puncto contracta. Actio enim Angelorum comes est essentia. Tandem quod ad quantitatem *Dei* spectat, timent quidem *Peripatetici* quantitatem illi ascribere, licet reverâ ponunt. Quo enim sensu dicunt, Deum esse magnum, nisi ratione quantitatis? At magnitudinem intelligunt essentia (inquiunt) non quantitatis. Esto. At nos nihil aliud ponimus quantitatem, quàm essentia modum, quo extra punctum constituatur. Unde nihil absurdi sequi potest juxta nostram sententiam,



## EXERCITAT. I:

§

sententiā, si hanc Deo adscribamus. Causa enim, quare quantitatem à Deo removeant, est, quod in Deo non audeant admittere aliquod accidens, quod sit ab illo distinctum. Nam omnem compositionem à Deo removeant, quare & hanc, ita ut quantitas non nisi analogiā illi conveniat. Lubens assentior, qualem-cunq; hanc Dei quantitatem non nisi quadam analogiā & similitudine primo huic enti competere. At interim eodem modo convenit illi quantitas, quo substantia. Deus enim dicitur habere substantiam, non propriè, ut entia creata, sed essentiam quandam inscrutabilem, quam ob imbecillitatem nostri intellectus ad modum substantiæ creatæ concipimus. Quidni igitur eodem modo statuamus transcendentalem essentiæ divinæ amplitudinem, licet in se quovis ingenij lumine inaccessibilē, à nobis tamen ad modum quantitatis concipi? Siquidem non magis absurdum mihi videtur Deo quantitatis, quàm substantiæ creatæ conceptum affingere. Ex his liquidò constat, quantitatem suo modo perpetuum esse substantiæ comitem, ita ut illam à suo subjecto separare penitus sit impossibile. Ad alteram partem si dicant realem distinctionem substantiæ à quantitate radices agere in diversitate conceptuū formalium, dico ex hoc non

inferri diversitatem essentiarum. Probatum, quia in uno eodemq; possunt formari duo conceptus reales. Nam Deus potest concipi ut ens, ut bonum, ut verum, ut sapiens, ut vivens, tamen entitatem, bonitatem, veritatem, sapientiam, & vitam, tanquam diversa in Deo entia ponere, quis non verebitur? Nec hoc locum tantum habet in Deo, sed & in entibus creatis. Quis enim in homine corporeitatem à rationalitate, vel ab animalitate, tanquam rem distinguit, licet conceptus inter se sint diversi; siquidem diversitas conceptuum non arguit diversitatem rerum, sed modorum, seu formalitatum, juxta quas concipi, aut cogitari potest. Quare insufficiens hinc duci potest argumētum ad talem distinctionem adstruendum. Deinde si quantitas ponatur ens in substantia, tunc proculdubio hoc consilio ut possit illi extensionem partium largiri. At hoc non: Primò, quia satis esset ad substantiæ extensionem, ut quantitas ponatur modus materiæ, quæ ab ipsa quidem materia realiter non distinguitur. Secundò, quia constat evidenti ratione, substantiam esse per se extensam ante adventum quantitatis. Si enim extensa non foret, tunc ablata, vel separata, quomodo libet, quantitate, substantia non esset extensa, & sic esset in puncto mathematico. At hoc fieri non potest: Primò, quia (uti supra)

*Ratio. 2.*

## EXERCITAT. I.

7

ſupra) punctum hoc eſt imaginarium, neq; al-  
licujus ſubſtantia pot eſſe capax. Sequando  
ſequeretur, quum ad adventum quantitat  
extendatur, & locum occupet, mutationem  
neceſſario ſubeat localem, & ita localis eſſet  
motus, immoto interim corpore, quod abſur-  
dum. At dicent fortalle, quantitatem a cor-  
pore ne divina quidem providentia poſſe ſe-  
parari. Regero hoc fieri poſſe ex eorum ſequi  
principijs. Omnia enim entia diſtincta ſe in-  
vicem per ſe poſſunt exiſtere, vel ſeparatim.  
At ſubſtantia & quantitas juxta illorum plac-  
ta ſunt hujusmodi: Ergo. Major confirmatur,  
quia quodlibet ens aliquem divini concuſſus  
actum terminat. Quid igitur obſtat, quo mi-  
nus Deus concurrens in productione alienius  
ſubſtantia, ibi ſe ſiſtat, ne ulterius concurret,  
ut quantitas producat? Siquidem Deus eſt  
agens liberum, & producto uno, ceſſare po-  
teſt ab ulteriori concuſſu. Tertiò, tandem  
quomodo ſigri poteſt hæc communicatio,  
quã extenſio à quantitate in ſubſtantiam de-  
riveretur, non ita facile eſt explicatu. Vel enim  
eadem extenſio, quæ prius erat in quantitate,  
poſtea tranſit in ſubſtantiam, vel diverſa.  
Non eadem, quia ſic unum & idem eſſet in  
duobus ſubjectis, quod contra naturam acci-  
dentis & modorum omnium accidentalium.

Deinde, quum hæc extensio primo conve-  
niet quantitati, quantitas esset per se exten-  
sa. At quantitatem extensionem suam habere  
per substantiam, in quam recipitur; certum  
est, quum abstracta talem partium rationem  
non sibi vendicent. Non diversa, quia sic, se-  
cundum illorum dogma, duæ essent extensio-  
nes, alia quantitatis, alia verò in substantia à  
quantitate, & ita altera esset supervacanea,  
quam una tantum sufficeret. Quare melius  
esset, quam tantum ponere, eamq; substantia-  
lem, & quæ ab ipsa substantia nonre ipsa dif-  
ferret. Tertium prædicamentum Peripateti-  
cis est Relatio, quam voluit esse ens reale à ca-  
teris distinctum. At contra demonstrabimus  
hæc duo. 1. Non esse ens reale. 2. Non esse  
quidem entis modum. Quod sic ostendimus.

Relatio  
non est  
ens.

Ratio 1.

1. Omne ens simplici mentis apprehensione  
concepitur. At relatio non sic concepitur. Er-  
go non est ens. Major confirmatur, quia illud  
quod est in se simplex, minimèq; complexum  
non nisi simplici mentis apprehensione subji-  
citur; siquidem objectum potentie semper pro-  
portionatum esse debet. At ens est unum, sim-  
plex, minimèq; complexum. Minor confir-  
matur, quia relatio collativa mentis actui  
subjicitur. Quis enim intelligit conjugium,  
nisi maritum & uxorem intelligat? Nam

ubi

## EXERCITAT I

tibi duo concipiuntur, & duorum ad se mu-  
 tuo relatorum connexio, ibi complexo in-  
 tellectus actu intelligi necesse est. Si dicant,  
 præcisivam entis operatione abstrahi re-  
 lationem à suo fundamento & termino; di-  
 co hoc impossibile esse. 1. Quia nihil abstrahi-  
 tur à suâ essentiâ. At ratio essentialis relatio-  
 nis est, ut sit habitudo ad aliud. 2. Relatio sic  
 abstracta conciperetur vel ut ens, vel ut hoc  
 ens. Si ut ens, non attingunt propositum, quia  
 sub hac ratione non est relatio. Si dicant conc-  
 ipi ut relatio, recurrit superius argumētum,  
 relationem hoc modo concipi non omnino  
 posse. Secundò sic argumentari solent: Ordo  
 entis ad ens non est ens. Relatio autem est or-  
 do entis ad ens. Ergo ens dici non potest. V-  
 traque propositio est clarissima, nec ulteriori  
 indiget demonstratione. 3. Nullum ens pro-  
 ducitur momento temporis imperceptibili.  
 At hoc modo producit relatio, quia posses-  
 sor agri alicujus è lapide communi sola men-  
 tis cogitatione potest terminū conficere. Vel  
 ergo hæc productio est à lapide, vel ab intel-  
 lectu, vel ab aliquo alio. Non à lapide, quia  
 quum lapis sit ejusdem rationis cum reliquis  
 lapidibus, nihil est, quod magis hanc relatio-  
 nem produceret, quàm ceteri lapides, qui ta-  
 men non sunt termini. Si dicāt, ab intellectu,  
 dicimus,

2. Ratio.

3. Ratio.

4. Ratio.

dicimus, intellectum ex se nullum ens realē extra se posse producere. 4. Ulterius cōfirmatur: Omne ens producit per aliquam actionem. Relatio autem per aliquam actionem non fit. Minor est Aristotelis 5. Phys. cap. 2. textu 10. ubi dicit, ad relationem nullum esse motum. Major est extra controversiam. Quod verò nulla actio sit in productione relationis (præter auctoritatem *Aristotelis*) probatur, ut supra, quia nulla actio est in instanti. Secundo, quia nato Hectore, quæro, à quo producat illa paternitas in Priamo? Nulla assignari potest. Non enim Priamus producit in seipso, sic enim pater esse posset, antequam produceretur Hector; Nihil enim impediret. Non Hector quia non agit in Priamum. Sic cum litteram aliquam scribo in chartâ aliquâ, donec alteram scribam, nec erit similis, nec dissimilis; at postquam alteram scribam, erit quædam similitudo: Quæro, à quonam producit hæc similitudo. Non à manu, quia nullam exercuit actionem in priorem illam litteram, & eadem ratione nec à priori litterâ producit: non à posteriori, quia nondum fit. At dicent, opinor, hoc fieri per quandam nescio quam resultantiam. At omne ens ab aliquo agente fieri quis ausus est unquam negare? 5. Omne ens potest, divinâ saltem

5. Ratio.

virtute

## EXERCITAT. I.

11

tute, ab alio ente separari. Relatio vero ab alio ente sic separari non potest: Ergo. Major est clara, quia omne ens propriam suam essentiam constat, ac conservatur; externas vero conditiones omnes Deus virtute sua supplere potest. Assumptio etiam haud minus patebit: Relationem non esse ab alio ente sic separabilem, quia relationem cogitare separatam à fundamento ac termino, esset somnium cogitare sine somno. Nam totum illud, quod habet relatio, hoc revera habet à fundamento & termino. 6.

Accedit ultimum argumentum illud non con-

6. Ratio.

temnendum: Entia minime esse multiplicanda sine necessitate. At qui relationem inter entia numerat, is entia sine urgenti necessitate multiplicat: Satis enim Philosophiae facimus: si admittamus relationem esse aliquid entis, etiamsi non statuamus esse ens ipsum. Ex his liquet satis, relationem non esse ens. Superest jam, ut probemus, nec esse modum entis realem, quod sic expedimus: 1. Omnis modus entis aliquid enti superaddit. At relatio nihil enti superaddit: Ergo. Major patet, quia quando ens concipio sub modo aliquo, plus concipio, quam nudam entis rationem: nam alio atque alio modo intelligimus ens purum & abstractum, & modo quodam contractum. Minor etiam confirmatur, 1. quia est relatio

Relatio non est  
modus entis. Ratio  
1.

quæ-

quædam inter Patrem & Filium in SS. Trinitate. At talis relatio nihil superaddit, cum nulla in Deo admittatur cōpositio. 2. Decreta Dei in Deo æterno sunt relationes: At non possunt statui modi Reales ab ipsa distincti Dietates: sic enim essent vel necessaria vel contingentia: At non sunt necessaria, quia sic Deus non potuit non decernere: Necessarium enim statuitur quod aliter se habere non potest. Deus autem agens est liberrimum, qui potuit decernere, vel non decernere omnia quæ dõereverit. Deinde decreta ista non sunt cōtingentia, quia sic aliquid in Deo admitteretur Accidētarium præter essentiam, & sic Deus non esset ens simplicissimū, compositionis expers, quod theologis horrendū. Dicent hic forsā Relationem esse *Transcendentalem*, non verò *Prædicamentalem*: at ubi duo hîc entium genera constituunt, entia multiplicant sine necessitate, quod non in saniori Philosophia admittendū. Deinde relatio cum non sit ens (uti supra demonstravimus) nullum in prædicamēto locum invenit, & per consequens prædicamentalis sine injuriâ dici non potest. Tandem & eādē ratione unitatem, veritatem, & bonitātē, & omnia reliqua entis attributa sic distinguere in Transcendentalia, & Prædicamentalia, quod supervacaneū. 2. Si relatio aliquid  
enti



# EXERCITAT. I. 119

enti superaddat, tum ens mutabitur: At non mutatur: Ergo. Majoris consequentia in apri-  
co statuitur, quia novi additio fieri non potest  
sine mutatione illius subjecti, cui fit hæc ad-  
ditio. Minor etiam confirmatur, 1. quia nulla  
mutatio fieri potest ad relationem, juxta Phi-  
losophum. 2. Aristotele facto Platonis disci-  
pulo, quæro (ut supra) à quo mutaretur Pla-  
to? Non à seipso: non ab Aristotele; quia neu-  
ter agit; quare non mutatur. Accedit secunda *2. Ratio.*  
ratio: Omnis modus verus entis est aliquid  
per se reale. At verò relatio non est aliquid  
per se reale: Ergo. Major patet, quia modus  
hujusmodi est aliquid rei intrinsecum, & ab  
intellectu non dependet: sic enim esset secun-  
da notio, & ita Metaphysica parum differret à  
Logicâ. Minor constat, quia omnis compara-  
tio pendet ab intellectu: at omnis relatio est  
comparatio unius ad aliud. Si dicant, esse ali-  
quid reale, saltem ratione sui fundamenti; hoc  
nihil aliud est, quam dicere, ipsum fundamen-  
tum esse reale: Et hoc non satis est ad modum  
entis realē, 1. quia hic ex se aliquid enti rea-  
le superaddit. 2. Eadem etiam ratione notio-  
nes Logicæ essent modi reales, cum in reali  
fundamento radices agant. Ultimo modus re- *3. Ratio.*  
alis immediate fundatur in ente: At relatio  
nō in ente, seu re, sed potius in ipsa realitate,  
juxta

juxta saniores Scholasticos. Quare relinquitur, relationem nec esse ens, nec genuinum entis modum. Superest, ut exponamus tandē, quid sit Relatio? Dicimus Denominationem quandam esse extrinsecam. Nam cum intellectus recolligat Socratem à Sophronisca genitum esse, Patris ei denominationem statim imponit, ita ut relatio sit ens rationis: Fundamēti tamen respectu inter modos reales quodammodo numerari solet. Locus proximus exigere videtur, ut aliquid etiam dicamus de *Qualitate*, quam prædicamentum faciunt ordine quartum: Ejus quatuor species constituunt; quarum prima est *habitus & dispositio*: Secunda, *potentia vel impotentia*: Tertia, *paribilis qualitas & passio*: Quarta denique, *forma, vel figura*. At ego ex omnibus hisce quatuor speciebus duas tantum esse vera entia, argumentis haud levibus confirmabo. Primò itaque, quod potentia & impotentia non sint species distinctæ qualitatis ostēditur. Vel enim intelligent necesse est potentiā passivam, vel activā. At neutra constitui potest in hac specie, ergo. Major est apertissima. Assumptio stabilitur: Si enim primò passivam ponant potentiam, tum vel objectivam, vel subjectivā, i. potentia illa respiceret vel efficientem, vel formam: At objectiva hæc potentia non est in hac

Potentia  
& Impotentia non  
sunt species  
Qualitatis.

Ratio.

hac specie, 1. quia omnis qualitas est necessarió in aliquo subiecto, juxta Peripateticos. At objectiva potentia invenitur ibi, ubi nullum est subiectum actu existens: Nam mundus universus, antequam crearetur, erat in potētiâ objectivâ respectu Dei creatoris. Quæro hîc, utrum illa potentia objectiva erat in Deo, vel extra Deum? Non in Deo, quia nihil in Deo est passivum. Omnis enim potentia in Deo est activa. Si extra Deum, quæro iterum, in quo subiecto? Certum est, nullum corpus ante creationem mundi extitisse, in quo tanquam subiecto hæc potentia objectiva radices ageret: ubi autem nullum subiectum, ibi nulla qualitas. 2. Potentiæ objectivæ respondet existentia seu actus entitativus, juxta Scottistas, qui primò hanc vocem introduxerunt. At nulla qualitas præcedit actum entitativum seu existentiam rei, sed potius illam, tanquam priorem præsupponit: quare non omnino erit hæc potentia objectiva. Deinde potentia hæc passiva non est subiectiva, quia tunc esset vel ut materiæ ad suam formam substantialem, vel ut subiecti ad suam formam accidentalem, seu accidens. Non prius: Primò, quia potentia & actus, juxta Aristotelem, & saniores Philosophos, sunt semper in eodem genere, ita ut si actus aliquis sit substantia

stantia, etiam potentia ad illum actum ad substantiam reducetur; si actus sit accidens aliquod, etiam potentia ad illum actum erit accidens. At actus ille, ad quem dirigitur subjectiva materiae potentia, est forma substantialis, & altera pars compositi. Quare & potentia illa erit etiam substantia, & non qualitas. Cui suffragari sententiae etiam videtur ipse Aristoteles, ubi ait, potentiam hanc esse de essentia materiae, cui etiam subscribunt Thomistae (ut dicam) omnes qui hanc clausulam ad litteram exponunt, quicquid in adversum cum suis Averroistis oggerit Zabarella. 2. Actus & potentia non distinguuntur inter se, ut duo entia disparata & perfecta, sed potius modaliter, ut perfectum differt ab imperfecto: Vna enim & eadem res esse dicitur in potentia & actu: quatenus enim fieri potest haec vel illa res, esse dicitur in potentia; in actu vero cum fiat, & ad existentiam promoveatur: quare absurdissimum erit, haec duo tanquam duas res genere vel specie distinctas in duobus praedicamentis collocare; uti faciunt Peripatetici, qui potentiam in qualitate, actum vero in substantia constituunt. Ulterius hoc confirmare possemus è dictis & concessis Adversariorum: Actum enim & potentiam inter se opponi dicunt, sicut opponuntur habitus & pri-

privatio, ita ut potentia, tanquam imperfectior, includat semper privationem actus introducendi. Quamdiu enim res est in potentia, suo actu & perfectione destituitur, adveniente vero actu, potentia illa & privatio aboletur. At habitus & privatio secundum vulgares Logicos ad eandem semper Categoriā revocantur. Quare quum forma essentialis (ut supra diximus) in substantiæ genere constituitur, idem etiam genus assignabunt illius potentia, & per consequens talis potentia non erit qualitas, quod sic contendunt. Iam quod potentia subjectiva substantiæ respectu accidentis non sit qualitas, demonstrabitur. Vel enim talis potentia requireretur respectu omnis accidentis, vel alicujus tantum. Non respectu omnis. i. quia sic potentia ipsa hæc, quæ adversariis statuitur accidens, talem ante se potentiam in subjecto requireret, & sic processus daretur in infinitum, à quo natura abhorret. 2. Si omne, tum quantitas, priusquam in subjectum reciperetur illius, potentiam quandam postularet, tanquam necessariam. At quantitas juxta ipsos Peripateticos immediate & primario inhaeret substantiæ, & omnia reliqua accidentia in substantiam per quantitatem recipiuntur. Deinde non aliquod tantum accidens requireret talem potentiam,

Probia entia non sunt multiplicanda sine ne-  
 cessitate. Proinde si unum accidens possit in-  
 formare & informare substantiam sine tali  
 qualitate, quare non omne? Siquidem non  
 major videtur ratio in tuto, quam in altero.  
 Secunda ratio cur reliqua accidentia in sub-  
 stantiam recipiuntur (ut supra tetigimus) est  
 quantitas. Quare si potentia etiam sit tanquam  
 ratio receptiva in subjecto, vel erit potentia  
 habens quantitatem, vel frustranea: Prius contradi-  
 ctorium illorum thesibus. Secundum, naturæ totius  
 universi. Tercio, recurrit huc superior ratio:  
 Actus & potentia sunt semper in eodem ge-  
 nere. Proinde quum potentia hæc statuatur  
 in ordine ad varia accidentia & genere distin-  
 cta, non magis in qualitate inveniretur hæc  
 potentia, quam in ceteris prædicamentis, &  
 ita distinctam qualitatis speciem non consti-  
 tueret. Haud defunt ex altera parte rationes ad  
 illos convincendum, qui volunt, potentiam  
 activam esse qualitatis speciem. Vel enim in-  
 telligunt potentiam activam esse entis incre-  
 ati, vel creati. Non increati, quia in Deo talem  
 qualitatem non admittunt, quum sit ens sim-  
 plicissimum, omnis compositionis expers. Si  
 creati, tum vel incorporei, seu Angelorū, vel  
 corporei. At Angelum non habere potentias  
 agendi, tanquam qualitates ab ipsa essentiâ  
 distinctas,

distinctas, ostenditur. Nam primò hæ qualitates sic distinctæ concurrerent ad perfectionem Angelorum, vel ad imperfectionem. Divisio est clarissima, quia omnis entitas alteri enti adjuncta vel illud perficit, vel illius perfectionem minuit. Nullum enim hîc frustraneum est admittendum. Non concurret ad perfectionem, quia Deus qui agens est perfectissimû, sine talibus potentijs intermedijs operatur. Eo autem quodlibet perfectius est censendum, quo magis Deo appropinquat. Non ob imperfectionem admittendæ sunt tales potentia. 1. quia quælibet forma statuitur subiectum suum, in quo inest, perficere. 2. Quia formæ accidentales hoc modo, quæ agentia sunt imperfectiora, tales potentias requirerent. At non requirunt, sed immediate agunt. 2. Si talis admittatur distinctio inter potentias & essentias Angelorû, tum colligeretur vel à sensu, vel à ratione. Non à sensu, quia Angelus nullo modo est objectum sensus, multo minus potentia illæ in Angelorum essentiâ recondita. Non ab intellectu, quia intellectus potius contrarium colligit. Sancitum enim est illud in ore omnium principium, nihil admittendum esse in naturâ frustraneum. At frustraneum esset ponere tales potentias, ubi ipsa essentia sufficeret. Si enim negant, essentiâ per

se immediate talem operationem posse produ-  
cere; quæro, quomodo ipsas potentias pro-  
ducat. Vel enim oportet ut intermedias &  
priores potentias ponant, quarum interventu  
istæ producerentur; vel saltem concedant has  
potentias immediate produci. Si prius admit-  
tant, erit processus in infinitum. Si posterius,  
quidni & operationes ipsæ immediate ab  
intellectu fluant. Denique potentia activæ in  
corporeis ab ipsis agentibus non realiter di-  
stinguuntur. Si enim tales inessent potentia,  
ut qualitates distinctæ; essent vel tanquam  
conditiones & dispositiones agentium, vel  
tanquam causa aliqua agens intermedia. Si  
prius dicant, dicimus primò, non opus esse tali  
dispositione, quia ut diversa agentia essentiis  
inter se distinguuntur, sic ad diversas operati-  
ones per se determinari possunt sine præpara-  
tione intermedia. Nec magis videtur alienum  
à ratione, ponere essentiam ex se ordinari ad  
proprias suas operationes, quam ordinari ex  
se ad proprias suas potentias, quod ipsi asse-  
runt. Deinde talis potentia activæ præparans  
essentiam agentis ad agendum, prior est natu-  
râ quæ determinatur ad agendum, vel simul  
concurrit cum ea, vel sequitur. Non prior est,  
quia sic potentia prior esset animâ, effectus  
sua causâ, quod absurdum. Quod si dicant,  
non



non priorem esse simpliciter, sed quatenus est determinata ad agendum: Regerimus, hoc modo in se naturam esse indeterminatam, & quasi in æquilibrio ad omnes operationes, & sic natura truci vel lapidis vulgaris æquè determinaretur ad attractivam operationem ac magnetis. Quod absurdum. Natura enim cuiuslibet agentis naturalis est ex se ad unū definita, & proprii tantum motus causa & principium: Ab eodem verò res habent determinationem, à quo habent distinctionem: At ut actus distinguuntur à potentiis, sic potentia à naturā seu principio. Quare erit quædam distinctio & determinatio ante potentiam, saltem naturā, si non tempore. Si dicant simul cōcurrere cum naturā, dicimus, hoc principiis Philosophiæ contradicere. Substantia enim hoc modo non esset prior naturā suo accidente, quod tamen omnes uno ore profitentur. Si deniq; sequatur naturam determinatam, esset omnino supervacaneum. Eum enim ad finem potentias in agentibus hisce collocant, ut naturam seu essentiam disponant & determinent ad hanc vel illam operationē. Quod si igitur disponatur & determinetur ante adventum talis potentie frustra omnino poneretur. Ultimo, vel ex ipsa nominis notatione videtur colligi posse, has potentias esse mo-

dos tantum, & non entia propria, seu qualitates: Appellantur enim ipsis dispositiones & conditiones. At quid hoc aliud sonat, quàm modus rei, & certa preparatio? Ad alteram partē si se divertant, & dicant, potentias hāc esse causas agentes, rationes haud minus validæ contradicunt, quas partim supra tetigimus. Primò, hoc modo agens aliquod substantiale immediate ageret, quod isti negāt. Dum enim potentiam producit, aut immediate ageret, aut daretur processus potentiarum infinitus, quod absurdum. 2. Naturalis causa frustra ageret producendo potentias, cum æquā facilitate suas produceret operationes. Quibus accedunt rationes speciales haud paucæ, quas adducunt Scotistæ, vt confirment potentias animæ non realitèr distingui ab ipsā animā, quas brevitatis causā omittendas censeo. Nostri enim est instituti, generalia tantum tangere, & non ad specialia descendere. Ex his liquet, potentiam naturalem, quomodocumq; accipiat, non esse speciem qualitatis, sed potius modum quendam substantiæ additum: Impotentiam illam naturalem, quam simul in hāc specie constituunt, nugatotiā iudico, & nō dignam disceptatione. Vel enim per impotentiam intelligunt potentiæ privationem, vel minorem aliquam potentiam. Si  

prius

prius dicant, necesse est privationem esse inter species qualitatis annumerandam, quod verebuntur forsan affirmare. Si posterius, non opus est alijs argumentis; quàm supra attulimus contra potentiam naturalem. Explosam secundam hanc qualitatis specie, videamus, tandem, an quartam speciem è numero specierum profligemus. Curiosius hanc distinguunt scioli inter formam & figuram; alii enim volunt, illam viventis esse, hanc picti; alii illam naturalium, hanc artificialium. At minutias has non carpo, sed rideo. Quis enim nescit, hæc vocabula promiscuè ferè apud omnes auctores usurpari, talesq; distinctiunculas nihil habere fundamenti aut vestigii in textu Aristotelico, sed in Monachorum nugacium cerebello. Nec maiorum virium est illa altera, eorum qui dicunt, formam respicere colorem, figuram vero externa lineamenta, quasi vero color non esset patibilis qualitas in tertiâ specie qualitatis, externa vero illa delineatio (ut modo sumus demonstraturi) in alio genere iuxta Aristotelem collocaretur. His itaq; sepositis, sit prima hæc ratio. Si recte statuunt, figuram esse speciem qualitatis, tunc accipiunt nomen figuræ vel pro magnitudine quadam figuratâ & delineatâ materialiter, vel formaliter (ut loquuntur) pro delineatione &figuratione ipsa:

Vel deniq; concrete proutroq; simul coniuncto. Divisio est clarissima. Si priori modo intelligant, falluntur plurimum, quia sic esset quantitas, non qualitas, & sic in alio genere esset constituenda. Omnis enim magnitudo est quantitas. Si secundo accipiant sensu pro delineatione & conformitate partium illius magnitudinis non esset qualitas, sed relatio, quam Aristotelici genus entium distinctum faciunt. Hoc probatur duplici ratione: Primo ordo & habitudo entis ad aliud, non est propriè ens, sed solummodo relatio. At figura nihil est aliud, quàm talis habitudo. Maior propositio est clarissima ex definitione relationis apud Aristotelem in prædicamentis. Minor etiam in apico statuitur ex definitione figuræ laxiùs acceptæ, prout Aristotelici definiunt. Nam figurationi tria sunt præcipua, nimirum, actus figurantis, fundamentum, & ratio seu modus figurandi. Actus figurantis est acti. Fundamentum, est magnitudo. Ratio seu modus est nihil aliud, quàm ordo partium inter se, in quo revera ponitur ratio formalis figure; hæc verò præter respectû nihil aliud includit, ut qualitatis pomœria sine injuria invadere non possit. Secundo, quod immediate fundatur in quantitate, est tantum modus, & non verè ens. At hujus farinæ est figura. Major est clara,

clara, quia omne verum accidens genuinum  
 immediate radices agit in substantiâ. Minor  
 est in confesso apud omnes. Deniq; si figuram  
 accipiant pro ente consurgente ex magni-  
 tudine simul, & ipsa magnitudinis delineati-  
 one: Regerimus, figurâ hoc modo esse colle-  
 ctivum & sic nullum locum invenire in Ca-  
 tegoriâ secundum Peripateticos, siquidem ex  
 quantitate & relatione (ut ostendimus) tan-  
 quam partibus coalescat. Ex his concludimus,  
 figuram & formam esse conscribendas in Ca-  
 tegoriâ qualitatis, nec veram ex hisce posse  
 constitui speciem. Accedamus jam ad actio-  
 nem & passionem, ex quibus duo entium ge-  
 nera conficiunt; has non esse vera genera enti-  
 um, sic ostendimus. Vera genera, seu prædica-  
 menta, tanquã res diversæ inter se distinguun-  
 tur. & à reliquis prædicamentis: at actio &  
 passio nec inter se distinguuntur, nec à reliquis  
 generibus: Ergo. Major probatur, quia præ-  
 dicamenta distinguuntur à diversis essendi &  
 prædicandi modis. Quæ igitur diversis gau-  
 dent essendi & prædicandi modis, sunt entia  
 diversa & distincta. Quare diversa prædica-  
 menta erunt entia inter se distincta, tanquam  
 res inter se divisæ. Minor confirmatur utrâ-  
 que sui parte. Primò, quod actio & passio in-  
 ter se tanquam duæ diversæ res, non omnino  
 distin-

*Actio &  
 passio non  
 sunt vera  
 entia.  
 Ratio.*

distinguantur, argumentis haud levibus confirmabimus. Primò, si actio & passio tanquam duæ res à se invicem distinguantur, tum sunt vel ambæ relationes, vel ambæ entia absoluta, vel deniq; altera est relatio, altera est ens absolutum. Actio & passio non sunt duæ relationes: Primò, quia hoc modo non essent entia. Suprà enim probavimus, relationem nec esse ens, nec entis modum. Secundò, hoc posito, relationem esse ens, non essent tamen ens distinctum ab alijs prædicamentis, quia certum apud Aristotelem constituitur genus & Categoria Relationis. Si dicant esse relationes secundum dici, non secundum esse: Regerimus, in hoc non discriminari à substantiâ, quantitate, & qualitate, quia in his omnibus tales respectus inveniuntur, quæ tamen non dicuntur relationes. Quicquid enim respectum aliquem includit, non statim definienda est relatio. Si dicant cum Scotistis, esse relationes extrinsecas, non intrinsecas, haud minùs decipiuntur.

1. quia omnes relationes secundum esse, quales sunt ambæ hæc quas nominant, continentur in Categoriâ relationis.
2. Si tales relationes constituerent hæc duo prædicamenta, tum agens secundum relationem diceretur agere, & patiens secundum relationem diceretur pati.

At non verum est. Consequētia est clara, quia  
for-

formalis effectus agentis secundum quem agere dicimur est actio: & sic etiā patiens secundum passionem dicitur pati. Assumptio confirmatur, 1. quia agere est movere, & pati est moveri. At nullus motus est ad relationē, iuxta Aristotelem. 2. ex multis confirmatur instantiis. Vulnere & verberare est agere. Vulnerari verò & verberari, est pati. At qui vulnerat & verberat, plus confert patienti, quā relationem. Similiter qui vulneratur & verberatur, plus recipit in se, quā relationem. Quia relatio est, quā aliquid, aliud respiciat. At vulnus infligere, aut verbera, maius est quiddam, quam respicere vulneratum, aut verberatum, quippe relatio nec ex se, nec affectu suo sensum afficit: Vulneratio verò & verberatio sensum movent. 3. Relatio (uti supra probavimus) non distinguitur à suo fundamento: fundamentum verò actionis & passionis invenitur in aliis prædicamentis, ut in substantiā, quantitate, vel qualitate. Quare actio & passio hoc modo ad alia genera referrentur, & per consequens genera per se non constituerent. Ex his satis constat, actionem & passionem non esse duas relationes genere distinctas; Confirmabitur jam, non esse duo accidentia absoluta. Si enim ponerentur duo accidentia absoluta, tum vel ambo essent in agente

gente, vel ambo in patiente, vel alterum in agente, in patiente alterū. Non prius: quia sic quum actio & passio simul sint in eodem, agens esset & agens & patiens, & ita duas oppositas rationes simul sustineret. Consequentia est certissima, quia omne accidens inherens in aliquo subiecto, illud subiectum, in quo inhaeret, denominat. Non secundum, quia si actio & passio, tanquam duo accidentia absoluta inhaerent in patienti, patiens similiter esset & agens & patiens, & opposita pateretur, quod absurdum. Deinde actio sic in patienti esset vel tanquam fluens, vel tanquam fixa. Non ut fluens, quia sic processum ab agente denotaret, fluens enim magis dependet à principio à quo fluit, quam subiectum in quod recipitur. Quod verò imprimatur & inhaeret, fixum intelligitur. Si ut fixum aliquod ponatur, non ulterius erit actio, sed qualitas, & sic in alio genere constituitur, quod infra uberiùs explicabimus. Si deniq; alterum sit in agēte, in patiente alterum, tum vel actio erit in agente, passio in patiēte; vel vice versâ. At non prius: Primò, quia hoc contradicit Aristoteli, cui adherent, qui vult in Physicis motum seu actionem esse actum huius in hoc; Quod autem est ab aliquo, non erit in illo: Actio verò est ab agente: Quare non est in eo, si



si distincta res sit à passione. Secundo, vulneratio & verberatio sunt actiones. At quis dicet esse in vulnerante ac verberante? Siquidē actio, quū sit operatio quādam transitiva, supponit semper materiam & objectum, in quod recipitur, quod hīc aliud esse non potest, quā patiens. Tandem passionem inharere in agente, in patiente actionē, ita videtur absurdum, ut nemo asserere ausus fuerit, adeo ut nullius indigeat refutatione. Hucusq; ostendimus, actionem & passionem non esse duo entia absoluta: Quod alterum sit absolutum, alterum relatio, nemo, quod sciam, unquam asseruit. Ex his demonstratur, actionem & passionem non esse res inter se distinctas. Iam quod actio & passio non distinguantur à reliquis prædicamentis, tanquam distincta entia, uno vel altero ratiocinio confirmabimus. In primis sic: Motus non realiter distinguitur à suo termino. At actio & passio sunt motus quidam, termini verò in cæteris generibus inveniuntur. Major in aprico statuitur apud Thomistas omnes, & saniores Peripateticos, nec multum repugnant Scotistæ. Licet enim inter motum & terminum realem quādam ponant distinctionem, non tamen ita inter se distingui intelligunt, ac si duæ essent res inter se distinctæ, sed duæ realitates (uti solent loqui).

qui (adeo ut ad formalem distinctionem ple-  
riq; reducant. Duæ verò realitates talem di-  
stinctionem non faciunt, qualem requirunt  
duo genera disparata inter se, cuius formæ  
sunt prædicamenta. Minor confirmatur ut-  
trâq; sui parte. Prior ex eo elucescit, quod su-  
prâ diximus, actionem nimirum & passionem  
esse motum quendam: posterior etiam non  
minus est manifesta, quia motus omnes (ut la-  
xius loquar) sunt vel generatio & corruptio,  
vel augmentatio & diminutio, vel deniq; al-  
teratio, & localis mutatio. At termini genera-  
tionis & corruptionis sunt forma substantia-  
lis de genere substantiæ. Augmentationis &  
diminutionis terminus est quantitas. Altera-  
tionis qualitas: Localis deniq; mutationis est  
ubi, seu localis rei præsentia; adeo ut motus,  
iuxta vulgatos quosdam Philosophos, in qua-  
tuor Categoriis constitui videatur. Nec qua-  
rat hic adversarius in reticulis distinct. ungu-  
larum subterfugium; quia unum & idem ens  
in distinctis prædicamentis locum habere non  
debet, iuxta doctrinam *Aristotelicam*. Hoc  
enim pacto unum aliquod ens duo haberet  
genera disparata, & duas differentias opposi-  
tas, & ita diversas essentias; quod absurdissi-  
mum. Urget locus proximus, ut quatuor illa  
reliqua genera, nimirum *ubi, quando, situm,*  
&

& *habitu* è prædicamentorum seriè exterminemus; generatim omnia perstringemus. Vel hæc quatuor prædicamenta sunt entia, vel saltem modi entium. At non entia sunt. Primò enim, si entia essent, tum vel omnia essent absoluta, vel respectiva, vel mixta. Vel saltem alia absoluta sunt, alia verò mixta: Primò omnia hæc quatuor ultima prædicamenta non sunt absoluta, propter has rationes: Primò, omne ens absolutum vel aliquâ actione transmutativâ producitur, vel saltem ab alio ente iam producto emanat. Siquidem omne creatum causâ aliquâ gaudet. Hæc verò entia (prout appellant adversarii) actione aliquâ non producuntur. Omnis enim actio, quâ sit de genere motus (uti superius demonstratum est) erit vel generatio, vel corruptio, vel augmentatio, vel diminutio, vel alteratio, vel latio, seu localis mutatio. At hæc quatuor non sunt producta per generationem, aut corruptionem, quia sic essent substantiæ: Siquidem actiones istæ ad substantiam terminantur. Non producuntur per augmentationem, aut diminutionem; quia sic essent quantitates. Harum enim mutationû terminus est quantitas. Deinde non producuntur per alterationem; sic enim eâdem lege essent qualitates. Deniq; non per localem mutationem, qui sic  
omni

omnia in *ubi*, seu locali præsentia terminarē-  
 tur, & clauderentur. Quare non producuntur  
 aliquā actione transmutativā. Deinde omne  
 ens hoc modo productum, aliquem actum di-  
 vini concursus terminat, atq; claudit. At hæc  
 quatuor ultima genera aliquem divini con-  
 cursus actum non omnino terminant; Quod  
 sic probatur: Quæ produci possunt sine con-  
 currenti actu divino, ea talem concursum non  
 requirunt. Deis enim potest corpus aliquod  
 producere, deinde corpore semel producto,  
 ab ulteriori actione cessare, quum agens sit li-  
 berrimū. Quare vel corpus aliquod produci-  
 tur, quod neq; sit *ubi*, neq; quando, neq; situ-  
 atum: Vel saltem hæc produci possunt sine  
 concursu causæ primæ, quorum utrumq; ab-  
 surdissimum. Secundò, hæc non fiunt per e-  
 mationem; quia sic erit vel fluxu aliquo  
 continuo, vel resultantiā instantaneā. Non  
 fluxu aliquo continuo, quia eodem momento  
 quo corpus aliquod productum est, erit *ubi*,  
*quando*, & *situatum*, si non & aliquo sensu *ha-*  
*bituatum*. Nam aliàs non esset corpus. Negā-  
 tis enim corporis alicujus proprietatibus, &  
 ipsum corpus negari necesse est. Non resul-  
 tantiā quādam momentaneā. Nam primò hoc  
 modo non essent entia, quum nullum ens fiat  
 in instāti, sed in tempore, si intelligatur modo  
 naturali.

naturali. Secundò, resultantia hæc qualiscun-  
que vel ex uno fieret, vel ex pluribus. Exem-  
pli causâ (ut à notiori fiat disceptatio) *ubi*, si  
statuatur ens factum per resultantiam, tum  
resultaret vel ex corpore, vel ex loco, vel ex  
utroq; . Non ex corpore; quia sic nihil impedi-  
ret, quo minùs corpori conveniret sine loco.  
At hoc non; quia Vbi nihil est aliud, quàm  
præsentia rei localis, seu esse in loco. Quomo-  
do autem sine loco sit, non intelligo. Non re-  
sultat ex loco tantum, quia sic potuisset esse  
*ubi*, seu localis rei præsentia sine corpore:  
Quod absurdum. Deniq; non ex utroq; si-  
mul; quia sic esset relatio, vel absolutum.  
Non relatio; quia hoc contra thesim. Non  
ens absolutum; quia sic vel substantia, vel  
accidens. Non substantia. Sic enim esset in  
prædicamento substantiæ, & distinctum per  
se prædicamentum non constitueret. Si acci-  
dens, sequeretur, idem accidēs esse in duobus  
subjectis: Siquidem accidentia resultantia nō  
migrant extra subjecta, è quibus emanant.  
Quod de *ubi* dicimus, idem sit de cæteris ju-  
diciis. Deinde hæc quatuor prædicamenta  
non sunt relationes. Primò, quia sic ad præ-  
dicamentum relationis reducerentur. Frustrà  
enim fit per plura, quod per pauciora æquè  
commode fieri potuisset. Secundò, relatio (u-

ti superius demonstravimus) non est ens, nec-  
dum entis modus. Quare si statuant, quatuor  
hæc esse relationes, eodem opere & entia esse  
pernegabunt. In altero hujus disceptationis  
articulo non opus est ut immorer; quia pau-  
cissimi reperiuntur inter Philosophos, qui sta-  
tuunt; alia est absoluta; alia verò respectiva.  
Nec aliquam rationē video, quare unum po-  
tius quàm aliud absolutum faciant, vel respec-  
tivū. Quod verò singula hæc ex absoluta en-  
titate & relatione non sint composita, osten-  
ditur ex eorum principijs: siquidem nullum  
ens aggregatum admittunt in prædicamento-  
rum serie. At ens compositum ex ente abso-  
luto & respectivo (quod illis est ens) erit col-  
lectivum, & aggregatum. Quare locum sibi  
vindicare nō poterit inter illa genera. Deniq;  
si asserant, hæc esse modos; sibi ipsis, non nobis  
contradicunt: Sic enim non essent entia, neq;  
vera genera constituerent. Quare concludi-  
mus, duo tantum esse genera entium, nimirū  
substantiam & qualitatem, eamq; vel de pri-  
mā, vel de tertiā specie, quarum hæc Innata  
illa acquisita dici possit. Cætera omnia, tan-  
quam aliena, & non verè entia, amputanda  
censemus.

## DECAD. I.

## EXERCITATIO II.

*Locus est nihil.*

**L**oco & tempore quid universis in ore familiarius? Quid intellectui obscurius? Nec mirum est, tot sagacissimos Philosophos de genere loci dissentire, cum inter entia non reperiatur. Ego, ut multiplicia illa Philosophorum dogmata & dissidia proscribam, contendam locum esse Nihil; quod his rationibus convincam. Si locus sit aliquid, tum vel Spacium, vel Superficies, vel Centrū. Nullam enim opinionem alicujus momenti apud Philosophos reperio, quæ huc non revocetur. *Ratio. 1.*  
 Primò, spatium non esse, sic conficiam. Spatiū hoc, qualecūq; statuitur, est vel ens, vel non ens. Si non ens, habetur propositum, locum esse non ens, seu nihil. Si ens, tum vel intentionale, vel reale. Non intentionale. Primò, quia apud omnes statuitur affectio corporis naturalis: affectio autem hujusmodi est realis. Secundo, intentionale pendet ab intellectu. At locus, juxta vulgatam loquendi formulam usurpatus, non pendet ab intellectu, cum cor-

*Locus non est spatium.*

pora localiter moveri sine intellectus actione  
statuantur. Tertiò, locus est fixus & immobi-  
lis, locati capax, &c. quare in intellectu sedem  
suam ponere, sine absurdo non admittendum.  
Deinde si spatiu hoc esset reale, tum esset vel  
substantia, vel accidens. Divisio est necessaria  
in omni ente reali. Non est substantia; quia  
sic vel corporea, vel incorporea. Non corpo-  
rea. 1. Sic enim cum duo corpora essent in eo-  
dem, corporum esset penetratio; corpus enim  
esset in corpore, tanquam in suo loco. 2. Aut  
processus in infinitum concederetur, aut sal-  
tem corpus illud, reliqua omnia continens, lo-  
co destitueretur. Et sic omne corpus non esset  
in loco, quod Peripateticis absurdum. Tan-  
dem spatium non est substantia incorporea.  
Nam esset vel Deus, vel Angelus. Alias enim  
substantias incorporeas non agnoscimus. Spa-  
tium non est Deus. Primò, quia hoc absolum  
in Theologiâ Christianâ. Secundo, locus de-  
bet esse extensus, commensuratus, & propor-  
tionatus rei locatæ. At inter Deum & corpo-  
ra naturalia talis extensio, proportio, & com-  
mensuratio non est admittenda. Tertiò, lo-  
cus passive subijcitur corpori suo locato: At  
in Deo actu purissimo talis potentia non est  
admittenda. Spatium non est Angelus crea-  
tus Primò, quia hoc videtur absurdissimum  
loco



loco tribuere vitam & rationem. Secundò, locus, juxta Philosophum, est fixus & immobilis: Angeli vero sunt mobiles. Tertiò, aut unus & idem Angelus esset locus omnium corporum, aut singulis corporibus singuli adessent Angeli, vel saltem plures Angeli unum locum constituerent. Hæc autem omnia absurdissima, & quæ sapientum aures sine injuriâ pati non possunt. Deinde si spatium hoc statuatur accidens, sequeretur primò, accidens esse sine subjecto. Querimus enim, in quo tandè subjecto existat hoc accidens? vel in corpore locato, vel in corpore locante, seu circumscribente, vel in nullo? Non in corpore locato. Primò, quia corpus locatum est in spatio, seu loco; non locus, in corpore. Secundò, spatium hoc statuitur immobile: Ergo non existit in corpore, quod motui subicitur. Tertiò, omne corpus hoc modo secum circumgestaret suum locum & ita nullus esset motus localis. Non existit spatium in corpore continente: Primò, quia continens non reperitur in omni corpore locato, ut infra de cælo ultimo demonstrabimus. Secundò, si spatium hoc inhaereret in locante, seu ambiente corpore; Ergo poneretur in aliquo genere entium. At nemo unquam potuit hoc assignare: Si enim (ut quidam statuunt) ad quantitatem revocetur,

tum hæc quantitas corpori continenti inhærens, esset, vel eadem cum illius corporis quantitate, vel diversa: Si diversa, tum corporis ejusdem duæ essent quantitates, & ita quantitatis penetratio; quod absurdum. Non erit una & eadem quantitas, quia sic quantitas extenderet se extra suum proprium subjectum, ut alterius corporis sit capax. Deinde hæc quantitatis porrectio sine penetratione fieri non potest, cum alterius limites ingrediatur. Si dicant, spatium hoc in nullo subjecto inhærere. Regerimus primò, hoc Peripateticis absolum, cum omnia accidentia ex præscripto naturæ alicui subjecto inhæreant, aut saltem ab aliquo subjecto dependeant, quod hîc non assignatur. Secundò, assignare non possunt, sub quo entium genere constituitur, quod superius attulimus. Quare omnino sequitur, Philosophos illos, qui locum ponunt spatium esse, aut falli, aut saltem nostras partes confirmare: nimirum Locum esse Nihil. Sequitur jam ut eorum excutiamus sententiam, qui statuunt locum esse superficiem. Hæc *Aristotelis* est opinio. Quare refutatio ex principiis Peripateticis est petenda. Primò itaq; videamus, quæ sint cōditiones loci, juxta Philosophum: Deinde an istæ conditiones loco conveniant. Prima itaq; loci conditio est, *ut sit immobilis.*

Sic

*Conditio-  
nes loci  
Aristoteli-  
ci.*

Sic autem ratione adstruitur: Aut locus & locatum simul eodem motu moventur, aut quiescente corpore locus motu movetur, aut quiescente loco corpus movetur. Si locus & locatum simul eodem motu moverentur, tum localis esset motus sine loci mutatione; quod absurdum: Si quiescente corpore locato locus moveretur, tum localis esset mutatio sine motu corporis, seu corpore quiescente; quod etiam rationi absolum. Quare necessum est fieri, immoto loco corpus moveri, & ita locum esse immobilem. Secunda conditio est, ut locus sit *locato adequatus*. Si locus non esset æqualis locato, tum esset vel angustior, vel latior. Si angustior, tum locus non totum corpus contineret, sed corporis partem tantum. Si latior, tum aut idem locus plura locata in se contineret, aut saltē vacuum admitteretur; quorum utrumq; absurdum. Sit tertia conditio: Locum esse *separabilem à re locatā*. Hæc etiam stabilitur. Nisi enim locus esset separabilis, nulla esset loci mutatio, & ita motus tolleretur. Sit quarta hæc, loco competere *sex differentias: Suprà, Infrà, Dextrosum, Sinistrosum, Antè, Pone*. Quod ideo confirmatur, quia hæc omnia non dicuntur, nisi in ordine ad locum. Reliquæ loci conditiones aut loco in genere non conveniunt, sed certo loco; aut huc

revocantur. His jactis fundamentis, confirmabimus, locum non esse superficiem. Primo superficiem esse mobilem, & non fixum, ex eo liquet, quod corpus illud, cujus est superficies, est mobile. Quare & superficies. Nam moto corpore omne accidens in corpore existens movetur. Sic superficies aëris circa turrim existentis, quovis venti flatu movetur, ut immobilis dici nullo modo possit. Hanc difficultatem animadvertens Scotus, vocem obscurā excogitavit, ut locus Immobilis diceretur per *Æquivalentiam*, ut secedentibus loco superficiali partibus aliæ substituerentur. At quam straminea hæc sit subtilitas, seniores videant. Primo, quia juxta hanc Peripateticorum sententiam, locus dici potest mobilis, ubi tamen nulla admittitur partium *Æquivalentia*. Superficies enim concava dolij alienj vis vinum continentis, juxta illos erit ipsius locus; moto autem dolio, vinum movetur, & contra. Nulla autem hîc *Æquivalentia*. Quare hoc modo difficultas plenè non tollitur. Secundo, in hac *Æquivalentia* quaero, utrum eadē maneat superficies, vel diversa substituatur? Si maneat penitus eadem, non esset *æquivalentia*: hæc enim definitur partium superficiali omnium vel aliquarum secedentium per novas restitutio. Vbi autē partes omnes mutantur (ubi hic  
fixe

sepe accidit, aëre nimirum à turre violenter pulso in locum longè remotum ) quomodo eadem dici potest superficies? Si diversa sit superficies, diversus etiam erit locus, & ita locorum erit permutatio. Deinde, quiescente corpore locato, localis esset mutatio, quod absurdum. Tertiò, æquivalentia hæc superficiei intelligitur, vel absolute, respectu unionis partium, vel comparatè, respectu loci & spatij, in quo æquantur. Non sufficit prior modus, quia requirunt talem partium æquipollentiam, in quâ substituta illa superficies eodem situ locatum suum circumscribat. Quare comparatè respectu loci & situs intelligant necesse est: Si dicant, æquivalentiam hanc suam requirere localem etiam situm. Regero: omnis situs est respectus rei ad locum. Quare situs etiam iste partium superficiei in æquipollentia erit respectu loci. At cum superficies hæc ipsa æquivalens sit locus, aut loci erit locus, aut saltem ejusdem duplex erit locus, quorum utrumq; Peripateticis absurdissimū. Nam primò corporis ipsius locus erit ea æquivalens superficies. Deinde alius admittendus est locus, quem superficies hæc suo situ & partium ordinatione respiciat. Thomistæ, ut tutiori incedant viâ, dicunt, loci spectari duo, *Materiale* nimirū, & *Formale*. *Materiale* vo-

lunt

Iunt esse superficiem concavam illam corporis continentis: Formale verò distantiam, respectu centri & polorum mundi. Ratione materialis haud verentur fateri, locum esse mobilem, immobilem tamen ratione formalis esse confidenter asserunt, eo quod eadem semper distantia maneat respectu centri & polorum mundi. At neque hæc explicatio satisfacit. Nam quæro, utrum hæc quâvisque distantia sit aliquid, vel nihil: Si nihil, non potest ratio esse formalis *entis*, siquidem quod *nihil* est, non potest alicui rationem aut affectionem tribuere: proinde dicere, locum esse immobilē ratione hujus rationis (quam *nihil* est fatentur) nihil aliud est, quàm asserere, locū esse immobilem ratione nullius, & ita per consequens non esse immobilem. Si sit aliquid, tum vel *ens*, seu *res*, vel *modus*, seu *habitudo* in re fundata. Non est res, quia sic vel substantia, vel accidens. Non substantia: sic enim corpus vel spiritus. Corpus esse hanc distantiam, non dicet, quia sic cū distantia, & corpora interjecta simul sunt, duo corpora essent in eodem loco, & ita admitteretur corporum penetratio. Deinde non est spiritus, quia sic vel increatus, ut Deus, vel creatus, ut Angelus. At quàm absonum sit asserere, hæc ad loci constitutionē concurrere,

suprà

suprà ostendimus de spatio. Tandem non est  
accidens, quia ostendant necesse est, in quo-  
nam subiecto existat & inhæreat. Aut enim  
inhæreret in superficie illâ mobili, aut in cen-  
tro, & polis tantum, aut in interiectis corpo-  
ribus, aut in omnibus simul. Non inhæret in  
superficie illâ mobili. Primò, quia motâ su-  
perficie, moveretur etiam ea distantia. Omne  
enim accidens ad motum sui subiecti move-  
tur. Quare hoc modo locus non esset immo-  
bilis, quod asserunt. Secundò, Quod inhæret  
solummodo in superficie, non potest esse dis-  
tantia. Nam distantia omnis utrumque attingit  
extremum. Distantia ergo superficie i re-  
spectu polorum & centri pertingeret usque  
ad ipsos polos & centrum. Tertiò, distantia  
duorum est respectu loci, quare daretur alius  
locus, ratione cuius hæc distantia esset affig-  
nanda. 1. Non inhæret in centro & polis. Pri-  
mò, quia sic non attingeret illam superficiem  
continentem cuiusque corporis continentis.  
Distantia autem (ut supra) utrumque attingit  
extremum. 2. centrū & poli puncta sunt Ma-  
thematica, ideoque distantiam talē sustinere  
non possunt, licet magnitudinem talem clau-  
dunt & terminant. Tertiò, non est distantia  
hæc in interiectis corporibus. Primò, quia i-  
dem accidens non potest esse in diversis sub-  
iectis,

jectis. Interjecta autem corpora, quæ polis, centro, & superfici ei interjacent, sunt multa & diversa, ut omnia elementa, aliaq; ex his composita. Secundò, cum interjecta hæc corpora sunt mobilia, moveretur etiam distantia, & ita locus hoc modo non esset immobilis, quod contendunt. Tertiò, sublatis omnibus illis corporibus, quæ interjecta sunt, erit nihilominus hæc distantia vel in vacuo spatio: Quare in corporibus subjectis tanquam accidens aliquod inhxere nullo modo potest. Ultimò non in omnibus simul. Primò, quia sic in multis esset subjectis, cum tamen idem sit accidens. Secundò, quod est in omnibus, est in aliquibus. At suprà demonstravimus, in particularibus illis non existere: quare quum nullum inveniri possit subjectum, in quo inhxreat, relinquitur non esse accidens. Tandem non est modus, seu habitudo in re fundata, quia sic motis & mutatis corporibus mutaretur; siquidem modus dependet à rebus, cujus est modus, ita per consequens non erit immobilis; superficies enim (uti suprà demonstratū) quovis flatu aëris est motui obnoxia. Deinde recurreret difficultas superior, in quonam subjecto existeret: modus enim se habet tanquam transcendentalis rei affectio. Quare neque sufficit hæc Thomistarum defensio, quæ  
vult,



Vult, locum immobilem esse secundum suum formale. Neq; multum abhorret illorum opinio ab illis, qui locum volunt esse spatium: siquidē distantia illa, quam formale loci constituunt, ad spatium & intervallum Platoniorum sine difficultate reducitur. Deficit ergo in superficie prima loci Aristotelici conditio. Secunda conditio similiter deficit, locum nimirum esse locato *adæquatum*: quod sic demonstratur; Quod duplici tantum pollet dimensione, non potest illud æquare, quod triplicis est dimensionis. At superficies duplici gaudet dimensione, locatum verò triplici: Ergo. Major est clarissima, quia ea, quæ se invicem æquant, earundem sunt dimensionum. Minor etiam confirmatur ex concessis & postulatis adversariorum. Superficies enim solum longitudinem & latitudinem complectitur. Corpus verò locatum longitudinem, latitudinem, & profunditatem, seu crassitiem. Respondent hinc adversarij, locum locato æqualem esse, non ratione dimensionū, sed capacitatis & continentię. At arundinea est hæc distinctio; quod sic probatur: Quicquid est æquale secundum capacitatem, est etiam æquale quoad dimensionem & magnitudinē. At superficies & corpus locatum æqualia esse non possunt secundum magnitudinem, juxta

eos: Ergo. Maior probatur, quia capacitas &  
 continentia non oritur, nisi ex ejus magnitu-  
 dine. Nihil itaq; aliud capacitate æquare po-  
 test, quod non magnitudine & quantitatis di-  
 mensione illi est æquale: quod si aliud aliud  
 continere possit, quod magnitudine ei non sit  
 æquale, tum vel ei coextenderetur, vel non: si  
 coextenderetur alterius dimensioni, tunc æ-  
 qualium esset dimensionum, aliàs enim fieri  
 non potest, ut coextenderetur. Si non coex-  
 tendatur alterius dimensioni, tum vel maius  
 esset, vel minus. Si maius, plus contineret, quàm  
 locatum suum, quod contra illos, qui dicunt,  
 locum esse æqualem suo locato. Si minus, mi-  
 nus etiam contineret. Quod enim est minus,  
 non potest illud, quod maius est, continere.  
 2. Si locus ratione capacitatis æqualis esset lo-  
 cato, tum æquales loci æqualia corpora loca-  
 ta continerent. At æquales loci æqualia cor-  
 pora locata non continent: Ergo. Maior fa-  
 cile demonstratur ex illo axioma: Quæ con-  
 veniunt in aliquo tertio, inter se conveniunt:  
 seu illo altero; Quæ æqualibus sunt æqualia,  
 inter se sunt æqualia. Minor confirmatur è  
 principiis eorum, qui volunt, locum esse su-  
 perficiem, præsertim ipsius Aristotelis, qui  
 voluit locum esse terminum. Sic se habet locus  
 ad rem locatam, ut terminus ad rem termina-  
 tam.

tam. At æquales termini non semper continent æqualia terminata: siquidē juxta principia Geometrica, ex *Isoperimetris* illud est majus, quod *Ordinatus*; ut circulus major est hoc modo quadrato, quadratum triangulo, & quò figura plura habet latera, eò semper est majus, factâ inter eas magnitudines comparatione, quæ eodem seu æquali termino comprehenduntur. Hanc difficultatem, alii animadvertentes, paulo subtiliùs exponunt locum esse locato æqualem per modum applicationis & congruentiæ. At hîc vel idem intelligunt cum præcedenti sectâ, aut nihil dicunt. Quod sic demonstratur: Locus secundum applicationē partium dicendus est tantum illi æqualis, cui applicatur. At verò toti locato non applicatur. Ergo toti locato hoc modo non est æqualis. Major est clarissima. Alium enim modum quo intelligant illam æqualitatem applicationis non percipio, nisi quod partes loci partibus locati ita applicentur, ut totum comprehendant. Minor confirmatur: Omnis partium applicatio fit per contactum. At locus non tangit totum locatum. Ergo toti non omnino applicatur. Major iterum patet sine difficultate, quia tunc dicetur applicatio, cum partes utriusque sunt simul, hoc autem non est aliud, quam

quàm contactus. Minor demonstratur: Primo, quia contactus omnis est in termino. Nullus itaque erit in solido, & per consequens solidum secundum omnes suas dimensiones tangere non potest locum. Secundò, superficies duas tantum habet dimensiones. Quare solidum, quale est corpus locatum, unde quaque tangere, & se illi applicare non potest (quod ipsi asserunt) si modo in solido contactus admitteretur. Quocirca neque hoc modo locus æqualis erit locato, si statuatur superficies. Tertia etiam *conditio* loci apud Aristotelem hand magis quadrat superficiiei. Asserimus enim locum (si modo statuatur superficies) esse aliquando *Inseparabilem* à suo locato, quod sic adstruitur: Locus sphæræ ultimæ cœlestis est *Inseparabilis*. Ergo omnis locus à suo locato non est *separabilis*, aut saltem non est superficies. Antecedens probatur, si locus ultimâ sphæram comprehendens sit à sphærà ipsâ separabilis, tum vel Annihilatione, vel Cessione locali. Non Annihilatione. Primo, quia sic ultima sphæra pro tempore moveretur sine loco: Omne autê corpus est in loco; quum locus sit propria corporis affectio, juxta Aristotelem. Secundò, sublato loco seu superficie motus etiam localis tolleretur. At motus localis non tollitur: Ergo, Consequen-

*Tertia  
conditio  
deficit in  
superficie.*

tia majoris patet, quia motus localis sine loco esse non potest, juxta illorum principia. Omnis enim motus supponit terminum. Minor probatur, quia motus ille localis est perfectio cœlorum. Quare à cœlis nullo modo auferri potest sine ruinâ universi. Essentialis enim & naturalis rei perfectio nullo modo est separabilis. 3. Annihilatâ superficie illâ, quæ cœlum ultimum comprehendit, cœlum illud ultimum esset vel alicubi, vel nullibi. At neutrum dici potest: Ergo. Consequentia est clara, quia omne ens finitū & creatum erit vel alicubi, vel nullibi. Minor probatur: Si sit alicubi, esset in loco quodam, quod isti negant, supponunt enim locū esse annihilatū. Si nullibi sit, nihil erit. Recentiores, ut huic difficultati satisfaciant, duplicem locum adinvenērunt: Internum & externum. Hunc superficiem esse dicunt, illum verò minimè. Statuunt ergo cœlum esse in loco interno, non externo. At quærimus quid sit locus ille internus? Vel enim erit spatiū, ut Socratici Philosophi volunt, aut, ut recentiores, interna partiū rei circumscriptio. Si prius esse velint, recurrūt in argumenta, quæ adduximus in primam opinionē quā probavimus, spatium esse Nihil. Si posterius, dicimus primò, circumscriptionē esse externam; quin circumscri-

D

bens

bens omne sit terminus aliud comprehen-  
dens: quare aut valde improprie loquuntur,  
aut nulla datur talis interna circumscriptio.  
Secundo, interna hæc circumscriptio nullo  
modo est separabilis à re, cujus est circum-  
scriptio. Conditiones itaq; loci requisitas a-  
pud *Aristotelē* non habet. Tercio, locis affig-  
nandus est coelo ultimo in ordine ad motū lo-  
calem. Motui autem locali non sufficiens est  
locus iste internus; quia hoc modo à loco in  
locū moveri non omnino potest. Ex his omni-  
bus liquet, locum illum primi mobilis, modo  
statuatur superficies, non esse separabilem  
per annihilationem, si talis admittatur. Dein-  
de quod cessione locali non est separabilis, li-  
quet primo, quia omnis cessio localis est rati-  
one loci, quæ habet. Quare si superficies loco  
suo cederet, haberet locum, & ita loci esset lo-  
cus, contra *Aristotelis* sententiam. Secundo, si  
daretur cessio superficiiei, ut loco suo pelleret-  
ur, tunc aut aliud corpus substitueretur, aut  
saltem vacuū relinqueretur. Vacuū non re-  
linquitur quia hoc absonum in scholâ Peripa-  
tetica. Aliud corpus aut superficies non substi-  
tuitur. Primo, quia, juxta Philosophum, nihil  
est corporeum extra coelum ultimum. Secun-  
dò, illud corpus aut naturale erit, aut superna-  
turale. Non naturale, quia omnium corporum  
naturalium

naturalium limes ultimus est coelum illud ultimum; Si supernaturale, sequeretur, corporis naturalis locum non esse naturalem, sed supernaturalem, & ita locum non esse locato proportionatum; quod absurdum. Secundum suppetit argumentum pro loci inseparabilitate. Locus, ubi dicitur separabilis à suo locato, aut intelligatur, quod corpus destitui potest omni loco, aut quod relicto priori loco, alium ingreditur. Non prius; quia hoc plerisque Peripateticis absurdissimum, ut corpus à liquo omni loco destituere. Non posterius, quia, ut sequente quadam exercitatione demonstrabimus, nullum corpus à loco in locum diversum transit, sed eundem semper locum occupat, quem antea occupaverat. Tandem si locus sit separabilis à locato, tunc vel absolute quatenus est superficies circumscribentis, vel comparate, quatenus est locus. Si prius affirmant, nihil dicunt; sic enim non esset propria loci conditio, sed corporis circumscribentis, & per accidens ejus superficiei. Propria autem loci conditio loco, in quantum locus est, debet comperere. Non posterius, quia superficies hæc, quæ à corpore suo locato separatur, non est ulterius locus. Non dicendum est igitur, locum hoc sensu esse separabilem. Quod ulterius explicatur. Separatio concipiē-

4. Condi-  
tio deficit.

da est vel cessione corporis à superficie, aut  
cessione superfici ei à corpore. Non prius, quia  
superficies illa relictæ, non ulterius dicenda  
est locus huius corporis, quod jam novum lo-  
cum invasit. Non posterius; quia locus (ut  
vult prima conditio Peripatetica) statuen-  
dus est immobilis & fixus. Quarta tandem condi-  
tio deficit; superfici ei nimirum competere  
sex illas loci differentias. Vel enim superfici  
ei absolute conveniunt, vel comparate. Non  
absolute; quia superficies absolute accepta,  
non est locus. Hæ autem loci sunt differentie.  
Quod autem superfici ei absolute convenit, ei  
vel à locato omni separato per se competit. si  
comparate, tunc vel respectu cæli, vel ratio-  
ne nostri. Non ratione cæli. Quum enim cæli  
undeque sit sui simile, & rotundum; istæ  
differentie, ut sunt *suprà, infra, dextrorsum, si-  
nistorsum, ante, pone*, saltem omnes admitti  
non possunt. Nulla enim ratio assignari potest  
quare Orientale mundi latus diceretur dex-  
trum potius, quam Occidentale, aut Septen-  
trionale, quam Meridionale; quum respectu  
nostri mutari possint istæ loci differentie.  
Quod si dicant, respectu nostri competere:  
Regerimus, nihil hîc majus pro superficie di-  
ci, quam si locum statuamus spatium, aut aliud  
quodvis. Ex his clarissime evincitur, non ita  
raturum



ratum esse, locum esse superficiem, quin ex ipsis postulatis Aristotelicis refutentur, aut saltem labefactentur. Non desunt tamen rationes aliunde petita, quibus locum non esse superficiem evincamus. Si enim primo locus esset superficies, tum mutato loco sola mutaretur superficies. At mutato loco non sola mutatur superficies: Ergo. Major est extra controversiam. Minor confirmatur; Si mutato loco sola mutaretur superficies, tum nulla distantia transiri potuisset. At distantia transi-  
tur: Ergo. Consequentia est iterum clara, quia superficies sunt secundum profunditatem individua. Quomodo cumque igitur accumulentur superficies superficiebus, locus non augebitur, aut continuabitur, haud secus ac linea, quae ex multis punctis inter se concurrentibus non constituitur. Quod sic ultèrnis declaratur: Locatum omne, ubi mutat suum locum, aut eandem servat superficiem, aut diversam. Si eandem; eundem etiam servabit locum, & ita localis erit mutatio sine locimutatione, quod est contra thesin, & contradictionem implicat. Si diversam, tum vel illae duae superficies immediate concurrunt, aut aliud erit interjectum. Non prius, quia hoc pugnat cum principiis geometricis, ut duae superficies immediate concurrant, Non posterius; quia sic

cum corpus esset in illo spatio intersecto esset sine superficie, & ita sine loco; quod similiter absurdum. At dicent fortassis, eandem esse superficiem, sed continuatam & productam. Regerimus; superficiem continuatam nihil aliud esse, quam solidum. Sicut enim ex fluxu puncti linea, ex fluxu lineæ superficies, ita ex fluxu superficiei creatur solidum. Quare dum locum statuerent esse superficiem continuatam, nihil aliud reverâ dicerent, quam locum esse solidum, & ita principiis suis aperte contradicunt. Solidum enim excedit superficiem. Quare hoc modo, si seipsos propriè intelligant, concurrunt cum eorū secta, qui tuentur locum esse spatium: quorū dogma superius examini subjecimus. Huc accedit, quod superius tetigimus de loco sphaeræ ultimæ. Vel enim largiamur necesse est locum non esse superficiem, vel saltē cælum illud omni destitui loco. Quis autem somniabit unquam, singula alia corpora gaudere suis locis, hoc autem corporum pulcherrimum loco suo carere? Superest ultimò, ut eorum excutiamus sententiam, qui locum volunt esse centrum. Distinguant enim inter locum situantem & continentem; illum volunt esse centrū; hunc superficiem. At centrū nullo modo dici posse locum, facile demonstrabitur. Si enim locus  
sit

fit centrum, tum vel centrum absolutè sumptum, vel comparatè. respectu totius universi. Si centrum absolutè acceptum; vel Mathematicum, vel Physicum. Non prius; quia hoc non est aliud, quam punctum aliquod imaginarium, & quasi magnitudinis privatio. At quis dicet, totum cælum esse in puncto imaginario, tanquam in suo loco? Non punctum physicum, quia hoc, juxta Peripateticos, est magnitudo quædam minutula & insensibilis. At magnitudo non potest esse locus sine quantitatis penetratione. Siquidem corpus illud quod est in loco, etiam suâ gaudet magnitudine. Deinde centrū comparatè acceptum, non potest esse locus. Primò, quia locus universaliter definitur, receptaculum rei locatæ, punctum verò quomodocumq; usurpatum, receptaculum esse rei locatæ non potest. Siquidem locatum omne est in loco. Secundò, ostensum est suprâ, talem, qualemcumq; habitudinem inter centrum, polos, & locatum esse merum imaginarium, & entis nomine indignum. Tertiò, eâdem ratione poli, & omne aliud punctum fixum loci dici possint, quum eodem penitus modo locatū respiciant: Quod absurdum. Quare centrum nullo modo dici potest locus corporum naturalium. Superest tandem, ut principia quædam constituamus,

quibus loci rationem aperiamus. Sic itaque primum: *Locus est extra rem locatam.* Quod sic stabilitur: Omnis locus aut est intra locatum, aut extra. Non intra: Ergo extra. Divisio majoris est ex immediatè oppositis. Minor confirmatur, quia si esset intra locatum, aut accidens esset, aut essentia. Non accidens; quia sic cum locato moveretur. At ita omnis localis motus tolleretur, aut saltem motus esset sine loci mutatione; quod absurdum. Non essentia. 1. Quia idem sequeretur locatum secum circūgestare suum locum. 2. Omne locatum dicitur esse in suo loco. At nihil dicitur esse in suâ essentiâ. Tertiò, hoc idem è postulatis Aristotelicis in 4. Physicorum abundè confirmatur. Sit secundum: *Locus est Capax sui locati*; quod sic demonstratur: Quod locatum in se recipit, est ejusdē capax. At locus locatum in se recipit: Ergo. Major & minor sunt notissimæ, ut ampliori non indigeant probatione. Sit tertium principium: *Locus toti rei locatæ quantitate & dimensionibus suis singulis coextenditur.* Confirmatur in præcedētibus, si enim locatæ quantitati non æquaretur, ejusdem non esset capax. Minus enim majus non comprehendit. Sit hoc quartum etiam Aristotelicum: *Locus respectu locati est immobilis*: hoc etiam supra abundè confirma-

confirmatum. Has omnes conditiones, saltem  
conjunctim sumptas, spatio imaginario soli  
competere, certissimâ demonstratione confir-  
mabimus. Quid enim *externum, capax corpo-  
ris, coextensum ejus quantitati, & immobile* som-  
nari potest, præter intervallum illud ima-  
ginarium, in quo corpora omnia consistere in-  
telliguntur? Nam primò si quidvis aliud dica-  
tur *externum* respectu corporis, quereretur ite-  
rum locus, respectu cujus dici potest exter-  
num: siquidem *internum & externum*, non  
dicuntur, nisi respectu loci. Quare aut in locis  
infinitis daretur processus, aut saltem illud  
*externum* non esset absolute *externum*. Pro-  
inde non alii quadrare videtur hæc conditio,  
quàm spatio illi imaginario: hoc enim extra  
omne corpus absolute constituitur. Secundo,  
non aliud præter hoc spatium nostrum corporis  
*capax* esse potest; siquidem omne illud quod  
*capax* est alterius, debet spoliari prius eo, cu-  
jus est *capax*. At spatium spoliatur omni eo ex se  
cuius est *capax*, nimirum omni corpore loca-  
to. Ens autem omne, cum sui plenum sit, alte-  
rius *capax* esse non potest. Quod si dicant ces-  
sione quadã alia in se capere posse, dico in se  
proprie non recipere, sed alteri hoc modo ce-  
dere, ut in spatium illud aliud admittatur, spati-  
um enim se habet, ac materia illa prima formis  
subiecta

subiecta, in qua aliâ cedente formâ, nova substituatur. Tertiò, quid aliud potest singulis *dimensionibus locati respondere*, excepto spatio: Nam si reale aut corporeum admitteretur, quod singulis corporis locati dimensionibus æquaretur, manifesta esset quantitatis penetratio. Quare requiratur necesse est imaginarium quoddam toti corporis quantitati adæquatum. Ultimo hoc tantum spatium est, quod *immobile* dici potest solummodo. Omnia enim reliqua, tam substantiæ, quam accidentia, tam corpora, quam spiritus totum subjiuntur, excepto Deo Optimo Maximo, quem locum esse hæreticum esset existimare. At obijciat aliquis, spatium hoc esse *nihil*, & ita per consequens non esse locum: Consequentiam negamus, nec aliud contendimus, quam locum esse nihil. Hoc ut plenius aperiam, dico, nihil, seu non ens duplex esse: Aliud commune, aliud restrictum. Commune, quod enti omni in genere opponitur. Restrictum, quod certo alicui enti restringitur & contrahitur. Non dicimus hîc nihil in genere, seu commune, esse locum, sed illud, quod specialiter corporeæ dimensionî proportionatur. Quod licet in se formaliter sit nihil, tamen per habitudinem, & ordinem, quem dicit ad corpus locatum, à quo occupatur, imaginariû quoddam

# EXERCITAT. III. 59

quoddam ens dici potest. Quod si dicant, nihil non posse esse fundamentum alicujus: Dicimus fundamentum rei primarium esse *rem* secundarium & mediatum esse *non ens*. Sicuti igitur locus seu localis hæc ratio fundamentum habet in spatio: sic spatium in opposito corpore, quod in se recipit. Differt autem hoc ens ab ente privativo; quod hoc subjectum supponit, in quo existat; illud vero minimè. Supponit tamen locatum, tanquam illud, cujus præsentia adimpleatur. Si quis autem quærat, in quo existat hæc aptitudo adimplendi, dicimus in corpore locato, à quo occupatur.

## DECAD. I.

### EXERCITATIO III.

*Omnia elementa sunt gravia.*

**A**RISTOTELIS I. de Cælo, triplicem statuit esse motum simplicem: Alium à medio, qualis est motus aeris & ignis, quæ levia esse arbitrantur: Alium ad medium, qualis est aquæ & terræ, quæ gravitate sua ad centrum propendunt: Alium denique circa medium, qualis est cœli motus circa terram tanquam

quam centrum circumrotantis. Quæ hodiè opinio ita est communis, ut nemini liceat sine præiudicio contradicere: *Æ* quis tamen iudicibus non ita firmum videbitur hoc fundamentum, quin faciliè concutiat. De aquæ & terræ gravitate, non audio inter Philosophos controversiam. Superest ut aërem & ignem (si quod tale detur omnino elementum) suæ naturæ genio restituamus. Inprimis quod aër suâ donatur gravitate, multæ rationes demonstrant. Primò itaq; effodiat aliquis puteum aut fossam in terrâ; quero hîc, utrum aër descendat ad puteum implendum, an vacuû in illo supererit? Non posterius dicent, quia in scholâ Peripateticâ omnino vacuum proscribunt, nec alibi in naturâ admittunt. Si prius asserant, quero rursus; Vtrum motus hic sit naturalis an violentus? Si naturalē concedant, manus dant in nostras partes, & statuunt aëra naturaliter descendere, & ex consequenti esse gravem: nec iuxta Aristotelem plures aëri motus possunt tribuere; quia unius corporis simplicis unicus est simplex motus: multo minus una. Forma naturalis esset duorum motuum oppositorum causa; quales motus sunt ascensus & descensus: Deinde non violentus erit hic motus, quia sic ab externo esset principio: At externum hoc principium non omnino



nino datur. Major est Aristotelis propositio. Minor autem confirmatur. Si enim externum aliquod principium daretur, esset vel reliquus aër, vel terra, vel vacuum, vel saltem vacui evitatio. Non reliquus aër. Primo, quia Reliqua pars aëris, nisi prius pulsa, aërem nō omnino pelleret. Secundo, pellens & pulsū sunt semper inter se discreta & disjuncta, & non continua: At hic aër pellens cum pulso nūm esset continuum. Tertio, si aëris particula reliquum pelleret, tunc esset validius. At nulla hujus ratio extare possit. Quarto, nec aër pelleret, nec pelleretur tanto impetu contra naturam, cūq̃ sursum naturā ferri vehementius statuitur. Deinde non movetur deorsum a terra cavitāte. Primo, quia terra ab aëre separata statuitur, nec in distans sine contactu, aut aliquā interjectā virtute hanc vim exercet. Secundo, quia talis attractio in terra non esset, cum contraria (qualia Peripateticis sunt gravia & levia) sibi mutuo naturā adversantur. Tertio, si terra aëris particulam attraheret, tunc aër esset aptus, qui a terrā attraheretur. At non aptus est, qui attrahatur. Primo, quia juxta Peripateticos adversā qualitate, nimirum levitate, donatur, ut potius disponatur ad ascensum, quam ad descensum. Secundo, talem inter aëra & terram sympathiam nemo adhuc

adhuc expertus est: Et fatius est Philosopho  
notis consentire, quàm ad causam occultam  
& obscuram confugere. Tandem vacuum non  
potest esse causa descensus huius. 1. Quia va-  
cuum non admittitur, multo minus huius  
effectus causa est statuendum. 2. Vacuum si  
admitteretur huiusce rei causa, quæreretur sui  
interitum per aëris locum subituri motum.  
At nihil quærit sui interitum. 3. Motus iste,  
iuxta Philosophos, est ad naturæ conservati-  
onem. At vacuum nullam naturæ amicitiam  
spondet, sed interitum & ruinam. Vltimò, si  
dicant, vacui evitationem esse huius rei cau-  
sam, minimè satisfaciunt. Primò, quia finalem  
causâ hîc afferunt pro efficiente. Nam evita-  
tio vacui causa est finalis, non efficiens. In fi-  
nalibus autem causis acquiescere, Philosopho  
indignum. Quod si evitatio hæc vacui statue-  
retur efficiens, effectus esset prior causâ suâ,  
quia hæc vacui expulsio aëris motum non an-  
tecedit, sed sequitur. Si regerant, evitationem  
vacui esse causam in *intentione*, non in *execu-  
tione*, oportet efficientem assignent cui in in-  
tentione sit hæc vacui evitatio. Nec possibile  
tanto consilio donari corpus inanimatum, ut  
vacuum subituum persentisceret. Nec ali-  
quid hic est relictum, quo subterfugium ali-  
quod quærant, præter occultum quendam na-  
turæ

mra instinctum, inscitia asilum, nescio cuius  
 delirantis somnium. Secundo, aer, dum talem  
 naturæ conservationem quarit per sui intor-  
 tum, non universi conservationem, sed ruinā  
 potius machinaretur. Nam quid magis uni-  
 versi ordini contradicit, quam invertere na-  
 turæ ordinē? Nec magis mundus sub hac vacu-  
 ā cavitae pateretur, quā sub aeris violenti-  
 ā, cum vacuum admissum reliquas fortassis  
 partes circumstantes pateretur incolumēs;  
 aer tamen sub hac violentiā laborat. Imo si  
 exquisitiū res expendatur, maior erit hiulus  
 & incommodū naturæ, ut aer sic descende-  
 ret, quā ut vacuum admitteretur; quia illud  
 positivum, hoc verò privativum, aut negati-  
 vū. At hīc confugiunt ad formam & naturam  
*universalem*, ex quā depromunt huiusce rei  
 causam. Aer (inquiunt) licet ascendat suā na-  
 turā speciali, tamē periclitāto universo cedit  
 universali. Hīc regerimus primò, formā hanc  
 universalem vix repertam esse apud Aristote-  
 lem, qui universum statuit non unum con-  
 stans ex materiā & formā, sed aggregatum, &  
 corpora omnia, quæ in eo sunt, non interno,  
 sed externo tantum vinculo inte se conjun-  
 cta. Quod si posuisset talem formam univer-  
 salem, hæc esset internum principium, ex quo  
 admirabilis iste rerum ordo dimanaret, nec  
 penderet

penderet à formis particularibus, quæ talem universi ornatum introducerent. Secundo, demus talem formam universalem. Huius tamen effectus causam existere non largimur. Nam hæc forma respectu particularium formarum esset superior, ut admitteretur quædam formarum subordinatio. At causæ subordinatæ non oderent nisi effectus subordinatis, non oppositos, aut contrarios: at hîc non est tantum motuum subordinatio, sed contrarietas. Nam ascendere & descendere motus sunt contrarii. Tertiò quarto, utrum hæc forma universalis sit simplex, aut composita? Non simplex, quia tunc motus ejus esset uniusmodi: Nam unius simplicis unicus est tantum simplex motus. At non est uniusmodi semper motus hic aëris; quia non descendit tantum ad vacuum evitandum, sed etiam in obliquum sæpissime torquetur, ut cum per fores & fenestras alicuius domus intromittitur. Non est composita hæc forma, quia forma, quo universalior est, eò simplicior. Universalia enim minorem includunt compositionem, quàm singularia, aut minùs universalia. Deinde hæc compositio, qualis sit, aut ex quibus, non audio apud Philosophos explicatū. 4. Hæc forma universalis esset vel una numero in omnibus corporibus, vel pro corporū varietate

varietate multiplicaretur. Si unicam agnoscerent in omnibus (præter illud, quod supra retulimus, mundum, hoc modo non esse aggregatum, sed unum essenziale suâ materiâ & formâ constans) singularis esset hæc forma, non universalis, & cum naturalis sit, & non libera causa, nec plorantem naturam persentificeret, nec motuum multiplicitem auspicaretur, cum omnis naturalis causa ad unam partem terminorû oppositorum sit definita. Si verò pro multiplicitate corporum multiplicaretur universalis hæc forma, non potuisset esse hujus descensus aërii causa. Cum enim in particulari aërii corporis termino inclusa sit, eius cancellos non egreditur, ut vacuum terræ hiantis cavitatem ingressurum percipiat atq; præveniat. Quicquid hîc dixeris, corrui principium illud Peripateticum, *Unius corporis simplicis unicum esse simplicem motum*: statuentes enim hanc formam universalem, duos motus naturales necessario statuunt, alterum à formâ universali, alterum à particulari profectû, ut in aërii ascensus & descensus motu.

5. Natura universalis, si quid ego intelligam ex Peripateticis, est omnium causarum & formarum particularium resultantia & conspirantium conformitas. Nihil itaq; à formâ universali provenire dicendum est, nisi id,

quod plures formæ conferunt, seu quod ex pluriû formarum inter se cohærentiâ oritur: At quales sint illæ particulares formæ, quæ ad hunc descensûs motum conferunt (nisi naturalem concesserint) non omnino possunt expedire: Nec illud ex omnium concursu & harmoniâ oriri putemus, cui causæ particulares omnes adversantur. At dicent fortasse, sequi necessariò talem aëris descensum, ex omnium harmoniâ, & universi consistentiâ Nam nisi hoc admitteretur, daretur vacuum, quod non est admittendum. At necessitas est hæc consequentis, non consequentiæ. Causa itaq; esset hîc quærenda, quare sistente se aëre, & non descendente ordo universi turbaretur? Quæ nihil aliud esse potest, nisi quod aër, quod suâ nativâ virtute descenderet ad centrum, prohiberetur, quo minùs hanc exerceret operationem. Aër itaq; naturaliter descendit, & per consequens erit grave. Secunda ratio, cur aër sit grave, ex hypothese haud impossibili prorsus ducitur. Supponamus aëris particulam violentiâ quâdam pulsam suprà aëris orbem ascendere, ut in orbem qui Peripateticis igni tribuitur ad concavâ Lunæ superficiem; quaero, utrum ascenderet hæc aëris particula altius versus cælum, aut descenderet, aut quiesceret? Si ascenderet altius, tum primò è suo loco

*Ratio. 2.*

loco moveretur, cum Philosophi potius aliud statuunt, omne corpus à loco suo separatum, ad locum illico reverti. Secundo, aer hoc modo peteret ignis locum, & ita elementa locis suis confunderentur; Quod Peripateticis absurdissimum. Tertiò, non esset in altiori loco centrum aliquod, aut punctum fixum, ad quod moveretur. At sic aer vago cursu ad nullum centrum moveretur, & motus esset infinitus. Si verò descenderet hac aeris particula, tunc motus iste esset aut naturalis, aut violentus. Non violentus, primò, quia motus iste est ad locum, qualis statuitur naturalis. Secundo, omne violentum est ab aliquo externo principio. At hic externum principium assignari non potest hujus descensus. Si descensus iste aeris sit tandem naturalis, habemus nos, quod quærimus, aëra suam naturam descendere, & ita esse gravem. Ultimo, si hæc aeris particula sic vecta in orbem ignis penitus quiesceret, tunc non verum esset Aristotelis effatum: Omne corpus elementare è suo loco dimotum, & separatum in locum continuo reverti; & sic rediret ratio illa superior de elementorum & locorum confusione. Hic video adversarios, naturæ ejus universalis asylum subituros, nisi quod illis aditum prius obstruxissem. Tertia *3. Ratio.* accedit demonstratio ad aeris gravitatem sta-

biliendam. Illud, quod è plurium partium additione gravius efficitur, eius quælibet pars erit in se gravis. At ubi multæ partes aëris inter se constrictæ & coactæ concurrunt, ibi totum redditur gravius: Ergo. Vtraq; propositio confirmatur. Maior, quia nihil potest è multis partibus simul additis illud mutuari, quod partes in se non habent. Quod si igitur partes additæ partibus totum efficiant gravius, necesse est in se partes omnes talē complecti qualitatem. Quod si respondeant cum vulgatis Philosophis, satis esse, ut partes virtute tantum complectantur gravitatem, non formalitèr, satis habemus ad nostrum dogma altruendum. Nam nihil virtute latet in hisce partibus, nisi quod earum naturæ est consentaneum. Assumptio superioris syllogismi ostenditur, quod aër è multis sui partibus simul constitutis, & simul coactis, erit gravior, quàm ubi fuerit tenuior: Primò, quia hinc vulgò assignant causam, quare superior aëris regio sit calidior, quia est tenuior, & ad ignem concipiendum aptior. Quod si esset densior, iuxta illos esset gravior, & per consequens descenderet. Secundò, experimento constabit; quia utres inflati aëre plus habent gravitatis & ponderis, quàm aëre effuso. Nec alia ratio potest reddi, quàm additio partium plurium  
ipsum



ipſius aëris, & per conſequens plarium parti-  
um ipſius gravitatis, quibus totus reddatur  
gravitate ſua ponderoſior; haud ſecus ac plu-  
res partes ignis aut caloris in ferri denſiſſimâ  
materiâ collectæ, vehementiùs urunt & cale-  
faciunt, quàm ubi in ligno diffuſæ. Nam ad  
ſubjectæ materiæ multiplicationem multipli-  
cantur etiam qualitates, quoad vires quæ illi  
adhæreſcunt. Hinc facile percipitur ratio hu-  
jus intenſionis graduum in gravitate. Quæli-  
bet enim pars in ſe gravis eſt. Quò ergo cor-  
pus pluribus gaudet partibus, eò gravius. A:  
in denſo partes omnes magis coactæ ſunt, &  
conſtrictæ, quàm in raro; quò ergo denſius,  
eò gravius. Hinc eſt, quod majorem aut mi-  
norem corporum denſitatem aut raritatem  
major vel minor gravitas conſectatur. At for-  
taſſis hîc dicent, non gravitatem eſſe ſed mi-  
norem levitatē. Regerimus, 1. Quod deſcen-  
dit, & movetur ad centrum, eſt naturâ ſuâ  
grave: At hoc accidit partibus aëris condenſa-  
tis, ut ſuprà demonſtravimus. 2. Si partes iſtæ  
condenſatæ ſint minùs leves, oportet accedat  
aliquod, ex quo fierent minùs leves: Quid au-  
tem aliud eſſe poteſt, quàm additio partium  
graviùm? Remiſſio enim qualitatis ſit potiſſi-  
mum ex admittance contrarii: E contrâ, levis  
addita levibus levitatem intenderent, ſicuti

\* ratio.

calida addita calidis calorem intenderent, & non remitterent. Quare cum multæ partes aëris simul additæ & coactæ totum non levius conficiunt, sed è contra gravius, necessariò sequitur partes singulas non in se leves esse, sed graves. Quarta tandem accedit ratio: Entia non sunt multiplicanda sine necessitate. At nulla cogit necessitas duplicem hunc in elementis motum admittere, ut alius à centro sit, alius ad centrum & per consequens nulla necessitas cogit nos gravitatem & levitatem admittere. Si enim aliqua sit necessitas, tunc quia experimur aëris particulam ut utre conclusionem sursum evehi, & aquis mersam è fundo resiliere. Hoc enim levitatis aëriæ certissimū videtur indicium. Hæc tamen non est ratio necessaria, ut motum aërii ascensus naturalē tribuamus. Motus enim quodammodo violentus est, & non naturalis, utpote aëris repulsi à fortiori. Licet enim omnia elementa nativâ suâ gravitate ad centrum se conforment, tamen cum omnia non æquè sint gravia, æquales movendi vires non obtinent. Hinc fit, ut duorum corporum unum locum simul competentium, illud quod gravius est, & fortioris virtutis vincit, & minus grave, tanquam virium imbecilliorum, repellit in locum superiorem, cum ambo hæc corpora eundem simul locum

locum occupare non possunt. Quod utribus aëre inflatis, & aqua dimerfis, erit conspicuum: Nam eandem aquæ cavitatem duo corpora quasi ambiunt; Aër nimirum utre inclusus, quia amplius retinere contendit locum quem habet, & si per vires potuisset, ulterius descendere; & aqua, quæ è suo loco violentiâ quâdam deturbata illum iterum contendit recuperare, & cavitatem dehiscen-tem circumstantibus suis partibus adimplere. Quo accidit, ut aqua, cum suâ gravitate præponderet aëri, locum illum tandem occupat, & aër violentiâ repulsus resilit in priorem seu superiorem locum. Hinc certus elementis singulis locus assignatur. Nam terra, cum omniū elementorum sit gravissimum, maximo contendit impetu ad centrum, & quam proximè assequitur. Aqua, licet naturali vi propendat ad centrum, minori tamen, quam terra, ideoque terræ opacitate ulteriorem aquæ motum inhibente secundum à centro locum obtinet. Aër etiam (ut diximus) suâ gravitate donatus, quantum potest, ad centrum collimat: At cum inferiorum sit virium, aquæ & terræ cedit, & ab aqua facile reperiçus in locum superiorem resilit, tertium itaq; locum à centro obtinet. Fictitium illud ignis elementum ad concavam Lunæ superficiem, ut non videmus, sic

non agnoscimus; quod si tale daretur, esse etiam grave eadem superiores rationes conficiunt. At dicunt hic adversarii. Aërem quotidie experimur ascendere. Ergo aut ascensus hic esset naturalis, quod contendimus, aut perpetua violentia aëri imponeretur; cui natura adversatur. Respondemus duplicem esse naturæ scopum; alium primum; alium secundarium. Primum est particularis cujusque corporis perfectio; Secundarius, totius universi *ἑνότης*, quæ omnium particularium naturarum quædam est resultantia. Illa particularis natura dici potest, hæc universalis. Violentum itaque dicimus motum hujus ascensus in aëre, non respectu scopi secundarii naturæ, seu naturæ universalis, sed particularis. In quâ assertionem communi sententiæ Peripateticorum è diametro adversamur. Nam illi ascensum naturæ particulari tribuunt, descensum universali. Quinta ratio ducitur ab harmoniâ & unione universi. Nam major est illis concinnitas naturæ & harmonia, qui gravitatē elementis singulis cōpetere adstruunt. Nam cū omnia hæc tria elementa, terra, aqua, aër, sint cognata, & animantium in terris agentium alimentū aut faciant, aut disponant, non improbabilis hæc ratione esset conjectura certâ hæc suâ ad idē centrū conformitate cōponi, quod fieri

5. Ratio.

fieri non potuisset, si mutuis dissidiis & inimiciis distraherentur; siquidem aër pulsus in sublimem regionem à corporum spissiorum motu nunquam reverteretur, quia hoc esset contra naturam: cuius contrarium est probabilius. Deinde rectè Philosophantibus fixum aliquod punctum aut centrum est constituendum, ad quod motu suo conformarent se singulae aëris particulae. Nam ratio perfectionis quam omnia corpora quarunt in loco suo ad quem tendunt, petenda est ex unione maiori versus centrum. Nam lineae, quò magis ad centrum accedunt, eò magis ununtur, quò magis à centro abeunt, eò magis magisque divergunt: quae igitur in Peripheriâ maxime distant, in centro maxime concurrunt. Proinde si aëris partes à centro moverentur, quasi ad orbis alicuius perimetrum (uti statuunt Peripatetici) non perfectionem, sed potius summam sui imperfectionem motu assequerentur, quod & rationi & Aristoteli absolum. At de igne elementorum altero non minor manet disputatio, nec non de exhalationibus & vaporibus in aëre elevatis, qui videntur suoapte Marte ascendere, & per consequens ex aliquo saltem elemento levi esse compositos. Ad hæc (ut mittamus celebrem illam de igne elementari controversiam in alium locum) dicimus

cimus fieri posse, ut tum ignis, tum exhalationes igneæ è fumo constantes adscendant, non tamen nativo impetu, sed modo quo supra exposuimus. Nam corpora tenuiora & minùs gravia, cùm aliquando in locum inferiore[m] cogantur, ob minorem efficaciam cedunt gravioribus eundem locum petentibus, & ita resiliunt, & ascendunt; exhalationes vero cum sin[m] mixtura imperfecta vergant ad dissolutionem, fieri necesse est, ut partibus à se invicem distractis & diffusis in orbem, major locus requiratur ad eas capiendum, quàm antea: Quærentes itaq; locum ampliorem, coguntur in illam partem recedere, quæ cedere aptior videatur. Quocirca superam statim regionem scandunt, quam inveniunt minori præditam gravitate, & majori raritate perviam. Statuimus enim, non sine probabili conjecturâ, totum terrestrem globum, quem incolimus, exurgentibus undequaq; ex ipsa vaporibus & fumis esse circumfusam. Vapores isti, cum ex tenuioribus aquæ partibus prius à Sole & syderibus solutis generentur, quò magis à terræ superficie separantur, eò magis se attenuant & effundunt, tam ob insitam naturam quàm maximè vergunt ad tenuitatem, calore Solis operante; tam quod cedant oportet vaporibus aliis de novo è terræ gremio

mio excitatis. Diffusio hæc & Rarefactio motum aliquem localem necessariò postulant: quicquid enim rarefit, aut diffundit se, necessariò mutat loci terminos, ut locum amplio- rem deponat, quàm antea occupaverit. Moveantur ergo necesse est vel deorsum versus terre centrum, vel in obliquum torqueantur ad dextrum vel sinistrum latus Horizontis, vel saltem ascendant. Deorsum tendere non possunt. 1. Ob terræ opacitatem & gravitatem, quæ locum prius occupat & corporibus tenuioribus viam intercludit. 2. Ob exhalationes alias à Terrâ perpetuò ascendentes à quibus tanquàm à crassioribus retunduntur & quasi reverberantur. Deinde in latus obliquum agrè movebuntur exhalationes istæ: quia cum istæ loci partes vaporibus forsân æquè validis obstruuntur, penetrationem non admittunt, & alijs subituris eundem locum difficulter cedunt. Hinc fit ut prædicti vapores eò perveniant, quò transitum inveniunt faciliorem: faciliior autem transitus est in locum superiorem, qui vaporibus istis minùs offunditur. Vapores enim quùm perpetuò se dilatent in transitu tanquam à Centro in superficiem perpetuò magis magisque rarefiunt usque ad mediam aëris regionem, ubi à frigore coacti gravitatem concipiunt & descendunt.

Hic

Hic Ergo concludimus, omnia elementa esse absolute in se gravia, licet comparatè, & ad se invicem collata, alia leviora, alia graviora dici possunt. Nam per levitatem hic intelligere non debemus qualitatem aliquam positivam gravitati contrariam, sed tantum minorem gravitatem, cujus quidem ad majorem annexa est privatio. Hoc sensu illud, quod calidum est ad duo, privationem habet ad plures caloris gradus, qui in subiecto admitti possunt; ita tamen, ut non absolute frigidum, sed minus calidum dici mereatur.

## DECAD. I.

## EXERCITATIO IV.

*Omnia fiunt ex nihilo.*

**D**ISTINGUUNT hoc modo Peripatetici Generationem à creatione, quod hæc ex nihilo, illa à subiecto prius existenti sit: At non obstante communi opinione, quolibet ex Nihilo esse productionem, sequentes hæc rationes conficiunt: Vel enim primo, res est ex Nihilo, aut est ex Aliquo. Non ex aliquo: Ergo. Majoris divisio est ex immediatè oppositis. Minor confirmatur: Si res producat ex aliquo



aliquo, tunc aut manet illud quod est, & fit hæc res, aut definit esse illud quod est, ut fiat hæc res: Neutrū est verum. Si enim maneat, quod est, & simul fiat alia res, tunc simul retinet suam essentiam, & accipit novam, & sic haberet duas distinctas essentias, & sic una res esset duæ res; quod absurdum. Si verò definat esse illud, quod est, ut ex eo aliud generetur, tunc illud, quod producitur, ex nihilo producitur, quod est demonstrandum. Secundò, si res fiat ex aliquo, tū vel ex Alio, vel ex seipso: Non ex Alio, quia sic omnis productio esset *Transsubstantiatio*: siquidem transsubstantiatio non est aliud, quàm unius substantiæ in aliam mutatio. Ex seipso nihil fit: Primò, quia quod jam est, non fit. Secundò, si aliquid fieret ex seipso, tunc idem esset principium & principiatum, illud Quod, & illud ex Quo aliquid fieret. At dicent hîc Peripatetici, fieri omne ex aliquo, quod non Actu, sed in Potentia est ad illam formam. Quæro hîc, utrum promotio illius potentia in actum sit rei alicuius productio, aut modus tantum. Si modus tantum, tunc non esset substantialis productio, quia in tali mutatione illud quod producitur, est res. Si dicant rem produci, tum res illa producta esset vel eadē cum potenciali subiecto ex quo producta est, vel diversa: Non eadem, quia

quia sic idem fieret ex seipso, quod suprà explosimus. Non diversa; quia sic vel re, vel modo. Si dicant modo, non sufficit, quia sic nihil produceretur præter modum; quod absurdum. Si res, tum res illa producta latuit intrà in potentia illa, aut non: Si latuit, primò non producta est, sed tantum promota à potentia ad actum: & sic nihil illi adderetur præter modum. Nam actus & potentia tantum rerum sunt modi. Secundo, si res hæc è potentia materiæ educeretur, tum efficiens non esset causa productiva, sed eductiva tantum, aut disposens. At non est: Ergo. Consequentia est clara quiaeductio formæ è materia non est ejusdem productio, sed dispositio. Nam producere non est rem à potentia ad actum promovere tantum, sed ejus essentiam facere. Si verò hæc res non latuerit in potenciali illo subiecto quomodo ex illo educeretur? Quod omnes tamen agnoscunt. Deinde fit ex materia, aut ex nihilo; Si ex nihilo: nobiscum consentiunt, generationē esse ex nihilo: si ex materia, tum materia aut manet, aut perit: si pereat, antequam fit hæc res, tum hæc res fit ex nihilo; si maneat, & fit hæc res, tum duas haberet essentias, & sic rediret superior difficultas. At dicent rerum formas non produci, ut *Quod*, sed ut *Quo*. Regerimus nos: Ergo sunt non ut *quod*

*quod, sed ut quo: Nam eodem modo sunt, quo sunt producta.*

## DECAD. I.

## EXERCITATIO V.

*Non datur motus à loco in locum.*

**V**ulgatum est in schola Peripatetica, motum localem proëssum esse quendam ab uno loco in alium. At hoc principium Aristotelis aut penitus falsum esse, aut malè ab interpretibus intellectū, paucis conficiemus. Si enim detur corporum transmigratio à loco in locum, (uti contendunt) tunc mobile progressu suo, aut *simul* retineret locum priorem, & indueret sibi novum; aut relinqueret unum ut ingrederetur novum. Non prius: Primò, quia sic idem corpus simul occuparet duos locos, priorem nempe, & posteriorem; quod absurdum. Secundò, cum priorem locum non amittat, non esset secundū illos localis motus & mutatio. Si posterius affirmant, tunc mobile vel eodem instanti relinqueret unum locum, & alium sibi adscisceret, aut diverso. Nò eodem instanti; quia sic verum esset dicere eodem temporis momento, Corpus est *hic*, & corpus

*Ratio. 1.*

corpus est *illuc*; & ita idem corpus esset in diversis locis; quod impossibile. Vtrumq; enim contradictionem implicat. Non diverso instanti relinquit unum locum, & ingreditur novum; quia sic vel Instans illud immediatè sequeretur prius illud, aut aliud instans esset interjectum. Non prius, quia juxta Aristotelem duo instantia se invicem immediatè sequi non possunt. Nam hoc modo continuū componeretur ex individuis; Quod Peripateticis absurdum. Deinde nec instans aliquod est interjectum inter prius illud & posterius: sic enim instans esset, in quo corpus neq; *hic* esset neq; *illuc*; & ita corpus aliquo temporis momento omni prorsus loco destitueretur. Deinde tria illa momenta sine tempore concurrere non possunt. Hic respondent faniores, corpus eodem temporis momento locum unum deferere, & novum ingredi: non quod instanti illo est in duobus illis locis, sed quod idem punctum & instans est utriusq; terminus, ut eodem instanti, quo unum corpus hic esse definat, eo alibi esse incipiat. Subtilis hæc responsio. At si pensiculatius penderetur, non omnino locorum multiplicationem probat, sed ejusdem potius loci continuationē; quam infra stabiliemus. Nam termini hic cum imaginarii sint, & non reales, in eodem loco concipi

cipi possunt infiniti; sicut in lineâ puncta. Cogitemus enim, motam esse quēdam corporis per lineam ad singula huius lineę puncta imaginaria, novus semper terminus imaginarius acquiritur, ut idem sit terminus aggredientis & egredientis corporis; ita tamen, ut omnes realiter in eandem lineam coalescant. Ita penitus in eodem loco continuo multi sunt termini potentiales & imaginarii, quorū unusquisq; idem erit, & incidentis corporis & egressi terminus. Nemo tamen hīc colligat locorum inter se disjunctionē aliquam, & discretionem, sed potius continuationem. Lineam verò licet à calce continuē curtatā, eminūs verò continuē augmentatam, nemo negabit unam eandemq; esse lineam. Eadem autē ratio est *Motus localis Linea, in quā absolvitur, Præsentia localis, seu ubi, & Loci ipsius.* Quod ut evidentius confirmetur, aliam adiciemus rationem; Si corpus movendo suum mutaret locum, tunc in multis mediis interjectis partibus multos sibi adscisceret locos. At hoc non est verum: Ergo nec illud. Consequentia clarissima est. Minor confirmatur: Vbi enim multi sunt loci, ibi multi sunt termini locales, seu (ut loquuntur) multa *ubi*. At ejusdē motus non possunt esse multa *ubi*. Major est iterū extra controversiam. Minor sta-

litur, quia motus est idem realiter cum suo termino locali, seu ubi; si itaque idem motus multos terminos suos respiceret, idem fieret motus realiter cum omnibus suis terminis. Quod si eidem motui plures cōvenirent termini, tunc omnes hi termini inter se convenirent, juxta vulgatum illud axioma: *Quae conveniunt in aliquo tertio, inter se conveniunt.* Quod si omnes termini essent idem terminus realiter, tunc aut idem terminus esset plures formaliter, quod absurdum; aut saltem plures termini in vnum terminum continuatum realiter coalescerent. Vno autem posito termino locali, unus erit locus, & per consequens corpus non movetur à loco in locum; sed idē semper locus continuatur, quod contendimus. At dicent; Si corpus à loco in locum nō moveretur, non daretur motus localis, cui experientia contradicit. Negamus hīc consequentiam, cuius rationem ut aperiāmus, dicemus: locum mutari intelligi posse bifariam, vel per loci *Commutationem*, vel per loci *Cōtinnuationem*. Per commutationem; cum loci inter se distincti & discreti commutantur, ac si corpus ex uno loco in alium distinctum & disjunctum transiliret. Per continuationē verò intelligitur, quum in progressu locali alicujus corporis locus idem continuatur, ut nō sit  
saltus

## EXERCITAT. VI. 83

salvus à loco in locum à priore disjunctum, sed qui prior est ad longiorem distantiam continuè protenditur, & ex alterâ parte contrahitur, & diminuitur. In omni itaq; mutatione locali idem semper locus servatur, ut non admittatur locorum Cómputatio sed Cóninuatio; ut non sit progressus à loco in locum disjunctum, sed loci & *Prasentia localis* (quam *Vbi* vocant) tractus aliquis continuatus. Quocirca asserere non veremur, Socratem, aut quemvis hominem, eundem hodiè locum occupare, in quo natus, & in lucem editus, inò in quo primo conceptus fuerit.

## DECAD. I.

## EXERCITATIO VI.

*Sensus nullo modo errare potest.*

**S**ENSUS nostros erroribus & fallaciis subijci, & proinde intellectus nostri indigere correctione, nihil Peripateticis familiaris. At quam levi aut nullâ ratione hæc asserant, facile liquere potest illi, qui rationes nostras perpendit. Sensus verò cui maximè ascribunt errores est visus noster, cui in remedium Opticam scientiam inventam esse prædicant.

dicant . A visu igitur tanquam notiori disputationem nostram auspicabimur . Ratio sit hæc prima: Si visus erret circa visibile , tunc vel in Primâ vel simplici Apprehensione, vel saltem in deductionibus & discursu circa visibilia . Non in simplici obiecti visibilis apprehensione . Primò, quia cum visus rem aliquam percipit; aut rem illam cognoscit, vel non . Si non cognoscat , non errat . Quomodo enim circa rem non cognitâ errare potest? Si verò cognoscit , scopum attingit, & ita non errat . At dicent, cognoscere quidem rem, sed non debito modo, & ideo errare, quia circumstantias quasdam circa rem non rectè percipit . Re-gerimus in primâ illâ ac simplici apprehensione rem tantum percipi , & non rei modos & circumstantias, cum hæ non nisi deductivæ operationi, aut discursui cuidam subjiciantur . Secundò, ubi non est veritas aut falsitas , ibi non potest esse error . At in simplici operatione sensus non est veritas aut falsitas : Ergo . Major patet, quia errorem semper comitatur falsitas . Minor est clarissima , quia veritas & falsitas (quam hic intelligimus) non nisi in cōpositione terminorū conspiciatur . Quod si recurrant ad veritatem simplicem & metaphysicam, nihil dicunt, quia huic non opponitur error & falsitas, sed potius non entitas & negatio.



negatio. Tertiò, si in primâ Apprehensione aberraretur, tunc vel defectu Potetiz, vel defectu organi, vel defectu Medii, vel defectu objecti. Non defectu potentiz: deficeret enim vel potentia prima, vel secunda. Non prima, quia hæc semper est eadem, & immutabilis, cum sit aut eadem cum animâ, juxta Scotistas, aut saltem comes animæ individua, uti Thomistæ sentiunt. Non secundaria, quia talis potentia non est aliud, quam organi dispositio: At defectus huius non error est, sed percipientis intemperies, neq; tam Opticæ remedium querit, quàm Medici. Deinde, si sic deficeret organi dispositio in objecti perceptione, non erraret sensus. Nam sensus eodem modo recipit quo objecta præsentantur. Mala enim materiæ & organi intemperies inficit prius, & mutat illud objectum, quod postea sic mutatum & infectum à sensu percipitur. Sic crassus humor oculo harena, ut flava bilis, coinquinat prius obiectum visibile, ut postea tanquam flavum aut croceum visui præsentetur: Iudicium enim visivum non nisi in centro visus, aut saltem intimius collocatur. Species itaq; per exteriores oculi partes transeuntes, in illis tanquam medio tinguntur priusquam ad centrum oculi deveniant. Aberratio itaq; non ad visus potentiam proximam referenda

(si quæ sit) sed potius ad objectum sic præsentatum. Ecquis est, qui me errare dicet videndo, quòd chartam à te priùs dinigratam albam non videam? Hinc etiam facilè perspicitur, quid de erroribus organi sentiendū sit. Si defectu medii oberret visus, tunc vel quia medium immediatè agit in visum, vel quia objectum disponit & modificat, ut falso modo à visu percipiatur. Non prius, quia medium ut medium non agit in visum. Nam medium distinguitur ab objecto. Si posterius, haberet se medium ut quædam ejus objecti visibilis dispositio, & modus, & sic ab objecto non esset distinguendum, & per consequens error iste in objectū potius esset referendus, quàm in medium. Quod si dicant errare visum, non quòd objectum percipit alio modo quàm repræsentatur, sed alio modo quàm verà est extra visum; dicimus, congruentiam vel Asymmetriā speciei cum objecto suo non subjici visui, sed potentix alicui collativæ, quæ malè colligit ex intermediâ specie objectum. Non itaq; error hic visus, sed intellectus, aut interni cuiusdam sensus conferentis. Deniq; error non est ex defectu objecti, quia hoc eodem semper modo, quo est non simpliciter, sed suis circumstantiis, sive per mediū, sive per oculum, dispositum, percipitur. Non  
autem

autem: entrare dicimus ex parte objecti, ubi  
objectum eodē quo est modo, oculo obversa-  
tur: sub objecti autem nomine non simplicem  
rem tantum, sed & circumstantias complecti-  
mur, quæ illi adhærescunt. Illud solummodo  
objecti rationem obtinet, quod oculo præsen-  
tatur; quod verò non præsentatur, non est  
objectum, ideoque ratione objecti error esse  
non potest. Ex his liquet; errorem non acci-  
dere in simplici sensus apprehensione, sed po-  
tius inductione & discursu mentis circa illa  
sensibilia. An quispiam est, qui me erroris in-  
simulet, quod vultum aut manum tuam pri-  
us à me, aut alio atramento conspurcatam ve-  
ro colore non conspiciam? Imò potius error  
est intellectus, quod res talis simpliciter esse  
judicetur, qualis mihi in ipso vidēdi actu præ-  
sentatur: Quod si igitur ad hoc confugiant, &  
dicant, errores accidere non in simplici visibi-  
liū apprehensione, sed potius in consequen-  
tiis illis, quæ è visibilibus aspectu oriuntur,  
dico hoc sensu errorem non ascribi visui, aut  
sensui externo, sed potius intellectui, qui è  
rectè perceptis male iudicat. At contrà obji-  
ciunt; Intellectus ergo non visū corrigit, sed  
seipsum, quum è contrà Philosophi imperium  
statuunt intellectus in visum & sensus, ut hi  
eius correctioni subiiciantur. Respondco, in-

telleſtum duplicem habere reſpectum, alterum ad ſenſum, alterum ad ſeipſum, ſed inferiori gradu conſtitutum. Ad prius dico, ſicut in ſenſu, ita in intelleſtu duplicem latere operationē, alteram Extrinſecam in ſenſu Exteriori poſitam, quæ ſimplex eſt ſenſibilium Apprehenſio: alteram Intrinſecam, quæ compoſita eſt in terminorum connexionē quādam & diſcurſu, licet in ſenſu imperfecto, qui apud Scholaſticos Ratio particularis, facultas cogitativa, & aliquando Imaginativa dicitur. In hac autem facultate latet vis quādam de ſingularibus diſcurrendi: Vbi igitur ſuprà diximus, ſenſum non errare, non intelleximus, niſi Externam illam Apprehenſionem: Attamen cum interna hac operatio falli poſſit, libenter concedimus, ſenſum hac ex parte falli. Cum enim erroris origo ſit in viſibiliū diſpoſitione, & Imaginatio ab externo ſenſu proximè recipiat, & pro ratione objecti conſequentiā eliciat, fieri non poteſt, quin multiplici captioni ſubjiciatur. Hujus ergo judicium ad intel-  
lectus tribunal eſt examinandum. Intellectus itaq; dicitur viſionem corrigere, quatenus Imaginationem ſeu interni ſenſus de viſibilibus judiciū dirigit, informat, & examini ſubjicit. Ad poſterius dico, duplex eſſe intellectus judicium, alterum Inventivum, alterum  
verò

## EXERCITATIO VII.

verò Scientificum. Inventivum est conclusio-  
nis alicuius particularis de re sensu appre-  
hensâ, apparenter saltem, consurgentis, quod  
& naturale & primum dici potest. Scien-  
tium est notitia universalis conclusionis mul-  
tis experimentis collectæ, & multarum inter  
se notitiarum comparatione elicite. Illud  
fallere, aut falli potest; hoc rarò, aut nun-  
quàm. Ad propositum itaq; hîc dico, imperi-  
um esse quoddam penes iudicium scienti-  
um: illud verò, quod corrigitur, & regitur,  
est iudicium inventivum. Objectum, circa  
quod hoc versatur, est visibile; nihil itaq; ob-  
stat, quo minus iudicium illud primum intel-  
lectus à posteriori & exquisitori corrigatur.  
Interior non hîc dicimus intellectum, im-  
mediatè agere in seipsum, sed mediante ob-  
jecto, ut quod intellectus primâ illâ & in-  
ventivâ operatione imperfectius percepe-  
rit, id postea limatiùs atque perfectiùs.

## EXERCITATIO VII.

*Ignis est humidus.*

**N** I H I L Peripateticis in opinione ratiùs  
quàm ignis siccitas; Ex quatuor enim  
pri-

primatum qualitatum combinationibus illā  
igni adjudicant, quæ ex calore constat & sic-  
citate. Quantas in Philosophiā difficultates &  
absurda pepererit popularis iste error facile  
constabit illis, quibus innotescunt hujus opi-  
nionis consecraria. Ergo, ut talia ex hominum  
mente dogmata eradicem, ostendam hanc  
qualemcumq; Ignis siccitatem quam depræ-  
dicant, non scientia aliquā aut probabili eniti  
conjecturā, sed potius in Philosophorum opi-  
nionem authoritatis potius quam veritatis  
consciam temerè sese ingessisse. Quod ut effi-  
ciam, pro fundamento primum sumo: Nihil  
in Philosophiā admittendum esse quod nulli  
facultati humanæ sese ingerit ut sciatur. Vel  
enim affectiones Physicæ sine ullo fundamen-  
to rebus affinguntur, aut saltem res ipsæ facul-  
tati alicui rerum consciæ faciem prius præfe-  
rant necesse est, quàm percipiātur. Non prius  
est concedendū, quia in Philosophicis scien-  
tiam quærimus non conjecturam. Quod si in  
hac rerū caligine locum habeat conjectura,  
non fallax illa & temeraria, sed quæ è mani-  
festis naturæ Iudicijs artificiali quadam In-  
ductione adstruitur. Hisce jactis fundamentis  
demonstrabimus ex nullis naturæ Sympto-  
matis colligi *Ignem esse suā naturā Siccum*:  
Imò multa nobis suffragari argumenta, quæ  
opposi-

oppositum confirmant, nimirum *Ignem esse humidum*. Primum itaq; sic ordior. Si ab aliqua Facultate humanâ Ignis siccitas percipitur, tum vel à Sensu vel ab Intellectu; Nulla enim alia in homine admittitur facultas cognoscendi. Si à Sensu agnoscatur, tum vel à Sensu Interno vel externo. Non à Sensu Interno: quia quicquid Sensui Interno suggeritur, illud prius in externum influit, à quo in Internum transvehitur: prius ergo quæres oportet in Externo quàm in Interno. Si ab externo, tum vel à Visu, vel Auditu, vel Olfactu, vel Gustu, vel Tactu. Non à quatuor illis prioribus; quia Siccitas propriè 1. Tactus est objectum, non alius Sensus nisi per accidens. 2. Absurdissimum videbitur, Si quis affirmaverit hominem Ignis siccitatem aut Videre, aut Audire, aut Gustare, aut Olfacere. Videri enim nihil potest nisi ex luce aut colore; nec audiri, nisi ex sono; ex quibus ad siccitatem adstruendû incertissima erit consequentia: multo incertior ex Gustu & Olfactu, cum in altero Ignis calore suo obtundat sensum, in altero nihil præstet, cum omni odore destituatur, nisi corporis fortè combustibilis, qui non tam siccitatem Ignis probat quàm humiditatem. Deinde non à Tactu percipitur ista, quàm affingunt Igni, siccitas. 1. Quia  
Sensui

Sensui fervidissimo ignis calore vehementer occupato impossibile est, ut siccitatis aut humiditatis differentia sese ingerant: Quomodo enim fieri potest, ut sensus calore vehementi laesus rectū in hisce minutiis exerceat Iudicium? Si quis affirmet fieri posse, rogo ut secundo tangat priusquam suam audacter ferat sententiam. Ego certè non prius credam quam experiar. 2. Siccitas illa, si quæ esset, Ignis, ob tenuitatem substantiæ igneæ, non sentiretur. Nulla enim ratio assignari potest, quare Siccitas Ignis magis perciperetur quam Aëris Humiditas, cum Ignis apud Peripateticos statuatur aëra Raritate suā, aut Equiparare aut vincere. At aëra humore præditum esse ex solo Tactu colligere non possumus, cum corpus sit admodum fluidum & insensibile, quod nec cuti adhæresere, nec sensum ob substantiæ suæ tenuitatem afficere aut terminare videatur. Quidni igitur idem de Igne judicemus? quem & facili cessione & fluxu humidum esse potius quam siccum deprehendemus. 3. Si ex Iudicio Tactus talis in Igne siccitas aliquo modo percipiatur, hoc pendebit ex calore per accidens humidum manus tangentis absumēte, de quo infra docebimus; & non ex innatā Ignis siccitate, quam adversarii stabiliunt. Ex his omnibus certissime liquet



quet immediatè ex sensu sciri nō posse hanc, si quæ sit, Ignis siccitatem. Deinde per Intellectum talem in igne effectum percipere non possumus. Hoc enim fieret vel à Priori vel à Posteriori? Non à Priori: Sic enim à Causâ & Formâ. At Causa, quæ apud omnes est forma Ignis ipso effectū est obscurior, cum formæ rerum plerumq; nos lateant, nec aliter à nobis cognosci possint, quàm ex ipsis effectibus seu affectionibus; quæ à talibus formis derivantur. Prius itaq; talem Affectionem externam Inductione aliquâ cognosci necesse est, quàm ut causa cognoscatur & investigetur. Ex effectū itaq; dependet si quid causæ Intellectui suggeratur. Tandem ab effectū seu à posteriori non dependet talis notitia siccitatis: Quod ex effectibus Ignis præcipuis ac notis facile demonstratur. Præcipui Ignis effectus sunt Calefacere, Urere, & Exiccare; Reliqui omnes aut alieni sunt à proposito, aut ex his oriuntur, aut saltem hūc revocantur. At Calefacere & urere non omnino probant hanc siccitatem. 1. Quia Calor & Humiditas possunt optimè simul consistere, ut in Aëre, Aquis calefactis, plurimisq; hujus farinae aliis: quare nihil obstat quo minùs aliquid calefaciat, interim ut non habeat in se aliquid siccitatis. 2. Vrendi facultas non pendet à siccitate, sed à calore

lore, & sapissimè in iis reperitur, quæ plus participant humoris & parum siccitatis, ut in Oleis accensis, metallis liquefactis & similibus. Porro Exsiccandi facultas non omninò demonstrat hanc Igni inesse siccitatem, cum Ignis hoc præstet non per se, sed per accidēs, neq; Innatâ aliquâ siccitate, sed solummodo Calore humidum absumentē. Siquidem Ignis duplici ratione hanc exsiccandi potestatem exercere potest absq; ope ullius siccitatis in ipso igne: vel nimirum in corpus illud, quod ejus combustioni subjicitur; vel in corpora alia remotiora, quæ sine combustione exsiccantur: Priori modo agit in accensam materiam partes in illâ humiditas secernēs à siccis: unde fit, ut relictis his, illæ absumentur; unde oritur siccitas. Secundo modo agit per calorem suum sine materiæ accensione, quatenus solutis in vaporem tenuem partibus humidis, relictis autem siccis & crassioribus, corpora talia Igni exsiccari videantur; cum revera non sit hæc igneæ siccitatis sed caloris Actio. Quare ex Accidentariâ hâc exsiccandi facultate ineptissimè arguitur ad innatum Ignis siccitatem astruendum. Siquidem Actio hujusmodi non Univoca est, sed Æquivoca juxta Aristotelicos. Si enim ex solâ exsiccandi facultate innatâ Ignis siccitas probari poterit, Solem

Solem ipsum dicemus siccum: cum pleraque corpora Radiorum Solarium incidentiâ calefacta areseant & exsiccentur: At dicere Solem in se siccitatem aut aliud quodcunq; elementaris fœcis admittere, verentur Peripatetici, tanquam in suâ Philosophiâ absurdissimum; Succedit altera ratio ex Ignis fomêto & conservatione ducta hunc in modû. Si Ignis nihil aliud sit quàm accensus vapor, tum erit Ignis suâ naturâ humidus: Consequentia est clarissima; quia vapor apud Aristotelem, ejusque omnes interpretes definitur quid humidum, quod à fumo tanquam à specie alterâ exhalationis distinguitur. Iam Ignem nostrum nihil aliud esse quàm accensum in Aëre aut combustibili corpore vaporē non difficile erit demonstrare. Nam primò certissimâ comperitum habemus experientiâ plerosq; Ignes depasci in ipso Humido, quod evidenter cernitur in bitumine, plerisq; oleis, Aqua vitæ, alijsq; aquis ardentibus, quæ quovis ignis contactu facillimè accenduntur. Nec multum dubitandum est in quovis combustibili corpore latere pinguem aliquam humiditatem, quæ Ignis est quasi pabulum. Hinc combustio est unctuosi hujus humidi consumptio ab Igne facta; in quâ conspicua est separatio partium humidiorum & sicciorum; quarum  
illæ

*Ratio. 2.*

illæ solutæ in vaporem concipiunt Ignem, & sic aut expirant aut absumuntur. Hæ verò ob summum ariditatem Ignem fovere non possunt, adeoq; non absumuntur, sed subsident in fundo, ut cineres omnium combustibiliū. At obijciant fortasse nobis hîc adversarii, humidū Ignem extinguere potius quàm fovere & pascere, quod trita experientiâ cernimus in aquâ vulgari, quâ solemus uti ad extinguendum Incendia. 2. Siccitatem potius fovere Ignem, quod luculento constabit experimento signorum aridorum, quæ facilius concipiunt Ignem, quàm uda & virentia, quæ multum humoris in se continent: Vtrumq; serupulum unicâ eximemus distinctione, ut ad sequētes nostras rationes via sternatur expeditior. Duplex in Corporibus invenitur Humidum. Aliud Mercuriale, aliud Sulphureum. Mercuriale appello illud Mercurium referens, Tenue & Aquosum: Sulphureum verò unctuosum & Oleaginosum: illud reverâ ignem extinguit, hoc fovet & pascit. Tali autem humiditate maximâ ex parte afficiuntur aquæ marinæ & fluviales, quibus uti solent ad extinguenda Incendia: Quæ multum in se habent Mercurialis substantiæ, nihil aut parum sulphureæ istius humiditatis, nisi fontes aliqui fortassis in locis aliquibus tale quippiam è cavernis terre contraxerint.

contraxerint. Humor iste Mercurialis est, qui latens in lignis viridibus incendio officit: unde arida combustioni aptiora videntur quam humida. At revera ligna arefacta ex arefactione ista parum aut nihil amisérunt humidi sui sulphurei, quod statuimus esse potissimum Ignis pabulum & fomentum. His duobus humidis in corporibus respondet siccum, quod Salem appellant Chymici: hæc tria in ipsa lignorum combustionem sunt admodum conspicua. Latet enim in lignis aliud Humidum sulphureum, quod Ignem fovet, aliud Mercuriale, quod in fumum solvitur: latet etiam præter hæc duo substantia quædam sicca, quæ solutis & separatis cæteris in ipsis cineribus conspicitur. Ex quo facile evincitur crasse errasse Peripateticos, quod Ignita meteora penè omnia ex fumo potius, quam ex vapore constare arbitrati fuerint; Aquea penè omnia ex vapore potius, quam ex fumo. Nam. 1. fumus est ad concipiendum Ignem ineptissimus, cum nihil sit aliud quam humidi Mercurialis expressio & separatio. 2. Vapores licet aquæ Mercurialis officiant igni (ut diximus) sunt tamen nonnulli ex Humido illo sulphureo unctuosos & viscosos orti, qui ignitis omnibus istis meteoris materiam præbent. Nec revera aliter se res habet in omnibus nostris ignibus

G

culinaribus

culinaribus(uti vocant)qui nō nisi in pingui  
& viscoso isto humido depascuntur. Quid de  
Elemento ignis ad concavam Lunæ superfi-  
ciem sit sentiendum, suo dicemus loco. Hisce  
prius explicatis ad argumentum me accingo.  
Constat ē præcedentibus ignem cum humido  
vapore coniunctum esse: Quaro hīc utrū  
ignis cum humido isto vapore sit idem vel di-  
versum. Si sit idem, habemus quod conten-  
dimus, ignem esse Humidum: quia omnis va-  
por est humidus. Si diversum quiddam, tunc  
erit vel substantia vel accidens. Nō Accidens:  
1 quia sic ignis esset Accidens; at omnes Peri-  
patetici statuunt esse substantiam & elemen-  
tum. 2. Nullum accidens vi suā corrumpit  
substantiam; At ignis corrumpit corpus com-  
bustibile quod occupat. 3. Si sit accidens, cū  
sit actiuosa, erit proculdubio qualitas: at reve-  
rā difficillimum inueniemus aliquam desig-  
nare qualitatis speciem, ad quam ignis sit re-  
vocandus. Porro si ignis substantia sit diver-  
sa à vapore accenso, tūc vel incorporea vel  
corporea. Non incorporea, tūc quod agit in  
materiam, tūc quod oculis & sensibus subji-  
citur; quæ reverā incorporeis non accidunt.  
Si Corporea, tūc vel ignis & Vapor consi-  
stunt simul, vel saltem vapor corrumpitur, ut  
nascaturn ignis. Non prius; sic enim fiet vel  
per

per modum Penetrationis, vel per modum  
 cessionis localis. Quia Ignis & combustibile  
 simul conjunguntur. Ergo necesse est, ut alte-  
 rum alterius invadat locum, ut fiat quantita-  
 tum penetratio, vel saltem alterum cedat al-  
 teri. Non prius, quia penetrationem quāti-  
 tum tanquam monstrum Philosophia pro-  
 scribit. Non potest esse cessio localis: 1. quia  
 ignis invenitur in candenti ferro, solidissimis-  
 que corporibus, quæ ob duritiem suam loco  
 non cedunt. Quod autem alteri cedit loco,  
 debet necessario esse rarius, Dēsius autē sem-  
 per est illud cui ceditur: Quare probabilius  
 statuunt ignem ferro, quàm ferrum igni ce-  
 dere. 2. Si combustibile locum cedat igni,  
 tum vel manebit intactum vel Accenditur;  
 non manebit intactum; quia sic non præbebit  
 igni fomentum & materiam, quod contra  
 Thesim: Si accendatur, tum ignis invadit  
 materiæ suæ combustibilis locum, & ita non  
 erit cessio alterius corporis, sed potius pene-  
 tratio substantiarum, quam explodimus. Pe-  
 ripateticis in promptu est responsio: Latere  
 in ignitis omnibus quantumlibet solidis po-  
 ros quosdam & meatus insensibiles, quos ig-  
 nis suâ subtilitate occupat. At verò Philoso-  
 phi, qui in poris hujusmodi insensibilibus  
 quarunt diverticula, facilius solent credere,

quàm demonstrare. Nam. 1. Quarto à quâ facultate in homine cognoscitivâ tales in solidis corporibus meatus inveniuntur: Non ex sensu, quia ex suppositione adversariorum sunt insensibiles. Non ex intellectu, quia intellectus nihil colligit nisi ex certis sensûs iudiciis: Quicquid enim est in intellectu, prius fuit sub aliquo sensu. At sensus nihil percipit in ferro candenti ex quo firma ducatur consequentia ad tales poros stabiliendum. Non enim necessario sic concludet aliquis. Ferrum est ignitum, ergo ferrum habet in se poros & meatus insensibiles, per quos ignem tanquam corpus aliud in locum suum intromittat. Siquidem alia via inveniatur, quâ ferrum occupet, quam supra tetigimus: Ex nostrâ enim sententiâ statuimus Ignem & Accensum in combustibili vaporem non esse duo corpora sed unum & idem, in quo dogmate hæc evanescit difficultas. 2. Substantia illa Ignea per tales poros intromissâ, erit vel continua, vel discretis partibus disjuncta & interrupta. Si continua, erit quantitatis penetratio: quia corpus ignis & Igniti occupabunt simul eundem locum sine alterius cessione. Si non continua sed interrupta, quomodo fieri potest ut tota combustibilis substantia accendatur? palam enim sensu deprehendimus totâ metalli candentis



dentis molem simul accensam esse, ut partes accensas à non Accensis impossibile sit dignoscere. Quòd si dicant sensum non dignoscere ob partium minutias, non tamen satisfacient: quia tota moles sæpe absumitur, omnesque partes propriis suis formis spoliantur; quod non fieret, nisi ignis totam substantiam invassisset. Ignis autem continuè sibi istos poros in ignito effodere non potest, quia sic ferrum & reliqua metalla paulatim in Igne absumerentur & excavarentur. At experientia testatur ferrum licet sæpiùs ignitum non minus ad sensum deprehendi solidum. 3. Non verisimile est tantæ tenuitatis esse Ignem, ut per tales poros insensibiles intromittatur. Particulæ enim Ignis omnis sensibiles sunt, cum sub rutulo aut alio aliquo colore sensui præsentantur: Colores autem in admodum raris & tenuibus substantiis rarissimè inveniuntur, sed in densis & solidis: statuendum itaq; adversariis necessario in rarissimo corpore colorem densissimum, aut saltem partiunculas istas Ignis intromitti in meatus se minores aut saltem sensui minùs obvios; quorù utrumq; suà abundat absurditate. 4. Inveniuntur multa corpora diaphana, quæ concipiunt Ignem & candent, ut vitrum, Crystallus, & Gemmæ quædam pretiosæ: Quæro hîc utrum ista eri-

am tales in se admittant poros & meatus, per quos ignea ista substantia transmittatur. Si non admittant iuxta illos non cadent: at experientia testatur oppositum: Si vero admittere dicantur: Regerimus, 1. hoc esse contra naturam omnium Diaphanorum, in quibus requiritur tum partium tenuitas, tum totius substantiæ continuïtas. Quæ autem prorsus sunt continua non possunt admittere tales partium hiatus & interruptiones, quas pori isti semel admissi introducunt. 2. Si tales in candenti vitro pori statuuntur tum vel in superficie tantum, vel in intimiori substantiâ: Non in superficie tantum, 1. Quod tota Interior substantia conspicitur ignita, quod fieri non possit, si superficies tantum esset poris pervia: 2. Si superficies esset multis poris confragosa, non esset continua, quia in multis poris multæ sunt superficies: multiplicem autem superficiem semper comitatur opacitas. Deinde pori isti non inveniuntur in intimiori substantiâ, quia sic in solido ex multiplici cõcavitate multiplex erit superficies. At hoc nullo modo admittendû. 1. Quia (ut supra) ex multiplici superficie introducitur opacitas; quod non deprehendimus. 2. Ex multiplici superficie in solido excavato multiplex in solido esset Refractio, contra experientiam omnium

omnium Opticorum, qui statuunt omnē Refractionem, cum sit ex contactu, fieri solummodo in extimâ vitri superficie, eamque esse semper in vitro uniformi uniformem. 3. Concipere non possum quomodo tota vitri diaphaneitas ab Ignis Rubedine auferatur pro tempore, modo pori tales admittantur. Non enim Ignis totam eius substantiam occuparet. 4. Si tales pori sint in vitro, qui possunt Ignem transmittere in intimiorem substantiam, tunc nihil impediret quo minus aër etiam tales subeat meatus: consequentia est maxime probabilis: quia Aër videtur Ignem nostrum substantiæ suæ subtilitate & Raritate superare: quia (ut supra diximus) Aër minime ab aliquo sensu percipitur, Ignis autem sub densissimo colore oculis præsentatur: nec colores isti sunt corporis combustibilis, quia sæpe deprehenduntur in cadentibus Diaphanis, quæ ante Ignis adventum non erant colorata, aut saltem alio colore tincta. Iam quod aër per tenues istos poros non omnino transvolet, facile invenimus non tantum in vitreis vasculis, sed etiam in utribus inflatis vitro minus solidis, quæ per multos annos in se retinent id, quod habent aëris inclusi, sine aliquâ sensibili differentiâ: Quod si essent meatus aliqui licet insensibiles, fieret tamē necessariò ut in

multis annis esset sentibilis, imò ut totus aër  
expiraret & evolaret: ex his omnibus certi-  
ssimè liquet (quomodocunq; se divertant ad-  
versarii) vaporem & combustibile accensum  
non posse simul ut duo corpora consistere: su-  
perest ut demonstremus vaporis aut combu-  
stibilis corrupti locum, Ignem minimè sub-  
ire posse, ut hâc ratione cū lignis subsistat. Si  
enim dicant prius corrumpi cōbustibile, quā  
Ignis generetur, tum vel penitus Annihilabi-  
tur, vel saltem ex illo Ignis producet: Non  
prius: quia in corporibus unius corruptio-  
nē comitatur semper alterius generatio: ne-  
que possibile est viribus naturæ, ut corpus  
aliquod in Nihilum redigatur, cū hoc solius  
Agentis Infiniti sit peculium. Si verò poste-  
rius affirmant; ex re combustibili fieri Ignē,  
Dicimus, 1. sententiam hanc maximā impli-  
cari difficultate. 2. Hinc non evinci Ignem  
esse siccum sed potius humidum esse. Si enim  
combustibile per sui corruptionē transeat in  
Ignis substantiam, tum combustibile intel-  
ligant necesse est vel remotum, ut lignum &  
stuppam: vel proximum, ut vaporem humidū  
in tali latentem combustibili. Si prius: nobis  
non contradicunt: hoc enim statuiamus cor-  
rumpi & dissolvi igneā combustionē, neque  
hinc aliquid evincunt. Si proximum ut humi-  
dum

dum viscosum & sulphureum velint, hisce premuntur angustiis. Humidus vapor non prius corrumpitur totus, quàm Ignis etiam extinguitur: cum itaq; per nullam temporis moram Ignis maneat post absumptum Humidum, fieri non potest ut ex illo corrupto generetur: si enim aliter statuatur ab adversario, supponamus exempli causâ minimam ultimamq; humidi Combustibilis particulam ab Igne devorandam; Quæro ego utrùm hæc corrumpatur eodem momento cum particulâ illâ Ignis ex illa generandi, vel diverso? Si eodem momento, nulla erit generatio: Siquidē nihil in eodem momento generari potest & corrumpi; cum corruptionem rei præcedat semper generatio. Qui verò statuunt ignem fieri ex corrupto combustibili, dicāt necesse est eodem Ignē generari momento quo combustibile corrumpitur: quare maneat oportet aliquantispër post corruptum illud combustibile, ut Ignis eodem non extinguitur momento, quo combustibile corrumpitur. Si diverso, ergò manebit Ignis aliquantispër sine subiecto pabulo aut materiâ combustibili; nec solum pro instanti, sed pro aliquâ temporis morâ; quia ad corruptionem illius sic geniti prævia requiritur dispositio materiæ & lucta contrariarum qualitatū, quæ in momento absolvi

absolvi non possunt. At nusquam experimur aliquam Ignis partem constituisse aut constare posse sine pabulo aut fomento : quod non raturum tantum in Ignibus nostris culinaribus, sed etiam (juxta Philosophos) in phantastico illo Ignis elemento, quod inveniemus (si fidē Philosophis adhibeamus) non nisi in perpetuā aëris mutatione & conversione in Ignem nutriri & conservari: ut abstracta illa, quā asfingunt igni, puritas non tam in naturā locum inveniatur, quā in cerebro opinantium. 2. Si ex combustibili materiā fiat Ignis, tū vel propriā aliquā generatione, quā substantia rei de novo producitur, vel saltē per Rarefactionem, aut aliquam aliam mutationem Accidentalem. Non per generationem aliquam propriē dictam, quia omnis talis generatio supponit aliquam pugnam inter contrarias qualitates, quæ viam sternat ad novam formam introducendam. At in generatione Ignis talis lucta contrariarum qualitatum non reperitur. 1. Quia experientia testatur Ignem aliquando productum esse, ubi tales qualitates non inveniuntur: ut ex Refractione & cōcursu Radiorum solarium in Crystallo, ex quo Aër aut aliquid aliud combustibile attritum concipit Ignem. Quæro hīc ubinam existant qualitates illæ contrariæ; Non in ip-  
sis

sis Radiis seu lumine solari: quia ex ipsorum  
 Peripateticorum sententiâ accidentia sunt, i-  
 deoque talium qualitatuum non possunt esse  
 subiecta. Deinde si tali qualitate afficerentur,  
 esset proculdubio illa qualitas nulla alia quam  
 calor: At calor in calidum Aërium tanquam  
 in contrarium non agit. Tandem nullum Ac-  
 cidens vi suâ producit substantiam per mo-  
 dum veræ generationis. Nulla enim causa  
 producit effectum se nobiliorem. Nihil au-  
 tem aliud generans causa cogitari potest, in  
 cuius virtute agit. Porro contrariæ istæ qua-  
 litates non habent locum in aëre, quia idem  
 subiectum non capax est duorum contrario-  
 rum. Aër autem solo gaudet calore & humi-  
 ditate: quare in hac generatione Ignis ex Ra-  
 refactione Radiorum Solarium, nulla qualita-  
 tum se prodit contrarietas. Idem iudicemus  
 de productione Ignis ex Attritu chalybis &  
 filicis, aliisque huius generis Experimentis.  
 2. Statuunt Peripatetici Ignem nonnunquam  
 produci per Antiperistasin, cum vapor aliquis  
 viscosus frigore corporum ambientium inter-  
 clusus & constrictus accenditur. Quaro hîc  
 utrûm calor ille interclusi vaporis pugnam  
 exerceat cû externo frigore, ita ut superetur  
 à frigore, vel saltem frigus illud superet? Quia  
 certissimum est ad omnem generationem sub-  
 stantia-

substantialem talem inter contrarias qualitates exerceri pugnam, in quam altera pars vincat & vincatur. At hic calor internus non vincitur, sed potius ex Accidenti corroboratur; quia ob excessum & Intensionem degenerat in Ignem. In Igne autem calor est intensissimus. Deinde si frigus vinceret calorem, in hac lucta non converteret in ignem, sed potius in elementum contrarium, sibi consentaneum. Omne enim Agens contendit, ut passum reddat sibi simile. Tandem calor non omnino vincit frigus, sed potius ex illo ambiente quodammodo superatur: ut nihil omnino hic relinquatur adversariis, in quo querant sibi diverticulum. 5. Contraria semper se mutuo expellunt, nec alterum alterius presentiam inhiat, sed adversatur. At in Ignis productione nihil tale sese prodit: sunt enim multa combustibilia, quae attrahunt ad se Ignem ex modica distantia, ut Oleum Naphthae, & huius generis alia: quae Ignem miram quasi aviditate hauriunt. 5. Haec pugna inter contrarias qualitates nullo modo est explicabilis. Dum enim ex vapore humido fit Ignis per alterius Ignis contactum; quare utrum calor Ignis illius generantis agat in frigiditatem vaporis; aut siccitas Ignis (quam fingunt) in humiditatem vaporis: aut saltem calor in humiditatem vaporis. Non prius; quia



quia vapor humidus, in quo Ignis depascitur, est ex Theſi calidus & non frigidus: ut abundè explicatur apud Ariſtotelem in Meteorologicis: non ſecundum, quia ſic Ignē non accenderet ſed potiùs interimeret, dum expellit humidum, proprium ipſius Ignis pabulum & fomentum. Deinde ſiccitas non videtur ſufficiens ad introducendam Ignis formam. 1. quòd ſiccitas inter qualitates minimè ſit actuoſa. 2. experientia teſtatur multa eſſe corpora quæ ſunt in ſe ſicca & aptiora ad ſiccitatē Ignis recipiendum: quæ tamen ex attactu Ignis Ignem non concipiunt, ut lapides, Cineres, & huiusmodi. Tandem calor ſi agere ſtatuatur in humorē ſubſtantiæ vaporolæ, non agit ut contrarium in Contrarium, ſed potiùs ut Artifex in materiam, non actione corruptivâ ſed perfectivâ; non tranſmutativâ ſed Immanenti, humidū nimirum terminando. Vnde nulla hîc evincitur qualitarum contrariarum pugna ad talem Ignis generationem aſtruendam. Ex his clariſſimè liquet converſionē humidi combuſtibilis in Ignem non eſſe veram ac propriam generationem. Superèſt ut eorū examinemus ſententiam, qui volunt iſta corpora in Ignem converti per Rarefactionem; quæ reverà opinio videtur alterâ multò probabilior. At nihil hîc evincit adverſarii ad ſectitiam

fictitiam illam Ignis siccitatem astruendati.  
Vel enim in tali Rarefactione Aëris, aut alterius corporis combustibilis corpus illud accensum eandem retinet essentiam & naturam specificam, vel variat: Si eandem servet essentiam, & naturam servabit etiam humiditatem: Humiditas enim est qualitas genuina quæ vaporis cuiusq; naturam necessario constitatur. Dum itaq; idem realiter statuatur corpus & vaporis & Ignis, eadem necessario emerget humiditas quam antea habuerat. Si dicant speciem suam variare. Dicimus. 1. hoc confirmare tamē, non evertere hanc Ignis humiditatem. Si enim demus adversario transire jam in novam aliquam substantiam, nullo tamen in olimine probabunt transire in substantiam contrariam. Ignis enim (ut experientia docet, & nos sæpè probavimus) ab humido sulphureo fovetur & conservatur. At nihil in rerum naturam invenire licet, quod à suo contrario fovetur, sed potius ab illo corrumpitur & interimitur. Similia enim à Similibus omnino cōservantur. Cum itaq; Ignis in humido pascatur concludamus Ignem esse Humidum nō obstante speciei variatione, quam stabiliūt.  
2. Speciem variari qui dicunt, superiorum rationū Impetū sustinere non possunt: quia nulla nova species producitur sine generatione substantiali;

## EXERCITAT. VII. III

substantiali: At nullam esse hanc propriam generationem Ignis ex combustibili supra multis argumentis confirmavimus. 3. Variatio speciei supponit necessariò variationē forme substantialis: at quomodo talis Ignis forma, aut à quo Agente in materiā hanc introducatur, res est difficultate plena, ut agrè explicetur. Vbi enim Ignis in concursu Radiorum producitur, à quo Agente forma producitur? Quæro utrū à lumine vel ab alio? Aliud Agens in hac productione non se prodat. Si à lumine, tum lumen Agit vel tanquam Agens principale vel tanquam Instrumentum: non ut Principale, quia Accidens (ut supra) non tanti est, ut possit producere novam formam substantialem. Si sit Instrumentalis causa, tum proculdubio aut Instrumentum est Solis, aut alicujus alterius corporis Agentis. Non potest est alterius, quia nihil præter Solem ipsum per Solis Radium agit. Si sol per lumē suum producat formam Ignis, tum vel Transvehendo & infundendo hanc formam, aut saltem Educendo latentem in gremio materiæ. Non prius. 1. Quia lumen cum sit Accidens non potest alicujus substantiæ esse vehiculū. 2. Si forma hoc modo à sole esset derivata cœlestis esset naturæ & non elementaris, & sic nullo modo materiæ suæ proportionata. Si  
sol

Sol agat Educendo hanc formam substantialem è materiâ: tum vel ut Agens dispositiva, vel ut Agens productiva: Si dicant causam esse dispositivam, non nobis contradicunt: sed adhuc querenda est alia causa Ignis productiva, & ita intacta manet difficultas: Non est causa productiva, 1. Quia tales productiones substantiales requirunt semper duorum corporum, Agentis nimirum & Patientis, contactum, eumq; non virtualement sed corporalem. At sol tantâ distantia à terrâ dissitus non nisi virtute suâ, id est, Lumine vel Influentiâ tangit terrâ. 2. In omni productione formæ substantialis prius producit ipsa forma, quam accidentia & propriæ affectiones ex illâ formâ fluentes: quia ista non immediatè producuntur per se, sed in suis formis, in quibus latent virtualiter, & ex quibus emanant. At hic modus producendi Ignem, prout apud Aristotelis interpretes exponitur, supponit proprias passiones & accidentia prius produci quàm formas substantiales. Volunt enim primò ex constipatione & concursu Radiorum plurimorum in uno puncto Aërē atteri plurimum & attenuari. Secundò ex hac aëris attritione produci in Aëre raritatem; ex Raritate autè produci volunt calorem: ultimò ex isto calore derivari Ignem. Quæ quidem explicatio  
duo

## EXERCITAT. VII. 113

duo involvit absurda. 1. Solem & lumen non  
 esse productivam causam huius formæ, sed  
 dispositivam. Attritus enim Aëris disponit  
 ad Raritatem; Raritas ad calorē; Calor ad for-  
 mam ignis, non tamen hæc generant aut pro-  
 ducunt. 2. Supponunt Raritatem præcedere  
 productionē suā calorem, calorem verò Ignis  
 formam, quod absurdissimum. Tertiā ratio-  
 nem generalem ad confirmandam Ignis hu-  
 miditatē desumere possumus ex definitione  
 Humidi apud Aristotelem. Humidum (inquit  
 Philosophus) est, quod facile alieno, difficultè  
 suo termino continetur, ut aqua, Aër, & hu-  
 iusmodi, quæ in vasculis & alveis facile con-  
 tinentur, in se verò apta nata sunt dissipare in  
 omnem partem ut dissipentur. Cui opponit  
 hanc definitionem siccis. Quod facile suo sed  
 difficultè alieno termino continetur: qualis  
 naturæ sunt lapides, qui cum siccissima sint  
 substantiæ, facile suis coercentur limitibus; &  
 ob substantiæ suæ duritiem non possunt se la-  
 teribus aut oris alicuius vasis continentis ap-  
 plicare. His explicatis, quis non iudicabit ex  
 harum definitionum criteriis, Ignem ex sen-  
 tentiâ ipsius Aristotelis (cui adherescunt) Hu-  
 midum esse, non siccum? Quis enim non pa-  
 lam videt Ignem aut ex se nullam, aut certè  
 variam & incertam vendicare figurā, adeo ut

suis terminis non nisi difficulter & per acci-  
 dens terminetur? Ea tamen Ignis subtilitas flu-  
 or & tenuitas est ut quibuscvis alicuius camini  
 continentis oris sese accommodet, facillimeq; al-  
 terius cōtinentis finibus terminetur. Appello  
 hīc Peripateticos omnes, utrū ex Aristotelis  
 sententiā, quatenus ex hisce definitionibus  
 Humidi & sicci eliciatur, Ignis statuendus sit  
 Humidus vel siccus? Apud me reverā non est  
 tanti Aristotelis aut cuiuscvis Philosophi au-  
 thoritas, ut eius gratiā veritatem dissimilem.  
 At in Aristotelicos hīc loquar superstitiosos,  
 qui malunt se cum Aristotele labi, quā ab  
 aliis institui. Vidēamus jam quid apportant  
 isti egregii Aristotelis asseclae ad muniendā  
 praeceptoris sui famam. Inter antiquiores  
 Philoponus ut hanc declinaret difficultatem,  
 voluit Ignem per se esse figuratam. Hanc ve-  
 rō figurā esse pyramidalem, sub quā Ignem  
 semper constare comperiret. At bonus hīc  
 Philoponus seipsum fallit. 1. Quia pyrami-  
 dis ista, quam Igni affingit, figura non per se  
 Igni, sed per accidens convenit: causa enim  
 quare Ignis semper ascendat in pyramidē si-  
 ne magnā difficultate explicatur. Partes enim  
 Ignis quō magis ad medium vergunt eō den-  
 siores sunt & fortiores, eō autem languidio-  
 res quō declinant ad latera. Hinc fit ut cum  
 Ignis

Ignis ob defectum pabuli in aëra degeneret, partes illæ, quæ ad medium sitæ sunt, diutius & constantius perstant: quò verò magis ad latera vergunt, eò magis, magisq; evanescent. Quò fit ut ab imâ parte ad supremam, cum flamma magis magisq; minuatur gradatim, relinquatur tandem ultimus longissimusque ille Radius qui sit Pyramidis hujus Axis, qui ubi definit, Terminat hanc figuram. Quare nihil hîc evincis Philopone ad præceptoris tui famam sustinendam. At plus forsitan vident oculi quàm oculus. Videamus tandem quàm dextrè præceptoris sui causam Patres graves Conimbricenses egerint. Homines isti quidem sunt ultra vulgaris Philosophiæ fines erecti, apud quos expectare non possum singularem ingenii acromoniam: ut qui jamdudum, sibi totum literarum imperium vèdicarent. Ignis (inquiunt illi) dici potest difficulter suis coerceri terminis, eò quod voracis sit naturæ, ut omne vasculum, in quo includitur, urat & corrumpat. O Acumen Iesuiticum! At doctissimi isti Aristotelis interpretes non negabunt (opinor) sequuti sui præceptoris vestigia, orbem Ignis in concavâ Lunæ superficie collocatum. Quæro utrum Orbis Lunæ continens & terminans istum Ignem aliquando ab igne aduratur & absumatur, vel non. Si

non aduratur, claudicat ista interpretatio; quâ talem Ignem excipiunt, quem tamen ex Philosophi sententiâ volunt esse purissimum minimèq; humidum. Si absumiatur, naturæ esse elementaris fateantur necesse est, & ita Quintessentiam magistri sui Idolum proscribunt. Non inuenio apud alios hisce succenturiatos quò Aristotelem suum validius tueantur. Quare adhuc immotum manet argumentum, quo evicisse me existimem ex definitione Humidi apud Aristotelem, Ignem esse humidum. At forsan ab hisce definitionibus Humidi & sicci ignem excipiunt elementarè in concavâ Lunæ superficie positum. Sequor adversarios. Hæc expositio non ponit aliquod discrimen inter Humidum & siccum in Reliquis; quis enim non palàm experitur, liquores multos, ut Aquam (quam vocant) fortem vasa metallicâ, in quibus includuntur, faciliùs & expeditiùs corrodere & absumere, quàm Ignis illa corrumpit; liquores tamen istos non negabunt esse humidos, nisi ex alterâ parte definitionè Humidi apud Aristotelem enervent. Nam certissimum est: difficultè suo, facillimè tamen alieno termino contineri: ut in vasculis vitreis, lapideis & similibus, quæ nec longâ temporis morâ cedunt. Igni; quare interpretatio hinc atq; hinc claudicat, ut candidis



## EXERCITAT. VIII. 117

dis ingeniis ruborem meritò incutiat. Tandem, ut terminū ponamus huic dissertationi, repetere oportet quod antea diximus, Humidum esse duplex. Alterū Mercuriale, Sulphureum alterum; quorum illud aqua vulgaris aut fluvialis naturam sapit: hoc olei. Illud Ignem extinguit, hoc fovet. Ignē reverà humidum esse contendimus, non humore illo Mercuriali sed sulphureo. Quā quidē distinctione sano modo intellectā, tota lis facillimē derimetur.


## DECAD. I.

## EXERCITATIO VIII.

*Motus cæli non est perfecte uniformis.*

**M**OTUS cæli omnes esse regulares, & uniformes, uno ore clamant Physici & Astronomi. Non difficile tamen Philosopho demonstrare, principium hoc aut falsum, aut malè à plerisq; intellectum. Accedat ratio: Motus uniformis & regularis, prout ab Astronomis universis definitur, est, qui æqualibus temporis intervallis æqualia absolvit spatia. At motus cæli omnis non est hujusmodi,

modi, quod sic probatur: Motus ille cœli quem Soli adscribunt, quo accedit ad *Æquatore*m per *Eclipticam*, & ab eâ versûs tropicos iterum bis in anno recedit, non est uniformis. Ergo universi cœlorû motus uniformes dici non possunt. Consequentia est clarissima. Antecedens confirmatur: quia quò magis ad *Æquatore*m per *Eclipticam* itur, eò spatia æqualibus temporibus transcendenda sunt majora. Minora verò, quò magis ab *Æquatore* *Ecliptica* divergit. Sit enim, exempli causa, Sol constitutus in puncto *Eclipticæ* A. converteretur



itaque (quatenus secundum sensum æstimamus) in Parallelo A. p. Deinde promoveatur Sol motu suo periodico in punctum B. Diurnus itaque motus Solis ibi constituti erat in parallelo

parallelo I. Q. cum postea gradietur Sol in Ecliptica usque in Equatoris punctum C. certissimum est, hic diurnum Solis motum mensurari ipso Equatore parallelorū maximo. Hinc elicitur, Solis motum aequalibus temporibus spatia transcurrere inaequalia; utpote parallelorum singulis viginti quatuor horarum spatio transcurritur, motu Solis diurno. Omnes tamen aequales esse non possunt cum versus Aequatorem gradiendo, majores sunt, minores vero prope tropicos, uti constabit ex thesi, & principiis Astronomicis. Quomodo itaq; hoc intelligendum est, uniformē esse cœlorum motum? Dico motum uniformem duplici sensu dici posse. Nam aliud est motus Uniformiter Uniformis; aliud Distormiter uniformis: Uniformiter uniformis dicitur talis, qui aequalibus temporis intervallis aequalia percurrit spatia. Distormiter uniformis est ille motus, qui aequalibus temporibus non aequalia quidem loca transcurrit, sed proportionalia. Priori sensu singulos cœli motus esse uniformes, ob præcedentem rationē, gr̃e concedimus, nisi novas admittamus hypothesēs, alienasq; ab eis, quæ vulgaribus Philosophis & Astronomis in usu sunt. Posteriori vero sensu libenter assentimus, motus omnes in cœlo esse uniformes. Licet enim unusquisque

æqualibus temporibus æqualia. Locorum intervalla non absolvit, nihil tamen obstat, quò minus temporibus æqualibus spatia transcurrat proportionalia; quòd cum vulgatis Astronomis libenter accipimus, ita tamen ut nec hec cum eorum principiis stare possit opinio. Si enim cælum æqualibus temporibus spatia percurrat non nisi proportionalia, tum motus iste esset vel voluntarius, vel naturalis. At neutrum dici potest. Non enim voluntarius: quia corporis est Inanimati, utpote cæli; motus vero voluntarius locum non habet, nisi in Rationalibus, quæ pro suo libitu & arbitrio actionem possunt intendere, vel remittere. Non naturalis: quia tum esset vel Agentis impediti, vel non Impediti, si non impeditur cælum in suo cursu, motus hic nec intendi potest, nec remitti, ut modo sit velocior, modo tardior! Siquidem (iuxta Aristotelē) *Agens naturale non impeditur agit semper quoad ultimum*; ita ut remittere suas vires, aut suspendere non possit; Si dicant, esse impeditum, ostendant necesse est à quo impedimento. Nemo enim Peripateticorum, quantum scio, talem in cælis resistantiam, aut obstatum posuit, aut admisit, aut, si posuerit, assernavit. Resistentia enim hæc esset aut ex parte Moventis, aut ex parte Mobilis: Mediū enim in

## EXERCITATIO IX. 121

in hisce contiguis non admittitur. Nulla est respectu moventis: quia movens non habet, à quo impediatur, quum nunquam fatigetur, nec pro arbitrio moveat, sed semper vires suas ultimas exerceat. Nulla respectu mobilis: quia eodem semper modo afficitur, nec ulla causa assignari potest, quare nunc potius, quam alias vires suas remitteret. Si dicunt, agens esse voluntarium, ex eo, quod Intelligentiæ in cœlis statuantur: Regerimus primò, Intelligentias illas ab Aristotele constitui motrices necessarias. Secundò, non dari tales Intelligentias orbium motrices alibi demonstrabimus. Quare concludimus, motum illum cœlorum non esse Regularem, juxta doctrinam communem, quam Peripatetici profitentur.

## DECAD. I.

## EXERCITATIO IX.

*Cometa non est meteorum igni-  
tum.*

**C**OMETA definitur apud Aristotelem,  
& pleròq; eius interpretes meteorum  
igneum, ortum ex Exhalatione sicca, viscosa,  
copiosa,

piosâ, amplâ, rectè compactâ, inque supremum aëra euectâ, ibidemq; inflammatâ, ex se vel omnes, vel aliquas in partes radios suos spargens, & certæ alicujus stellæ dominio subjectum. Ex hac Ignæ materiæ concretione, tanquàm è causâ genuinâ prædicere conatur in terris siccitatem, famem, bella, & quicquid aliud aut casus parturiat, aut ingenium hominis præjudicio captum sibi format horrendum & formidabile: At ne ipsum quidem Aristotelem, nec dum ejus interpretes rei veritatem attigisse, tam è Physicorum, quàm è Mathematicorum argutiis ita contendam stabilire, ut non amplius nobis videatur absurdum, aut temerarium, vel principè Philosophorum in hac causâ excussisse. Primò itaque cometam non esse materiam accensam, hoc patebit ratiocinio: Vel enim moles hæc secundum omnes suas partes simul accenderetur, vel paulatim, & successiuè. Nō prius: Primò, quia nulla alteratio aut mutatio fit in instanti: accensio verò talis sine mutatione fieri non potest. Secundò, experientia testatur, ignem nostrū culinarem non sine perceptibili temporis intercapedine se per totū lignum, aut aliud qualecunq; combustibile corpus se insinuare. Quidni igitur ignis illè, quem cum hoc nostro in eodem genere constituant

stituunt. Si successivo modo contingat cometam accendi, duo imprimis sequuntur: 1. Cometam omnem initio minorem, in medio apparentiæ suæ tempore maiorem appariturum. Cuius consequentia est clarissima, quia ignis quamdiu partem tantum illius materiæ occupabit, partialem tantum aspectum, & fulgorē nobis exhibebit: ubi verò totius molis materiā invadet, plenā facie cōspicietur. At illud in initio continget, hoc nō nisi interiectā quādā temporis intercapedine. Veruntamen nemo (quod sciam) hucusq; observare potuit, cometam à primo apparētiae tempore augeri unquā, & maiorem fieri, sed potius paulatim minui, & decrementum pati, donec tandem evanescat; quod observare licuit in insigni illo cometa superiori anno viso, quia primæ apparentiæ nocte incrementum non passus est sensibile, nisi quod ex interjecti aëris varietate & temperie forsā variationem quādam subierit: At talem mutationem à continuo incremento facillimum est distinguere; quum non ratā proportionē fiat, sed inconstanti. 2. Cometam non in unam tantum plagam comas suas sparsurū, sed in multas, ut modò bicaudatus, modò tricaudatus sit, modò hanc, modò illam figuram & imaginem nobis exhibeat. Consequentia ita stabilitur, quia  
 ignis

ignis, quodcumq; invadit corpus, materię seu pabuli sui rationem sequitur, & quodammodo figurā suā imitatur. At quis in corpore fluxili, inconstanti & quasi casu in supremam aëris regionem erecto, talem partiū *infigurā* & conformitatem somniare potest, quā stellam unius semper figurę & imaginis apparentem, idque per sex menses aliquando per annum ostenderet? Certè nec materiam talē in aëre pendentem, ita formatam, & quasi æquiponderatam, iudicio possum assequi, nec cometam ita mutabilem figurā & multiformē experiētiā observare. Quare improbabile est, cometam ex tali oriri igneę materię concrectione. Secunda ratio sequitur: Si cometa sit corpus sic accensum in aëre, tunc caudam suam post se averſam traheret, & Occisum versus motu suo diurno trajiciens barbam suam versus Orientem porrigeret. Conſequentia est rata experiētiā. Quis enim non experitur tadam aut faciem per aëra translata, flammam & scintillas post se trahere? Cuius causa (ni fallor) referenda est in tadę densitatem, & rationem flammę: Quum enim omne corpus motum resistantiam inveniat à medio, necesse est ibi maiorem esse hanc resistantiā, ubi corpus densius: ubi verò rarius, ibi minorem. Hinc fit, ut facis corpus solidius, tan-



tanquam validius, transeat impuniùs: flamma  
tanquam rarius & imbecillius plus ab aëre re-  
sistenti repercutiatur, ut facem à tergo sequi  
necessario cogatur. At cometam suam à tergo  
caudam post se trahere, ita experientia adver-  
sarium est, ut contrarium saepe accidere expe-  
riamur. Nam Cometam superioris anni Sole  
ab Orientis puncto vergente barbam suam  
versus Occalum porrexisse constitit; adeo ut  
barba cometam ipsum motu suo anteverte-  
ret; quod non in illo tantum cometa obser-  
vatum accepimus, sed in omnibus aliis barba-  
ris, qui barbam semper in plagam Soli oppo-  
sitam ejaculantur; cuius rationem infra uberi-  
us explicabimus. Satis hinc demonstrare come-  
tam aversam post se caudam non trahere,  
quod erat propositum. Sit hæc ratio tertia:  
Nullum Ignitum aut Elementare ascendit su-  
pra Lunæ sphaeram. Cælum enim Peripateti-  
cis est quinta quædam essentia à quatuor ele-  
mentorum mixturâ & compositione aliena,  
quæ tales fumos nullo modo potest admitte-  
re: At cometas multos visos fuisse supra Lu-  
nam, vel peritissimorum Astronomorum ob-  
servaciones & suffragia confirmarunt. Quod  
etiam de prædicto cometa superiore anno vi-  
so asserere non dubitarunt: idque ex paral-  
laxe huius cometa, quam Lunari parallaxe  
minorem

minorem esse deprehendêrunt. Ex quo Mathematicis certissimū iudiciū, cometæ corpus supra Lunam ascendisse. Quarta sit hæc: Corpus in supremā aëris regione accensum talem sibi motum vindicare non potest: Vel enim motus ejus esset proprius, vel alienus, seu mutuatus. Non proprius quia mixta omnia prædominantis elementi motum sequentia recto tantum motu pollerēt, nec circularem gyrum conficerent. Si hunc motum aliunde acciperent, tunc vel à fixis, vel à planetis. At neque à fixis, neque à Planetis motum suum accepisse prædictum illum Cometam, evidenter liquet: quia neque horum, neque illorum cursum est imitatus. Nam præter motum diurnum (quem forsàn à primò mobili accepit) motum ostendit periodicum ab Austro in Septentrionem, quo à spicâ Virginis, propè quàm in initio conspectus fuit, usque ad secundam stellâ in caudâ Vrsæ majoris promoveretur. Quo quidem motu ab Austro in Septentrionem neque Planeta, neque fixæ unquam incitantur, ut futile omnino videatur cometæ motum aliquem stellæ altius ascribere. Denique improbable est, tantam exhalationum copiâ e terrâ ascendisse, qualem cometæ illius quantitas postulare, Vix enim tantæ magnitudini sufficeret totus orbis

orbis terrestris vel in exhalationes solutus. Convulsis tandem principiis Peripateticis, superest, ut exponamus, quid nos de cometa sentiamus. Statuimus nos, cometam esse corpus aurâ ethereâ paulò spissiore, ita tamen translucentum, ut radios solares appellentes transmittat; per hoc corpus radii solares transeunt refractionem quandam patiuntur, & in opposito Soli loco se mutuò interfecantes, rursus juxta leges Opticas divergunt à se mutuò, & quasi barbam ostendunt. Quod ex eo facile demonstratur, quod omnes comete, qui unquam visi fuêrunt (quantùm ex antiquiorum aut recentiorû scriptis potuimus intelligere) caudam suam in oppositam Soli partem directè projiciunt. Qui quidem effectus in aliam causam derivari non potest, quam in hanc radiorum solarium trajectionem, quam hîc astruimus. Regerent hîc forsân Adversarii: hanc quam Cometæ assignamus constitutionem cum legibus non stare opticis: si enim ex trajectione radiorum solarium per corpûs aliquod Diaphanum, reliquo tamen Æthere paulò spissius, oriatur, fiet necessariò ut huius Cometæ Barba minimè sit conspicua. Consequentia videtur clarissima: quia lumen à Diaphano corpore imbibitum, non solet esse conspicuum, aut aptum ad visum terminandum.

dum. Quemadmodum cernimus Aëra nostrū radiis solis illuminatum visum omnino non terminare. Licet illud sit per quod, tanquā per medium, corpus aliud intuemur. Ad hoc respondemus hanc nostram assertionem tantum principiis quadrare Opticorū, ut Optica planē confirmet, minimē verō enervet hunc Trajectionis modum: quod enim Cometarū Barba non obstanti corporis Ætherii Diaphaneitate tam clarē sit conspicua duplex assignatur causā: Altera nimirum Densitatis Luminis, altera Distantiæ: *Densitatis*, quia tradunt Optici (quod & experientia confirmat) illuminatum corpus, licet in se Diaphanum, ubi tamen lumen maximē condensatur, non nihil in se opacitatis recipere, ut visum terminet. Lumen verō per corpus Cometæ trajectum & transmissum ex Refractione maximē condensari testantur Optici, cum se mutuō in Æthere interfecent quasi in puncto unde postea divergant: *Distantia*, quia Diaphana luminata ubi a magnā loci Distantiā visui obversantur, condensari & crassescere incipiunt quoad sensum, ut tanquam vera & genuina opaca visum terminent.

DECAD.

## DECAD. I.

## EXERCITATIO X.

*Nullum agens naturale est uniforme.*

**A**GENS uniforme definimus illud, quod ita distantiae proportionatur, ut ad Aequalia loci intervalla Aequalem semper edat effectum; in spatio propinquiori maiorem, in remotiori minorem. Hunc ad modum natura agere censetur apud vulgus Philosophorum: ut Calidum ad aequalia spatia aequalem calorem producere statuatur, & Lumen ad aequalia etiam spatia illustrationem medii aequalem introducere. At contra hanc assertionem, nullum Agens naturale ad hanc Uniformitatem se componere, contendam demonstrare: idq; unicâ hac, eâq; mathematicâ ratione, quâ nihil certius invenitur. Si enim hoc admitteretur, ut calidum, exempli causâ, ageret uniformiter, fieret necessarium, ut aequalibus intervallis aequalia essent caloris decrements: At hoc non concedendum. Consequentia est clara ex superiori definitione agentis naturalis. Minor demonstratur. Si enim ex aequo caloris profusio & spatium divideretur, sequeretur

1. *Equalium causarum alteram alterâ robustiorem esse.* 2. *Infirmiorem robustiore potentiorem esse;* quorum neutrum sine manifesto absurdo admittendum. Prius sic ostenditur: Exponentur calida duo proportionē duplâ,


A  $\frac{8}{7}$  6

B  $\frac{4}{3}$  2

quorum alterum A sit ut 8 alterum B ut 4. Illa autem habenda est causa, seu agens fortius, quod validiorem edit effectum. At cum calidum majus A per unum spatium producit calorem ut 7, & per secundum spatium calorem ut 6; tum ad hunc effectum omnes simul partes calidi A cocunt pro viribus suis; itaque pars dimidia utpote 4 præstat caloris 6 partem dimidiam, nempe 3: in secundâ autem calorem ut 2 ex hypothese. Itaque fortior est pars dimidia calidi majoris, quæ graduum est 4, quàm calidi B, item ut 4, solitariè agentis: siquidem hoc per duo spatia calorem tantum ut 2 producit. illa verò per duo illa spatia calorem ut 3: proinde æqualium agentium seu calefacientium, hoc modo alterum altero erit fortius & validius. Secundum ex eadem


## EXERCITAT. X. 131

dem hypothefi confirmabimus, minus calidū  
 majori calido esse potentius seu validius. Sint  
 enim duo calida, unum A ut 8, alterum B ut  
 5: ubi A producit 5 ibi ejus dimidia pars, ni-  
 mirum 4, producit ipſius 5 dimidium, ſcilicet  
 $2\frac{1}{2}$ . at ibidem calidum B, quod dimidio cali-



di A majus est, producit tantum 2; quare ca-  
 lidum B quod majus est, infirmius est calidi  
 A dimidio, quod est minus. Quare omnino  
 absurdum cenſeri debet, agentia ad æqualia  
 ſpatia æquales producere effectus. At hic di-  
 cent dimidiam partem agentis alterius eſſe  
 fortioſiorem ſolitariè agente ut 4, ex Vnione &  
 conſpiratione partium: Quia *Vis unita for-  
 tior*. At hoc axiomā aut malè à plerifq; intel-  
 ligi, aut penitus falſum eſſe, ſine difficultate  
 demonſtrabo. Vbi enim dicunt, vim unitam  
 eſſe fortioſiorem, vel hoc intelligunt; ex multis  
 partialibus agentibus conſtari unum agens  
 totale, quod ſit quolibet partiali per ſe ſump-  
 to fortius: vel ſaltem unum & æquale agens  
 ex unione fortius agere, quam idem ageret  
 ſeorſim

seorsim & disiunctim. Prius si dicant, nihil aliud asserunt, quàm totum esse majus suâ parte, quod lumine rationis certissimum est. At hic sensus axiomatis non attingit quæstionculam: Non enim hic instituimus comparationem inter totum & partē, sed inter Agens ut 4 solitariè agens, & Agens ut 4 coniunctim agens. Neutrum enim pars est alterius. Posteriori sensu si accipiant, dicimus falsum esse: singula enim Agentia ut calida, dum simul conspirant in medio, non maiorem, nec minorem edunt effectum, quàm unumquodque per se seorsim. Quod sic facile demonstratur. Exponatur agens calidum A ut 4 primò solitariè agens, cuius activitatis semidiameter in medietatum decrementsa distribuetur, constabit luculenter calorem in proximo spatio futurum ut 2 in secundo ut 1 qui virtutis istius est terminus. Quum itaq; tota semidiameter in tot spacia dividatur, quot calidum A




cōtinet partes proportionales, certum est singulis spatiis

calorem unâ medietate deficere, quousq; tandem in minimum naturale terminetur. Sit enim idem Calidum ut A, quod 4 esse diximus, coniu-



coniunctum calido B item ut 4, similiterque ambo agant, dico in proximo spatio aequalem effectum edi ab A nunc, atq; dum per se solitariè agere statueret. Exponatur enim aliud



quoddam calidum duobus A & B simul acceptis, viribus æquale, nimirum C ut 8, palam experiemur hoc calidum in proximū medium calorem duplo maiorem producere, illo

quod A per se solum. Quum calidum omne,  
 quò majus est, eo per paria intervalla calorem  
 majorem producit. At duo calida A & B si-  
 mul sumptâ quantitate æqualia sunt calido  
 C ex hypothefi: Quare æqualia erunt agendi  
 virtute. Quare A & B dum simul operantur,  
 calorem edunt singula in medio proximo suis  
 viribus proportionatum. Quare nec majus,  
 nec minus quàm unumquodq; per se seorsum  
 edere potuisset. Causam ut enucleemus qua-  
 re agens naturale non sit uniforme, dicimus,  
 ad hoc caloris decrementū duo concurrere:  
 quorum primum est radiorum (nam agentia  
 hæc naturalia non nisi radiis agere statuimus)  
 seu linearum quibus virtus transmittitur à se  
 invicem *Divaricatio* & *Elongatio*. Quum e-  
 nim virtus activa ex quolibet agentis puncto  
 tanquàm è centro exeat, omnes autem lineæ,  
 quò magis à centro elongantur, eo magis re-  
 tenuentur, necesse est, ut magis magisque defi-  
 ciant & labescant. Neque tamen nobis ipsis  
 contradicimus, quasi vires ex unione acquirere-  
 rent; quòd superius negavimus: sed potius  
 quòd plura agentia non tantum possint in spa-  
 tio majori, quantum in minori, ubi sibi invicem  
 arctius applicantur: aliud autem est sta-  
 tuere duo agentia, ut duo calida vires maiores  
 acquirere ex unione per se, quasi idem plus a-  
 geret

geret coniunctum, quàm disjunctum: aliud autem, duo calida plus posse in maiori spatio, quàm minori. Nam licet unumquodq; agens effectum semper producat viribus suis proportionatum (quod superius demonstravimus) unumquodq; tamen agens per se eo minus potest, quò magis attenuatur, sive coniunctum, sive disjunctum. Vnde fit, ut in longiori distantia à centro decrementum maius patiatur: Quod si nulla alia causa concurreret, proculdubio agens omne produceret effectus æquales ad æqualia loci intervalla, cuius contrarium supra demonstravimus, Nam hæc radiorum elongatio & divaricatio erit distantis æqualis iuxta principia Geometrica. Sequitur ergo alla causa huius decrementi, nimirum *Finite natura* illius Agentis, cuius virtus in infinitum distribui & dividi non potest: Quod si *Æqualibus spatiis Æqualiter* deficeret, nihil obstaret, quò minus in infinitum extendetur illius virtus, & nunquam omnino deficeret, quia nulla particula ita parva, quæ non dividi Mathematicè possit; Saltem in longissimum spatium vires suas exerceret agens naturale, & longius, quàm experientia aut sensus ratum faciat. Ex his omnibus satis liquet, nullum agens naturale esse Uniforme, seu æqualibus spatiis effectus æquales edere: attamen

men ut demus aliquid ad versarijs, dicimus, Vni-  
formitatem esse duplicem; aliam Equalita-  
tis; Proportionis alteram: Priori sensu uni-  
formem esse actionem naturalem; inficias i-  
mus, quod supra fecimus: Posteriori verò mo-  
do largimur quidem Agens esse Vniiformem:  
hoc est, ad æqualia spacia effectus cedere non  
æquales, sed proportionales.

## DECAD. II.

## EXERCITATIO I.

*Transubstantiatio est Impossibilis.*

**P**ANEM sacramentalem in verum Christi  
corpus conversum esse Pontificis in ore  
est perpetuum: Quod veritatis & sanioris  
Philosophiæ studiosis (præsertim ubi princi-  
pia Theologiæ non contradicunt) Impossibile  
esse demonstrabimus. Extra Philosophiæ no-  
stra pomeria non evagabimur, & sacris lite-  
ras illotis manibus non atrectabimus, ita ta-  
men ut principia struamus quedam ad Theo-  
logicas adversariorum captiones, evertendū:  
Transubstantiationem esse Impossibilem pri-  
mò sic evincimus. Si Transubstantiatio sit  
possibilis, tum vel modo Naturali, vel super-  
naturali

naturali, & divinâ potentiâ. Non modo naturali; quia adversarii fatentur hoc modo fieri non posse. Deinde si modo naturali, tum Generatione: quia Creatio non est modus naturalis; aut nulla generatio sine prævia dispositione materiæ: Transubstantiatio verò supponit instantaneam mutationem, quæ præviam materiæ dispositionem non supponit. Non modo supernaturali & divinâ potentiâ, sic enim productio hæc esset Creatio; At si creatio dicatur, hæ rationes contradicunt; Primo omnis Creatio est ex Nihilo: Transubstantiatio verò non est ex Nihilo, sed ex pane. Secundo si sit creatio, tum vel aliquid fit, vel non fit. Si fiat, ergo antea non erat. Quare quum corpus Christi fiat, proculdubio antea non erat corpus Christi: At hoc falsissimum. Quia corpus Christi & antea erat, & nunc est in cælis: dicere verò corpus hoc toties creatum esse, quoties occurrit sacramenti consecratio, nihil aliud est quam dicere, quod iam est, denuo creatum esse, quo non possit aliud esse absurdius. Si non fiat aliquid in Transubstantiatione, tum non esset productio, & per consequens non fieret Transubstantiatio, & ita unum corpus in aliud non converteretur; cui refragatur thesis adversariorum. Secunda ac cedit ratio: Si panis consecratus

cratus in corpus Christi cōvertatur, tunc hoc ubiq; fieret, ubicunq; panis consecraretur. At non: Ergo. Consequentia est clara, quia alias in Sacramento non semper esset Transubstantiatio. Minor confirmatur. Si ubicunq; Sacramentum ministraretur fieret Transubstantiatio panis in corpus Christi, tum vel in Idē corpus mutaretur, vel Diversum. Non in Diversum; quia plura essent Christi corpora, & ita esset monstrum, quod absurdum: si in Idem Christi corpus converteretur, tunc idē corpus esset in diversis Locis. At hoc est impossibile. Maior est clara, quia Transubstantiatio est in multis locis. quare si in Transubstantiatione omni sacramentali panis in corpus Christi converteretur, proculdubio illud unum corpus in multis esset locis. Minor confirmatur: Vbicunq; Idem corpus statuitur esse in multis locis, ibi corporum & quātitativē est Penetratio: At hoc in saniori philosophiā non est admittendum. Consequens confirmatur; quia nihil aliud est hæc corporum Penetratio, nisi eū diversorum corporum dimensiones sunt simul sine alterius cessione. Minor confirmatur, penetrationem corporum non admittendum. Omnis penetratio supponit contactum. Contactus iste, qui penetrationis est vel accidit corporis termino, vel interna

ternæ crassitie. Si dicant, contactum esse terminum, non esset penetratio; plus enim requirit hæc quam ut termini duorum corporum coniungantur. Deinde quæ externò tantum terminò tangunt, non eodẽ, sed diverso gaudent loco. Si admittant tangere secundum solidum tunc dicant necesse est aliquem in solido esse contactum corporis, quod Aristot. & omnes faniores Philosophi negant. Contactus enim corporis definitur superficietum coniunctio.

3. Si Transubstantiatio sit possibilis, tum per modum Productionis, vel Substitutionis. Non per modum productionis, ob id quod attulimus in prima ratione. Si per modum substitutionis, quod hodiè statuunt doctiores Catholici, tum corpus Christi vice panis substitutum vel antea Præsens erat, vel non. Non prius; quia nemo dicitur id substituere, quod antea in eodem loco erat præsens. Si dicant, non antea præsens esse, tunc corpus Christi motu prius aliquo huc ferretur necesse est, quam substitueretur. At hoc non. Consequentia est clara, quia nihil posse esse præsens illi, cui antea non adfuit, sine motu. Minor confirmatur, quia si motus esset aliquis, tum vel in Instanti, vel in Tempore. Nō in Instanti: quia nullus motus est in Instanti, iuxta Philosophos. Non in Tempore: quia omnes volunt Trans-

Transubstantiationem esse instantaneam. 4.  
Si admittatur talis Substitutio, qualem intel-  
ligunt Pontificii, tunc Panis, cuius vice cor-  
pus substitui intelligitur, vel manet idem qui  
antea, vel saltem Annihilatur. Non manet i-  
dem qui antea fuit; quia sic non esset Tran-  
substantiatio, sed Consubstantiatio, quod ne-  
gant Pontificii, & affirmant Lutherani. Si  
Annihilaretur, hoc sequeretur absurdum, Ac-  
cidens esse sine subiecto. Sensus enim testatur  
Colorem, quantitatem, Figuram, Gustum,  
ceteraq; accidentia panis in Eucharistiâ ma-  
nere, ut necessum sit, aut sensum ultra modum  
falli circa proprium obiectum, quod negant  
Philosophi, aut saltem Accidentia hæc in aëre  
pendere à nullo subiecto sustentata: At fatē-  
tur Pontificii accidens aliquod existere posse  
sine subiecto divinâ potentiâ; quod reverâ  
dogma licet in se ita videatur absurdum, ut  
refutatione non egeat, haud desunt tamen è  
saniori Philosophiâ rationes plurimæ ad hoc  
evertendum. Nam nihil implicans contradi-  
ctionem potest esse obiectum divinæ potentie:  
At quid magis videtur Naturæ contradicere,  
quàm Idem à Seipso seponere, & Accidenti,  
quod naturâ suâ pendet à substantiâ, natu-  
ram aliquam per se subsistentem affingere?  
Quod si dicant non per se subsistere, sed à di-  
vinâ



vinâ virtute sustentari: Regerimus primò, Deû causę materialis vicem subire non posse; quum sit actus purissimus, & potentiam passivam admittere non possit. Secundò, talem accidentis existentiam sine subiecto, sine corporum & quantitatis Penetratione concedi non posse facile est demonstrare: Penetratio enim quantitatis, est quum duæ magnitudines seu quantitates sunt simul in eodem loco: At statuunt in hac Substitutione, quantitatem panis divinâ virtute sustentatam pendere sine subiecto. Occupabit ergo eundem locû in quo est Aer seu aliud aliquod corpus, vel saltem aeris illa portiuncula prius Annihilabitur, quàm quantitas illa in illum recipiatur. Si prius admittant, duæ quantitates, nimirum aeris & panis, erunt simul, & ita erit manifesta quantitatis penetratio. Si posterius, admitte- tur Vacuum. Vacuum enim definitur apud Aristotelem, locus non repletus corpore: quã- titas verò illa suo corpore seu subiecto exuta non potest subire munus corporis, ut vacu- um proscribat, & locum per se repleat. Quare ex his necessario sequitur vel penetrationem quantitatis, vel saltem vacuum esse introdu- cendum. Quibus nescio quid absurdius in Philosophiâ dici aut somnari possit. Conclu- dimus ergo ex his rationibus, Transubstantia- tionem

tionem illam Papicolarum, quocumq; demum intelligunt modo, esse futile delirantis cerebelli somnium, & minimè possibilem.

## DECAD. II.

## EXERCITATIO II.

*Intelligentia non sunt cœlestium orbium motrices.*

**N**ihil Peripateticis familiarius quàm motuum cœlestium Regimen Intelligentiis committere: Quod ego mysterium sub aliâ non capio similitudine & Idolo, quàm caniculæ in culinis rotæ intus excavatæ conclusæ ad verum convertendum, aut captivi alicuius Triremi Turcicæ alligati. Hoc Aristotelis commentum dum pensiculatiùs introspectio, satè mirari non possum summas illas, quibus Stagyrta noster urgebatur, angustias: ut qui in cæteris penè omnibus nimis Physicus videri voluit, ad Metaphisicas hic adigeretur argutias, ad orbés suos stabilendum. At hoc in Aristotele facilè condonandum, quia, juxta sua (ni fallor) principia aliud non potuit statuere. Cum enim animalia solummodo à se moveri in Physicis tradidisset, necesse

neceſſe erat, ut orbes illos cœleſtes aut perpetuæ quieti deſtinaret, aut Motorem illis aliunde quaereret. Interpretes verò Ariſtotelis nonnulli eadem licet admittūt principia, non tamē integrè & plenariè, ſed plurimis diſtinctionum cautiunculis limitata, ut tales ſine abſurditate Intelligentias poſſint proſcribere. Quicquid hi fecerint, ſtatuo ego ſimpliciter & abſolutè, nullas tales admittendas eſſe Intelligentias orbium Cœleſtium Motrices: quod Ratiocinio ratum faciam. Si Intelligentia ſit principium Motus in orbe tunc erit neceſſario aliquod reſpectu orbis Intrinſecum, vel Extrinſecum. Medium enim hîc non admittitur: non eſt Intrinſecum; ſic enim vel eſſet de eſſentiâ orbis, vel aliquod eius Accidens: ſi de eſſentiâ orbis ruruſus eſſet vel materia, vel forma; hæc enim duo ſunt, quæ concurrunt ad eſſentiam Rei conſtituendam. Intelligentia autem non eſt materia orbis. Primò, quia nemo hoc auſus eſt affirmare. Secundò, materia corporis eſt, in quo potentia eſt, ſeu principium paſſivum. Intelligentiæ autem ſtatuuntur Actus ſuorum orbium. Deinde non eſt forma: ſic enim eſſet vel forma Aſſiſtens, vel Infor-mans: ſi aſſiſtentem dicant, fateantur neceſſe eſt Intelligentiam eſſe extrinſecam, & ita ad eſſentiæ eius conſtitutionem non concurrere, ſiquidem

siquidem assistens forma est respectu essentie  
 Externa, ut Nauta respectu Navis, ut illius cui  
 adiungitur compositionem non ingrediatur,  
 licet ad motum conferat. Tandem non est for-  
 ma Informans respectu Orbis; 1. Quia forma  
 Informans in materiâ mergitur: Intelligenti-  
 a verò, licet ad materialis motum concurrere  
 statuatur, in ipsa tamen materiâ immergi non  
 statuitur. 2. Intelligentia cum sit substantia in  
 se completa & perfecta, tanquàm pars alte-  
 rius compositionem non ingreditur: quia  
 iuxta Peripateticos ex duobus in Actu enti-  
 bus ens per se unum non conflatur. 3. Si In-  
 telligentia sit forma Informans cœli, tùm ni-  
 hil impediet quo minùs cœlū dicetur verum,  
 perfectum, & propriè dictum Animal: Nihil  
 enim aliud requiritur essentiale ad Animal  
 constituendum, quàm materia ad Informatio-  
 nē idonea, & forma Animalis seu Anima il-  
 lam Informans materiâ: Cœlum tamen per-  
 fectum esse Animal Nemo quòd sciam adhuc  
 ausus est affirmare: Non nego Cœlum apud  
 Aristotelem frequentèr dici Animatum: at  
 Tropicè tantum hoc loquutum fuisse, & non  
 propriè, à suis Interpretibus intelligitur. At  
 quid tandem ex Analogicâ hâc & Metaphy-  
 sicâ Cœli compositione evincant Adversarii,  
 pensitemus. Cœlum (inquit Zabarella) com-  
 ponitur

ponitur ex Orbe & Intelligentiâ, tanquàm  
materiâ & formâ Corpus naturale, adeo ut  
totus Orbis materiæ subeat vicem, Intelli-  
gentia verò formæ. Ex hisce infero, 1. Cœ-  
lum hâc ratione esse corpus aliquod aggrega-  
tum; & sic neq; esse per se unum, nec in præ-  
dicamento collocandū, nec in scientiâ defini-  
endum: At hæc omnia Peripateticis absurdissi-  
ma. 2. Tale semper est corpus, qualis est  
compositio: quare ex compositione hâc Tro-  
picâ seu Analogicâ erit corpus naturale non  
univocè, sed Analogicè: & ita sub vero sub-  
jecto & genere Phylilogiæ nō continebitur:  
Quare aut nihil obtinet Analogica hæc com-  
positio cœli ex orbe tanquàm materiâ & In-  
telligentiâ ut formâ, aut saltem præter hanc  
quærenda nobis est in cœlo alia. Præsertim  
cū corpus quale cœlum est apud omnes, in-  
telligatur substantia ex materiâ & formâ cō-  
posita. In quâ definitione per materiam &  
formam non intelligunt nisi veram & pro-  
priè dictam, qualis in prædicta illa cœli con-  
stitutione non reperitur. Hanc difficultatem  
animadvertens prædictus Author, coactus est  
tandem producere distinctiunculam: Forma  
(inquit) duplici modo potest accipi; vel pro  
alterâ parte compositi quæ respondeat mate-  
riæ, vel saltem pro cuiusq; rei quidditate. Pri-

ori sensu nullam Cœlo assignat formam, præter ipsam Intelligentiam, cum nullam sibi vindicare visum sit formam à materiâ secretam, aut distinctam: sed talem quæ appellari potest vel materia formata, vel forma materiata. Posteriori verò sensu non veretur Formam Cœlis præter Intelligentias tribuere: quæ reverà ipso auctore, describente, nihil aliud erit quam Cœli quidditas. Egregia sanè responsio & Philosopho digna! At quæro hinc utrum quidditas illa quam hinc vocant formam, sit talis qualem in Physicis inter principia enumerat Aristoteles, vel alia: Si alia, oportet ut plura assignet principia quam tria, ut aliam cœlo compositionem largiantur & non Physicam; cum apud omnes esse corpus Naturale statuatur: quorum utrumq; Aristotelicæ doctrinæ absonum. 2. Hæc ratione & accidentia omnia & Angeli ipsi in se corpora naturalia dicenda sunt, cum non minùs tali quidditate gaudeant: nihil aliud enim per talem quidditatem possum intelligere quam essentiam rei positam extra nihilum, quod nulli entium generi denegabunt adversarii. At quicquid hinc largiamur adversariis, nobis non officium: quia dum aliam in Cœlo compositionem querant quam ex orbe integro & Intelligentiâ, fateatur necesse est Intelligentiam respectu orbis

Orbis esse Extrinsecam, & ita compositionem  
ejus veram & propriam non ingredi. Porro  
non dicent (opinor) Intelligentiam esse Orbi  
moto Intrinsecam, ut Accidens in suo subje-  
cto. 1. Quia talis Angelus seu Intelligentia a-  
pud omnes statuitur esse in se substantia, ac  
proinde inhærendi modum Accidentalem si-  
bi vindicare non potest. 2. Si concurreret tã-  
quam Accidens esset tantum causa motûs  
Instrumentalis: unde querenda esset nobis  
causa aliqua prior ex qua talis motus deriva-  
retur. Omne enim Accidens agit vi substan-  
tiz. Ex his constat Intelligentiam non esse a-  
liquid Orbi Intrinsecum. Iam si ad alteram  
partem se divertant, & dicant esse Extrinse-  
cū: quero rursus utrum motûs negotio se im-  
miscet, quatenus præparat & disponit orbē  
ad motum, vel quatenus concurrit ad ipsum  
movendi Actum: Prius nullo modo est neces-  
sarium, quia sic disponderet & præpararet sub-  
jectum indefinitè ad motum, vel saltem ad  
hunc vel illum motum determinaret: Non  
prius, 1. Quia materia ex se prima capax est  
omnium formarum, omniumq; motuum: ut  
non tali indigeat præparatione. 2. Hâc rati-  
one & Intelligentiæ requirentur ad motum  
in omnibus aliis, quia non dissimilis invenitur  
ratio. 3. Si Intelligentia præpararet & dispo-

neret subiectum, hoc faceret vel ut forma se  
adjungens materiæ, vel ut efficiens: Non ut  
forma; sic enim vel ut forma substantialis vel  
accidentalis: non ut forma substantialis: quia  
materia per formam suam informantem satis  
præparatur ad motum, ut Intelligentiis non  
habeat opus. Non ut forma Accidentalis:  
quia diximus esse substantiam. Non ut effici-  
ens concurrat in hac præparatione: quia effici-  
ens omne agit introducendo formam in pas-  
sum: At talem formam minùs esse necessariam  
demonstravimus. Tandem non opus est Intel-  
ligentiæ ut disponat ad certum & determina-  
tum motum: Quia forma & natura cuiusq;  
Corporis intrinseca disponit & restringit ad  
certum & definitum motum: Motus enim  
omnium corporum ab Intrinsecâ rerum na-  
turâ definitur, non ab Extrinsecâ: sic enim nõ  
essent Naturales sed violenti. Deinde Intelli-  
gentiæ non omninò concurrunt ad movendi  
Actum in cœlis: sic enim vel ad motum In-  
choandum, vel ad motum Continuandum, vel  
ad motum Regulandum. At neutro concurrat  
modo: Si Intelligentia statuatur motum In-  
choare, tum vel quatenùs ad istum motum  
dat Inclinationem vel quatenùs corpori sic  
moventi primum largitur Impetum: Non  
prius: hoc enim nihil aliud est quàm ad mo-  
tum



tum disponere: At tali dispositione ab Intelligentiā præstandā non opus esse supra docuimus. Deinde non primum motui impetum largitur. 1. Quia motus cœlestium corporum Aristoteli est æternus; ut nullum impetūs sui principium agnosceret. 2. Cœlum non debemus omnino spoliare communi omnium corporum privilegio, quæ suis formis sine formā hâc Assistenti moventur: unaquæq; enim res ad suam perfectionem à naturâ ordinatur: motus autē iste circularis cœli est perfectio. At dicant forsan hoc reliquis corporibus non concessum esse ut à se moveantur: Gravia enim & Inanimata reliqua videntur ad suum motum externum aliquod requirere. Respondeo aliam esse rationem in motibus rectis, aliam in circulari: utrumq; tamen à formā internā proficisci facile probabo. Motus enim rectus elementorum cum sit corporis extra locum positi, & per mediū in suum locū reversuri, semper aliquam externam supponit Resistentiam. Quare in illo duplex assignare possumus motus principium, externum nimirū & Internum: quorum illud disponit ad motum, hoc motum excitat. Externum est duplex, Remotum, & proximum. Remotum est Generans quod producit formam: Proximū verò illud quod removet Impedimentum:

Immediatum verò Internū quod ad motum excitat, est ipsa forma Rei Interna. Iam verò in Cœlis talia obstacula & Impedimenta non inveniuntur, ut liberior censeatur forma ad motum talem concitandum quàm in Inferioribus. Huc Accedit quòd apud Aristotelem ipsum quem sequuntur, Natura, quæ maximè in formā est cōspicua, definiatur motus principium: ut Naturam cœlo interdicanē necesse est, aut necessariò fateantur à forma internā esse primum Motūs Impetum. 3. Si Intelligentiæ primum Impetum motui cœlesti impertiant, tūm vel Consentiente omnimodò naturā ipsius mobilis aut Renitente: non Renitente; quia sic, cūm fiet etiam ab Intrinseco principio, motus esset violentus, quē omnes Naturalem esse predicant. Non omninò Consentiente: quia quæro rursus, utrūm mobile excitatum ab Intelligentiā patiat, vel non; si non patiat non movetur: quia moveri est pati. Si patiat, erit proculdubio Resistentia: Quomodo enim talis sine Resistentia Passio cœlis inveniatur non capio. Vel enim ab Intelligentiā orbi illata in illo orbe terminatur vel non: Si terminetur, patietur orbis ab Intelligentiā ut aliquo modo resistat. Si non terminetur, non patietur. 4. Si Intelligentiæ inchoent cœlorum motum, tunc in aliquo

quo orbis loco fideant necesse est: quæro itaq;  
utrum ad totam orbis latitudinē diffundatur  
Intelligentia, vel in aliquā ejus parte ter-  
minetur? Si ad aliquam Orbis partem defini-  
retur, non moveret orbem integrum. Orbis  
enim apud nos (prout præmonstravimus) sunt  
fluidæ & non consistentes substantiæ: unde  
motā parte non necesse erit ut totum movea-  
tur. Haud secus ac in Aëre, cum sit fluentis  
naturæ totus orbis Aëris non movetur ad  
motum unius partis. Nec respondere hūc pos-  
sunt toti orbi virtute tantum præsentem esse,  
non essentiā: quia virtus & operatio perpetu-  
æ sunt Comites essentiæ, nec probabiliter an-  
gelus ibi operari statuatur ubi non est præsens  
essentia: præsertim non locis tam longè dissi-  
tis. Si integrum orbem implere statuatur talis  
Intelligentia, hæc adversantur. I. Quia multo  
probabilius statuitur unus angelus totam si-  
mul substantiā suā occupare Terram. Terra  
enim respectu orbium superiorum vix obti-  
net unius in illis fixæ stellulæ rationem, aut  
quantitatem, cum respectu illorum instar  
puncti in nihilum evanescat. At hoc impro-  
babile nobis reddunt hæ rationes. Primo im-  
manis talis illa angeli immensitas; deinde  
missio angelorū à Deo ab unā parte Terræ in  
aliā, cujus in sacris literis non raro facta est

mentio. Legimus enim in Libro Iobi satanam qui inter spiritus infernales supponitur esse princeps & maximus, Deo interroganti respondisse, rediisse se à Terra hûc & illûc circumcundo: Quorsum autem totum terræ ambitû circumiret, si antea præsentia suâ occupasset. 2. Legimus in sacris literis Angelos ad homines in Terram à Deo fuisse missos & delegatos: fieri autem hoc non potest quin transitu omnes orbes interjectos secarent, & per consequens Angelus alter alterius substantiam invaderet: quod an sit probabile aliis iudicandum relinquo; difficultatem hîc non discutio, quia in aliam quæstionem non descendam. 3. Sic arguitur: entia non sunt multiplicanda sine aliquâ necessitate: At nulla necessitas urget ut Intelligentias admittamus Cœlorum Motrices. Si enim aliqua lateat Necessitas proferatur in apicem. Attonitos hîc intueor plerosque Peripateticorum, ut non habeant quod opponant præter Reverendam Aristotelis auctoritatem & cunctiæ. Cristas hic erigunt patres Conimbricenses & præceptoris audacter satis suscipiunt patrociniû: Corpora Cœlestia (inquiunt) non moventur effectivè à propria formâ. Nam sic moverentur à propria forma tanquàm principali causâ, ut corpora gravia & levia à suis progenitoribus:

vel

vel à minùs principali causâ quomodo prædictâ gravia & levia à suis formis. Non moventur à propriâ formâ, ut à causâ principali: quia sic essent viventia: quia unum præcipuum vitæ indicium est habere in se motus sui principium: Non posteriori modo: quia sic cum Accessus esset Naturalis, Recessus esset contra Naturam: quare cum utriq; in cœlis motus admittantur, nequaquam à formâ suâ accipiant. Non parui (quæso lectores) pendite hoc Argumentum, ut quod non à vulgaris farinæ Philosophis profectum fuerit, sed ab illis qui totam literarum Monarchiam suo jure vendicent. Cedant tamen nobis (opinor) ut ea nostro subjiciamus examini, quæ non intelligimus. Instantiam illam aggrediamur primò gravium & levium, quæ reliqua tanquam notiora nobis enucleent. 1. Gravia & levia (inquiunt) moventur à Generante tanquâ principali; à formis verò tanquâ causis minùs principalibus: At Generans (inquam) causâ est corporis mobilis, potius quam motus, Remota non Immediatâ, quæ corpus ad motum aptum facit, non quæ motum ipsum excitat. Vbi igitur comparisonem instituant inter Generans & formam, tanquam causam principalem & minùs principalem, vel causas has accipiant in eodem genere tanquam

quam subordinatas vel in diverso genere. Nō in eodem genere sunt, quia 1. Generans est causa Externa, forma verò Interna. 2. Forma est immediatè & per se causa: Generans autem nequaquam, nisi ex Accidente, quatenus illud producit quod motus est subiectum. Si fateantur esse in diverso genere non rectè distribuunt in principalem & minùs principalem: Cùm istæ in eodem genere & subordinatis necessariò intelligātur. Vtteriùs urgeor supponamus à Socrate commissum esse homicidium: quæro utra hujus homicidii causa sit principalis, an Socrates aut Pater Generans? Si pater Generando talem filiū incidisset in homicidiū, plectendus esset pater potius quàm filius: at iustitia refragatur: Si filius: ergo filius dicendus esset causa principalis, non generans. 2. Vbi dicunt solummodo animalia habere insitum sibi movendū principium in se, falluntur plurimùm, nec suum dextrè intelligunt Aristotelem. Annon enim ipsi fatentur gravia & levia moveri à suis formis: quidn̄ igitur illis largiamur internum suū motus principium? At moventur (inquiunt) gravia & levia à suis formis, non tamen sine adminiculo Externarum Causarum, Generantis nimirum & Removētis impedimenta. Subtilis Responsio; sed audiant:  
Ce-

1. Generans æquivoco modo appellatū fuisse  
Causam principalem supra ostendimus: Pri-  
matum ergo decernimus formæ, non gene-  
ranti. 2. Ratio cur formæ gravium & levium  
Externis indigeant adminiculis, est quarenda  
in Impedimentis, quæ sine Externo Agente  
non remouentur: At in cœlis cum nulla talia  
occurrant obstacula, tales causas Externas  
non requirent saniores philosophi. 3. Assig-  
nari potest motus in Inferioribus, qui talibus  
Externis Causis non indiget, ut unusquisq;  
motus magnetici Corporis. Videmus enim  
Compassi Nautici ab Ortū in Occasum co-  
dem parallelo transversū Indicem seu liliū  
(ut vocant) semper suū mutare situm.  
Omnes hic fatebuntur esse motum aliquem.  
Quæro hîc utrum ad hunc motum interce-  
dat aliqua Causa, quæ removeat Impedimen-  
tum. Nulla hîc se prodit: erit enim vel Aër,  
seu medium, vel corpus movens, vel Terra:  
Non Aër, quia Iudex illè qualiscunq; rarita-  
tis aut qualitatis fuerit Aër, suū attinget  
punctum, suū polum: Non corpus movens:  
quia non impedit unquam quò minus ad ve-  
rum se suū componat sitū, aut promoveat:  
Licet enim à loco in locum promoveat, non  
tamèn propriè removeere dicitur obstacula;  
quia in singulis, quò promovetur, locis, quod  
suū

suum est assequitur, nec minùs hîc quàm illîc impeditur: unde non opus sit hîc aut illîc aliquo quod removeat impedimentum. Tandem Terra non removet impedimentum: Quia Terra in Magnetem ubicunq; terrarum situs fuerit proprium obtinet imperiû, Interim terra (ut ostendimus) stilum magneticum non cogit sed allicet: Nec alio movetur modo stilus magneticus quàm à propriâ suâ formâ, interim tamen ut ad polum terræ collimet non tanquàm punctum Attractivû sed respectivû. 4. Deniq; ubi dicunt motus Accessus & Recessus non esse Naturales sed necessariò sequi, si Accessus sit naturalis, Recessum esse contra Naturam: Respondemus: vel per Accessum & Recessum istû, intelligunt motum Trepidationis seu (ut alii volunt) Librationis in eodem orbe, vel saltem motus illos oppositos quæ in diversis orbibus concipiuntur, Si priùs: concedimus ambos non simul esse naturales. At hinc apud nos nihil evincât adversarij: quia nos tales motus in nostris Hypothesibus tanquam impossibiles reieccimus: Si posterius affirmant pueriliter argumentantur, quia singulis orbibus singulas assignant Intelligentias: ut nihil hîc sequatur absurdi si duæ Intelligentiæ in diversis orbibus siti orbes suos contrariis motibus agent. Nec apud  
nos



nōs erit absurdius si duæ diversorum orbium  
formæ motuum diversorum aut contrario-  
rum effectrices extiterint. Ex his omnibus  
satis constat, Intelligentias ad motum Cœlo-  
rum inchoandum non esse necessarias; sed po-  
tius eorum naturæ contradicere. Quod verò  
huiusmodi intelligentiæ ad continuandū ta-  
lem motum minimè sint necessariae facilè de-  
monstratur. Hoc enim concessio, orbem ali-  
quem cœlestem motum suum suâ formâ tan-  
quam causa inchoasse, quæro utrū ipse per  
se motum suum continuare possit vel vires  
remittat & flaxescat: Si prius admittant, In-  
telligentia non erit necessaria: frustra enim  
vires suas conferet illis, quæ equo modo per se  
moverentur sine tali adminiculo. Si vires suas  
remittat forma in hoc motu post inchoatio-  
nem, tunc quia in motu suo impeditur vel  
quia ultrò deficit: Non prius: quia tale in cœ-  
lis Impedimentum, aut obstaculum, è suis  
principiis non admittunt. Non posterius:  
quia ex noto Philosophorum Axiomate *Om-  
ne Agens Naturale non impeditum, agit sem-  
per quoad ultimum*, nec vires suas aut remitte-  
re novit, aut intendere. Quare nulla talis me-  
tuenda est in cœlorum motu fatigatio quæ  
Intelligentiarum ope indigeat. Denique ad  
motum cœlestium Corporum regulandum  
non

nō opus esset, censemus, talibus Intelligētis, quia omnis motus naturalis à suâ formâ & Naturâ regulatur & determinatur ad certum finem & terminum, ut nihil omnino in Naturæ operibus admittatur vagum, sed ad certos limites destinatum. Quare ab eodem habet motus cœli principium & Terminum sibi præscriptum.

## DECAD. II.

## EXERCITATIO III.

*Logica pugno, Rhetorica palma, non  
rectè à Zenone compara-  
tur.*

**E**OU S QU E processit artium ignoratio apud vulgatos Philosophos, ut Logicam ad steriles syllogismorū spinas restringerent, Rhetoricam non nisi in explicato orationis stylo constituerent; quâ persuasionē Logicam pugno, Rhetoricam palmæ populari quâdā similitudine compararent. At quàm fragili fundamento hanc suam stabiliērunt opinionem, paucis instantiis ratum faciam. Primò enim, si Logica pugno, Rhetorica palmæ rectè comparetur, tum quia Logicus contractiori modo

modorem explicat, Rhetor explicatori: At hoc non verum; quare & laudicat comparatio. Consequentia maioris patet ex eorum dogmate, qui hoc asserunt. Minor confirmatur, 1. Omnis orationis expansio & fusio est ex Amplificationibus, quibus orator in dicendo utitur: At omnis amplificatio est opus Logici. Maior est extra controversiam: Nam orationem dilatare, & partes exaggerare, nihil aliud est, quàm Amplificare (uti nomen ipsum denotat.) Minor confirmatur; quia hæc qualiscunque amplificatio posita est in argumentis Logicis, & Logici agri fructus est quidam, non Rhetorici. Siquidem argumenta Logica apud politiores distribuuntur in Probandia, Explicantia, & Amplificantia, quæ divisio desumpta est ex usu, quod alia probationi, alia explanationi, alia demùm amplificationi deferuiunt. Quum enim ad amplitudinem orationis requirantur 1. materiæ Inventio. 2. Dispositio argumentorū. 3. Ornatus: Certissimum est, Primum è variis scientiis suppeditari pro oratoris scopo & proposito: Secundum è Logica: Tertium è Rhetorica: ita ut variæ scientiæ materiā exhibeant, Logica argumentorum nexum & dispositionem; Rhetorica solummodò orationis flosculos & condimentum; amplificationis autem artificium in  
varia

varia argumentorum dispositione positum esse, nemo sanus inficiabitur. Quod si dicant, dilatationem orationis non in argumentis tantum Logicis esse positam, sed etiam in tropis & figuris, quæ Rhetoricæ sunt peculiaris: Regerimus 1. tropi & figuræ hæc Rhetoricæ amplius grassari non possunt, quam fundamenta, in quibus sedem figunt. At fundamenta troporum & figurarum prima sunt argumenta Logica: Quare hæc etiam qualiscunq; dilatio orationis Logicæ potius, quam Rhetoricæ tribuenda: plus enim tribuere debemus causæ & fundamento, quam illis quæ à tali fundamento oriuntur. 2. Multis instantiis probare possumus, tropos & figuras non semper dilatare, sed etiam curtare, & contrahere, ut hæc differentia non sit nisi accidentaria & fortuita. Exempli causâ, sit hæc pura & Logica propositio comparativa: *Ut se habet anima ad corpus, sic se habet Rex ad Rempublicam.* Hanc propositionem tropo modificatam sic reddit Rhetor: *Rex est anima Reipublicæ:* Quis autem breviloquium hîc non agnoscit Rhetoricum, quum metaphora illa sit ad unicam solummodo dictionem contracta quædam similitudo? Deinde quis non videt in Apophorisi, aliisque figuris inter strictiores cancellos orationis propositum contrahi juxta Rhetores,

Rhetores quod Logicus quâ Logicus pleni-  
 us & explicatiùs adhiberet? Quocirca certifi-  
 simo iudicio constabit, comparisonem illam  
 minimè ferendam esse.

## DECAD. II.

## EXERCITATIO IV.

*Motus gravium non est simpliciter  
 naturalis.*

GRAVIA omnia naturalitèr ad centrum  
 descendere ita sancitum in scholâ Peri-  
 pateticâ ut contradicere sit piaculum. Hanc  
 tamen sententiam cum grano salis accipien-  
 dam esse facile illis persuadebimus, qui ratio-  
 ni confidunt plùs quàm authoritati. Natura-  
 lem esse motum Gravium ad centrû non ne-  
 gamus: at simpliciter esse naturalem sine om-  
 ni internâ resistantiâ inficias imus: Motum  
 simpliciter naturalem definimus, quo grave  
 secundum omnes sui partes sine diverticulo  
 aliquo aut deviatione ad centrû collimat: At  
 hoc esse impossibile demonstrabimus. Cen-  
 trum enim intelligitur punctum aliquod in  
 medio totius universi fixum & imaginarium.  
 Omnes autem partes alicujus gravis rectâ li-




necesse est ut D F & E G sint inter se paral-  
 lela: ideoq; in centro non concurrent, & per  
 consequens non sunt radii prædicti circuli:  
 motus verò purè naturalis alicujus gravis ad  
 centrum radio mensuratur. Quod si fingamus  
 D directè moveri ad centrum per lineam D  
 C, & E per lineam E C, & ita in centro con-  
 currerent, tunc grave illud suos amitteret  
 quantitatis & extensionis limites, & in cen-  
 tro esset Indivisibile. Quod absurdum. Quare  
 ad centrum terræ naturaliter non descendit,  
 nisi unicum illud punctum H quod centrum  
 gravitatis constituitur: Quod quidem lineam  
 seu radio H C defertur: Ratio petenda est ex  
 vi & efficaciâ centri gravitatis in H positi,  
 quæ ex omnium partium aliquid gravitati  
 conferentium unione confurgit. Nam partes  
 alicujus gravis continui (quamdiu in toto sunt  
 partes) duplicem habent inclinationem, alte-  
 ram primariam, alteram verò secundariam.  
 Primaria est, quâ ad suum gravitatis centrum  
 propendunt, illique adhærescunt: secundaria  
 quâ partes omnes cum toto suo ad centrum  
 terræ, quanto possunt impetu vergunt. Hinc  
 fit, ut partes illæ extremæ, quæ ex se universi  
 centrum non attingerent, unione tamē suâ in  
 centro proprio interno, & viriū suarum com-  
 municatione centrum illud universum conse-  
 quantur:

quantur: quatenus nimirum corporis gravi  
centrum omnium suarum partium viribus  
communicatis stipatum rectè descendit ad  
centrū vniuersi. Sicut in præcedenti schemate  
D punctum lineæ extremum per lineam D H  
transfundit vires suas in H centrum corporis  
gravis. Similiter punctū E quasi vires emit-  
tet per E H in prædictum gravitatis centrū.  
Quare licet ex se ob necessitatē naturæ devi-  
ationem habent à centro vniuersi, tamen ex  
consequenti punctum illud attingunt, quate-  
nus unitur in puncto H, quasi cum eo descen-  
dit in radio H C. Ita prudenter disposuit na-  
tura, ut quod partes in se non possunt centri  
sui virtute assequantur. Hinc facile reddi po-  
test ratio, quare gravia omnia in fine veloci-  
us moventur quàm in initio, aut medio. Quum  
enim puncti gravitantis unica sit inclinatio ad  
propriū centrū gravitatis internum, alia ad  
externum, nimirum vniuersi centrum; certū,  
eo minorem esse resistentiam, quo due istę in-  
clinationes cœunt & coherent. At magis co-  
herent & coalescunt: quo magis magisque ad  
centrū mundi provehuntur. Moveatur enim  
exempli causā grave D H E, ut sit inferius in  
P M N, dico in hoc statu inclinationem pri-  
mariam ad suū centrum internum cum se-  
cundariā ad centrum externū vniuersi magis  
coincidere



coincidere vel cōvergere quàm in priori. Si-  
quidē inclinatio illa primaria in utroq; casu est  
similis: Inclinatio verò extremarum partiū ad  
centrum externū in priori casu dirigitur li-  
neis  $D C$  &  $E C$ , hic verò lineis  $P C$  &  $N C$ .  
At verò linea  $N C$  magis conspirat cum  $N$   
 $M$  linea inclinationis primæ, & angulus  $H E$   
 $C$  superstruitur basi  $H C$ , Angulus verò  $M$   
 $N C$ , basi  $M C$ . Quum itaq;  $H C$  sit major  
 $M C$  per 9. com. notion. Euclidis, erit per  
theorem. 11. lib. 1. Euclid. angulus  $H E C$   
major angulo  $M N C$ , & per consequens li-  
neas inclinationis primariæ, & secundariæ  
magis à se mutuò divergere in loco superiori,  
& à centro universali remotiori quàm in lo-  
co inferiori. Quare minor erit resistentia in  
motu gravium propè centrum, & ita velocior  
erit motus in fine, quàm in principio. Ratio-  
nes aliorum philosophorum è Physica rerum



constitutione du-  
ctas non repu-  
dio, sed hanc an-  
tefero. Nam præ-  
ter internā hanc  
resistentiam ma-  
thematicam ali-  
am agnoscimus  
externā ab aëre  
seu

seu medio, quod eo est minor, quo corpus magis ad centrum vergat. Plures enim partes resistentes inveniuntur, ubi corpus grave magis à centro distat. Sit enim, exempli causa, lapis aut aliud grave cadens in planum telluris E F, perspicuum erit in loco A aeris densitatem inventurum ut 4: descendat in B, erit aeris resistentia ut 3: tandem in C, erit illa prædicta resistentia, ut 2: denique in D, loco proximo erit tantum ut 1. Ex quibus sequitur motum illis propè centrum esse omnium velocissimum. Quibus etiam accedit magnetica gravium inclinatio, quæ ibi maxime corroboratur, & quasi animatur, ubi telluris quasi matricis sinum & fomentum maxime per sentiscit.

## DECAD. II.

## EXERCITATIO V.

*Bruta rationis quodammodo sunt  
capacia.*

Sancitum est hucusq; in Scholâ Peripateticâ Bruta Animantia rationis esse penitus expertia: adeo ut Bruto forsan haud dissimilibus habeatur qui oppositam partem tueatur.

Ita

Ita fastuosum est humanum genus, ut sibi soli arrogare soleat quod natura benigna mater reliquorum commune fecit. Detersâ tamen præjudicii labe, conficiam uno vel altero ratiocinio, in his Brutis latere etiam quosdam Rationis Igniculos & indicia, ut non sine iniuriâ è Rationalium Choro excludantur. Primum itaq; argumentum petemus ex Discursu effectu Rationis maximo: ex quo fundamento talis procedat argumentatio. Bruta discurrunt: ergo rationis sunt capacia. Connexio est certissima: quia proprius & immediatus effectus, supponit semper propriam & immediatam causam. Discurrere verò, cum nihil sit aliud, quam aliud ex alio deducere, rem cum re cõferre, aliud cum alio disponere, certissimû Rationis est Indicium. Antecedens suadetur multiplici experimento. Offeratur Equo aut Asino quædam fœni portiuncula. Equus ille aut Asinus (experientiâ monstrâte) desiderio illius fœni allicietur, & se movebit ad illud illicò degustandum. Quæro hîc utrûm Equus hoc fecerit simplici tantum eius objecti Apprehensione motus, an Discursu quodam Deductivo? Si simplici ac primâ Apprehensione, tum vel intellectûs, vel sensus: Non Intellectûs: quia talem in Brutis potentiam non admittunt. Si sensûs, tum sensitiva objecti ali-

ius Apprehensio ageret in locomotivā facultatem vel Immediate, vel saltem Mediate, mediante nimirum appetitu sensitivo. Aliud enim medium quo sensus agat in locomotivam operationem præter appetitum sensitivū non invenitur. Si simplex objecti sensibilibus Apprehensio agat in locomotivam operationē Immediate, hoc intelligetur necessario vel de actione objecti sensu prius apprehensi, vel de actione sensus ipsius. Objectum ipsum sensibile quatenus tale non agit in hanc potentiam locomotivam : quia propriam solummodo attingit facultatem, nec aliud præstat apud sensum quàm ut sentiatur. At actum sentiendi localis motus ex se necessario non consequitur; cùm multa à nobis sentiantur ad quæ non moveamur. Deinde hoc patebit enumeratione sensibilium objectorum : vel enim hoc præstabit objectum apprehensum à sensu Externo, vel Interno. Non externo: quia sic vel à visu, vel ab auditu, vel à gustu, vel à tactu, vel ab olfactu. Non à visu: quis enim existimabit Equum aut Asinū tali spectaculo, eoq; nudo, ita delectatum ut gressus moveret, nisi sub colore aliud quiddam lateret, quod moveret appetitum? præsertim cùm eisdem serpiens oblati coloribus iisque splendidiore facie depictis, modo pabuli aut sceni species

species non suggeratur, Equus nihil cōmoveatur; quod si ex visione colligat esse pabulum, quo vesci possit, hoc non solum visus, sed aliquis visionem consequentis erit operatio, quod alterius est potentiae nimirum discursivae. Dum enim ex re visâ aliud quiddam eliciamus, nō simpliciter videmus, sed ex ipsa visione discurremus. Deinde non ab auditu, gustu, tactu aut alfactu locomotiva facultas excitatur; quia in tantâ distantia (quanta saepe accidit inter facultatem & objectum) Equus nec audit, nec tangit, nec gustat, nec olfacit. Quod si largiamur objectum hoc omnibus hisce sensibus esse prius cognitum & perceptum, non inde tamen sequitur locomotivam illam potentiam ab ipso objecto hisce sensibus apprehenso excitari, sed potius ab ipso appetitu sensitivo his objectis prius informato. Idem prorsus est judicandum de sensu interno: sensus enim Internus quod suum est solummodo apprehendit. relictis ad appetitum illis quae facultatem locomotivam excitent & afficiant: cum potentia sit juxta Philosophos non motrix sed cognoscens? Ex his clarissimè evincitur Objectum sensu apprehensum ex se non agere Immediate in potentiam locomotivam. Non difficilius erit demonstrare sensum ex se non agere in illam facultatem:

cultatem: quia operatio sensus non est aliud  
quàm ipsa sensatio, seu objecti sensibilis per-  
ceptio: At sensus dum suum percipit objectū  
non semper movet corpus, aut gressum loca-  
lē excitat; quippe aliud est sentire, aliud mo-  
vere corpus: Nam sensatio omnis in ipsa ob-  
iecti Apprehensione terminatur, nec ulterius  
ex se porrigitur. Deinde fieri non potest ut  
sensus aut Internus aut Externus hoc modo  
agat in illam potentiam; quia non sentit nisi  
commotum ab externo & materiali objecto,  
quale non est potentia illa prædicta ad motū  
localem. Tandem si dicant simplicem hanc  
objecti sensibilis apprehensionem agere ad  
motum localem mediante Appetitu sensitivo,  
ita ut appetitus prius à sensibus informatus  
excitet alterā illam potentiam, aut malè in-  
telligunt, aut idem nobiscum sentiunt. Quo-  
modo enim appetitus sensuum externorum  
Apprehensione simplici motus afficiat loco-  
motivam facultatem sine discursu aliquo aut  
deductiva operatione, si possint, expediant:  
vel enim idem obiectum sensibile movebit  
appetitum vel aliud obiectum ex illo forma-  
bitur. Non prius: quia sensibile quatenus est  
sensibile afficit tantum sensum, & notitiam  
informat non movet appetitum. Si posterius  
affirmet, ex illo obiecto sensibili aliud for-  
mari

mariquo appetitus commoveatur, dicant necesse est aliud ex alio elici & deduci & sic discursum necessario introductent. Siquidem formatio novi hujus speciei ad appetitum concitandum necessario discursum comitatur aut supponit: vel enim formatur ex recipiente Appetitu, vel ex offerente sensu, vel ex objecto oblato: non ex ipsa facultate recipiente 1. quia objectum tantum recipit, eoque patitur non agit aut producit quicquam. 2. Si recipiens suum sibi formet objectum sequetur aut objectum aliunde oblatum non esse necessarium, aut saltem æquè affectum esse ad omnia: quod absurdissimum. Quia potentia quælibet recipit objectum suum eodem modo quo offertur, non quo facit. Non ex sensu offerente formatur hæc species nova: quia sensus præsentat tantum quod suum est, non alienum: neque enim appetitus plus largiri potest quam ipse in se complectitur; hoc autem objectum adhuc est tantum sensibile non appetibile. Denique non ex ipso objecto oblato per sensum: hoc enim præstaret vel ut simpliciter Apprehensum, vel Operatione quadam collativâ aut deductivâ præparatum; Non prius; quia simplicem rei apprehensionem non sequitur appetitus, priusquam accedat dictamen aliquod Iudicii, ex terminorum collatione & discursu

discursu deductivo ortum. Nam juxta Philosophos eodem modo in Brutis movetur appetitus sensitivus à Judicio Sensitivo, quo in hominibus voluntas à iudicio Intellectivo. Hæc ut melius intelligantur, dicimus duplicem esse voluntatis sicut appetitûs actum; Alius est simplex, simplicem rei Apprehensionem consequens, qui est Delectatio: Alius collativus ut Assensus, aut Dissensus. Illa reverà primâ illâ obiecti apprehensione excitatur; hic verò practicum semper syllogismû ante se supponit. Quoties itaq; in Brutis commovetur Appetitus ad assensum aut dissensum (sine quo facultas locomotiva nunquàm excitatur) accedat oportet dictamen aliquod Iudicii sensitivi quod reverà nihil est aliud quam practici alicuius Syllogismi conclusio; insigne Rationis specimen. Hæc enim qualificunq; imperfecta (parcite verbo) Equi Deliberatio antequàm suum appropinquet pabulum in hunc videtur syllogismum singularem resolvi posse: Hoc sub tali figurâ aut colore præsentatum est Fœnum: ergo à me devorandum: Antecedens pars ab anticipatâ quâdam notitiâ in Equi phantasiâ ingeneratur: Consequens ex discursu quodam deductivo elicitur; ex quo statim sequitur consensus Appetitus, locomotivæ facultatis stimulus. Si itaq;



in Brutorum phantasiâ talis reperiatur discursus, & deductiva terminorum collatio, quæ appetitui assensum aut dissensum commoveat, quis rationem proscribet? Siquidem motus Bruti localis arguit consensum quendam appetitus: Consensus appetitus quodammodo sententiam practicam aut saltem aliquod analogum: sententia practica discursus; Discursus Rationē. Si affirmant in Imaginatione sensitivâ, talem latere Discursum: non nego: At quid aliud erit ille discursus, quàm Singulare quoddam Ratiocinium? Nam componere Terminos, & aliud ex alio deducere, certissimum est Rationis indicium, nisi curiosius quàm vocis natura ferat vocem illam distinguant, & inanibus dictionum diverticulis quærant subterfugium. At dices: solus homo est rationis particeps. Dico, latius patere discurrentis & Ratiocinantis quàm Intelligentis vocem. Nam animæ Brutorum animantium (ut ostendimus) suus debetur discursus, non secus ac suū menti Intelligenti Ratiocinium: Nihil enim aliud intelligi volunt politiores Authores per rationem & discursum, quàm collativam operationem quâ aliud ex alio deducitur: quæ vocis acceptio Peripateticis ac Ramæis pariter in ore est perpetua. quod verò deductiva hæc notitia soli homini coaptetur

tur exclusis reliquis, credo ex hominum Superbiâ profectum, non Iustitiâ. Præter hæc, Discursum quendam in animâ sensitivâ delitescere prodit inter cætera pulcherrima illa facultatum sensitivarum cum Intellectivis comparatio. Tres vulgò in scholâ Aristotelis recensentur Intellectûs operationes: quarum prima est simplicium terminorum Apprehensio: Secunda in Compositione & Divisione terminorum occupatur: Tertia Discursus seu Dianoia appellatur; quæ nihil aliud est quàm unius ex alio deductio: Non desunt cõsimiles in animâ sensitivâ quæ his respondeant analogiâ haud inconcinna. Nam Apprehensioni simplicium terminorû in Intellectu, respondet in Brutis prima illa perceptio & apprehensio Objecti sensibilis; quæ an in sensu communi sit, an in organo Exteriori hîc non disputo. Deinde operationi Intellectûs secunde, nimirum compositioni & divisioni, respondet certa operatio apud sensum Internum Componens nimirum & distinguens. Distinguens ex eo liquet quòd canis distinguit canem aut hominem à lepore: Componens: quia in phantasia hanc videtur propositionem concipere; Hoc præsens est lepus: Item hanc propositionem: hic homo est fautor meus. Nam in tali propositione componit hos duos terminos  
(Hic

(Hic homo) & (Fautor meus:) Nam primâ & simplici apprehensione sensus cognoscit hunc hominem. Sed hominē esse huius aut illius conditionis non nuda sensus est perceptio sed collativa quedam operatio: Nam nihil aliud est compositio terminorum quàm cognitio terminorum & cognitio affectionis & respectus quem habent isti inter se termini. Si itaq; canis cognoscat & ipsos terminos & ipsorum terminorum inter se habitudinem, quis negat etiam ipsam compositionē scire? Quod si dicant canem cognoscendo terminos inter se conferendos respectum tamen & habitudinē nescire: Regerimus: Canis cognoscit suum Herum, vel ut hominem tantum, vel ut hominem huius vel illius conditionis, utpote suum Herum: Non ut hominem tantum quia hoc modo non distinguet suum Dominum à ceteris hominibus, quod tamen falsum esse dicitur sæpè experientia. 2. Si hominem talem hoc modo cognoscat, tū vel promariò ex sensu, vel secundariò ex consequenti: quia sub tali figura visui præsentatur: Non ex sensu tantum: quia (ut suprà ostendimus) sensus objectum percipit tantum ut sensibile, videlicet ut coloratum aut figuratum: At ista accidentia ex se promariò nō designant hominem talem nisi inter se conferantur: oportet enim primò

primò ut aliquo modo innotescat sub humana specie: Secundo ut coloratum tale: Tertiò ut figuratum tale, cum reliquis circumstantiis: at horum neutrum per se notificat particularem hominem, nisi omnia simul accipiantur & inter se compararentur. Quod si ex consequenti, nimirum ex horum comparatione canis suum Dominum intelligat: non est cur negent collativam hanc operationem Bruto competere. Tandem discursui apud animam intellectivam respondet discursus quidam in animâ sentiente. Quod videre est, nò tantum è superioribus quæ adduximus ratiociniis, sed etiam ex syllogismo Canis apud Plutarchum. Qui talis est: Aut hâc viâ Lepus elapsus est aut illac; tandem olfactu apprehendit non hâc elapsum esse; quare concludit illac transiisse. In quo Syllogismo Canis partem à parte distinguit in minore, quod sine anticipatâ majoris noticia facere non posset. Hûc etiam accedit, quod experientia sæpè testatur, Canem vetulum oculis orbatum Dominum suum ex mero olfactu dignoscere & ab aliis distinguere: hoc itaq; præstet necesse est ex ipso olfactu, vel ex ratiocinio quodam ab ipso olfactu. Non ex sensu: quia sensus proponit tantum ut sensibile seu odoriferum: erit itaq; ex Ratiocinio & discursu. Hæc omnia  
difficili

diffare se posse putant adversarii *instinctu* quodam naturali, quem animis Brutorum sensitivis tribuunt. At quomodo Instinctum istum Naturale à discursu distinguant quem eisdem donant privilegiis? Pari ego ratione negare possum ipsos homines esse rationales; objicienti autem adversario manifesta rationis indicia: Respondeam, hæc non à ratione proficisci sed à quodam nescio quo secretioris naturæ *Instinctu*, & ita naturæ benignioris thesauros eadem sepeliam vocis obscuritate, quâ inscitiam meam. At quam pulchella sit hæc responsio videant Philosophi. Malim ego certè reclamâre totâ Peripeticorû scholâ apertis naturæ indiciis consentire, quàm in obscuro vocularum cortice acquiescere. Tres in sensitivâ animâ operationes tribus Intellectus operationibus analogas quis non deprehendit? Has tres in animâ sentiente disponimus: ut Apprehensionem simplicium Præsentium in externo organo, Absentium in Interno sensu collocemus. Duas reliquas operationes Collativam sub phantasiâ seu Imaginatione complectimur. Nam Imago nobis est duplex, alia in primâ terminorum sensu perceptorum comparatione & Divisione, quæ vulgò phantasia appellatur: Alia Secundaria in ratiocinio & Discursu, quam

nonnulli Philosophorum rationem particularem nuncupant. Hanc etiam in homine admittunt operationem sub nomine potentie Cogitativæ, quæ reuera nihil est aliud quam summa & ultima phantasie operatio. Rogabis hic forsitan: quomodo Discursus iste sensitivus à Discursu animæ humanæ distinguatur? Respondco, 1. Quod discursus iste in Brutis sit mutilis & valde imperfectus: in hominibus verò perfectior & excellentior: Ita tamē ut istæ perfectiones differant specie non gradu tantum numerico. 2. Quod hæc ratio Brutorum in Singularibus solummodo terminatur, neq; Abstractione aliquā attingere valeat universalia: Homines verò abstrusissima, & à sensus operatione remotissima scrutantur & explicant. 3. Sciendum est actum Discurrendi esse duplicem: Alius est Directus, primus & naturalis, ut eū Intellectus elicit aliquod quod sensus externus immediatè præ se fert, quod ratiocinium hand raro fallaciæ & errori subicitur: alius est reflexus & correctus; ut eum Intellectus supra suum actum se reflectat, & errores, si qui sint, in primo illo discursu detergit. Priorem in Brutis solummodo admittimus Discursum & Rationem; Posteriozem, tanquam speciale quoddam privilegium, Homini tantum aut Angelo reservatum credimus.

DE-

## DECAD. II.

## EXERCITATIO VI.

*Idem numero Corpus post corruptionē restitui  
posse, non contradicit principiis Na-  
tura vel Philosophiæ.*

**I**NTER reliqua Religionis vulnera nullū  
lucius urit quàm curiosa nimis Philoso-  
phorum vanitas, & rigidus Theologorum Ze-  
lus & superstitio. E priori fonte scaturisse  
comperimus in universam Philosophiam spi-  
nas illas argutiarum è quibus agrè se extri-  
cantes Philosophi arcana Dei mysteria, aut  
penitus prætermittunt, aut ænigmatum Cor-  
tice obvolvunt, aut Sophismatum tendiculis  
irretiunt, aut saltem frigidius quàm par est  
exponūt. Quo fit, ut, inter cetera, Anime Im-  
mortalitatem & mortuorum Resurrectionē  
vel cum Atheis tanquā cerebelli alictius de-  
lirantis insomnium exploderent, aut saltem  
cum Cicerone hæsitanter affirmarent, aut hoc  
verum esse qualecunq; de Resurrectione dog-  
ma, aut si error sit, errorem esse jucundissimū.  
Ex alterâ parte incommoda, haud levia è  
præcipiti nimis Patrum Zelo in Ecclesiâ in-  
volasse.

volâsse mecum fatebuntur illi, qui Rationis sequaciores sunt quàm Nominum. Dum enim sanctissimi hi viri, ferventi admodum Ecclesiam propagandi studio, omnipotentiam Dei omnibus quibus poterant modis ampliare conténderent, Naturam ipsius pedissequam, aut proscripserût penitùs, aut suis privilegiis spoliârunt. Hinc horrido & inculto habitu salutare scholas philosophorum, visa est Theologia Christiana, ut quæ Naturæ principiis contradicere potiùs quàm Creatoris potentiam ampliare videretur. Sed ne plus hæc ex parte Divinæ tribuamus omnipotentiæ quàm ipsa Naturæ principia patiantur, ratum faciemus ex ipso Resurrectionis. Mysterio, eâ Philosophiæ principiis non contradicere; quod tali stabiliemus ratiocinio. Si idē numero Corpus iterum Restitui posse post corruptionem contradicat Philosophiæ, tum vel Ratione Agentis, vel ratione objecti seu Corporis naturalis de novo post talem corruptionem restituendi. Non ratione Agentis: quia Agens in Resurrectione mortuorum supponitur esse Deus, qui asserente saniorum Philosophorum turbâ Agens est Infinitum, ideôq; ea omnia facere potest quæ possunt fieri. Deinde non ratione objecti contradicit; sic enim vel à priori, ratione Naturæ & essentiæ corporis Naturalis,



turalis, vel à posteriori respectu essentialium proprietatum: Si à priori ratione Naturæ hoc fieret, tum vel respectu partiû Corporis, vel respectu totius Compositi. Non ratione partium seu principiorum corporis Naturalis, hoc enim accidere necesse est, vel quia partes huiusmodi corporis Naturalis non manent, vel quia post corruptionem colligi non possunt, vel saltem quia ita componi & conjungi non possunt, ut ex illis fiat compositum. Non prius, si enim deficient partes in corruptione, tum vel primariæ & Radicales, aut secundariæ ortæ ex his prioribus. Partes primordiales & Radicales non deficiunt: sic enim vel Materia, vel Forma; Non Materia prima deficit in corruptione: quia hæc juxta Peripateticos est Ingenerabilis & Incorruptibilis. Neque enim Corruptio est partiû Annihilatio seu Interitus sed totius Dissolutio: Illæsis enim partibus nihil obstat quo minus totum dissolvatur, hæud secus ac in Artificialibus Scamnum aut Cathedra in sua membra & partes dividitur & resolvitur, interim ut partes in se singula integræ conserventur: Deinde forma hominis in corruptione non deficit: quia consensu omnium est Anima Rationalis, quæ Immortalis esse ab Aristotele & pluribus Philosophis prædicatur. Tandem non ita deficiunt

partes secundariæ in Corruptione quin refarci possunt: quia Deus (ut diximus) cum sit Agens Infinitum ea omnia facere potest quæ possunt fieri. Omnes autem Formæ latent in materiæ gremio juxta Peripateticos: partes autem secundariæ nihil sunt aliud quàm Materia Formata: Nihil itaq; impedit quo minus Deus ex quâlibet materiæ portiuunculâ educat formas illas materiales rerum omnium quæ in illâ delitescunt. Dicent (opinor) partes hæc & formas educi quidem posse, sed non easdem numero cum illis prioribus corruptione abolitis. Regerimus, I. Ad Identitatem Corporis Numericam non requiri necessario ut partes istæ secundariæ & ortæ integre simpliciter conserventur, eademq; numero maneant: Nam Corpus denominatur Idem Numero non ab his partibus ortis sed ex primis illis & Radicalibus ex quibus istæ oriuntur; siquidem homini adhuc in vivis degenti partes istæ sæpe affluunt & defluunt ut alia quotidie ejiciantur tanquàm excrementa, quæ novi alimenti accessu restituantur: Nihilominus non veremur eundem Numero Societatem aut Platonem nuncupare, cum eadem gudeat formâ eademq; Materiâ primâ. Non absurdū videtur partes hæc easdem numero appellare, licet non Formaliter tamen per  
 Equivalen-

*Æquivalentiam* quandam, in quâ partium extinctarum loco alię novę eiusdem penitus rationis substituantur quę in eandem materię molem coalescunt. Quod ut dilucidius aperiamus statuimus. *Æquivalentiã* esse duplicem, externam nimirum & Internam: Externam appello illam in quâ partes amissę, partium aliarum foris advenientiũ accessu refarciuntur: quo sensu flumen appellari solet Idem numero, & navis quę progressu Temporis detritis partibus restituitur: Interna verò *Æquivalentiã* nobis est illa, quâ ex eadem materię potentiã, ab eodem Agente, eadẽ formę educuntur, ut si Deus ex eadem materię portiunculã Leonis aut Equi prius corrupti, easdem membrorum formas, partes & figurationes omnes extraxerit: Erunt istę formę eadem cum præcedentibus Leonis corruptis per *Æquivalentiam* Internam quę reverã propè accedit ad Identitatem Formalem: Nam si formę essent diversę, esset hęc diversitas vel ex parte Agentis, vel ex parte Materię ex quâ ortę sunt, vel ex parte formarum ipsarum, vel ex parte temporis & externarum circumstantiarum: Non ex parte Agentis: Quia. 1, In utroq; aliquando statuitur idem Agens ut Deus: ut in Adamo corrupto Resurrectione iterum renovãdo, qui ut in primã creatione for-

matus erat à Deo: ita in ipsa Resurrectione pari operâ reformabitur. 2. Identitas essentialis nō fuit ab Agente, cum sit Externum & extra rei essentiam, positum, sed ab internis rei principiis, unde nihil refert utrum idem sit A. gens, an diversum, modò eadem principia Interna supponantur. Non ex parte materia: quia supponimus unam eandemq; esse materiae portiunculam, ex quâ formæ istæ producuntur: Non ex parte formarum ipsarum, quia formæ materiales totum quod habent Individuationis & Identitatis Numerice, hoc habent, iuxta saniores Philosophos, à certa materiae dispositione factâ ab agente, iuxta quam formæ à materia educuntur, aut in materiam recipiuntur. Materia enim cum in se sit indifferens ad omnes formas, non nisi certâ agentis præparatione & dispositione hanc potius quàm illam formam apta est effundere: ubi itaq; eadem materiae præparatio ab eodem Agente introducta, ibi formam à materia editâ eandē esse necesse est, saltem Æquivalentiâ, quâ diximus, Internâ. Deniq; formæ hæc in materiâ redintegratæ non sunt diversæ ratione externarum circumstantiarū: Nam Res ab eodem habent unitatem à quo habent essentiam, cum quoddam essentiam necessario consequens sit unitas: essentia autem foris non advenit

venit, sed in intimis rerum recessibus delitescit. Ex his quæ diximus satis liquet partes hominis corrupti etiam post corruptionem non omnino deficere, sed quodammodo easdē manere numero ut nihil obstat quo minus Composito restituantur: Siquidem Anima Immortalis & materia prima seu Radicalis eedem ipsæ supersunt numero formaliter, uti demonstravimus. Reliquæ verò partes secundariæ quodammodo eadem dici possunt numero per Æquivalentiam & Concomitantiam. Superest ut secūdo in loco demonstremus nō impossibile esse Deo, partes undequaq; sparsas aut confusas colligere: quod sic demonstramus. Si Deus huiusmodi partes colligere non possit ad unionem; tum Vel quia partes hasce Invenire non possit: Vel confusas singulorum partes secernere & distinguere non possit: Vel quia localitèr movere & pellerè non possit, ut coalescant & simul consistent. Non prius; quia Deus Infinita est cognitionis ac proinde ea cognoscit omnia quæ sunt scibilia: partes autem istæ cum sint entia necessario sunt scibiles. Non secundum ob eandem rationem, quia qui perfectè cognoscit omnia Entia, is singulas earum partes & essentias discretè cognoscit, & ita suâ notitiâ à se invicem distinguit & discernit, ut suum cuiq; tribua-

tur;

tur: Non tertium quia cum partes sint corpora in se mobilia, nihil obstat quo minus à Deo Agente Infinito moveantur ut simul coalescant. Tandem non impossibile est, ut partes hominis corrupti eidem unioni & compositioni concurrente divino auxilio restituantur: quia ipsæ met partes à Naturâ ad talem unionem & compositionem ordinantur. Deus enim (ut supra) est Agens Infinitum qui ea omnia facere potest quæ possunt fieri. At hîc contra talē partium collectionem novamque Informationem, obijciunt hominis à Canibale devorati partes cū materialibus Canibalis partibus confusas esse, ut aliæ aliis salvâ utriusq; integritate secerni & separari nō possint. Nam certum est carnes hominis à Canibali devorati in ipsam Canibalis substantiam transire, ut in idem corpus coalescant. Si itaq; quod suum est homini sic devorato restituitur, fieri non posse videtur quin aut quædam Canibalis illius partes deficiant, aut saltem aliæ quædam adulteratæ & mutuatitæ in Resurrectione substituantur: quorum utrumq; videtur verē Resurrectioni contradicere. Ad hoc respondemus, 1. Partes Materiales alias esse primævas & originales, alias adventitias. Quicquid de his statuatur, certum est Deum ab Infinitam suam potentiam, partes illas posse

posse colligere, leuare & distinguere, & suū cuiq; ita tribuere, ut neq; aliquid in altero aut redundet aut deficiat: Deinde ad novam hominis compositionem non necessarium semper ducimus ut tota materiæ primæ Massa adhibeatur quæ homini inerat corrupto: quia omnes formæ Materiales in quālibet materiæ particulā potentialiter delitescunt, ex quā pro arbitrio Agentis infiniti iterum educi possunt: Quod autem Peripatetici de suā materiā primā, idē Chymici de suo sale intelligi volunt: Latere nimirum in eo semina & virtutes rerum omnium ē quibus admoto Agente quodam proportionato emergere & educi possunt: Ex quibus omnibus liquidō constat nullum in principiis ipsis defectum esse quo minùs homo corruptus restituatur. Iā quod talis restauratio nullam omnino involuat contradictionē respectu Totius compositi non minori constabit ratione: Nihil enim impedit quo minùs ex eisdem positis principiis & partibus idem Compositum eademq; essentia Totius oriatur: siquidem Actus Totius nihil aliud est quàm Actus omnium partium: cū partes à suo Toto non nisi Ratione distinguantur. At partes & prima Principia hominis post corruptionem integra conseruantur, uti suprà probauimus: Quare eundem Totius

Totius Actum Composito restitui necesse est  
quo primum donaretur ante sui dissolutionē.  
Nec obstat quod partiales Actus isti post sepa-  
rationem & divisionem iterum fuerint con-  
iuncti. Quia Compositio & dissolutio aliqujus  
Compositi, nihil Entis rei largiuntur sed Mo-  
dum tantum, ut Actus tales jam coexistant  
qui antea erant separati: Quod si enim Com-  
positio aliquid entitatis rei superadderet, ef-  
fet revera aliquid Entitatis in Composito  
preter partes illas in quas compositum resol-  
veretur, quod Peripateticis absurdissimum: si-  
quidem unumquodq; in illud solummodo resol-  
vitur ex quo componitur: quare eiusdem Ani-  
mę Platonice idem erit actus quoad essentiā,  
sive materię conjuncta, sive separata: pariter  
& eiusdem materię, sive liberę existentis (si  
ita fingi possit) sive formę aliquā contractę  
eadem erit potentia subjectiva, actusq; Enti-  
tativus idem quoad rem. Compositio autem  
modum solummodo largitur non rem, aut  
Entitatis partem. Deniq; hæc corporis cor-  
rupti Restitutio à posteriori non contradicit  
Naturę, sic enim aliquam ejus proprietatem  
auferret: at hoc non, quia omnis proprietas  
fluit ab ipsa rei essentiā: ubi itaq; eadem es-  
sentia seu idem Actus Rei essentialis, ibi ex-  
dem erunt proprietates. At eundem actum  
rei



rei essentialem restitui posse in superioribus demonstravimus: Restituentur itaq; & eadem proprietates. Ex his omnibus liquido constabit nihil omnino Naturæ principii contradicere quo minus idem Numero corpus post corruptionem iterum restitatur.

## DECAD. II.

## EXERCITATIO VII.

*Datur Vacuum.*

**N**IHI L Peripateticis familiarius quàm Vacuum proscribere: at dogma hoc omni ex parte non esse verum unico conficimus ratiocinio: Sic enim argumentamur: Datur in corporibus Naturalibus condensatio, proinde concedendum est Vacuum. Propositio extra aleam controversiæ ponitur, ut probatione non indigeat. Vnde in confirmatione consequentiæ totum lateat magisterium: non diffidimus tamen ex ipsa Naturâ & ratione condensationis, prout apud Aristotelicos definitur, perspicuum reddere. Condensatio est partium materialium alicuius corporis in locum aliquem angustiorē quam antea occuparunt constipatio seu coactio: exempli cau-

sâ,

fa sit sphaera aliqua Aëria aut Aquea contenta intra Peripheriam C, ubi hæc ipsa aëris aut aquæ portiuncula condensari contingat intra Ambitum superficiei

C coërcebitur, minorem scilicet Peripheriâ C quâ prius continebatur: His positis & explicatis sic colligimus rationem: ubi Peripheria C per cō-



densationem cogetur in B, aut aliquid antea admisit vacui, aut erat absolute plena: si vacuum admiserit habemus quod contendimus dari in corporibus Naturalibus Vacuum: Si absolute plena fuerit, quomodo plus in se reciperet: Siquidem omnis absoluta plenitudo excludit alterius corporis intromissionem & ulteriorem loci capacitatem: si enim largiamur adversario Sphaeram illam plus capere posse sine vacui admissione, dabitur necessario corporum aut cessio, aut penetratio. Non cessio: 1. quia hæc duorum est corporum se mutuo tangentium, & pellentium: at hic non duo sunt corpora sed unum continuum ex Thesi. 2. Si Cessio admittatur, tū non esset condensatio quod contra Thesin. Consequentia est clarissima: vel e-

nim

nim Aër aut Aqua illa in circulo B conclusa  
 manet in eodem in quo antea fuerit loco, aut  
 Non: si maneat non loco cedit & per conse-  
 quens non omittenda est cessio aliqua loca-  
 lis. Si non maneat sequentur hæc duo. 1. Non  
 esse condensationem: Condensatio enim de-  
 finitur (ut antea) partiū in eundem angustum  
 locum coactio. At ubi partes priores non ma-  
 nent, sed aliis locum eundem subituris ce-  
 dunt, ibi non potest esse partium omnium in  
 eundem locum constipatio. Constipatio enim  
 supponit ut partibus loco non cedentibus al-  
 lie partes eundem simul locum ingrediantur.  
 2. Partes si non maneant in eodem loco, mo-  
 uebuntur necessario vel versus centrum, vel  
 à centro, vel in obliquum: Si versus centrum  
 sphæræ ergo partes intermediæ centro proxi-  
 miores, aut manent, aut loco cedunt: Si ma-  
 neant in eodem loco dum reliquas in se reci-  
 piunt, admisérunt antea in se Vacuū, sine quo  
 non reciperent. Si non maneant sed movean-  
 tur, ergo vel in Infinitum, vel ad statum locū:  
 Non in Infinitum quia motui huic certus est  
 Terminus præfixus, nimirum centrum: Si ad  
 statum locum, ergo reliquas partes in eundē  
 admittunt locum vel non: Si admittunt erat  
 antea in illis Vacuum. Si non: nulla erit Con-  
 densatio. Deinde in hac cessione partes sphæ-

re Interioris B non movebuntur à Centro: sic enim non erit Condensatio, sed vel Diffusio seu Rarefactio, vel saltem partes eadem quàm antea gaudebunt densitate, ut amplius non constipentur: vel enim Sphæra interior plures sui partes amittet quàm recipit ab Exteriori; aut pauciores, aut æquales: si plures erit Rarefactio cum totidem in se non coerceat partes quot antea: si pauciores non erit cessio localis absoluta omnium partium, sed aliquarum, ut saltem aliquæ partes Sphære interiores eodem gaudentes loco alias in se recipiant, quod fieri non potest absq; vacuo. Si denique æquales partes amittat & recipiat, non erit condensatio, cum plures quàm antea partes in eundem non cogantur locum. Deniq; in obliquum non movebuntur ob easdem rationes: quia erit iste motus vel in Infinitum vel ad statum terminum. Non in Infinitum; quia duo motus utcunq; statuantur, in Peripheriâ concurrunt, quo concursu définiant sibi terminum. Sed ad definitum terminum, partes istæ ( ut superius ostendimus ) vel alias in se partes recipient, & ita admitteretur vacuū, vel non: & ita nulla erit condensatio. Ex his clarissimè liquet cessionem illam localem partium, aut non omnino dari, aut si detur, vacuum non excludere. Tandem Sphæra illa minor  
plus

plus in se capere non potest per Penetrationem corporum: quia hæc nunquam admittitur apud saniores Philosophos. Quid itaq;? Vacuum admittemus? Quid hoc aliud quam hiatus nescio quem in naturam introducere, ut ruina dissoluti mundi metuitur? Ne metuite aut ruinam mundi aut naturæ periclitantis querimoniam: Quæ vacuum lege naturæ donetur civitate unicâ expediam distinctiuncula. Tria hîc distinguenda censeo. 1. Absolutè plenum. 2. Absolutè vacuum. 3. Medium: quod reverà neq; absolutè plenum est, neque absolutè vacuum. Absolutè plenum definimus illud quod ita corpore sit oppletum, ut aliud aut plus corporis in se ulterius non possit recipere. Vacuum absolutum est illud, quod nihil in se habet corporis, sed mera est corporis in loco negatio. Medium verò illud intelligimus spatium, quod corporali licet gaudeat ubiq; præsentia, non ita tamen adimpletur, quin condensatione partiumq; celsione plus in se possit recipere. His positis dicimus. 1. Non dari in rerum naturâ absolutè Plenum: quod ex eo patebit, quod omne corpus densum condensari amplius est possibile, ita ut huic terminus condensationi à nemine præfigi possit. Cum enim Augmentum condensationis sit continuum, nihil impedit ob-

minus in infinitum se porrigat. Nulla enim ratio assignari potest, quare hic potius quam illic terminum hujus condensationis constituamus. Deinde absolutum vacuum non esse in naturâ admittendum Rationes multæ apud Aristotelicos demonstrant. Siquidem vacuum hoc sensu definitur *Locus carens omni corpore*, quod in universo sine contradictione non concedendum. Quare Naturæ relinquitur vacuum illud Medium, quod licet aliquo semper obstruatur corpore, nunquam tamen absolutè adimpletur, quin alterius corporis subituri fiat particeps. Tale vacuum, cum privatio quædam sit, haud ineptè comparari potest cum privatione illâ Physicâ Formæ in materiâ primâ apud Peripateticos. Sicut enim materia prima nunquam omni prorsus formâ destituitur, ejus tamen in sublunari-bus potentia & Appetitui nunquam ita satisfacit, quin ulteriorem semper formam ad sui perfectionem ulterius expetat. Ita spatium hoc utcunque corpore aliquo instructum nunquam ita invenitur plenum quin alterius semper capax esse & possit & soleat.

## DECAD. II.

## EXERCITATIO VIII.

*Numerus non est quantitas.*

**Q**uantitas apud Aristotelem, tam in Logicis, quàm in Metaphysicis, distribuitur in continuam & discretam. Hujus speciem primariam facit numerum. At contra: Numerum speciem non esse Quantitatis hisce evincitur ratiociniis. Si numerus sit quantitas, tum vel Simplex vel Aggregata. Neutrum est verum. Primò non est aggregata: quia sic non esset aliquod per se unum, & ita nec definitionem pateretur, nec in prædicamento haberet locum. Non est simplex: primò quia sic simplex aliquod requireret subiectum in quo existeret: at non simplex habet subiectum. Consequentia est clara: quia Accidens ab eodem habet Essentiam, Simpliciter, & Unitatē. Quare simplicis numeri subiectum erit simplex, & non aggregatum. Minor apertè confirmatur: quia Ternarii Numeri subiectum nō est aliud quàm tres homines. Tres verò homines non sunt unum subiectum simplex, sed Aggregatum. Secunda ratio sit hæc; Affectio

quantitatis non est quantitas . Numerus verò quædam est quantitatis affectio . Minor est clarissima: quia omnes Logici accuratiùs distinguunt inter affectionem & speciem tanquam inter subjectum & adiunctum, ut in idem quadrare non possint. Minor etiam confirmatur, quia numerus oritur ex divisione continui iuxta Peripateticos: At species contradiuisa ex specie oppositâ non oritur. Oritur ergo tanquam affectio quædam quantitatis continuæ diuisæ. Sunt qui dicunt, esse speciem non Vniuocam sed Analogicam. At falluntur: primò quia iuxta doctrinam Aristotelis species analogatæ in Catagoriam non admittuntur: Secundo, si ut species hæc ex alterâ oriretur, tum vel secundum materiale suum, vel formale. At neutrum dici potest. Nam materiale numeri est unitatum collectio: formale verò est earundem unitatum ordinata quædam dispositio. At neque collectio hæc unitatum, neque earum ordo & dispositio species quantitatis dici potest: quia modi sunt hæc entia, non entia. Quantitatis verò species iuxta Peripateticos entia dici debent, & solent. Huc accedit, quòd formalis ratio quantitatis apud saniores Philosophos statuitur Extensio partium. At hæc extensio supponit semper partium continuitatem: Quare in quantitate



titate discretâ, qualis est numerus, nullatenus reperitur. Nulla enim hic partiû unio sed disjunctio. Vltimò sic arguitur. Si numerus sit quantitas, tum aliquâ Dei actione erat productus. At non dici potest positis adversariorum principiis: Ergo. Consequentia aperta est quia juxta saniores Theologos omne ens aliquâ Dei actione est productum: omnes autem Peripatetici volunt quantitatem esse aliquam entis speciem. Minor etiam suadetur: si Deus quantitatem aliquâ actione suâ produxerit, tum vel Primò & immediatè, vel saltem Secundariò & mediatè, quatenus numerus ex alio ente iam producto emanaret. Non primò & immediatè: quia sic productis tribus hominibus quoad essentiam, si Deus ibi sisteret, & non ulterius operaretur ad numerum producendum, tres essent homines sine numero, quod contradictionem implicaret. Deinde nò per Emanationem oriretur numerus: Primò quia juxta saniores Deus Absolutè concurrat ad productionem cujusque entis absoluti, quale volunt esse Numerum. Deinde secundo; quod ex specie aliquâ iam productâ emanat, non est species eius contradiçiva, sed potius modus eius & affectio, quod in aliis passim experimur. Hinc accedit etiam quod numerus invenitur in SS. Trinitate, ubi ens

aliquod distinctum, aut quantitatem ponere est hæreticum. Dicent hîc adversarii numerum illum esse Transcendentalem, non Prædicamentalem, & ita vobum obscuritate nos illudent. At sancitum illud in Philosophiâ, entia sine necessitate non multiplicanda esse. At nulla hîc necessitas, ut duplicem numerum admittamus. Si dicant cogi nos ut fateamur, quia quantitas est ens, quale in Deo non sine absurdo admittitur; petitio est principii: nulla enim necessitas est, ut ens esse fateamur. Dicemus potiùs entis esse affectionem quæ entia, aut entium collectionem consequitur.

## DECAD. II.

## EXERCITATIO IX.

*Non datur vera Compositio.*

**V**ERAM ac genuinam compositionē in corporibus definiunt illam, quâ ex multis inter se unitis una res alia coalescit. Ut quum ex quatuor elementis mixtum, ex materiâ & formâ, compositum oriatur. At talem in corporibus (de quibus præcipuè agitur) constitutionem impossibilem esse minimèque in saniori Philosophiâ admittendam unico  
hoc

hoc conficiemus ratiocinio. Si compositum sit unum ens ex multis, alterum horum trium necessario sequeretur: vel una pars ex omnibus fieret: vel ex omnibus partibus fieret aliqua res distincta ab omnibus: vel ex omnibus fieret res aliqua, quæ sit eadem res cum omnibus. Non prius: quia sic non esset compositio, sed Transubstantiatio. Transubstantiationem enim definimus, quum una res in aliam seu alias transmutatur. Si secundum asserant, ex omnibus nimirum partibus fieri rem aliquam distinctam ab omnibus, tunc alterum horum necessario sequeretur: vel partes manerent idem quod sunt, & ex illis fieret nova res: vel desinerent esse quod sint, eo quod fiat alia res. Si manerent quod sunt, ut ex illis fiat alia res, tunc duas simul retinerent essentias, nimirum suam & simul novi illius entis quod produci-  
tur. At aliquid duas simul retinere essentias est penitus impossibile, & ab omnibus explosum in scholâ Peripateticâ. Si esse prius desinerent, quam ex illis alia res fieret, non esset compositio, sed Transmutatio, siquidem illæ partes, quæ esse prius desierunt, in aliam substantiam secundum naturâ transmutarentur. In compositione verò partes non Corrupti, aut Annihilari intelliguntur, sed in ipso manere composito, ad cuius compositionem con-

currere putantur. Deniq; tertius casus admitti non potest, scilicet ex omnibus fieri rem aliquam, quæ sit eadem cum omnibus, quia fieri non potest, quod non potest esse. At non potest esse per naturam, ut unum numero ens sit idem quod omnes partes. Partes enim sunt à se invicem distinctæ. Quare non potest idem esse aliquid cum omnibus, nisi aliquid aliud esset à seipso. Quod impossibile,

## DECAD. II.

## EXERCITATIO X.

*Intellectus agens ad intellectionem non est necessarius.*

**I**NTELLECTU Agente prout apud Aristotelem ejusq; interpretes suâ essentiâ & officiis exponitur, nescio quid spinis argutarum implicatius. Nec mirum unico concessio absurdo absurdorum myriades consecrari: Ego exemplum sequutus Alexandri Magni dissecare contendens Gordianum nodum, quem agrè possû solvere, Intellectum illum Agentem tot subtilitatum tendiculis irretitum uno vel altero ictu amputabo. Statuo enim mentem illâ agentem ad intellectionem minime necessa-

necessariam esse, sed fictitium & monstrum ab intellectu malè sano editum. Primò itaq; sic arguo. Si Intellectus Agens sit admittendus, tum vel propter obiectum, vel propter potentiam, vel propter medium. At nullo horum necessariò cogimur ad talem potentiam admittendum. Divisio maioris est clarissima: quia nihil aliud requiritur ad intellectionem præter hæc tria, & ea quæ horum trium sunt. Minor confirmabitur singulis suis partibus: Primò non admitti videtur propter mediũ, quia tale mediũ non est in intellectione, neq; aliquis hoc illi munus assignavit. Deinde non est necessarius hic Intellectus Agens propter obiectum. Obiectum enim est res intelligibilis, vel saltem intellecta in phantasmate relucens. Quod verò phantasma tali auxilio non indigeat facilè liquebit, primò comparatione sensus. Si enim intellectus possibilis intellectu indigeret Agente propter phantasmata, eadẽ ratione & sensus propter suum obiectũ sensu agente indigeret, quod saniores Philosophi non admittunt. Consequentia erit clara ex illis quæ infra disputavimus: quia Abstractionis negotium, cuius gratiã pleriq; aut omnes hanc potentiam introduxerunt, non minus ad sensum spectat quàm ad intellectum. Secundò si Agens hic intellectus aliquo modo

do conferret ad phantasma, tum vel ut efficiens, vel ut Forma. Consequentia est iterum clara ex ore adversariorum, qui alterum illi munus affingerent. Quod non concurrit tanquam Efficiens, probatur primò. Si ut efficiens tum vel ut Efficiens Privativum, vel ut Efficiens Positivum. Si ut privativum, tunc ageret auferendo & abstrahendo ea, quæ obiectum impediunt, aut quæ reddunt minus intelligibile, ut phantasma materialibus & individuuantibus conditionibus denudatum, & iam factum tanquam spirituale intellectui possibili præsentaretur. At nulla necessitas cogit, ut talem abstractionem admittamus: primò: quia non adhuc constitit, utrum materialia & singularia ab intellectu percipiantur. Quis enim negabit Deum, Angelos, & animam separatam à corpore homines singulares, adeoque omnia huiusmodi cognoscere? Quidni igitur & intellectus humano corpori astrictus? Quod si nullum singulare propriè & directè (uti loquuntur) ab intellectu perciperetur, tum vel quia Materiale vel quia Singulare. Non quia materiale quia sic nullum materiale cognosceretur, & ita materia prima quæ solius intellectus statuitur obiectum, lateret ineognita ab intellectu, quod absurdum. Non quia singulare: quia sic nullum singulare afficeret

afficeret intellectum. At Angelos singulares fuisse cognitos Prophetis & Apostolis sacræ testantur literæ. Hûc accedunt rationes Nominalium ferè omnium, & magnæ etiam partibus Scotistarum, quæ suadent Singulare materiale esse ab ipso intellectu cognitum, idq; actu directo, quicquid Thomistæ in adversum de actu suo reflexo prædicant. Reflexa enim cognitio illa apud Thomistas supponit ad minus triplicem humanæ mentis discursû. Volunt enim primò, intellectum percipere universalem rei quidditatem; tum verò reflectere se super suû actum; ex actu verò cognoscere speciem; ex specie deniq; materiale subiectum ex quo derivatur; Adeo ut sit processus ab objecto ad actum intelligendi, secundo ab actu ad speciem, tertio à specie ad subiectum singulare. Ut omittamus ea quæ dici possunt de improbabili harum reflectionum ratione, vel in ipsâ primævâ rerum notitiâ, certû est, singulare vel simplici mentis apprehensione posse concipi ab intellectu ante omnem discursum. Quis enim ita stupidus, qui existimet se non posse Socratē aut Platonem intelligere sine difficili illo & laborioso mentis ratiocinio; præsertim quum simplex illa subiecti apprehensio omnem intellectus discursum, & dianoiā antecedit: Quare concludimus  
nullam

nullam rationem à Philosophis adhuc inventam esse ita validam, quæ homini sano suadere potest, singulare & materiale non ab intellectu percipi posse. Omnia quæ à me inferri possunt non infero : quia non longius quàm par est à proposito evagabor. Secundò, Intellectum Agentem ex parte phantasmatis talè abstractionem non producere eo facilè patebit, quòd intellectus possibilis ex se sufficiens sit ad tale negotium obeundum, adeo ut frustraneum sit illud per plura fieri, quod per pauciora facilè expediri potuisset. Abstractio enim (uti ex ipso nomine colligere liceat) est quum intellectus aut alia potentia cognoscitiva aliquid intelligit relictis aliis illi coniunctis, ut quum in homine hominem seu essentiam humanam percipiam, non intellecto simul colore, staturâ, figurâ, aut alio aliquo hominis adiuncto. Quid igitur obstat, quo minus intellectus possibilis in obiecto illud solummodo percipiat, quod suum est, relictis ad sensum reliquis illi coniunctis? Obiectum enim, quum sit unum est nihilominus potentiâ tam sensibile quàm intelligibile, utpote quod ab utrâq; facultate sit perceptibile. Ab hoc obiecto derivatur species unica, quæ utramque rationem & Sënsibilitatis & Intelligibilitatis participat: huius itaq; speciei particeps  
fit



fit tam sensus, quam intellectus, ita tamen ut  
diversus sit actus intelligendi & sentiendi,  
iuxta aliam atq; aliam rationem formalem  
obiecti & speciei: Recipit itaq; sensus quæ  
sua sunt secundum quæ formaliter obicitur  
sensui, nimirum materiales illas & individu-  
antes conditiones: Recipit intellectus etiam  
quæ sua sunt, nimirum quidditatis rationes sibi  
proportionatas. Hinc dicimus non opus esse  
aliquâ facultate, quæ in obiecto rationes has  
formales à se invicem distinguat & separet,  
quùm ab ipsis potentiis receptivis satis di-  
stinguantur. Quod etiam exemplo sensûshic  
raturum faciemus: Vt enim intellectus à sensu,  
sic sensus inter se certo abstractionis genere  
discriminantur. At in sensu non requirimus  
potentiam aliquam abstractivam in obiecto,  
quum talis abstractio ipsis potentiis commo-  
dè expediatur. Offeratur enim homini senti-  
enti pomum, aut aliquid aliud simile sensibi-  
le: pomum hoc singulis sensibus emittit spe-  
ciem sui sensibilem. Exhibetur enim visui  
ut coloratum, gustui ut sapidum, olfactui ut o-  
doriferum, & ita reliquis iuxta propriam rati-  
onem: singulæ hæ rationes sensibilis coloris  
nimirum, saporis & odoris, utcunque si-  
mul à pomo ad sensum derivantur, non  
ab uno aliquo sensu simul apprehenduntur,  
sed

sed singula à propriis sensiteriis recipiuntur  
iisque distinguuntur. Quod si in intellectu-  
nem necessariū esset Agentem ponere intel-  
lectum, qui singulas in obiecto rationes dis-  
tingueret, quidni in sensatione idem admit-  
teretur? quum species omnium horum obie-  
ctorum non minis in obiecto sint confusæ &  
coniunctæ quàm species sensibilis & intelli-  
gibilis in phantasmate. Si ad alteram distincti-  
onis partem se divertant adversarii, & dicant  
agentem intellectum ad phantasma concur-  
rere ut Efficiens positivum, tunc dicant ne-  
cesse est formam aliquam esse introductam  
in phantasma ab intellectu Agente. Conse-  
quentia est aperta: quia omne efficiens, ubi a-  
git in obiectum, operatur formam quandam  
in illud introducendo, ut quum ignis calore  
suo in aquâ calorē in illâ generat. At talis for-  
ma non est admittenda. Primò, quia sic verge-  
rent in eorū opinionem qui statuunt, mentem  
hanc respectu phantasmatum habere se per  
modum forme illi adiuncte, quam sententiam  
& hi recipiunt. & nos infra confutabimus. Se-  
cundò hec forma proculdubio esset ratio in-  
telligibilitatis in obiecto. Consequentia est a-  
perta, quia illud quod de non actu intelligibi-  
li facit actu intelligibile, erit proculdubio ta-  
lis ratio. At tale munus ascribunt huic formæ  
ab

ab agente intellectu in obiectum introducte. Hanc tamen formam non talem esse ex eo sequitur, quod *Intelligibilitas* sit interna rei ratio entitatem consecuta. Res enim eodem modo intelliguntur, ut sunt: iuxta Philosophū. Quod si penderet hæc ratio intelligibilis ab Agente intellectu, cognitio nostra non ex re mensuram sumeret, sed potius ab ipso intellectu tanquam aliquo rei extrinseco, cuius contrarium omnes profitentur. Tandem si dicant mentem hanc Agentem cum phantasmate tanquam formam concurrere: Contrastant rationes haud minorum virium. Nam primò hæc forma esset intelligibilis ab intellectu possibili vel non. Si intelligi possit ab intellectu possibili, sequeretur intellectionē aliquam in possibili præcedere operationem agentis, & per consequens operationem illius agentis non esse necessariam ad cognitionē, quod tamen adversarii contendunt. Consequentia est aperta, quia supponunt possibilem primò ipsam formam intelligere, & postea huius auxilio rei ipsius notitiam attingere, adeo ut prior sit ipsius agentis intellectus tanquam formæ *Intelligibilitas*, quā illius obiecti cui adiungitur. Quod verò prius est in unoquoque genere non dependet causaliter ab illis quæ sunt posteriora. Secundò, si hæc forma  
sit

fit intelligibilis, tunc terminaret intellectiō-  
nē: Illud enim dicitur à potentiā aliquā perci-  
pi, quod talem potentiā terminat. Quod  
verò hæc forma intellectum non terminat,  
demonstratur his rationibus: Primò quia sic  
intellectus in primā apprehensione non nu-  
dam rei quidditatem perciperet, sed præter  
entitatem & quidditatem rei ipsam etiam  
formam agentem intelligeret, contra eorum  
Thesimque vult quidditatem rei abstractam  
à materialibus conditionibus primò subiici  
intellectui possibili. Consequentia rata est,  
quia certum est mentem possibilem rem ipsā  
percipere in phantasmate relucens. Quod  
si & ipsam Mentem Agentē simul percipiat,  
non nudā solummodo rei quidditatem perci-  
at necesse est. Secundo si utrumq; intelligatur  
nimirum *Hæc Forma* agentis intellectus, &  
*objectum*, tunc vel eodem actu, vel diverso.  
Non eodē actu, quia actus distribuuntur ut ob-  
iecta seu intelligibilia, & duplex hæc intelli-  
gibile, nimirum res ipsa cognita relucens in  
phantasmate, & forma hæc illi adiuncta. Ter-  
tio intelligibile est uno vel altero modo sensi-  
bile. Quicquid enim est in intellectu prius fuit  
sub aliquo sensu. At Agens Intellectus sive  
statuatur Deus vel Intelligentia cum Aver-  
roistis quibusdā, sive potentia humani intel-  
lectus

lectus cum reliquis, quomodo extiterit sub sensu, percipere non possum. Quod si dicant non esse per se intelligibilem, sed esse instar luminis in phantasmate ipsū reddens intelligibile (sicuti videtur innuere Aristoteles:) Regerimus non recte valere comparisonem lilam inter lumen & intellectum agentem. Vel enim in hac comparatione lumen intelligunt internum quod in materiā pellucidi sepelitur; vel externum à sole & externo quodam obiecto proiectum. Si internum; dicimus huic melius respondere analogiā rationem rei intelligibilem, proximè essentiam & quidditatem rei consequentem, quam Intellectum Agentem. Siquidem intelligibilitas illa est interna rei passio: Intellectus iste est aliquid exterius adiunctum. Si externum, dicimus non esse visibili penitus necessarium, Argumento sint ignea & lucida corpora, quæ in profundissimis cernuntur tenebris sine aliquo externo lumine, solā innatā suā luce & splendore coruscantia. Secundò per hoc lumen necessariò intelligunt rationem aliquā quā obiectum seu phantasma promovetur ab intelligibili potentiā intelligibile actu. Quare erit vel discursus aliquis, vel abstractio & Distinctio materialis quidditatis à conditionibus materialibus. Non est discursus. Primò quia potest esse intellectio sine discursu, ut

in primâ illâ ac simplici Apprehensione. Intellectus verò Agens ad omnem intellecti-  
onem apprime necessarium esse arbitrantur.  
Secundò discursus licet ad rem & obiectum  
terminetur, tamen in re tanquam forma non  
est, sed in ipsa animâ: intellectum agentem  
verò in phantasmate tanquam in subjecto  
constitui existimant, quum sit quasi forma illi  
adjuncta. Si operetur per abstractionem im-  
materialis quidditatis à conditionibus mate-  
rialibus, recurrunt superiora argumenta, qui-  
bus probavimus totum abstractionis negoti-  
um abfolvi posse ab intellectu passivo sine A-  
gente. Quum enim ad abstractionem duo so-  
lummodo requirantur, nimirum rationum in  
obiecto distinctio, & alicuius rationis recep-  
tio relictis reliquis, dicimus primum esse  
virtualiter in ipso phantasmate, formaliter  
in ipsis potentiis, quæ obiectum secun-  
dum proprias suas rationes percipiunt, ita  
ut utraqueq; facultas quod suum est apprehen-  
dens reliquas relinquat. Secundum opus in ab-  
stractione, nimirum receptionem, dicimus esse  
solummodo possibilis intellectus, ita ut nihil  
dimittatur ad fictitium illum intellectum,  
quem agentem nuncupant. Ex his concludi-  
mus intellectum illum agentem respectu ob-  
iecti & phantasmatis non esse necessarium:

superest

superest ut demonstremus nullius esse momenti respectu intellectus possibilis, quod paucis conciemus: Si requiratur Agens intellectus respectu possibilis, tū vel ut causa cognitionis Dispositiva, vel ut Productiva. Divisio est clara, quia uterq; intellectus ad cognitionem vires suas conferre statuitur. Omnis verò causa hīc vel ad disponendum confert, vel ad productionem. Primo non est causa dispositiva, quia sic vel ad habitum disponderet, vel ad actum. Non ad habitum, quia sic ad aliquem vel aliquos actus eiusdem habitus. Habitus enim in nobis nascitur ex diversis actibus. Quod verò actus non requirat talem mentem facile liquet, quia duo hīc statuuntur, obiectū nimirum & potentia: Obiectum (uti patet ex antecedentibus) per se satis præparatum & dispositum est ad potentiam informandum sine ulteriori formā illi adiunctā. Quod verò intellectus etiam possibilis non indigeat aliquā præparatione patebit exemplo & inductione sensuum. Haud secus enim ac visus obiectum debito modo dispositum recipit ac cognoscit sine aliquā aliā agente facultate, ita & intellectus possibilis, ubi semel ab obiecto commovetur naturali quādam inclinatione & potestate imbibit & cognoscit, certasq; in illorationes receptione separat ac distinguit. Quod

verò ad primum cognitionis actum disponit  
disponit ad secundum, & ita ad habitum,  
Quod verò ad habitum disponit, ad omnes  
actus ex illo habitu provenientes disponit. V-  
ti enim habitus primò in nobis generatur per  
multos actus, ita ex habitu semel in nobis ge-  
nito omnes actus fatali quâdam lege derivan-  
tur. Tandē quod non sit causa productiva cog-  
nitionis in intellectu demonstratur. Vel enim  
ut causa productiva concurreret cum objecto,  
vel cum possibili Intellectu, vel saltem per se  
ageret. Non concurrat cum objecto & phan-  
tasmate, quia sic haberet se per modum for-  
mæ illi adjunctæ, & ita relaberemur in eorum  
dogma qui dicunt hunc intellectum requiri  
propter phantasma, quorum placita in superi-  
oribus perstrinximus. Quicquid enim simul  
agit cum objecto, vel agit ut res ipsa cognos-  
cibilis vel saltem ut forma & ratio, quâ aptum  
sit objectū illud movere potentiam. Non con-  
currit in agendo cum intellectu possibili. Pri-  
mò, quia sic idem intellectus esset in eodem  
actu agens simul & possibilis: & ita opposita  
simul & respectu eiusdem eidē convenirent,  
cui omnes Logici adversantur. Consequentia  
patet: quia nihil dicitur concurrere in agendo  
cum eo quod non agit. Quod si igitur statu-  
ant Agentem Intellectum cum possibili con-  
currere,



currere, statuant simul necesse esse & possibilem intellectū agere. Secundò si possibilis agat non necesse esset alium intellectū agentem ponere quod hi contendunt. Deniq; non agit per se in opere intellectionis. Primò quia sic cognitio non dependeret ab objecto, sed ab ipso agente intellectu, & ita per cōsequens cognitio absolvi posset sine objecto. Quod absurdissimum. Secundò, quicquid per se movet intellectum, erat prius sub aliquo sensu juxta Aristotelem & saniores Philosophos: At Intellectum Agentem sensum unquam movisse, nemo quod sciam unquam ausus est asserere. Hucusq; ex officiis Agētis Intellectūs generatim confirmavimus talem omnino intellectum non esse admittendum: speciatim iam demonstrabimus talem non esse substantiam qualem adversarii prædicant: Processus argumentationis erit hujusmodi: Si Intellectus Agens concedatur, tunc proculdubio erit vel substantia separata & distincta ab intellectu possibili, aut eadem ratione tantum differens. Consequentia est clara, quia omnes concedunt esse mentem quandam & substantiam spirituales. Quare vel erit cum intellectu possibili eadē vel diversa. Quod si dicant esse substantiam separatam, tunc vel erit Deus vel Angelus. Aliam enim substantiam in-

corpoream & spiritualement non agnoscant.  
Quod primò, non sit Deus hisce conficitur rationibus. Primò, qui statuunt Intellectum Agentem esse Deum volunt esse instar formæ phantasmati adjunctæ, cuius quasi lumine intellectus possibilis objectum suum recipit. At Deus formæ rationem subire non potest, quoniam sit actus purissimus ab omni materiâ seiunctus. Hanc verò formam phantasmati imprimi & immergi somniant. Quod si dicant Deum talis formæ rationem subire, quæro utrum ad extensionem illius materie extendatur vel nō? Non dicent extensionem esse, quia hoc esset penè hæreticum talem in Deo extensionem statuere, quum extensio omnis sit comes quantitatis. Si non extendatur, quomodo singulis objecti partibus ita applicari potest, ut totum quasi illuminatum intellectui possibili repræsentet? Siquidem applicatio illa sine extensione quādam agrè & difficulter intelligitur. Secundò, si Deus ut forma adungeretur objecto vel phantasmati, ut de intelligibili potentia faciat actu intelligibile, tunc Deus esset intellectui possibili maxime intelligibilis. At non est. Consequentia est clars, quia illud, quod tanquam actus quidam & forma aliud reddit tale, est magis tale. Ut albedo igitur dicitur magis visibilis, quia per albedinem tanquam  
formam

formam aliquam paries est visibilis. Quod verò Deus ab humano intellectu non sit maxime intelligibilis, ex eo liquet, quod minima aut nulla sit proportio, & convenientia inter Deum & humanum intellectum, quum hic finitus sit, ille verò infinitus: tum etiam quod Metaphysici post multas resolutiones ad cognitionē Dei ultimò perveniunt. quod enim in naturā primum; illud ordine inventionis nostræ plerumq; ultimum: quia omnis cognitio intellectiva ortū ducit à sensitivā, divina verò essentia est à sensu remotissima. Nec est alicuius momenti quod dicunt, Deum in se esse maxime intelligibilem licet non à nobis. Hoc enim gratis concedimus maxime intelligibilem esse, sed ab intellectu infinito, nō finito. Satis est nobis asserere Deum humano intellectui maxime obscurum esse, & per consequens non esse illud quod phantasma de non intelligibili tanquam forma reddit actu intelligibile. Tertiò; Huc accedunt rationes à vulgaribus Philosophis propagatæ. Primò quod Deus agere solet mediātib; causis secundis, non immediatè, nisi miraculosè, quod in agentibus naturalibus & ordinariis raro admittunt. Secundo quod hoc posito cognitio nostra non dependeret ab objecto sed à Deo, quam rationem suprà tetigimus, & alia

haud pauca, quibus non ita facile satisfacient  
adversarii; licet minoris sint momenti, quam  
primæ illæ. Tandem si affirmant intellectum  
Agentem esse Angelum: Primò recurrunt su-  
periores difficultates, in quas impingunt illi  
qui volunt hunc intellectum esse Deum. Se-  
cundò, si Angelus tali gaudeat officio in actu  
nostro intelligēdi, tum vel idem Angelus hoc  
præstaret apud omnes intellectus, vel plures  
Angeli eidem intellectui assisterent, vel saltē  
quilibet intellectus possibilis proprio suo ge-  
nio gauderet. Non primum, quia idem Ange-  
lus, quum sit substantia finita, & certis limiti-  
bus contentus, non potest esse in pluribus lo-  
cis, ut omniū intellectionibus se immisceat.  
Non secundum, quia si ponunt hunc intelle-  
ctū esse plures Angelos, tum plures essent A-  
gentes intellectus secundum substantiam. At  
hoc nemo adhuc admisit: frustra enim illud  
pluribus tribuitur, quod æquè commodè per  
unum absolvi poterit. Quare entia hinc multi-  
plicantur sine necessitate: Quod in Philoso-  
phiâ absurdū. Non tertium deniq; , quia pri-  
mò, si unicuiq; intellectui certus Angelus as-  
taret, tum concurreret ad intellectionem, vel  
speciem suggerendo intellectui possibili, vel  
speciem & phantasma præparando, vel intel-  
lectum possibilem movendo. Non prius; quia  
tali

tali suggestionem non est opus. Species enim immediate ab objecto recipitur in sensum, à sensu promouetur in phantasiam, cui quum intellectus semper præsens adsit, ab eâ informari potest, ita ut non opus sit reliquo tertio interveniente. Non secundum, quia sic præpararet speciem & phantasiam vel per modum formæ illi adjunctæ, & quasi illuminantis, vel per modum efficientis alicuius materiales conditiones ab immaterialibus & singularibus distinguendis: quorum utrumque in superioribus confutavimus. Non tertium, primò quia scilicet quum Angelus humanum intellectum moveret ad certi alicuius obiecti perceptionem cognosceret etiam cogitationes nostras, quod saniores Philosophi & Theologi negant quum Deum solummodo *αποδογμῶν* esse volunt; Angelus autem non potest ad illius obiecti apprehensionem cōferre & movere, quod non novit illam facultatem informaturum. Secundò hoc posito cognitio nostra non dependeret ab obiecto, sed ab Angelo, quod superius reiecimus. Quare concludimus tandem Intellectum hunc Agentem non esse substantiam aliquam separatam, quod ex adversariis nonnulli contendunt. Ultimò, quod hic intellectus non sit idem cum possibili argumentis haud levibus demonstrabimus. Primò enim

enim si idem realiter sit intellectus Agens & Pateriens, tunc agens ageret vel immediate in patientem, vel saltem in obiectum in illo reconditum. Non prius: primò, quia sic in eodẽ intellectus operationis opere idem esset agens & patientes, & idẽ ageret in seipsum, quorũ utrumq; Peripateticis absurdum. Primum, quia agens & patientes sunt opposita, ut non possunt eidem respectu eiusdem sine cõtradictione competere. Secundò, quia movens & motũ, Agens & Pateriens, saltem in simplicibus Agentibus iuxta Aristotelẽ debent esse inter se diversa, & non idem. Secundò, si Agens ageret in intellectum possibilem, tunc vel movendo & flectendo possibilem, vel sub ratione obiecti intelligibilis in illum recipiendi. Non prius, quia primò talis actio flectendi & torquendi intellectum soli Deo ascribitur & non aliis Agentibus à doctoribus Theologis. Secundò, si sic flecteret & moveret intellectum patientem, primò illã cognosceret: nihil enim movere & flectere dicitur illud ad intelligendũ, cuius rationem antea non perceperat. At hoc posito, intellectum Agentem cognoscere & intelligere patientem, esset quædam intellectio sine patiente, & antequam res in patientẽ reciperetur, & ita vel duæ essent intellectiones vel saltẽ possibili nõ esset opus in omni intellectu.

tellectione, quorum utrumq; rationi absonū. Tertiò si intellectus agens sic moveret possibilem, tūc vel ut Agens Liberū, vel ut Naturale. Non ut liberum, quia sic supponeret ante se voluntatis actum, quia liberum dicitur quod à voluntate proficiscitur: voluntas autē ab intellectu prius determinatur, & actuatur iuxta meliores Philosophos. Erit itaque intellectio precedens voluntatem illam quæ agentem movet ad agendum, & per consequens erit intellectio ante Agentem intellectum, & per consequens agens ille intellectus erit penitus inutilis & supervacaneus: Si moveret ut agens naturale, primò semper ad unū determinaretur, & semper ageret uniformiter: quia omne agens naturale ad unū definitur: secus verò experimur in intellectu apprehensione, quæ se huc & illuc torquere solet, & infinitā obiectorum varietate perfundi. Secundò Agens intelligens & cognoscens non agit per modum Agentis naturalis, sed liberi. At talem volunt esse Agentem intellectum. Quorsum enim intellectum vocarent si non intelligeret? Tandem si dicant actum intellectus in obiectum seu ipsum phantasma terminari; in angustias haud leviores se precipitant. Si enim Agens Intellectus, qui idem realiter constituitur cum patiente, primò

primò agat in objectum, tum vel primà ac simplici illius Apprehensione, vel actu collativo & discursu: non priori, quia sic vel eadem esset hæc Apprehensio cum receptione, vel ab illâ distingueretur. Non est eadem cum receptione objecti, Primò, quia actus intellectus agentis juxta illos est actio. Intellectus verò possibilis est passio. Secundo, quum intellectus patiens sufficeret ad receptionem obiecti, frustraneus esset agens intellectus, quod hi negant, & nos contendimus. Si dicant diversam esse à receptione, falluntur. Primò: quia entia sine necessitate non sunt multiplicanda. At nulla necessitas cogit ut dicamus primam illam apprehensionem simplicis obiecti esse aliam à receptione illius in intellectum possibilem: quia non alio modo se habet intellectio ad intellectum patientem, quam calefactio ad aquam calefactam. At calefactio nihil aliud est quàm caloris in subiectum receptio & impressio, ut curiosum sit nimis hec inter se distinguere. Quo sensu dicitur visio nihil aliud esse quàm obiecti visiti: is in visum imbibitio & receptio. Quidni etiam pari ratione dicamus intellectionem illam primam esse obiecti in intellectum receptionem & impressionem. Secundo, si distinguatur simplex hæc animi operatio à receptione, tum vel receptionem



nem antecederet, vel simul cum eâ concurreret, vel saltem sequeretur. Non primum, quia sic esset intellectio priusquam res in intellectum per speciem reciperetur. Quod absurdum. Nulla enim potest cogitari intellectio sine unione & coniunctione potentiz cum obiecto. Non secundum, quia quum apprehensio iuxta illos sit actio, receptio verò passio, idem intellectus respectu eiusdem obiecti simul ageret & pateretur, & ita oppositas pateretur rationes, quod absurdum. Nec admitti potest hic aliqua Reactio, quia illa tantum locum habet in Agentibus naturalibus, in quibus datur resistantia. At in intellectu ad recipiendum species disposito & preparato, talis resistantia cogitari non potest, præsertim ubi contrarietas & repugnantia non admittitur. Si deniq; hæc simplex animi operatio sequatur receptionem, tum primò receptio præcederet, & ita aliquid esset in intellectu priusquam intelligeretur, quod videtur absurdum. Siquidem operatio intellectus unica est intelligere, sive actio sit, sive passio. Deinde si hæc receptio qualiscunque præcederet tempore Apprehensionem, tum vel contingenter vel necessario. Non contingenter, quia sic apprehensio possit esse sine receptione

ceptione, quod isti negabant, & ratio non admittit. Si necessario, tum intellectus, dum recipit species, vel intelligit, vel non. Si intelligat, tum habemus propositum receptionem hanc & apprehensionem tempore coincidere. Si non, relabuntur in superiorem rationem, & dicunt necessario res prius per speciem recipi in Intellectum quam intelligantur, & ita intellectus noster prius erit in habitu, quam in actu. Quod absurdum. Habitus enim in nobis nascitur ex multis actibus intelligendi. Intellectus verò omnis in habitu esse dicitur, quum species in Intellectu receptæ reconduntur, licet semper non intelligantur. Ex his constat, Apprehensionem illam primam non omnino differre à passione & receptione, & proinde Intellectus Agentis auxilium non requirere. Si ad alteram partem se divertant, & dicant intellectum agentem conferre ad collativum mentis actum & discursum, sibi metipsis contradicere videntur. Sic enim esset intellectio sine intellectu agente, quod isti negant. Nam dicant necesse in omni intellectione opus esse illâ facultate. Consequentia sic ostenditur: quia conceptus seu apprehensio simplicium iuxta omnes est intellectus. Hec verò apprehensio discursum necessario antecedit. Si itaq; esset talis apprehensio ante discursum

non indigens auxilio Agentis Intellectûs, tunc esset intellectio sine illo. At præcipuum munus istius mentis agentis collocant in abstractionis negotio, quod primè illi ac simplici intellectioni adscribunt. Ex his clarissimè colligitur, talè intellectum, prout suis officiis exponitur apud vulgares interpretes, esse figmentum curiosulorum & minimè necessarium. Quid ergo? dicemus intellectui nullā omnino actionem competere, sed totum illius opus in passione constitui? Non profitemur. Dicimus enim unum & eundem quoad substantiam esse intellectum, qui duplici distinguitur operatione. Passione nimirum & actione. Passio est simplex illa ac primaria rei Apprehensio, in quā Agens remotū est obiectum, proximum verò species in illum recepta: patiens verò est Intellectus, quatenus à specie afficitur & movetur. Actio verò est collativa mentis operatio quæ absolvitur partim compositione & divisione terminorū, partim discursu. Hanc ultimam animi operationem si quis Agentis intellectûs operatione & nomine dignari cupiat, non contradico. At hunc sensū ab interpretibus Aristotelicis abhorreere penè omnibus facile suadere possum illis, qui illorū libros vel primis labris degustarunt. Quare concludimus, intellectum illum agentem Peripateticorum

ripateticorum vel non omninò dari, vel saltem alio sensu esse explicandum.

## DECAD. III.

## EXERCITATIO I.

*Materia non communicat extensionem Formæ.*

**D**E extensione formarum quoties occurrit quaestio apud Peripateticos ad materie extensionem refugiunt tanquam genuinam ejus Radicem. Nihil enim huiusmodi Philosophis in ore familiarius quàm formas omnes extensas esse ad extensionem materie. Hoc tamen principium Aristelis munitum autoritate, vulgus Philosophorum aut non satis intelligit, aut malè explicat ut Aristoteles nullibi minùs videatur querendus quàm in ipsis Aristotelicis. Ego autem ut extoquem quid sentiant adversarii & veritatem aperiam, probabo falsum esse quod astruunt isti Philosophi formarum extensionem è materie quantitate esse derivatam. Quare sic ordior: si materia formæ largiatur Extensionem, tum hæc extensio sic communicata erit vel materie propria, vel ex ipsa materia in formâ nova quædam extensio generabitur: Consequentia est clarissima quia alius modus inveniri non potest quo materia formæ largia-

tur extensionem, quam ut vel suam propriam communicet vel alienam gignat. Jam quod suam propriam extensionem in formam non transferat facile suadetur: sic enim vel materia simul retineret suam extensionem & forme comunicaret vel prius à se deponeret, ut in formam reciperetur: Prius non est admittendum. 1. quia sic una & eadem extensio esset simul in diversis subiectis, materiâ nimirum ac formâ: materia enim & forma duæ sunt res inter se distinctæ: At impossibile est idem accidens esse in diversis subiectis simul, multo minus eundem modum entis qualis est extensio. 2. Hæc extensio materia in formam derivata erit corporea vel non: si corporea, locum solummodo invenit in corpore; at forma non est corpus, sed quæ aut spiritus est omnino, ut anima Rationalis, aut saltem quæ spirituales sapiat subtilitates, ut formæ reliquæ. Deinde si posterius affirmetur materiam suam ex ætate Extensionem ut in formam recipiatur, minus satisfaciunt. 1. quia sic extensio migraret à subiecto in subiectum: at hoc accidentibus tribuere vel suffragante totâ Peripateticorum Scholâ est absurdissimum; multo magis in modis entium, cum maiore habeant cum ente in quo insunt dependentiam, ut maiori cum difficultate à subiectis suis separentur. 2. Que-

ro utrum materia depositâ hâc suâ extensione sit extensâ vel non: non prius; quia contradictionem implicat materiam post exutam extensionem esse extensam. Non posterius; quia sic materia non occuparet locum sed esset in puncto Mathematico conclusa, quod impossibile. Quicquid enim est vel est in puncto, vel in spatio. Inter hæc autem non assignatur medium. Tandem affirmare materiam novam in formâ progignere extensionem multo est absurdus: Nam materia hoc præstaret vel immediate & per se, vel per aliquod accidens aut modum: Non immediate & per se. 1. quia materia ex se est passiva non activa: quod autem merè passivum est non agit aut producit quicquam. 2. Si producat tum vel Effectione aliquâ productivâ, vel resultantiâ quâdam: Non prius: quia hoc fit mediante aliquâ qualitate: at hoc contra thesin, quæ voluit materiâ hoc ex se præstare: Deinde, occurrit superior ratio materiam ex se non esse activam aut productivam. Deinde, non producitur merâ resultantiâ, hoc enim modo producuntur tantum entia respectiva & non absoluta: hæc enim aliquem divini concursus actum terminât. Quare concedant adversarii necesse est, materiam à Deo produci posse sine extensione, quod impossibile; aut saltem produci

duci non posse per resultantiam ut ens aliquod absolutum. Quid enim obstat (si modò extensio concedatur esse absolutum quoddam) quominus Deus productam rerum materiam sistat se ab ulteriori actione & concursu. Porro materia per accidens aliquod non largitur hanc formæ extensionem: hoc enim præstaret vel per propriam suam extensionem vel per aliquod aliud accidens: Non per propriam suam extensionem quia quantitas non est activa: Extensio autem est aut quantitas, aut aliquis quantitatis modus, qui ad actionem minus idoneus invenitur quam ipsa quantitas. Denique, non potest esse hæc generatio novæ extensionis ab aliquo alio Accidente: quia nullum in materia reperitur accidens activum quod tale aliquod producat: omnis enim actio est à formâ quæ apud omnes statuitur principium activum. Tandem, si ex materiæ extensione nova quædam in formâ derivetur, tum illa de novo sic genita erit vel eadem cum compositi extensione, vel diversa: Non eadē, quia nulla est totius corporis extensio præter illam materiæ: at hæc ex thesi alia est ab illâ quæ in formam transmittitur. Non diversa, sic enim in eodem corpore duplex esset extensio, & ita per consequens duplex quantitas, quod sine corporum & quantitatum penetratione non

admittendum: Hinc etiam sequitur ex eorum opinione qui plures formas in eodem concederent multiplicem eiusdē esse extensionem, quam necessario sequitur multiplex quantitatum penetratio. Quid hīc Peripatetici? formæ materiales (inquiunt) se dilatant ad extēsq; materiæ limites. At per se non talis extensionis sunt participes : A materiâ itaq; accipiant necesse est. Largimur facile formam ad quamlibet materiæ suæ partem se diffundere; utrum verò extensionis nomen mereatur talis diffusio, non pugno: materiæ itaq; propriam suam tribuimus extensionem, propriam etiam dilatationem formæ. Ita tamen, ut huius ad illius partes Applicatione quādam se mutuo respiciant, sibiq; mutuo respondeant. Ut verò melius intelligatur hæc partium Applicatio in materiâ & formâ simul iunctis, dicimus partes materiæ esse quasi corporeas & quantitativas: formæ verò entitativas: Cogitandum igitur in hac Applicatione partium singulis partibus quantitativis materiæ singulas formæ partes (ut vocant) entitativas sic respondere, ut forma videatur ad materiæ suæ extensionem dilatari.




## DECAD. III.

## EXERCITATIO II.

*Superficies aquæ est conica.*

**D**E Aquæ Superficie haud levis est disceptatio. Peripatetici, juxta antiquorum Mathematicorum principia, contendunt aquam esse sphericam: haud desunt ex alterâ parte Platoniorum nonnulli, qui planitiem astrunt: Neutrum verò planam rei veritatem attingisse, tum nostris, tum aliorum inventis demonstrabimus. Deinde, quid pro nostrâ parte statuendum sit, explicabimus. Prima ratio sit hujusmodi: Aut superficies aquæ est Sphærica, aut plana, aut Conica, aut alterius alicujus figuræ: Aliam figuram non facillè admittent, quia nemo hucusq; ausus est assignare. Deinde non est plana, ob eas rationes, quibus Philosophi sphericam esse contenderent. Nam primò trajicientibus per altum mare, primò turres, castra, & propugnacula in littore posita integra conspiciuntur, mox imâ sui parte paulatim occultantur, donec tandem tecta tantum aut culmina sint conspicua: hujus causa non est alia, quàm globosus tumor aquæ


oculis nostris & turri interpositus, qui imas  
ejus partes abscondit: quod etiam in Nave  
transcūte experiuntur homines in littore am-  
bulantes. Imò etiam nautæ in tectum Navis  
ascendentes, imas turrium partes vident, quas  
alii non vident; sicut patet in Diagrammate



opposito. Pla-  
tonici quidā  
has visus no-  
stri impediti-  
ones non in  
spharicam a-  
quæ naturam  
sed in alias  
causas rejici-  
unt: partim  
nimirū in di-  
stantiam, quæ


non perfectè rem repræsentat; partim in va-  
pores interjectos: partim verò in lumen illud  
tremulum, quod è radiis solaribus in aquâ re-  
fractis spargi solet. Has quidem causas non  
negamus aliquando visum impedire, quo mi-  
nùs integra rei species ad visum deferatur.  
Plùs tamen constat impedire rotunditatem  
aquæ, licet portio illa aquæ visui obiecta non  
ita magna sit, ut differentiam valdè notabilem  
oculo exhibeat, quod facile patebit in quâli-  
bèt

bet arcûs sectione. Supponamus enim navem distare à visu intervallo quod sit arcûs portio  $ACB$ , erit itaq; eminentia seu tumoris altitudo visum impediens Sinus versus  $CD$ . De-



inde illud Patritii effugium, cui quodammodo consentire videtur Clavius in Iohannem de Sacro Bosco, De vaporibus interiectis, confirmat potius nostras partes, quàm evertit. Quod enim videtur in medio crassiori, illud iuxta principia Optica maius apparet quantitate, & per consequens propinquius, & sic consequenter altius, sicut in ortu Solis constat aliquando Solem à nobis per refractionem videri, priusquàm supra horizontem elevatur. Quare turris hoc modo ob vapores interiectos ascendit altius, ut ad maiorem distantiam loci se ostendet, quàm si nulli omnino vapores intervenirent. Deinde nihil est quod urget de lumine Solis incidente in aquam tremulo, quod visui obscuritatem pariat. Nam licet aliquid obstaculi hoc modo visui contingat, decrementum tamen magnitudinis continuum esse & proportionale ex hac causâ non  
P 4 experimur.

experimur. At Navem mare trajicientem videmus continuâ aliquâ proportionē paulatim magis magisque minui, & imâ sui parte curtari, ut in nullam aliam causam, præterquam in aquæ curvitatē, referri possit. Altera ratio, quæ maioris est momenti, desumitur ab ortu & occasu siderum, quæ tum aquæ, tum terræ gibbositatē probant, & planitiem illam fictitiā tollunt. Curvitatē hanc & rotunditatē astruimus ab Ortū in Occasum, & à Septentrione in Meridiem. Quare omni modo erit rotunda hæc aquæ congeries. Quod aqua sit rotunda ab Ortū in Occasum; primò confirmatur ex signis & stellis omnibus, quæ prius oriuntur & occidunt apud gentes Orientales, quam Occidentales. Hoc maxime experiri licet in eclipsi Lune (quia hæc omnium gentium est communis) tamen omnibus eisdem horis non est conspicua. Hoc autem accidit ob diversitatē horizontium ortam ex gibbositate terræ, ut in schemate huic affixo sit Oriens A, Occidens B. Sunt ergo duo diversi horizontes A B & D E, ob rotunditatē terræ C. Hinc facillè apparet, intuenti Solem, stellas, & præcipuè eclipsin, citius illis esse conspicuam, quorum horizon est D E, quàm illis quorum horizon est A B. Cum autem Sol ex Æquatore quâlibet hora gradus



15. conficiat iuxta principia Astronomica fit  
 necessario, ut illi, qui à nobis 30. gradibus  
 distant, eclipsin aut stellam orientem duas ho-  
 ras ante nos conspiciant. Pars altera superio-  
 ris assertionis, nimirum terram esse gibbam  
 ab Austro in Septentrionē, facile liquet. Nam  
 quædam stellæ sunt sempiternæ apparitionis,  
 quædam sempiternæ occultationis, quædam  
 apparent nobis, & occultantur. Cuius causâ  
 alia reddi non potest, quàm curvitas terræ ob-  
 stantis aspectui. Deinde si quis sub eodem  
 meridiano proficiscatur, quasdam stellas ob-  
 servabit antea conspicuas, iam paulatim ma-  
 gis magisque deprimi, & occultari, & è contrâ  
 quasdam

quasdam antea non visas iam reddi magis magisq; conspicuas, ut patet exemplo Solis, qui nobis multo est depressior, quam Italis & Aegyptiis: hoc autem incrementū, vel decrementū semper est proportionale; Nam Oxonia polus elevatur ad milliaria circiter 52. Si quis hinc sub uno meridiano conficiat gradus 60 versus Septentrionem, videbit polum ad 53 gradus assurgere, & sic singulis milliariabus 60 (quæ unum gradum conficiunt) poli variatio uno gradu variabitur: Quod certissimum est indicium, terram gibbam esse inter Septentrionem & meridiem, & nullatenus planam esse quod hi contendunt. Tertia ratio ad rotunditatem aquæ stabiliendam delumitur ab Aristotele lib. 2. de cælo; Aqua (inquit) suā naturā semper petit locū decliviorē, & per consequens rotunda est: nam aliter ad lo-




cum declivē non semper conflueret. Sit enim exempli causa aquæ plana superficies ADB, & ex centro mundi C describatur circulus EGF, & ex C educatur CD perpendicularis ad AB, connectanturq; AC, & BC,

B C, & quoniam recta C D minor est, quàm C A aut quàm C B, erit punctum D in loco decliviori, quàm punctum A vel B, quia propinquius est centro. Hinc concludunt, fieri non posse, ut aqua alterius sit figuræ, quàm rotundæ. Cui affinis est demonstratio Archimedis libro primo de Aquâ vectis: Omnis nimirum humidi eam esse naturam, ut partibus ipsius æqualitèr jacentibus, & inter se continuatis minùs pressa à magis pressa expellatur: quod quum ad perpendicularum fiat, sequitur, omnis liquoris superficiem arcu quodam è centro terræ describi, & sic rotundam esse. Quantum deficiunt hæ rationes ad figuram aquæ purè sphericam demonstrandam, infrà expediemus. Satis tamè validas esse ducimus ad evertendum illud Patritii, & quorundam Platoniorum dogma, qui planitiem aquæ astruerent. At contra hanc aquæ sphericitatem insurgit Patritius bello (uti arbitratur) apparatu. Omnis (inquit) aqua est in superficie vel Plana tantum, vel Rotunda tantum, vel & Plana & Rotunda, vel nec plana, nec rotunda. At plana simul & rotunda dici non potest, quia hoc pacto contraria admitteret: neque unam esse planam, aliam rotundam dices, cum aqua sit homogenea, eiusdemq; rationis. Vt sit nec plana, nec rotunda, est impossibile, neq;  
aliquis

aliquis aliam figuram aquæ assignavit: Non verò est rotunda tantum; quod confirmat multis experimentis: Primò, ex montibus quibusdam *Anseri & Corsica*, qui (uti testatur) sub Aurorâ navigantibus conspicui erant, orto Sole evanuerunt. Vnde infert, hoc non in aquæ rotunditatem, sed in alias causas esse referendum. Ad hoc verò dicimus, hanc rationem aquæ tumorem non tollere. Nam primò: utrum hîc Patritio fidem adhibeant docti, necne, nescimus. Secundò: licet alia daretur causa huius Phænomeni, non sequitur tamen, aquæ tumorem visui nunquam officere, quod contendit hîc confirmare. Non enim negamus, alias etiam causas sæpe concurrere ad visionem navigantibus impediendam, quo minus res procul distantes oculo complectamur. Secundum accedit Patritii experimentum. Apud oppidum *Comaclum* (inquit) stagnum sanè permagnum est: per id stagnum anno abhinc tertio è *Comaclo* cymbulâ solvimus, ut *Ostellatû* peteremus. Fundus itinere ferè toto clarissimâ aquâ minùs duobus pedibus altus est conspicuus: Itinere procedete ima domorum primò sensim è visu tolli cœpta, mox altiora, tandem humiliora culmina, nondum sex mille passuum itineris confectis, turris alta pedes 72. è medio sui supereminebat visibilis,



lis, ea quoq; ad decem mille passus è visu est sublata. Hic Geographos rogamus, an tam brevi spatio, quo totus fundus duobus pedibus minúsq; pressus & conspicuus quum esset, an mare illud potuerit in medio ad 5. passuum millia, pedes 72. in rotunditatem attolli, ita ut minus duos pedes & 72. aqua super fundum attolleretur. Aut mons sub aquâ pedes 74. est. At è tanta terræ subiectæ altitudine littora stagnum circumdantia visa essent decliviora: At visuntur stagno altiora: Non ergo in eo medio aut terræ aut aquæ ullus est mons, aut rotunditas. At demonstrationem Patritianam ex hoc experimento ductam non difficile est evertere. Dicimus itaque primò, non Aquam tantum, sed & particulam terræ Aquis subiectam cum ipsa aquâ rotundari. Non mirum est itaque, aquæ non minus duos pedes alta in tantam curvitatē seu convexitatē incurvari, quum tota illa terræ portio aquæ subiecta eodem modo rotundetur. Cui ocularis accedat demonstratio. Sit enim exempli causa circulus terræ minor B D E, sit aquæ circulus, saltem pars eius aquæ terram circumfluens A L C, profunditati aquæ L F addenda est terræ subiectæ gibbositas F C, & sic videmus (ut ex schematē sequenti apparet) aquæ tractum, licet duos attingat pedes altitudi-



altitudinis, modo ad distantiam magnam por-  
 rigatur, in tumorem aut gibbum tantum as-  
 surgere; ut turrim 72 pedes aut plures forte  
 altam visui adimat: Calculus tamen Patritia-  
 nus non planè quadrat; quod observationis  
 incertitudini tribuendum. Vbi tamen obicit  
 littora videri altiora, quæ ex nostris principiis  
 essent visui decliviora, quia aquam per medi-  
 tum in tumorem assurgere defendimus. Tria  
 sunt quæ respondeamus. Dicimus enim hoc  
 accidere ex illis quæ Optici tradunt: *Paral-  
 lelas lineas in fine quoad visum concurrere.*  
 Quàm autem celestis circulus & aquæ cir-  
 culus

culus sint inter se paralleli in fine sensim concurrunt . Quare aqua videbitur partim assurgere & attolli ut cœlum attingat ; sic & cœlum aliquantulum deprimi ut attingat aquæ circulum . Secundò, turris illa quæ sic videtur necessario eminet supra aquas. quum itaq; aqua quoad sensum ubiq; videatur plana , necesse est ut iudicio scsitivo turris videatur altior ex principiis Opticis ; Ratio huiusce rei duci potest ex Refractione Radiorum visibilium : Nam juxta principia Optica quicquid videtur per medium densius videtur maius : Vnde fit ut assurgat altius : Aër autem circa superficiem Aquæ ob perpetuam vaporum elevationem crassa est censenda : quod si ex se crassa non esset , ea tamen est Distantia quæ respectu visus crassitiem introducit ; ut cum multæ ejusdem corporis Diaphani partes eadem rectâ lineâ oculo obversantur . Tandem cum Rei visibilis ut Aquæ in medio crassiori sit Refractio, visusq; nolter ex obliquo superficiẽ Aquæ respiciat & nõ perpendiculariter, fieri nõ potest ex perspectivis, quin videatur altior quàm reverâ est . Alteram rationem ducit ex homogeniâ aquæ . Si aqua ( inquit ) sit in superficie rotunda , quæq; eius pars esset rotunda in superficie , quod & guttarum & poculorum productores & fatebantur &

con-

concludebant. At partium nulla rotunda est. Ergo nec tota Assumptio ita suadetur. Partes omnes aut magnæ sunt aut parvæ. At neque parvæ guttulæ exactam habent rotunditatem nec magnæ. Confirmatur hæc multis modis. Primò: poculorum orificia non videntur elata: nam licet ad labra aqua à siccitate coërceatur, tamen nullus est in medio tumor. Secundò, flumina ne effundantur ripis coërcentur. Tertiò, flumina quando ita turgent nivibus, ut à ripis vix contineantur, in medio non videntur elata. Quartò, si quis in imâ alterâ ripâ prostratus collimet ad signum in alterâ ripâ positum, proculdubio conspiciet nullo aque tumore visum impediante. Quintò tantum abest, ut flumina in medio videantur elata, ut potius cava videantur quia omnis immundities in medium è ripis innatare solet. Hoc argumentum ex homogeniâ aquæ ductū infra ostendimus nihil demonstrare. Sicut enim terra rotunda dicitur, licet singulæ eius partes in se spectatæ à geometricâ & exactâ illâ rotunditate declinent, ita partes aquæ licet singulæ non quadrant, tamen tota aqua in se sphærica dici potest, quum illæ particulæ nihil habent proportionis, respectu totius universæ sphæra. De guttulis aquæ, & poculorum orificiis quid sentiendum sit, inferius aperie-

periemus. Quod verò suggerit, tumorem non esse conspicuum; nec collimantis visum impedire, dicimus; nihil probare aliud, quàm tumorem aquæ in tantillo spatio non esse sensibilem, quod sine magnâ difficultate largimur, etiamsi hæc à Patritio gratis dicta sint, & non probata. Quod ultimò subiicit, aquam potius videri in medio cavam, quod omnis immundities, si quæ sit, in medium torrentis illabatur, dicimus; hoc fieri per accidens; quia torrentes, ubi incrementum sumunt à ripis pluviam effusis, motum habent aliquem concitatiorem aquæ à ripis in medium protulæ, unde immundities à ripis elutis in medium quasi violentiâ fluminis ex altiori loco currentis prolabitur. Deinde hoc fieri potest è fluminis Canale delati rapaci violentiâ, cum medium citius promoveatur, quàm partes, quæ sunt à latere, unde per vacuitatem maiorem fit, ut medium aliquando sit cavum. At pergit Platonius noster alio apparatu. Si quis mari tumore insit, erit necessario vel in mari medio, vel ad unum, vel utrumq; littus. Si ad utrumq; littus mare altius sit, & in medio declivius, tunc iuxta Aristotelem à litoribus in medium confluet, illudq; complanabit. At hæc nusquam visuntur. Si quæ in medio est rotunditas, dubium nullum ad littus utrumquæ esse declivita-

declivitatem: Mare ergo à medio ad littora  
 conflueret, donec ambo loca complanaren-  
 tur: Si autem non difflueret, altius non erit:  
 Si non altius, nulla erit rotunditas. Ad hoc  
 dicimus, aquam esse quodammodo tumidam  
 in medio, cujus infra causam enucleabimus:  
 Satis hic respondere cum Peripateticis, aquā  
 ita sphericam statui, ut terræ sit concentrica:  
 Quare à littoribus non fit tumor talis, neque  
 una pars aliā sit eminentior, quam omnes li-  
 neæ ductæ à centro ad peripheriam sint equa-  
 les: quare ex principiis Aristotelicis non dabi-  
 tur talis altitudo & declivitas. At quicquid  
 hucusq; contra aquæ planitiem à Patritio in-  
 troductam reposuimus: dicimus, aquam non  
 esse absolutè sphericam, sed conicam, quod  
 sic demonstramus: Si superficies aquæ sit sphæ-  
 rica, tunc vel est terræ concentrica, vel non  
 est concentrica. Si ita sit rotunda, ut non sit  
 concentrica, tunc proculdubio una pars erit  
 aliā eminentior, nec omnes ejus partes æqua-  
 liter distabunt à centro terræ, & ita erit coni-  
 cæ figuræ: Nam conica est, cujus media pars  
 è centro longius fastigiatur quam reliquæ.  
 Non est terræ concentrica hæc aquæ superfi-  
 cies: quod experimentis, illis prioribus con-  
 firmatur: licet enim planitiem aquæ non om-  
 nino probant, satis tamen sunt validæ quædā  
 ad

ad conicam hanc figuram stabiliendam: Gut-  
tulae aquae ad rotunditatem accedunt teste ex-  
perientiâ: at unam aquae guttulam totiûs ter-  
rae globo esse concentricam penitus est im-  
possibile: quare tumor aquae non semper erit  
concentricus. Respondent hic Philosophi Pe-  
ripatetici, aquam refugere sicci contactum:  
hanc itaq; sphaericitatem violentiae externae  
potius quam naturae aquae esse tribuendam;  
cû enim in nullo minore aqua tangere potest  
siccû quam in puncto, necesse est, ut aqua re-  
fugiens contactum siccitatis in globû se con-  
formet, & ita in puncto tangat. At contra hoc  
insurgit subtilissimus Scaliger Exercitat. 105  
Sect. 2. de argento vivo in aquis, & in scobe  
ferri fuso; quod nihilominus in sphaeram se  
colligit. Argentum vivum verò aquam &  
scobem ferri appetere magis quam refugere  
manifestum est, quum inter hæc non parva sit  
eognatio, uti docent Chymici. Deinde gutta  
aquae cadens per aëra conglobatur: At aëris  
humorem aqua non refugit. Cui etiam tertia  
accedat ratio. Si aqua siccitatem refugiens  
conformet se ad rotunditatem, tunc aut hu-  
mor aquae ageret in siccitatē subjecti, aut sal-  
tem siccitas ageret in humorem aquae. At neu-  
trum verum. Primò quia humor & siccitas  
non sunt activæ qualitates, saltem non sunt

ita activa, ut se invicem loco pellant ea corpora in quibus insunt quod hic accidit: Secundo, si agant hic inter se mutuo, tunc aut humidum tangeret siccum, aut non. Si non tangeret, non ageret, quia omnis actio est per contactum. Deinde quomodo aqua siccitatem non prius tactam persentiscet? Si tangat, tunc contactum siccum non refugit, sed se illi conjungit. Scaligero itaq; nova ratio procuditur hujus rotunditatis. Quæcunq; sunt (inquit) unum sunt. Vnitas autem in homogeniis excellentius servatur in globo: nihil enim descendit, nihil absistit, nulla inæqualitas. quâ parti pars aut desit, aut superfit. At hic interrogare licet pace doctissimi Scaligeri, quare partes majores non similiter conglobantur. Respondeat fortassis non ita in illis naturam periclitari, ut speciale hoc privilegium sibi vendicent. Esto. At finalem hic causam audio, non efficientem. Nec pro philosophis habendos censeo, qui in causis finalibus tantum acquiescunt. Licet autem ad formam aquæ recurrant aliqui tanquam hujusce rei causam, non ostendunt tamen, quo motu hoc fungatur officio. Si forma aquæ sit causa hujus rotunditatis, tum vel particularis forma aquæ, vel universalis quædam forma: Non universalis, quia hoc non tam confert ad conservationem  
universi



universi, quam ad particularis aquæ conser-  
vationem: Ille autem motus tribui solet na-  
turæ universali quo corpus aliquod particu-  
lare quasi proprium suum deponit genium ad  
totum conservandum: At ubi aqua se conti-  
net à centro, potius universum deserit ad se  
tuendum: Si sit hæc rotunditas à particulari  
formâ ipsius aquæ, nobiscum consentiunt, &  
concedunt, aquam esse naturaliter rotundam,  
& nihilominus terræ excentricâ, & per con-  
sequens eminentiam aquæ super terram esse  
conicam. At hanc rotunditatem aquæ natura-  
lem juxta Aristotelicorum principia defendi  
non posse hæc ratione confici videtur: Si for-  
ma aquæ hanc efficiat rotunditatem, tunc vel  
actione privativâ, impediendo nimirum par-  
tes, quo minus à globositate defluant; aut po-  
sitivâ, conformando nimirum suas partes ad  
rotunditatem. Non priori: quia juxta Peripa-  
teticos forma hæc est causa motûs deorsum;  
quare quum agens sit naturale, & non libe-  
rum, remittere hanc actionem aut suspendere  
non potest. Non posteriori; nam una & eadem  
simplex aquæ forma non potest esse causa du-  
orum motuum oppositorum, quales sunt mo-  
tûs descendens, & motûs aquæ conforman-  
tis se ad sphæram. Non potest enim aqua  
rotundari, nisi recedendo à linea perpendicu-

lari, per quam descenderet. Quare vulgaris  
hisce Philosophis necesse incumbit, motum  
descensus contra Preceptoris sui dogma pro-  
scribere, aut saltem hujus conformitatis ad  
rotunditatem causam aliam assignare. Huc  
accedat secundum experimentum. Statuatur  
mensa aliqua plana, aut tabula magnæ am-  
plitudinis, in quam particula aquæ haud mag-  
na incidat. Quæro ego, utrum aqua diffuen-  
do semper locum petet decliviorē, vel ali-  
quando se sistet. Non semper defluet: quia  
experientia contradicit; quod si semper difflu-  
eret ad locum decliviorē, & nunquam qui-  
esceret, tunc tabulā positā infinitā in infinitū  
difflueret; cuius contrarium quis non experi-  
tur? Quis nō animadvertit, intra certos sem-  
per cancellos se compingere, ut ne ad margi-  
nem illius tabulæ, si aliquantulum ampla sit,  
se exporrigat? Neq; hic ad siccitatem mensæ  
possunt confugere: Nam idem licet experiri  
in tabulā prius madefactā; quod si aquæ illa  
particula in mensa posita, post aliquot se si-  
stat nec ulterius moveatur (quod experientia  
monstrat) certissimum est eius superficiē esse  
conicam. Quod enim crassitie & tumore ali-  
quo sit donata nemo negare potest: nam cor-  
pus est & quantitate præditum: aliquid ergo  
protuberabit magnitudinis super mensam:


non

non erit plana hæc superficies, quia extrema tangunt: medium ergo erit eminētius. Deinde non est ita spharica, ut terræ planè sit concentrica, quia convexitas hæc est sensibilis: at in vastâ totius terræ magnitudine sensibilis esse non potest. Quare erit figura hæc conica, ita ut aquæ extrema minus distent à centro terræ quàm medium, quod hic contendimus. Ut nostram itaq; sententiâ hic aperiamus, dicimus aquæ figuram compositam esse ex spharâ terræ concentricâ, & spharâ aquæ quantitati consentaneâ. Nam si simplicem & particularem aquæ naturam spectemus, donabitur figurâ purè sphæricâ terræ excentricâ, cum terra multo sit minor: Si verò eam spectemus, quatenus concurrit ad universi consistentiam, dicimus participare figuram sphæricam, seu sphæræ sectionem terræ concentricam: quia verò neutra harum figurarum præcise per se potest existere, (posita enim alterâ alterâ tolleretur) admittenda est figura quædam mista ex utraq; quæ alia esse non potest quàm conica. Quod ut amplius enucleemus, dicimus duplicem esse motum ipsius aquæ, primum *conformitatis*, secundum *coitionis*. Motus conformitatis est, quo aqua apta est se ad sphæram componere & conformare, ut cum guttulæ rotundentur: motus

verò coitionis est, quo aqua cum cæteris elementis gravibus apta sit ad centrum propendere, & se illiungere. Motus ille est aque primarius tanquam ad aquæ conservationem, qui maxime est in unitate: motus verò hic coitionis est propter universum, quasi ex naturâ universali. Ex motu conformitatis oritur spherica illa figura guttularum terræ excêntrica. Ex motu coitionis oritur illa alia figura convexa quæ terræ est concentrica; quæ in mari & magna aquarum mole est conspicua. Aqua itaq; quo minuitur magis in minorem quantitatem, eo magis particeps est illius prioris: quo verò magis magisque augetur in magnam molem, eo posterioris. Sed ut demonstratione hæc rata sint, quædam hîc principia seu propositiones sunt proponendæ, ex quibus tota huiusce rei veritas facillè eluceat. Suppono itaq; primò non tantum è Philosophiâ Democraticâ sed & Aristotelicâ dari in corporibus omnibus aliquod *minimum* saltem *existens*, sine quo forma illa subsistere non potest. Nam licet Mathematici supponant, magnitudinem esse in infinitum dividuam, certa tamen in natura requiritur quantitatis ratio ad formam recipiendam, & sustentandam, quâ diminutâ, forma statim perit. Secundò *Animam hanc particulam esse triplici dimensione*

*mentione magnam.* Nam ad corporis existentiam altera tantum dimensionum non sufficit, quum ad triplicem distantiam forma in corpore porrigatur. Tertiò, huius *minimi figuram esse sphericam*: Primò, quia in corporibus illis homogeneis nullo ratio dari potest, quare una dimensio aut augetur, aut minueretur potiusquam alia. Quod si in longitudinem aut latitudinem plus effunderetur, minueretur eius altitudo, nec aliquid alteri dimensioni incrementi potest accidere sine alterius decremento, & contra. At hoc contra hypothesein; quia ex præcedenti supponimus secundum omnes dimensiones iam minimum & definitum. Vnde nihil illi minui potest. Ex hisce propositionibus verè intellectis, facillimum est colligere, hoc minimũ, siue aquæ sit, siue alterius corporis, esse sphericũ. & rotunditatis eius in guttulis esse causam. Sola enim spherica figura est, in quâ omni ex parte longitudo, latitudo, & altitudo æquiparantur. Quod tamen hoc non sit causa guttularũ, vel ex eo inferri videtur, Primò, quod guttulae hæ non sunt planè atomi, sed dividuæ in minutiores. Secundò, quod non sunt æquales inter se, quum atomi eiusdẽ homogenei corporis debent esse inter se æquales. Ad hoc respondemus, hæc guttulas aquæ rotundas non esse quidẽ per

se atomos, sed ex earum tamē atomorum rotunditate fieri, ut hæ sint rotundæ, aut saltē magis ad rotunditatem accedant, quo magis minuantur. Quod facile percipiamus, quā intelligamus modum, quo corpora humida, præsertim & homogenea ex atomis coalescunt. Sciendum est itaque, atomos, quoties concurrunt ad portionem aquæ maiorem constituendam, non concurrere per modum Aggregationis, ut cumulus hordei, sed Identitate, unione, & augmento continuo primæ il-



lius atomi. Sit enim exempli causâ atomus prima A, addatur secunda, & erit ut B, tertia tandem accedet, & C circulum complebit, ita ut continuo aliquo incremento & unione in infinitum

augeatur, & nisi alius esset motus nimirum coitionis, quo ad centrum tēderet, absolute esset rotunda: sicut ergo quantitas huius aquæ continuè propagatur, ita & figura ut quo magis ad atomum illam primam accedatur diminutione, eo magis ad rotunditatem vergat: hic motus conformitatis prior est eo altero nam aqua primariò in se perficitur, secundariò

cundario concurrat ad perfectionem universi: Conformitas hæc atomorum ad rotunditatem aliquo modo experimento ostenditur. Nam si quis guttis quibusdam in arenâ aut mensa positis guttulam unam vel alteram addat, videbit non duplicari guttulam aut in caudam desinere, aut novam figuram sibi vendicare, sed ambas illas partes concurrere, & coalescere in sphaerulam paulo quàm antea maiorem. Deinde nisi hoc admitteretur fieret necessarium, ut multis rotundis atomis simul additis vacui quidam meatus interponerentur, & illius aquæ continuitatem interromperent. Denique certæ alicuius quantitatis continuum augmentum supponit figuræ illius continuum incrementum. In illis enim quæ iam unum facta sunt nulla ratio est reddenda, quare una dimensio potius quàm altera aut cresceret aut deficeret. Quùm itaque prima illa atomus in initio erat rotunda, fieri non potest primariâ & naturali aquæ inclinatione, quin sphaerula illa in maiorem extendatur, nisi externo agente varietur. Quod verò in compositione est primum, illud in Resolutione erit ultimum. Quo itaq; in diminutione & divisione aquæ magis ad illam primam atomum pervenimus, eo aqua magis magisque rotundabitur: Quo verò magis ab illâ recedit, eo  
magis

magis à rotunditate. Vnde in maiori aquæ quantitate magis est indultum alteri illi convexitati aquæ in suo loco, qui toti terræ concentrica est. Hinc causa facile emergit, quare motus iste conformitatis non æque sit conspicuus in magnâ aquæ portione ac in guttulis, Nam non ita periclitatur magna aquæ portio, quin & sibi simul & universo indulgeat: at hîc parva quùm sit particula proximè ad atomum accedit, & exuit motum illum alterum aliquatenus ut sibi consulat. Prius autem motus ille externus deficit quàm internus iste: Nec tamen planè tollitur motus iste descensus ad centrum, sed prudentis naturæ ductu (quæ nihil molitur nisi optimum) ubi ampliùs per particulas divisas ad centrum moveri non potest hæc sphaerula aquea sine fractione aut diminutione per se totum molitur. Tota itaque aquæ sphaerula sine partium dissipatione descendit, & in puncto sustentatur. Neque enim in instanti sine præviâ dispositione fieri potest corruptio, unde nec tam citò à sphaericitate recedit suâ: nec tamen per modum causæ liberè aqua suspendit suam actionem, quâ centrum peteret, sed potius ad modum deficientis laborat. Causâ sciscitabitur forte quispiam huius defectus? Si enim deficiat motus descensus, tum vel ex internâ causa, vel externâ, Non



ab interna; quia sic esset forma vel materia aquæ: At neutra potest esse huius causâ, quia sic defectum formæ aut materiæ talis defectus comitaretur. At hic nec materiæ, nec formæ ullus est defectus. Non ab externo principio, quia à nobis dicitur naturalis. Respondemus; hoc fieri ob concursum duorum illorum motuum, qui se invicem in eodem non sine alterius defectu & remissione compatiuntur. Ex hisce etiam principiis facile reddi potest causa, cur aquæ guttula in mentam demissa non semper diffuat ad locum decliviorum, sed intra quosdam limites se continet. Siquidem adiecta est aliqua violentia, quæ aquam à tali descensu prohibet ne ulterius moveatur. Quod demonstratione tali explicabimus. Sit enim tabula plana in quam incidat Sphæra aquea, cuius diameter sit  $ER$ , hæc sphæra vel consistet integra, vel diffundetur: Non consistet integra: quia hoc contradicit experientie: videmus enim aquam diffuere & se orbiculari modo diffundere quoties tabulæ planæ imponi cōtigerit: diffluet igitur hæc aquæ sphæra: sit linea huius diffusionis in obliquum, vel  $EG$ , vel  $EH$ ; dico lineam  $EG$ , mixtam esse ex lineâ horizonti perpendiculari  $ER$ , & aliâ horizontis plano parallelâ  $RG$ , similiter & lineam  $EH$ , mixtam esse ex lineis  $ER$  &  $RH$ ,  
linea

linea verò perpendicularis  $ER$  mensura est naturalis motûs ipsius aque. Linea verò  $RG$ ,



vel  $RH$  parallelæ plano horizontali mensuræ sunt motus violenti: quatenus ergo moveatur aqua ab  $E$  versus  $R$  movetur naturali impetu; quatenus verò ab  $R$  &  $G$  vel ab  $R$  &  $H$  violento. Crescendi itaq; lineâ parallelæ, & perpendiculari superanti, crescit hæc violentia. Vnde fit; ut tandē non ulterius moveatur; sed quiescat. Violentia enim non est perpetua, nec naturalem motum promovet, sed impedit. Ex proportionē utriusque lineæ perpendicularis & parallelæ mensura nimirum naturalis & violenti motus, facile elicitur quantus sit motus ille mixtus. Ex hisce omnibus liquet motum illum Conformitatis disponere aquam ad figuram absolute sphericam, cujus centrum sit intra: motum verò Coitidis disponere ad talem spheram, seu potius sphere sectionem, cujus centrum idem sit cum centro universi. Quamvis itaque neque  
hi

hi motus neque he figuræ perfectè simul possunt consistere, necesse est ut ex utrisque confluat motus aliquis mistus, ex quo figura aliqua mista procreabitur, quæ sit Conica. Quid itaque dicamus ad venerandam antiquitatis canitiem & antiqua Cosmographiæ principia quæ sphericam aquæ figuram astruerent? Dicimus aquam spectari dupliciter: primo pro universâ spherâ aggregatâ, quæ universam aquarum molem complectitur: Secundo, pro aquæ aliquâ portione particulari, ut flumine seu mari aliquo duâbus terris interiecto per se sumpto: Priori sensu dicimus aquam esse sphericam, quia licet partes in se non sint exactè spherice, respectu tamen totius ambitûs nihil proportionis obtinent. Partes itaque singulæ per se sumptæ Conicæ sunt figuræ ubi tamen totam aquarum molem sub uno quasi globo complectimur, dicimus plane sphericam esse. Ex hoc facile est videre, quid statuendum sit de illâ quæstione, utrum Mare sit altius terrâ, in quâ tantâ cum difficultate ægrè desudant Philosophi.

## DECAD. III.

## DECAD. III.


## EXERCITATIO III.

*Contradictio est oppositio-  
num minima.*

**C**ONTENDUNT Peripatetici contradic-  
tionem esse omnium maximam. Ego ve-  
rò minimam. Rigorē Peripatetici, paulisper  
remittam & me accingam ad differendum.  
Magnitudo uniuscujusque oppositionis asti-  
manda est, vel ex Distantiâ extremorum ad se  
invicem, vel ex Pugnâ & dissidio, quod inter  
se exercent: Alias ego vias non novi metien-  
di oppositionis magnitudinem. Si ex distantia  
terminorum astinemus oppositionem, Con-  
tradictionem esse minimam inter cætera op-  
positionum genera demonstrabimus. Extre-  
ma in Contradictione inter omnes sunt Ens  
& Non ens. In reliquis verò oppositionum  
generibus, Hoc-ens & Illud-ens, seu duo En-  
tia à se invicem contradistincta & divisa, ex  
postulatis omnium Logicorum. At verò mi-  
nus inter se distant ens & Non ens, quàm duo  
entia distincta; quod ostenditur hoc modo.

*Illa*

Illa distantia censenda est minor, quæ facilius & expeditius transitur, seu in quâ ab extremo ad extremum brevius pervenitur. Quippe distantia propriè dicta est linea quædam recta inter duo puncta: à quâ acceptione Geometricâ non inconcinnâ Metaphorâ translata est in modos oppositionum apud Logicos. Ex Mathematica ergo distantia seu lineâ tanquam ex Regulâ judicatur. Statuamus itaque



Exempli causâ  
duo entia contradi-  
visa opposita, quæ sunt A

& C: Distantia itaque ex These inter hæc extrema erit linea A C. Supponamus jam Distantiam hanc sic esse transeundam, ut ex A fiat C. Quæro utrùm illud A immediatè fiat C, vel mediante alio actu. Non immediatè; quia priusquàm A fit C, definit esse A. Simul enim esse non potest  $\tau$  A &  $\tau$  C; quare definire oportet esse  $\tau$  A, priusquàm fiat C. Si mediatè, ut prius fiat Non-A quàm C, erit illud Non A proximius & immediatius ipsi A quàm C, ut in loco B. Ex his clarissimè liquet Distantiam minorem esse in Contradictoriis, maiorem in reliquis oppositis. Quippe A & C, sunt ex These duo entia divisa. A verò & B habent se ut Ens & Non-ens: pri-

us enim quàm A transit in C oportet ut sit in B, hoc est, ut clariùs aperiàm, prius quàm Albedo transit in Nigredinem, oportet ut sit Non-Albedo seu Non-ens: Sed ne plùs prætendere videatur linea abstracta & Geometrica, quàm ipsa natura patiatur, Rerum ipsarum productionibus me accommodabo, ex quibus facilè evincam enti alicui proposito proximius & Immediatius esse Non-ens quàm ens aliud contradivisum. Postulo itaq; non tantum à Theologis Christianis, sed etià à Philosophis sanioribus hoc fundamentum, *A Deo Agenti infinito Rem aliquam in aliam contradivisam converti posse*; Quod confirmatur ex illo Salvatoris miraculo, quo Aquam in vinum cōverterit. Postulo secundò: *Proximius & Immediatius esse illud in hac cōversione seu Transmutatione quod unicum solūmodo Creatoris Actum terminat, quàm quod duos ad minus Actus supponit*. His explicatis sic progredior, ex Instantiâ illâ miraculose cōversionis Aquæ in vinum in nuptiis tanquàm exemplo notissimò, Certum est Aquam cōversam fuisse in Vinum. Quæro hîc, utrùm Christus hoc fecerit Immediatè & unico Actu, vel mediatè duobus divinæ suæ potentie Actibus: Non prius; quia si Christus unico Actu Immediatè Aquam in vinum cōvertisset

fisset, Quæro rursus utrùm Aqua sic conver-  
 ta in vinum retinuerit simul suam essentiam &  
 formam vini induerit, vel amiserit prius esse-  
 tiam suam quàm formam vini induerit: Non  
 retinuit simul suam & induit vini essentiam;  
 quia sic duas simul retinuisset essentias, A-  
 quæ nimirum & vini: & sic non amplius u-  
 num sed duo esset corpora, & sic per conse-  
 quens non esset vera transmutatio, sed duo-  
 rum Corporum Appositio & Compositio:  
 quod absurdissimum & sacris literis adver-  
 sarium. Si prius esse desineret Aqua, quàm in  
 vinum transformaretur, fateamur necesse est  
 prius in Nihilum redigi; & ita Aquæ *Nihil*;  
 seu *Non-Aqua* esset propinquius quàm vi-  
 num. Siquidem illud alteri propinquius est  
 censendum, per quod tanquam per medium  
 ad aliud fiat transitus: At interim talis Con-  
 versio non est immediata sed Mediata: Nam  
 duos supponit Actus. Alterum *Annihilatio-  
 nis*, quo ex Aquâ fiat *Non-Aqua*. Alterum  
*Creationis*, quo ex Nihilo creat vinum: adeo  
 ut tres hîc sese prodant termini: *Aqua: Nihil:  
 vinum*, ut Nihil sit medium & cõmunis Ter-  
 minus utriusq; Actûs, in quo desinit Annihili-  
 tio, & à quo incipit Creatio. Contra hanc  
 Instantiam excipiant fortasse aliqui; Aquam;  
 ubi in vinum transformaretur, non reduci in

Nihilum simpliciter, sed eandem materiam esse superstitem, quæ exutâ prius Aquæ formâ induerit formam vini. Regerimus, hoc non constare nobis ex sacris literis utrum talis superfuert Aquæ materia, in quam forma vini introduceretur. Opposita sententia est verisimilior. Cum talis transmutatio erat Creatio instantanea ex nihilo, forma autem à materiâ non educitur nisi motu successivo. Licet enim infinita Dei sit potentia, tamen materia huius motus instantanei non est capax, nec in instanti ad talem formæ alicuius educationem disponi & preparari potest. Nam motus omnis utcumq; ab Agente infinito ad modum tamen materiæ recipientis est metiendus.

2. Vt cumq; materia superstes admittatur in hanc transmutatione, difficultas tamen non omnino tollitur. Supponamus enim tanquam possibile, Deum unum Angelum in alium transmutare: Querimus utrum Angelus sic transmutandus, prius redigatur in Nihilum, quàm cœpit esse alius, vel saltem aliqua talis materia supersit. Non posterius, quia talis in Angelo materia juxta Peripateticos non reperitur. Quare concluditur prius esse nihil, quàm aliud Angelum.


3. Quicquid ex his statuatur Instantiis, immota tamen manet huius argumenti vis: quia comparationem instituere pos-



possumus de duobus Entibus simplicibus ab omni materiæ communione abstractis. Quare si ex Distantiâ metiamur oppositionis magnitudinem, evincemus Contradictionem esse Minimam : cùm Distantia sit Minima. Iam si ad alterum se divertant adversarii, & dicant Contradictionē esse inter oppositiones maximam ratione Pugne vel Dissidii inter extrema; Quaro quid tandem intelligant per hoc dissidium? Vel enim in hoc dissidio intelligūt ea dissentire, quæ maximè recedunt ab Identitate, seu quæ inter se minimè conveniūt: Vel saltem quæ Physicā aliquā actione mutuò in se invicem transmutātur. Posterius intelligere non possunt, 1. quia talis pugna non in omnibus oppositorum generibus, sed solummodo in Contrariis invenitur; quia talis lucta non est nisi in activis & passivis qualitatibus, quæ contrarietatis sunt peculium. 2. Hæc ratione contrarietas esset oppositionum maxima, quod contra illorum Thesin, quæ vult contradictionem esse maximam. Si prius asserant talem intelligendam esse pugnam quæ maximè recedant à se invicem, quo minùs possunt fieri idem, nihil aliud intelligunt, quàm Distantiam extremorum; at hæc ratione contradictionem esse oppositionem minimam su-

prà demonstravimus. At hîc vibrant adversarii Herculeum (ut existimant) argumentum, non nisi victoriæ conscium. Maior (inquiunt) est convenientia inter Ens & Ens, quàm inter Ens & non ens; quia duo entia contradivisa ut calor & frigus conveniunt in uno communi genere, nimirum in Qualitate: Inter Ens verò & Non-ens seu Nihil spatium est infinitum. Sustineo personam, & multiplici me oppono clypeo. i. Si convenientia extremorum quàm reliquis oppositionum generibus adscribunt, minuat hanc Distantiam, tunc quo maior est hæc convenientia, eò minor erit distantia & Oppositio: quo minor, maior: Consequentia est clarissima, quia auctâ causa effectus etiam augebitur, minutâ minuetur. At quò maior est hæc Convenientia, non minor invenitur oppositio vel ex adversariorum postulatis. Concedunt enim (opinor) Calorem & Frigus magis opponi, quàm Calorem & Lineam. Illa enim se expellunt mutuò ab eodem subiecto: hæc verò se mutuò simul patiuntur sine lucta: Iam nemo dubitat Calorem & Frigus genericâ hâc convenientiâ magis convenire, quàm Calorem & Lineâ: Nam Calor & Frigus conveniunt non tantum in Ente, In Accidenti, quod habent cum lineâ commune, sed etiam in eodem genere prædicamentali,

mentali, nimirum Qualitate, eademq; qualitatis specie, nimirum in qualitate patibili, sub quâ tanquam species constituuntur: Calor verò & linea totis inter se generibus dissentiunt, cum linea in Quantitate, Calor verò in Qualitate collocetur. 2. Quæro utrùm Distantiam hanc metiri velint per lineam directam vel Indirectam, seu obliquam. Si per rectam lineam, non minuetur per convenientiam illam genericam: hæc enim obliqua est & collateralis, cum sit conspiratio duorum in aliquo tertio: per obliquam autem lineam Distantia nunquam mensuratur. Hæc cum propter abstractionem fortè videantur obscuriora, lineis explicabo: Cum inter distantiam Geometricam & luctam seu Distantiam oppositorum non levis sit cognatio & analogia. Supponamus A & B, esse oppositionis extrema, inter quæ Distantia interiecta sit AB linea, in extremis hisce punctis constitui intelligantur duo contradicto-



ria, ut Homo & Non-Homo, per Ens & Non Ens: hæc duo, quoniam nunquam concurrunt in tertio termino, moveri concipiantur per duas lineas parallelas A D & B E, quæ lineæ tantum in fine distant, quantum in principio. Iam in eisdem extremis statuantur duo reliqua opposita, ut contraria, Calor & Frigus; hæc duo, quia coeunt in aliquo tertio, signentur per duas lineas A C & B C quæ concurrunt in puncto C, communi utriusq; termino: hinc videmus palam Distantiã ex These esse unam & eandem inter A & B; quippe quam eadem linea A B mensurat, siye A & B statuantur duo contraria, siye duo Contradictoria: nec concursum linearum A B & B C aut minuere, aut augere hanc Distantiam. Hæc, ut uberius explicem; dico concursum duorum terminorum esse duplicem, alium Directum, alium Indirectum: Directum appello illum, in quo duo termini sibi mutuo occurrunt, quasi in unã rectã lineã: Hoc modo autem non possunt aliter coire quàm in *Nihilo* seu *Non-ente*: Essentia enim rerum sunt individua, ut non possint in aliquo tertio communicari. Hinc in ipsa conversione unius in aliud tres sese produnt Termini, Vt *Hoc, Nihil, Illud*. ut antea in conversione Aquæ in Vinum tres isti termini sunt conspicui: *Aqua, Non-Aqua,*

*Aqua, Vinum:* Conveniunt (inquam) ista extrema Entia in Nihilo, seu Non-Ente intermedio, non tanquā in uno subjecto, sed Termino communi, qui terminat alterius Entis Abolitionem seu Annihilationem, & secundī creationem. Talis autem concursus, seu conveniētia Directa minuit hanc oppositionem, cum ipsam quasi dimidiat Distantiam. Vnde judicemus *Nihil* seu *Non-Ens* esse alteri Enti propinquius, quā Ens contradivisum, & per consequens contradictionem esse oppositionum minimam; quia tres isti Termini quasi in unā rectā lineā constituuntur. Cōcursus verò Indirectus duorum Terminorum est, in quo duo Termini concurrunt, sed non quasi in una recta linea, sed obliquē tanquam in aliquo Tertio, quod sit extra illam lineam constitutum, quasi superius, vel inferius: ut cum duo contraria conveniunt in eodem genere. At obliqua hæc duorum convenientia (ut dixi) nihil minuit Distantiæ inter duo extrema. 3. Dicimus nullam esse talem convenientiam duorum oppositorum in uno communi genere Reali, quam reliquis oppositionibus affingunt: Supponant enim, exempli causā, duo contraria, Calorem & Frigus tanquā duas species in eodē genere convenire. Quæro hīc utrū Qualitas illa, in qua tanquam genere

genere conveniunt, sit una & eadem in utrisq;  
extremis aut diversa: Non est una & eadem in  
Calore & in Frigore, quia sic esset communis  
utriq; : at illa qualitas, quæ de Calore prædi-  
catur est una & eadem res cum Calore de quo  
prædicatur : similiter & qualitas frigori at-  
tributa non alia est res à Frigore, de quo præ-  
dicatur : ex quo sequitur juxta eorum senten-  
tiam unam & eandem Rem esse Calorem &  
Frigus. Consequentia facile patebit ; quia ex  
communi notione apud Euclidem, *Quæ Idē  
sunt in aliquo tertio, inter se sunt Idē*: hoc ita-  
que posito unam Qualitatem esse cum Calo-  
re eandem, etiam cum Frigore eandē, seque-  
tur necessario Calorem & Frigus in eandem  
Qualitatem coalescere : Si verò qualitas di-  
versificetur in Calore & Frigore, nō erit am-  
plius eadem qualitas, & per consequens nul-  
lus erit communis Terminus realis, in quo  
hæc extrema conveniunt, & per consequens  
nulla erit talis convenientia, quam hisce op-  
positis ascribunt. Si dicant abstrahi ab Intel-  
lectu communem Qualitatem, in quā tanquā  
in Cōmuni Genere conveniunt, assentior: At  
hæc Convenientia non est duarum rerum in  
Reali Termino, sed potius in cōmuni aliquā  
notione & voce: Intellectus enim dum rerum  
diversarum comparatione similitudinariam  
animadvertit

animadvertit rationem communē sibi fabricat notionem utrique communem. At hoc sensu non magis realiter inter se conveniunt reliqua oppositorum genera, quā Contradictoria. Altera Ratio quā confirmabimus Contradictoriam esse oppositionem minimā, sit huiusmodi. Omnis oppositio involvit in se Contradictionem; Contradictio verò à qualibet aliā oppositione potest sejungi; quod manifesto constabit exemplo: *Calidum* enim & *Frigidum*, quæ opposita sunt contraria, involvunt hanc oppositionem contradictoriā, *Calidum* & *Non Calidum*: Sic Relata Contraria, ut *Pater* & *Filius*, recedunt in hanc, *Pater* & *Non Pater*: Sic Privantia; ut *Videns* & *Cæcus*, in hanc resolvuntur Contradictionem, *Videns* & *Non-videns*: quod verò contradictio ab aliis oppositionum generibus sejungatur & abstrahatur, multis etiam constabit instantiis: ut *Homo*, *Non-Homo*: *Equus*, *Non-Equus*: cum aliis huiusmodi innumeris. Hic sciscitor adversarium utrum aliud oppositionis Genus contradictioni superadditum vel augeat vel minuat oppositionem, vel saltem oppositionis negotio nihil omnino præstet. Si augeat aut intendat, tum Contradictio ex se est minor, quā oppositio alia aucta: quare quodlibet oppositionis genus erit ma-

jus contradictione; quia præter id quod habet contradictionis, suum etiam habet oppositionis modum. Non minuit oppositionis vim; hoc enim faceret vel omnino tollendo oppositionem vel restringendo: Non tollendo; quia oppositio quævis aliâ contradictione aucta manet semper oppositio, quæ in formalem contradictionem facile resolvitur. Siquidem in omni oppositione (ut diximus) virtualis quædam implicatur contradictio. Si contrahendo & Restringendo, tum restringit vel Terminos sive extrema, vel Distantiam: Si dicant Extrema: reponimus, 1. Hinc non contrahi statim vim eius oppositionis, quia hæc pendet potius ex contractione Distantiæ, quàm extremorum. 2. Non facile expedient qualis sit hæc Contractio: Accipiamus enim exempli gratiâ duo contradictoria, ut Calidū, Non-Calidum: Contrahatur hæc contradictio ad contrarietatem, ut ad calidū & Frigidum. Rogo hîc, utrum *illud Non-Calidum* aliquo modo contrahatur à *Frigido*, ut minùs jam opponatur calido quàm antea? vel enim illud Non-Calidum significat ipsum Frigidum, vel quodlibet aliud, quod non est Frigidum. Si præcisè ipsum Frigidum significet, nulla erit contractio, sed alia explicatio eiusdē Termini. At hoc non dicent (opinor) quia quodlibet



quodlibet volunt includi in alterâ parte contradictionis. Si secundo modo accipiant *Non-Calidum*, tum vel pro Ente aliquo distincto à Calido, vel saltem pro *Nihilo* seu *Non-Ente*. Non possunt ex eorum principiis accipere pro Ente; quia altera pars Contradictionis semper est *Non-Ens*. Cum itaq; Calidum sit Ens, oportet ex hac These non Calidum esse Non-Ens. Si verò sit *Non-Ens*, quomodo concipietur contrahi? Vel enim Restrictio hæc latet in ipso significato, quod in Non-Calido subintelligitur, vel in modo significandi. Non prius; quia supponimus ex eorum postulatis Hoc esse *Nihil*; quod Restrictionem aut Contractionem non omnino patitur. Si in modo significandi lateat hæc contractio, non erit propriè limitatio, sed vocis ambiguae distinctio. Vbi itaq; dicunt adversarii contradictionem per aliam superadditam oppositionem restringi & contrahi (si seipsos propriè intelligant) non dicunt minui aliquid de ipsa reali oppositione, sed tantum distinctius iam illud exprimi & signari, quod antea confusius significaretur: nam reverà nihil aliud est Contradictio, quàm positio, aut Affirmatio, & Negatio eiusdem rei: quæ multo confusius explicatur, quàm speciali aliquâ oppositione. Ex his clarissimè elicitur hanc  
qua-

qualemcumq; Restrictionem nihil esse aliud quam vocis; ut nihil inde minuatur oppositionis vis. Porro hæc Contractio non est in Distantiâ, quia (ut supra ostendimus) maior erit Distantia in reliquis oppositionum generibus quàm in luctâ contradictoriâ. Denique si dicant hanc Contradictionem alteri oppositioni additam nihil præstare in oppositione, non multum dissentiunt ab aliis, qui voluere restrictam esse ab alia: cum reverà per hanc restrictionem non aliud intelligere possunt, quam determinationem vocis, & distinctionem exprimendi modum. Ego tamen iuxta principia nostra præcedentia) statuo reliquam oppositionem Contradictioni additam aliquid præstare in oppositionis negotio, non tamen minuendo, sed potius augendo: quia Ens (ut sæpe diximus) magis recedit ab Ente contradiçto & distincto quàm Nihil, seu Non-Ens: quare distantia ampliatur, & oppositio intenditur. Ex his omnibus concludimus Contradictionem inter omnia oppositionum genera esse minimam: Quod erat in initio demonstrandum.

## DECAD. III.

## EXERCITATIO IV.

*Probabile est Terram esse circulariter  
Mobilem.*

**M**OTUS apud Aristotelem in duplici classe constituitur: Alius enim Rectus, alius circularis est; quorum illum elementis, hunc cœlestibus solum corporibus coaptari voluit: quippe unius corporis simplicis unum statuit motum simplicem. At falsum esse hoc principium Aristotelis aut saltem malè fuisse intellectum probabit imprimis motus Terrestris sphaerae orbicularis, quem Philosophiæ haud vetemur donare civitate. Hæc opinio velut ova struthiocameli in arenis sepulta Pythagoricis, multos annos obdormivit, donec excitatus est recentioribus Copernicus, in cōperabilis vir ingenii, qui vividis quasi iudicii radiis excluderet, & in lucē ederet. Hic verò, ut multiplices orbium in cœlis concamerationes, intollerabiles ingeniorum carnificinas amputaret, triplicem in ipsa terrâ aut invenit aut quæsit motum circularem: Primum Diurnum, quo volvit totam terræ machinam circum-

cumgyrari ab occasu versus ortum 24 horarum spatio: qui motus motui primi mobilis Diurno ab ortu in occasum apud vulgares Astronomos respondet: Secundus est motus annuus, in quo ipsius terræ centrum movetur ab occasu in ortum; qui motus describit signiferū: Tertius est motus Declinationis Annuæ Revolutione absolutus: Certe ego nec Terram penitus quiescere cum Aristotelicis, nec triplici motu circulari cum Copernico agitari audacter statuo. Integrum sit omnibus liberè philosophari, utrinq; hærent difficultates quæ oppugnant: illinc Philosophicæ, hinc Theologicæ, ut illa non tam contra rationem absona, quam hæc contra religionem impia videantur. Scio utrinq; latere spinas: at inutilis Philosophorum curiositas à præcipiti nimis Theologorum iudicio sæpe vincitur, ut sæpenumero prius indicent quàm intelligāt, & mentem præiudicio illaqueatam conclusioni subiiciant prius quàm principiis instruxerint: ego liber sum in nullius iuratus, nisi divinitus inspiratorum verba; in quæ si levissimè impingā, ignoscat mihi Deus (precor) temeritatem iudicii, non tam opinionis pruritu, quam Philosophicæ libertatis amore excitatam. Nec loquor hinc semper quæ planè sentio, sed quæ plus ultrò dici possunt: non ut quicquam

quicquam mihi arrogem, sed ut alios excitē. Non cedit itaq; mihi (uti spero) in præjudici-  
um, si Pythagoricum hoc de motu terre circu-  
lari dogma, à plurimis neglectum, ab aliis ex-  
plosum, rursus è cineribus excitem, & in lu-  
cem edam. Si veritatis conscia videatur hæc  
opinio, assensum certè apud plurimos mere-  
bitur: Si veritati inveniatur inimica, candidis  
tamen ingeniiis non iniiciam offendiculum,  
si veritatis exponam adversarium. Hanc igitur  
sententiam ut clarius enucleem præstare  
conabor. Duo: primò hoc dogma rationi esse  
consentaneum: secundò sacris literis non cō-  
tradicare. Prior assertio continebit tres arti-  
culos; primò motum hunc circularem naturæ  
terrestris sphaeræ non contradicere, quin ut  
possibilis admittatur: Secundò in cœlesti ma-  
chinâ non sine manifestâ absurditate esse col-  
locandum: Tertiò verò nullam esse rationem  
tanti momenti introductam ab adversariis,  
quæ non facilè solvatur: ut à primo itaq; in-  
cipiam, & ab ovo rem deducam, constabit li-  
quidâ experienciâ ex ortu & occasu solis &  
syderum, motum esse aliquem Diurnum 24  
horarum spatio absolutum: Huius motûs sub-  
iectum est quærèdum, vel in cœlis, vel in ter-  
râ: In terra possibilem esse hunc motum con-  
firmabimus hoc ratiocinio; Si naturæ terrenæ

motus iste contradicat, tum vel à priori Ratione formæ, vel à posteriori ratione proprietatum: Si à priori dicant, recurrant necesse est ad proprietates ut demonstrent: quia formæ rerum ex se sunt insensibiles, nec nisi ab affectibus & internis proprietatibus sese nobis ostendunt. Quod si locum hîc habeat probabilis coniectura, non video cur terræ, cum multis experimentis inveniatur magneticæ naturæ, non simili se habeat modo cum formis illorum globorum sphericis & magneticis, quæ ob insitam sibi vim magneticam, licet terræ multo grandiores, super suis polis & axibus æquabili cursu incitantur: Quod in Sole & Ioue observant *Fabricius & Keplerus*, In similibus autem similiter iudicare magis rationi videtur consonum, quam sine aliquo fundamento disparitatem fingere. Sed hæc mitto tanquam leviora, adversariorum sequutus vestigia, qui quietem terræ non nisi ab externis proprietatibus sensui cognitis rimari cupiunt. Si itaq; hæc terræ Revolutio alicui terræ proprietati contradicat, tum vel *Quantitati*, & *Magnitudini*, vel *Figura*, vel *Qualitati*, vel *Motui*, vel saltē situi & positioni: Nullam enim aliam proprietatē intelligo, quæ in hoc negotio se immisceat: Primò Quantitas Terræ non obest huic motui: quia sic vel quia  
nimis

nimis est magna ut moveatur, vel quia nimis parva est & exilis. Non prius: quia (ut constat illorum experimentis qui usi sunt novis perspicillis) globi Iovis & Solis, qui magnitudinem terræ multis vincunt parasangis, super suis polis circularitè circumrotari inveniuntur: Idem etiam de Venere observant prædictus *Keplerus* & *Galileus*, ut magna eius sphaeræ quantitas tali motui nullatenus obstet: quid itaque impedit quo minùs Terra corpore satis ad movendum apto donata, diurnum suum non absolvat cursum? Deinde quantitatis Terrestris parvitas talem motum non impedit; cum corpus aliquod parvum aut aptius aut saltem æquè aptum ad movendum inveniatur, ac magnū. Quare quantitas hîc non interponit obicem. Deinde *Figura* terræ nullo modo motum hunc impedit circularem: quia Figura terræ (juxta omnes faniore Philoſophos) est sphaerica quæ ad motum circularem omnium est aptissima. Hæc enim Terræ Figura quibusdam cedit in argumentum motum Terræ esse sphericum: quia concipere non possunt Terram nullū ob usum sphaericā donatum esse figurā, quin ut ad circularem motum disponatur. Porro circulari isti motui nulla Terræ qualitas obest: Hæc enim qualitas omnium consensu esset terræ

nativa gravitas: At hæc nullo modo tollit naturalem Terræ Revolutionem. 1. Quia gravitas nihil aliud est quam partium terrestris sphaeræ extra locum suum violentiâ pulsatū ad locum suum motus & inclinatio: ubi verò gravia suum locum motu suo consecuta fuerint, non ulterius movebuntur, sed quiescent; unde natum Peripateticis proverbium: *Nihil gravitat in suo loco*: nihil itaq; hic impedit quo minus terra suum locum jam consecuta in eodem loco super suis polis circumgyretur. 2. Gravitas si adversetur motui, hoc facit immediate & per se, vel per accidens: Non prius: quia gravitas est qualitas; motus verò Actio: Per accidens vel mediatè si dicant, tū proculdubio, quia contrariatur levitati, à quâ motus Ascensus oritur: At ultrò concedimus motum Ascensus quo levia à medio ciuntur, à naturali terræ gravitate fore impeditum; motui tamen circulari nullo modo esse contrarium: hoc autem duplici ratione demonstrabitur. 1. Quia quæ mutuò sunt contraria in eodem genere ponuntur. At motus gravium proprius & motus circularis non sunt in eodem motus genere. cum ille sit rectus, hic orbicularis. Nec certè circulari motui quicquā aut minuit aut addit terræ gravitas; cum motus rectus & circularis nec concurrunt nec si-  
bi



bi mutuo quicquam adversantur. 2. Vtteriùs affirmare ausim cum ipso Aristotele 4. Capite primi de cœlo, *Impossibile esse ut in circulari motu aliqua admittatur contrarietas*: Cum duo motus circulares qualescunq; fuerint inter se opponi non possint: huius demonstrationem hic non attexam ne nimium evager à proposito. Tandem, motus iste circularis terre motui alteri non opponitur: Hæc enim fieret, vel quod motus hic esset per se alteri terre motui contrarius, vel quia plures in eodem motus non admittantur. Non prius ob ea quæ suprà diximus motum circularem Recto nullatenus esse oppositū. Non posterius: 1. Quia hoc Axioma *Unius corporis simplicis unicum simplicē esse motum*, si simpliciter & absolute sine limitatione adhibeatur, multiplex experientia deprehendit esse falsum. Nam instrumentis opticis, præsertim novo perspicillo, invenērunt Solem & Iovē corpora (si credimus Aristotelicis) simplissima, duplici ad minus motu agitari. Habent enim unum motum Revolutionis super suis polis minori spatio quàm diurno: Habent præterea alium motum suorum centrorum ab occasu in ortum super polis Ecclipticæ Astronomis omnibus familiaris cognitum: quibus adicere possumus multiplicem motum periodicum qui planetis

singulis à vulgaribus Astronomis adscribuntur : Peripatetici seipso hinc defendere satagunt per motum *Proprium & Mutuatitium*. At hæc distinctio non satisfacit: Primò quod priori illi instantiæ de duplici Solis & Iovis motu non officit, cū uterq; sit per se: secundo supponit in cælis orbes & concamerationes solidas & materiales, quas Astronomi hodiè saniores explodunt, & docebimus nos infra aliâ quâdā exercitatione. 2. Vbi dixit Aristoteles uniûs corporis simplicis unicū simplicem esse motum, potuit sic intelligi; unicum esse motū unius & ejusdem generis. Sic enim Axioma illud universam suam obtinuisset veritatem: Iam motus Rectus & circularis sunt in diverso genere; sicut & motus Revolutionis circa suam Axem: & motus ipsius centri progressivus: quare nihil hinc impediret quominus Terra triplicem illum Copernici motum non admitteret, cum diversi generis sint motus. Sed ego unicum solummodo stabilio. Hæc tamen Axiomatis expositio non quadrat menti Aristotelis: quia hinc Numerum simplicium corporum elicere non potuerit. 3. Quis nobis persuadebit Terram esse tale simplex corpus? vel enim hanc simplicitatem queret in Terrâ ipsa per *Realem Existentiâ*, vel in intellectu per *Abstractionē*: Non prius dicent:

dicent: quia liquido constabit experimento omnia corpora quæcunq; nobis in usu sunt super totam terræ faciem esse mixta, impura & sæculenta, purissimumq; terræ globum nullibi inveniendum. Si per Abstractionem talem quærant puritatem, Terram accipiunt vel per se, quatenus est substantia quædā aquæ contradistincta, ex quâ globus constituitur, vel saltem pro globo ipso spherico ex hisce omnibus composito: Si priori modo intelligunt non multum abnuo, Terram ut corpus aliquod simplex unicum simplicem motum sibi vindicare: etiamsi hoc dictum, nondum demonstratum. Si posteriori modo intelligi velint, integram terre spheram unico solummodo donatam esse motu, constanter nego. Duplicem enim in Terrestri sphaera animadvertere licet constitutionem, alteram *Elementarem*, alteram *magneticam*: Illa solummodo aquæ, Terræ, aliorumq; corporum cognatorum Aggregatio est: unde totum globum *Simplex* quiddam vocare non possumus, sed *Aggregatum*, licet ex simplicibus corporibus componatur: Nec aliquem hinc per se motum vindicare nisi corporum ex quibus conflatur: & in hac Terræ constitutione radices agit motus ille rectus gravium ad centrum: Constitutio verò Magnetica est quâ omnia Magnetica

corpora sphaeræ Terrestris compositionem ingressa in unicâ formâ Magneticâ uniuntur. Quo sensu integra sphaera unum homogeneum dici potest: Nam licet materia ex quâ cõflatur hæc sphaera per multas particulas sit divisa, in naturâ tamen & formâ magneticâ arctissima est communio: Homogenia itaque hîc erit non *Quantitatis & Materia: sed Forma & Natura Sphærica*: ex hæc profluere dicimus motum istum circularem, quem terræ ascribimus. Explodant forsân vulgares Peripatetici Magneticam Terræ constitutionem tanquam Fictitiâ & Monstrosâ. Fictitiâ volunt quia Antiquis Philosophis incognitam; Monstrosâ: quia hinc efficietur Terram esse Vnum per se Simplex & Essentiale, minimèq; Aggregatum prout exponunt Aristotelici. Ad hæc respondeo brevissime: Ad prius bifariam. 1. Ex Antiquorum ignorantia non rectè evinci Recentiorum Insaniam aut mendacium. 2. Affectiones magneticas antiquioribus fuisse ex parte cognitâs, etiamsi à veris non derivatæ fuerint radicibus & perfectius demonstratæ. Certum est enim Pythagoram eiusq; discipulos huius motus circularis quem formæ ascribimus magneticæ, defensionem antiquitus suscepisse. Ad posterius dico Homogenietatem quam asstruimus, non esse

esse materialem sed formalem; quatenus omnia magnetica in unâ formâ magnetica conspirant, quæ tamen materialem illam corporum *Conseruationem* non tollit: Licet enim conspirant omnia hæc magnetica in unâ formâ magneticâ, (quæ omnium est sphericorum corporum) tamen corpora omnia ex quibus sphaera constituitur, gaudent & suis formis & suis materiis distinctis elementaribus, ut hæc ratione dicatur Aggregatum. Sed ut plenius illorum satisfaciam quæsitui, qui magneticam hanc constitutionem Terrenæ sphere tollunt, ulterius paulò immittā falcem in hanc legem. Vbicunq; inveniuntur Qualitates & proprietates ab elementaribus distinctæ ibi novam quærendam esse formam & constitutionem ab elementis distinctam saniores omnes Philosophi concedent; quia à diversitate proprietatum, optimè arguitur ad distinctionem formarum. At tales qualitates & proprietates in terrena sphaerâ eiusq; partibus inveniuntur. Assumptionem confirmabimus & duo præstabimus: primò demonstrabimus tales in terrenis corporibus inveniri qualitates; secundo, non ex constitutione elementari oriri posse, sed ex aliâ magneticâ qualem astruimus. Primò tales esse in terrâ affectiones constat ex triplici motu magnetico, Directione, Variatione

one, & Declinatione. Nam observârunt Nautæ peritissimi omnibus locis terræ Acum magnete tactam dirigi ad Boream, & alterâ suâ parte respicere Austrum: in nonnullis locis Directè & Exactè, in aliis verò Indirectè, vergendo per nonnullos gradus & minuta vel ad orientem, vel ad occidentem: quem variationis appellant motum. Constat etiam æquè certis experimentis in certis punctis inter polum Arcticum & Antarcticum Acum magneticam in versorio ita constitutam, ut libere moveatur conformare se ad certos angulos cum Axe terræ: ut sub polis ipsis si statuatur in eandem rectam lineâ cum Axe concurreret, & ita perpendiculariter insisteret Horizonti: sub Æquatore parallelo sitû se conformet Axi: In locis verò intermediis vel magis vel minus inclinabit, pro loci cui applicatur latitudine: ex quâ declinatione nonnulli tabulas quasdè composuêrunt ad locorum latitudines investigandum; cùm inter locorum latitudines & convertibilem acûs hujus Inclinatoriæ declinationem quædâ inventa sit proportio. Constat itaque talem esse motum magneticum. Quæro utrum talis motus & Inclinatio magnetica sit tantùm in ipsa Acu magneticâ terminata, vel aliunde derivata. Non in Acu ipsa terminatur; quia sic Acus in omnibus terræ  
locis

locis motu suo similiter afficeretur: acus enim in se spectata simili se modo habet in omnibus terræ partibus: Si dicant aliunde esse derivatam non aliunde quærent quàm in ipsa terrâ; cum in cœlis statuere multo sit incertius & absurdus. Iam distinctas esse has proprietates ab elementaribus minori negotio ostendam. Si enim ex formâ elementari oriantur, tum vel primò & *Immediatè* vel *Mediatè* ab aliis qualitatibus. Non prius: quia sic essent qualitates primæ: at quatuor tantùm Aristotelicis qualitates primæ sunt, ut *Calor*, *Frigus*, *Siccitas*, *Humiditas*: Si mediatè fluant ab aliis qualitatibus è forma primò ductis, tunc vel ex unâ aliquâ qualitate, vel saltem ex plurium conspiratione: Ex unâ aliquâ qualitate nō est oriunda Affectio magnetica; quia sic vel ex calore, vel frigore, vel siccitate, vel humiditate. Non ex calore aut frigore: quia & calidiora & frigidiora sunt multa magneticis corporibus, quæ talem non exercent operationem. Similiter judicandum de Siccitate & Humiditate, quia certissimum est inveniri corporum agneticis & sicciora & humidiora, in quibus tamen talis non inest affectio. Si ex plurium primarum qualitatum conspiratione & unione producat, tunc esset motus mixti: consequentia est clara; quia quatuor primæ qualitates

qualitates unitæ & temperatæ non nisi in mixto reperiuntur : At motus mixti semper est à prædominanti elemento, ut sit vel sursum vel deorsum: At alterius rationis esse motus magneticos omnes vident: quare concludimus aliam esse compositionem Magneticam, aliam Elementarem: ex his facile liquet Terrestrem sphaeram vel non tali gaudere simplicitate qualem illi affingunt Peripatetici, aut si simplex sit, nihil tamen obstare quominus plures motus per naturam non modo patiantur sed necessario requirant. Vltimò demonstrabimus motum hunc terræ circularem naturalē terræ situm non tollere aut immutare. Si enim *Situs* ex revolutione periclitetur, tum vel quia centrum hoc modo extra suum locum moveatur: vel qua hæc ratione partes terræ à se invicem separarentur & distraherentur, vel quia poli mutarentur. Non prius: 1. Quia motus iste qui à nobis astruitur, non est ipsius centri extra suum locum sed potius terræ circa suum centrum & polos circumvolutio; centrum itaq; stat immotū. 2. Quod si cum Copernico alium terræ statuamus motum, quo centrum ipsius moveatur, non ita facile invenient adversarii quod respondeant. Terram enim in medio esse constitutam postulant adversarii, sed Copernicani negant.



Scio multiplicem esse demonstrationem apud Ptolomæum & recentiores Astronomos quæ videtur evidentissimè probare Terram esse in centro positam : at cum ex umbris Solaribus potissimum ducta sit , postulent necesse est Solis orbem respectu Terræ sensibilem & notabilem habere quantitatem : quam si negabimus argumenta evanescent. Deinde partes à se invicem ita distrahi non possunt per hunc motum. 1. Quia omnes partes Terræ naturali suâ gravitate centro uniuntur, ut si fortè nonnullæ ex suo loco separentur ad suum locum revertentur. 2. Motus iste est naturalis non violentus, qui tam vastâ mole & magnitudine non sensilem aliquam infert mutationem. Ultimò , poli extra proprios locos in terrâ mutari non possunt; quia Poli terrestres magneticâ quâdam verticitate eandem semper in cœlis puncta respiciunt: à quibus si fieri possit ut translocarentur, futurum certè , ut ad eundem situm naturali suâ magneticâ Inclinatione revertentur. Hîc primum claudio Articulum , & concludo Nihil Terræ obesse vel Naturæ, vel proprietatibus quominus in gyrum convertatur. Secundus Articulus postulat ut ostendamus , hunc motum nullâ cum probabilitate in cœlis esse admittendum, quod sic aggredior : Si motus huius Diurni  
subiectum

subiectum in cœlis statuatur, tum vel in orbe aliquo inferiori, vel saltem in orbe omnium supremo: Non in orbe inferiori. 1. Quia orbibus inferioribus singulis præter hunc motum alium assignant proprium; quare necesse est ut ab alio accipiant; erit ergo alius superior in quo sit iste motus. 2. Si esset orbis aliquis inferior, non potuisset omnibus reliquis hunc motum communicare: Quia omnes uno ore profitentur hoc motu totum circumgyrari cœlum. Dicant itaq; necesse est huius motus subiectum esse orbium omnium supremum qui complexu suo reliquos omnes secum rapiat. Quod si dicant motum istum esse in supremo orbe, contra stant rationes haud paucæ, quæ opinionem hanc aut oppugnant penitus, aut saltem improbabilem reddunt. Imprimis huic motui obstare videtur supremi illius orbis Immensa penè magnitudo, quàm necessariò consequitur talis motus velocitas, qualis nec natura sit capax, nec intellectus conscius. Quod ut dilucidè aperiā sumo primò pro fundamento certissimo, *Duorum corporum super eodem centro iisdemq; polis eodem temporis spatio motorum, illius motum esse velociorem quod est majus, velocitatemq; horum motuum crescere & augeri pro proportionē corporum sic motorum.* His positis si comparemus

## EXERCITAT. IV. 287

mus Terræ orbem cum orbibus illam ambi-  
entibus, inueniemus eos tantæ esse magnitu-  
dinis ut tota terræ moles quantumlibet vasta  
in Nihilum evanescat. Nam præter duo illa  
elementa Ignis & Aëris inter convexam ter-  
ræ & concavam lunę superficiem à Peripate-  
ticis collocata, quæ crassitiem sibi non medi-  
ocrem vendicant: quot prætereà orbium con-  
camerationes interjectæ sunt inter lunam &  
supremum orbem, seu primum mobile? *Ari-  
stoteles* quidem octo fecit orbés, in quibus  
voluit insigi stellas haud secus ac totidem  
clavi rotæ inferuntur: quorum septem sepe-  
tem planetis destinavit, alterum fixis stellis,  
quas omnes in eodē orbe collocavit: Nihilo-  
minus iste numerus Recentioribus non satis-  
fecit: unde *Ptolomeus*, ut satisfaceret obser-  
vationibus, orbem adjecit nonū: Post eum *Al-  
phonsus*, ne observationibus deficerent Hypo-  
theses, introduxit decimū: & quamvis in scho-  
lis philosophorum ista diu invaluerit opinio,  
duobus tamen recentioribus *Clavio* & *Ma-  
gino* non ita potuit satisfacere, quin undeci-  
mum invenirent: Et certe verendum, ne præ-  
gnans *Doctæ* hujus *Ignorantia* venter plures  
quotannis producat partus ad matris suæ fa-  
mam sustinendam. Hi verò orbés non possunt  
sibi non vendicare immensā & vastam crassiti-  
em,

em, 1. quòd in se statuuntur gerere sphaeras Solis & Syderum, *Terram* ipsam multis parafangis excedentium. Vt enim fileam magnitudinem fixarum stellatum ob distantiam planè incognitam, constabit instrumentis Astronomicis Solem esse centies maiorem ipsa terra quare necesse est maximam esse orbis solaris crassitiem quæ ad minus ad totam hanc Solis ipsius Diametrum exportrigatur. 2. quòd juxta vulgatos Astronomos in multos orbes minutiores & partiales iterum distribuuntur, ut in *Epicyclos* & *Excentricos*, quorum quilibet cum aut stellam in se vehat, aut stelle motum promoveat, sine magnâ aliquâ spissitudine non consistat. Hùc accedit, quod crassities octavæ sphaeræ in quâ fixæ collocantur, videtur penè inexplorabilis, cum in illâ innumera conspiciantur stellæ disparis distantie & altitudinis, ut meritò dubitemus, utrum omnes in eodem sitæ sint orbe. His adjiciendæ sunt distantie & crassities noni, Decimi, & undecimi orbium, quos recentiores suprâ octavum cælum collocant. Cogitemus jam crescentibus horum orbium Diametris ipsorum orbium ambitus proportionalitèr augeri; pro magnitudine verò Peripheriarum motum ipsum circularem proportionem quâdam fieri velociorè. Tantæ certè velocitatis comperimus

mus istum motum qualem nec Natura ferre novit, nec intellectus fingere Si enim motus iste terræ concedatur non neganda est tanta illi celeritas, quantā unius horæ spatio 900 miliaria conficeret Anglicana: quid itaq; cogitandum de motu octavæ spheræ, respectu cuius ob immensam magnitudinem tota telluris moles instar puncti in Nihilum evanescet? quid adhuc de convexâ superficie primæ mobilis seu undecimi cœli apud vulgatos Astronomos, quæ octavi cœli ambitum tanto circuitu superat? comparabimus cum motu aliquorum globulorum è bombardis explosorum? At certè motus iste multo statuendus est velocior, ut qui cogitationi, celeritate sua, aut nihil aut parùm cedat. Veritus est olim *Ptolomæus* ne motus circularis terræ concessus ob violentam rapiditatem Terræ ruinam introduceret: At multò magis verendū esset illi, si probè intellexisset, ne rapidissimo isto in cœlum motu introducto, tota cœlestis machina dissolveretur. Maximi certè est apud me momenti rapidissima huius motus velocitas ad circularem Terræ motum astruendum: At Peripateticos intueor accinctos ad respondendum: qui, ne nihil dicere videantur, dicent quidlibet. Non improbabilis (inquiunt) censendus est iste motus ob summam velocitatē:

T

quia

quia nulla in cœlestibus corporibus invenitur  
resistentia quę talem motum retardet aut im-  
pediat. Si enim talis admitteretur *Resistentia*  
esset vel respectu *Movētis*, vel respectu *Mo-  
bilis*, vel respectu *Medii*: non ratione moven-  
tis; quia movens juxta Aristotelem est Intel-  
ligentia immaterialis quę talem à corporibus  
resistentiam pati non possit. Non in mobili,  
quia 1<sup>o</sup> cœlestis est substantiæ quę reluctātes  
qualitates in se non recipit, 2<sup>o</sup> corpus est ad  
hunc motum maximè à naturā propensum &  
proclive. Non à medio fit hæc Resistentia;  
quia in orbibus istis inter se contiguus tale  
medium non invenitur. Omnia quę contra  
hanc assertionem dici possunt non inferam;  
cū plurima in aliam reiicienda sint Exerci-  
tationem; in quā de orbibus cœlestibus di-  
cam. Nonnulla tamen reponam, 1. Nullam in  
naturā necessitatem tales in cœlum Intelli-  
gentias introduxisse: vel enim ibi statueren-  
tur ad excitandum, vel ad regulandum, vel ad  
continuandum motum cœlestium orbium:  
nullum enim alium finem assignabunt. Non  
ad excitandum motum: quia hoc corporum  
cœlis viliorem commune est privilegium, ut  
motum suum propriis formis excitent, nec a-  
liorum indigeant adminiculo. Non ad regu-  
landum, quia natura cū sit finita, limites &  
mensu-

mensuram sibi præscribit in omni opere: Nec  
 deniq; ad continuandum: quia omnis natura-  
 lis causa non impedita agit semper quoad ul-  
 timum, nec unquam defatigata requirit alte-  
 rius succenturiatæ suppetias. 2. Vbi statuunt  
 Resistentiam in mobili non inveniri, suis vi-  
 dentur contradicere principiis: convenit e-  
 nim inter omnes huius farinae Philosophos,  
 orbis superiores movere & ciere inferiores:  
 quæto hic, utrùm hoc faciant virtuali aliquo  
 influxu & emanatione, aut contactu quodam  
 corporeo: Modum priorem apud Astrono-  
 mos non invenio: Neq; facile explicare pos-  
 sunt qualis sit hic influxus, aut emanatio, aut  
 ad quam qualitatem revocetur. Si contactu  
 corporali statuunt hoc fieri, admittant necesse  
 est aliquam in cælis passionem, & ita per con-  
 sequens resistentiam. Omne enim Agens cor-  
 poreum & Immediatum in Agendo repati-  
 tur: quare orbis moventes inveniunt resisten-  
 tiam. Tertius tandem exigit articulus, ut o-  
 stendam nullam tanti momenti esse rationem  
 apud Adversarios quæ à nobis sine difficul-  
 tate non solvatur: Fundamenta plurimorum  
 in præcedentibus sustulimus, ut pauca reliqua  
 supersint, quæ aliquod rationis specimen præ-  
 se ferant: primò à sensu sic arguitur inter vul-  
 gares Philosophos: Si in globo terrestri talis

motus admittatur circularis, quâ fieri potest ut à nobis terræ incolis non sentiat? Dignum sane illis argumentum, qui res omnes sensu potius metuntur quàm ratione: Annon, sæpè provectis nobis in Naviculâ, tranquillo mari, motus ita nobis fit insensibilis, ut navicula quiescere non movere videatur? Quid itaq; de motu circulari terræ cogitemus, quæ minus quàm Navicula habet causæ cur sentiat? Quippe Naviculæ corpus pusillum & exile, Telluris verò vasto mole præditum: motus Naviculæ violentus & vagus; Telluris verò Naturalis uniformis & Equabilis: ut si talis admittatur motus, futurum impossibile ut à sensu percipiatur: Obiiciunt secundo, quamlibet terræ partem rectâ lineâ ad cætrum descendere: quare idem erit totius motus, cum in Homogeniis eandem esse rationem partis & totius omnes saniores profiteantur. Huic rationi partim respondemus in præcedentibus. Quædam hic reponam. 1. Aliud esse loqui de sphaera integra ex materia terrestri & forma magnetica composita, aliud autem de partibus materialibus, ex quibus talis sphaera terræ magnetica constituitur; si loquuntur de integra ea telluris sphaera, dicimus ex magnetica sua inclinatione, motum sibi vindicare circularem, quem astruimus. Partes verò sphæ-

ra




1. *Materialis* dicimus duplici sensu spectari,  
 vel ut unitæ sunt reliquæ telluris massæ &  
 moli, vel ut separata: ut unitæ eodem inci-  
 tantur motu orbiculari, quo totum: partes  
 enim omnes moventur ad motum sui totius;  
 partes autem istæ materiales ubi à toto sepa-  
 rata fuerint præter motum istum alium ha-  
 bent rectum quo locos suos repetant. Talis  
 Inclinatione partium ad centrum propriè dici-  
 tur Gravitatio, quæ revera non quadrat in to-  
 tam terram, neq; in aliquam eius partem toti  
 conglobatam, sed solummodo in partem à  
 suo toto divulsam vel separatam. 2. Dicimus  
*Homogeneum* esse duplex, aliud ratione *Ma-*  
*teria & quantitatis*, ut est aqua, vinum & huius-  
 modi, in quibus totius & partis eadem est de-  
 nominatio: aliud *Formale*, eorum scilicet quæ  
 ejusdem formæ & naturæ communione gau-  
 dent, ut magnetica omnia. Ex priori Homo-  
 genia rata erit consequentia: quælibet terræ  
 particula recto motu descendit ad centrum,  
 ergo tota terra. Interim limitatio utrinq; est  
 adicienda, 1. Quia quælibet particula hæc in-  
 telligitur extra locum non in loco. 2. Tota  
 terra etiam duplicem subit acceptionem; vel  
 enim tota sumitur terra pro globo compo-  
 sito ex omnibus partibus, vel pro omnibus par-  
 tibus indefinitè sumptis, ex quibus globus

telis conflatur. Priori sensu negamus in talibus Homogeneis eandem esse rationem totius & partis : quia totum hoc sensu est globus integer, in quæ, ut antea diximus, talis motus rectus non omnino quadrat : quare sensu posteriori accipere necesse est, ut sensus sit, omnes terræ partes indefinitè acceptas habere inclinationem ad centrum. Iam ex Homogeneitate posteriori, nimirum formali, vires obtinebit hæc consequentia. Tota terræ sphaera movetur circulariter, ergo quælibet eius pars eodem motu circulari mutatur : quælibet (inquam) pars movetur circulariter, non circa centrum suum sed centrum terræ ; non motu partis *Proprio*, sed totius machinæ communi. Tertium argumentum, quod omnino reverà validissimum, & à quibusdam Herculeum existimatur, à duobus similibus ducitur experimentis. Concesso enim terræ hoc motu circulari, explicari non potest, 1. Quo fieri possit modo ut globus ferreus vel lapis ex altissimâ turre demissus in punctum terræ infra se perpendiculariter situm, ad amissim incidat, terrâ interim circa suum axim volutatâ. 2. Quomodo sphaerulæ Bombardicæ simili pulveris Pyrii quantitate & qualitate, similique per eundem aërem directione & altitudine projectæ, pari intervallo, & ab uno loco, & ver-

sus

sus Eurum, & versus occasum proiicerentur: motâ interim tellure versus Eurum. Hisce experimētis ut satisfaciamus, præmittimus primo, telluris sphæram ex partibus constare duplicis rationis: alix enim solidiores sunt & ad Consistentiam aptiores, ut Terra, lapides, Ligna, Mineralia; & quæcunq; aut in terræ gremio, intra eius superficiem occultantur, aut super superficiem eius solidiora consistunt, illiq; adhærescunt. Alix autem sunt tenuiores & fluidiores, qualis est *Aer & Vapores* in illo geniti, qui nihil aliud sunt quàm certa terræ ipsius effluvia. Alix autem sunt partes quæ licet in se solidæ sunt, superfici ei tamen terræ non adhærescunt, sed ab illa pro tempore separantur, ut lapides in sublime projecti, sagittæ volantes & similia: His explicatis cogitandum est hæc partes isto motu Circulari alias ab aliis non separari, sed uniformi & æquali motu cieri circa idē centrum: licet enim materiæ inter se quasi discrete separantur, eadem tamen Magneticâ & formali continuatione coniunguntur, tanquàm in eodem orbe, ut à se invicem divelli non possint: Partes itaq; *Solidiores* primi generis & *Fluidiores* secūdi, eodem uniformi & regulari incitātur motu terræ, quicunq; alii sese huic adiunguntur motus violenti: corpora verò separata à suis locis, ut

lapides & Spharula Bombardica duplicem in isto statu motum sibi vendicant; alterum *Naturalem* & uniformem, quo ad motum totius terræ tanquam partes Homogeneæ se cōformant; alterum *Violentum* & *Rectum* ex vi projicientis impulsus: motus autem ille projectus rectus non impedit circularem. 2. quia rectus & circularis nullam admittunt proportionem, ut se invicem impedian aut promoveant. Neq; duo motus circulares aut misceri, aut directè opponi possunt; nisi super eisdem fiant centris, eodemq; intervallo. Nec certè improbable videatur Globolos ferreos, lapides & hujusmodi in aëre suspensos sic circumferi; cum hoc ipsum in ipsis cœlis reperiat ut in sequentibus aperiemus. Motum istum ut clarius explicemus adjiciemus tale diagramma: Sit orbis terrarum  $LQM$ , cuius centrum  $A$ ; effluviolum ascendentiū crassities  $OQ$ , quemadmodum orbis effluviolum, seu fluida substantia, procedit cum terrâ; ita etiam pars orbis in rectâ lineâ  $OQ$  immota procedit generali revolutione; In  $O$  &  $Q$ , grave aliquod corpus ut  $O$  cadit perpendicularitè versùs  $Q$ , viâ brevissimâ versùs centrum  $A$ ; motus autem iste à circulari nec est impeditus, nec cum illo compositus: Non impeditus; quia alteri nullo modo



modo contrariatur: Non est cum illo compos-  
 itus: sed simplex & rectus, nunquam exce-  
 dens lineam  $OQ$ , quare projectum aequali  
 vi à  $Q$  versus  $L$  & à  $Q$  versus  $M$ , æqualem  
 utrinq; conficit distantiam: etiamsi diurna  
 Telluris Revolutio se interponat: Haud secùs  
 ac unius hominis in terra ambulantis viginti  
 passus æquale metiuntur intervallum, tam  
 versus orientem, quàm occidentem: quare ni-  
 hil hic evincit adversarii ad diurnam terræ  
 revolutionem evertendam. Iam superest ulti-  
 mo

mò in loco, ut ostendamus motum istum Revolutionis Terræ concessum, sacrae Scripturae testimoniis nullo modo contradicere, Locorum singulorum interpretationes varias colligere extra aleam nostri est instituti: generatim perstringam, quæ fortassis omnibus satisfaciant. Loci omnes sacrae paginae, quæ Assertioni nostræ adversari videntur, vel astruunt motum cœlorum, vel oppugnant terræ motum circularem, & quietem probât; At media hæc nostra est opinio, quæ nec motum cœlis adimit, nec oppugnat terræ quietem, quam sacrae litteræ subintelligunt. Nam. 1. licet cœlis motum illum diurnum adimimus, singulis tamen orbibus motus singulos concedimus proprios & genuinos, ut nullam cœlorum partem penitus quiescere statuamus. 2. Terræ Quietem in multiplici sensu tribuimus; quies enim quadruplici motui opponi intelligitur: primò, motui centri terrestris progressivo, quo à loco in locum promovetur; Secundò Separationi & Dissolutioni partium à se invicem, quâ totiûs machinae integritas periclitetur. Tertiò, Polorum transmutationi, quâ poli mundi extra verum suum situm vel versus unam vel alteram partem dimoveantur; Quartò motui Diurno, quo tota tellus circa suum axim ab occasu in ortum, 24 horarum

rum spatio convertatur : primo modo quietem terræ astringimus , quia terram utcunque mobilem , in medio & centro totius mundi constituimus . Secundo etiam modo , quia partes terræ omnes naturali suâ gravitate ad centrum collimant , in quo uniuntur , ut excludatur terrestris sphaeræ dissolutio . Item tertio modo ; quia poli terrestris orbis magnetica quâdam verticitate eosdem semper in cœlis polos directè respiciunt , ut nullo modo ab illis dimoveantur : ultimo tantum modo quietem excludimus , ut quæ diurnæ terrestris sphaeræ revolutioni solummodò opponatur . Ex his concludimus probabilem esse terræ motum diurnum revolutionis circa suum axim , ut quæ nec rationi , nec Sacræ Paginæ testimonio adversetur .

## DECAD. III.

## EXERCITATIO V.

*Quaternarius causarum numerus non  
rectè assignatur.*

**C**ELEBRATUR hodie tum Peripateticis , tum Socraticis & Ramæis , quaternarius causarum numerus , utpote efficientis , materix ,

teriaz, formaz, & finis: quarum duas externas vocant, nimirum efficientem & finalem, duas verò internas, ut sunt materia & forma. At hanc causarum partitionem utcunq; à Philosophis maximis sancitam redarguit tum defectus, tum redundantia, tum confusio. Quibus prius expositis aliam divisionem fortassis exquisitiorem suggeremus. Primò itaq; redundare ostendemus ex eo quod finem inter causas enumerent, quod non admittendum. Sic itaq; ratiocinamur. Omnis causa influit in effectum. At finis non influit in effectum. Ergò non est causa. Minor est evidens, quia influxus causæ in effectum aut est ipsa causalitas, aut saltem aliquid causalitati necessariò conjunctum. Minor etiam in aprico statuitur: vel enim finis immediatè influeret in effectum, vel mediatè, excitando nimirum efficientem ad operandum. Non prius, primò quia sic vel ingrederetur constitutionem, vel productionē rei, vel deniq; conservationem. Neq; enim aliud somnari potest. Non constitutionem, quia solummodò materia & forma constituunt rem. Non productionem, quia sic concurreret ad producendum, vel quatenus est finis simpliciter, vel quatenus est stimulus efficientis. Non simpliciter quatenus est finis, quia finis ut finis nò antecedit, sed consecratur rem iam productam



productam: ideoq; ad ejus productionem non concurrat. Si dicat eatenus concurrere quatenus ab agente excipitur, tunc non immediate influeret in effectum, sed moveret prius efficientem. Non ad conservationem: primò quia res sæpe conservatur debito suo sine frustrata & destituta, ut cum convertatur ad novum usum & finem. Secundò finis apud Peripateticos non statuitur tantum causa conservans, sed procreans, & produciens. Si dicant finem agere, sed mediante, efficiente (quod affirmare videntur, ubi finem & efficientem mutuas sit i invicem esse causas tradunt.) Dico primò, sic finis esset causa impulsiva, & sic reduceretur ad efficientem. Secundò, vel esset aliquid efficientis, vel disjunctum ab efficiente. Si aliquid efficientis, esset aut res, aut modus illi coniunctus. Non res: Primò quia in una simplici re concurrunt sæpe finis & efficiens, ut in Angelo & Deo. Secundò, Si res esset distincta ab efficiente, tunc hic finis alium finem tanquam causam haberet, & hic alium, ut tandem processus daretur in infinitum. Si modus; non erit amplius causa per se, sed causæ modus; quia modus ex se non concurrat ad rem producendam nisi quatenus disponit rem ad agendum: Dispositio verò causæ, quæ præparatur, non est ipsa per se causa, sed aliquid causæ. Si dicant  
finem

finem esse aliquid per se disjunctum ab efficiente, ostendant ubinam gentium existat. Vel enim existeret in materiâ, vel in formâ, vel in effecto ipso. Non in effecto ipso, quia nondum est. Deinde finis, ut effectum confectatur, non est causa: Omnis enim causa effectum antecedit, non sequitur. Non in formâ, ob eandem rationē, quia forma simul est cum effecto seu composito. Non antecedit, quocirca non potest in se continere causam suæ productionis, quam confectatur. Non in materiâ, quia finis coniunctus esse debet cum activâ facultate; materia verò non agit, sed patitur. Quare ab agente facultate non est aliquid disjunctū, & per consequens non est causa, sed eius modus. Hâc etiam accedit vulgata illa ratio, quam non ita facilè excutient. Omnis causa alicuius realis debet esse realis, ut in plerisque effectis realibus; finis tamen non realis est. Major est extra controversiam; quia intentionale nullo modo possit esse finis realis effecti. Nihil enim agit extra vires suas. Minor cōfirmatur, quia finis in rebus artificialibus non est aliud quàm *Idea* in mente artificis concepta, quæ stimulat ad agendum. Ad secundam partē dicimus prædictam causarum partitionem laborare vel Redundantiâ vel Defectu. Si enim iuxta doctrinam Peripateticorum causarum  
nume-

numerum è causalitate seu causandi modo  
 metiamur, erunt plures quam quatuor. Si ve-  
 rò è rebus ipsis metiamur hunc numerum, e-  
 rit saltem in quo modos plurimos ad causam  
 repositos desideremus. Materia enim, vel ip-  
 sis consentibus, triplicem causandi modum  
 exercet, alterum respectu *Agentis* seu *Effici-*  
*entis*, alterum respectu *Formae*, alterum re-  
 spectu *Compositi* seu effecti, quos omnes mo-  
 dos aut inscite prætereunt, aut frigide expo-  
 nunt. Respectu efficientis in potentia quidem  
 obiectiva constituitur. Est enim obiectum in  
 quod efficientis actio recipitur. Respectu ve-  
 rò formæ est in potentia subiectiva, siquidem  
 subiectum est, quod à forma informatur: Re-  
 spectu verò compositi est pars constitutiva,  
 & in alio potentia genere posita, quam com-  
 positivam nuncupamus. Vbi verò triplex po-  
 tentia, ibi triplicem causalitatem poni neces-  
 se est. Nam radix prima, ex qua nascitur hæc  
 causalitas, est ipsa potentia, uti tradunt Meta-  
 physici. Deinde circa causas reliquas, quot de-  
 sideremus modos, suggerant ea, quæ infra di-  
 cemus. Quocirca laborat causarum numerus,  
 ut vel res ipsas pensitemus, & ita pauciores  
 habeamus quam quatuor, aut saltem causandi  
 modos, & ita plures. Ad tertiam verò dici-  
 mus, hanc partitione confusionis insimulari.

Causas

Causas enim productionis non distinguunt à causis constitutionis. Deinde divinum, naturalem, & artificialem causalitatis modum nō accuratiùs exponunt & distinguunt, quod necessariò hīc erat faciendum. Nobis sic visum est causas partiri. Causæ sunt vel productivæ, vel constitutivæ. Productivæ, quæ in ipsa rei productione conspicuæ sunt. Suntq; vel efficiens, vel obiectiva. Efficiens est à quo est actio, seu quod in obiectam materiam actionē suam exercet. Obiectiva causa seu obiectum est quasi materia, in quam talis actio recipitur, ut in productione alicuius domūs, Efficiens est Architectus, qui vim exercet in obiectam materiam. Obiecta hæc materia sunt lapides, ligna, & alia, quæ eius actioni obijciuntur. Hinc obiter notetur Logicorum error qui obiectum ad subiectum revocant, quū potius ad causas esset referendum. Porro efficientis radix est potentia activa: actus verò est actio, seu effectiva operatio: In hac causa duo sunt modi, quæ operationem hanc effectivam perpetuò comitantur, & potentiæ illius activæ quasi partes sunt, *vis* nimirum *motrix* & *formatrix*. Vis motrix est quæ efficientem movet ad agendum, quæ vulgatis Philosophis finis & causa impulsiva dicitur. Hæc in Inanimatis est instinctus quidam naturalis rei  
prima

primâ creatione inditus, quâ res vel sui, vel totius universi conservatione quarrit, aut aliquid utile in naturâ præ se fert. In brutis agentibus est appetitus, in hominibus voluntas. In hoc tamen differunt inanimata ab animatis, quod in illis hæc vis penitus est infusa, in his verò ab objecto externo excitatur, ut appetitus in brutis à sensibili externo, voluntas in homine etiam ab objecto bono: Suggestitur illud ab imaginatione, hoc ab intellectu. Vis formatrix est, quâ efficiens effectum sibi eo modo quo proposuit producere, apta nata est edere. Hæc vis est quidem in Inanimatis, sed Innominata. In brutis est iudicium sensus, in homine verò intellectus, quatenus disponit & format effectum sibi consentaneum: hic iterum discriminem latet inter Inanimata & Animata, quod in illis à naturâ pendet, in his ab externo informatur. Hoc modo Estimativa in brutis à phantasmate prius concepto, in homine ab Ideâ menti impressa dirigitur. Hæc de efficiente, Obiectivæ causæ seu obiectivæ radix prima est potentia obiectiva. Effectus est, obiectio seu observatio. In obiecto hoc quod efficienti observatur, duos notamus terminos seu extrema. Deinde spatium interiectum. Termini sunt inter quos motus hoc versatur, suntq; vel ad quædam, vel à quo. Terminus à quo

quod est à quo motus incipit, estq; in creatio-  
 ne nihil seu non ens: In naturali v. productio-  
 ne privatio, quæ etiam potentia dicitur Phi-  
 losophis. Huc reducenda privatio illa, quam  
 Aristoteles habet inter principia. Terminus  
 ad quem est in quem actio efficientis definit,  
 & actus nuncupatur, ut opponatur potentie &  
 habitus, ut privationi. Hic in creatione est En-  
 titas simplex seu existentia, in naturali vero  
 productione Forma, quæ in materiam effi-  
 cientis virtute introducitur: Spatium vero in-  
 ter mediū est, quod inter terminos hos est in-  
 teriectum, quod in creatione est Infinitum, Fi-  
 nitum in operatione creaturarum: Nam in-  
 ter nihil & aliquod, spatium est infinitum; in-  
 ter potentiam & actum, privationem & habi-  
 tum naturalem, est finitum & proportiona-  
 tum. Actio vero promota per hoc spatium est  
 instantanea in creatione, in generatione vero  
 temporanea & successiva. Hinc facile patet,  
 quid dicendum sit de causis productivis, quas  
 non Universim, sed è notioribus tantum ex-  
 emplis explicavimus. Sequuntur constituti-  
 væ, quibus effectum seu compositum consti-  
 titur, suntq; vel materia, vel forma. Materia  
 est quæ res constituitur, seu quæ formæ infor-  
 manti subiicitur. Forma, quæ materiam sibi  
 subiectam informat, actumq; Radix materię  
 huius

huius, quatenus est subiectiva, est potentia illa  
 Subiectiva: Effectus est Receptivitas seu  
 Subiectio materialis: Fundamentum formae, qua-  
 tenus est causa formalis, est vis Informativa:  
 Actus vero (si actus dici possit) est informa-  
 tio, quae nihil est aliud, quam eius in subiecta  
 materia immersio. Vtriusque actus communis  
 est compositio, seu unio partium ex qua ema-  
 nat forma compositi. Materia & forma se mu-  
 tuo discriminant in suo genere. Materia enim  
 quae in se communis est, formam restringitur &  
 coarctatur ad certum compositum: Sic forma  
 quae ex se indeterminata per materiam coar-  
 ctatur, haud secus ac in rebus artificialibus,  
 ut in poculo argenteo, Idem argentum est  
 quod cuiusvis aliae figurae subiiciatur: eadem  
 etiam poculi figura est, quae aliae materiae ut-  
 pote aureae coaptetur. Vbi vero concurrunt,  
 poculum argenteum constituunt, & se mutuo  
 determinant. Ita explicatas habetis omnes  
 causas, tum causandi modos, quibus unicum  
 effectum opponitur materiale, quod tamen  
 iuxta causas omnes & modos formaliter di-  
 stinguatur. Ab efficiente enim dicitur effectus,  
 à vi motrice seu fine dicitur destinatum, à vi  
 formatrice, præconceptum, ab obiecta mate-  
 ria, fundatum, à termino à quo dicitur poten-  
 tia, positum: à termino ad quem, actuatum.

ab interiecto spatio, instantaneum vel successivum: similiter in constitutione, à materiâ materiatur, à forma formatum: Vt nihil amplius desideres ad causarum numerum. Multa fortasse nomina, quibus causas & causandi generandos consignavimus, vix omnibus causarum neribus quadrant. At in subtilibus hisce metaphysicorum spinis satius duximus omnia è notioribus rimari, quàm inscitiam sepelire.

## DECAD. III.


## EXERCITATIO VI.

*Variatio pixidis nautica oritur tantum  
ex magneticâ telluris naturâ.*

**V**ARIATIO definitur apud plerosque arcus horizontis inter communem eius cum verò meridiano intersectione, & deflexionis in Horizonte terminum: Licet enim cuspidis magnetica alterâ sui parte in Boream, alterâ v. in austrum perpetuâ naturæ lege contendit; non ita tamen ubiq; directè, quin aliquando in Orientem aliquando in Occidentem obliquè collimet. Huius variationis causam rimari satagentes nonnulli Cosmographicorum in polos nescio quos magneticos à  
veris



veris mundi polis aliquantulum distantes retulêrunt: Ex hisce polis regionum longitudines, maior spe quàm fructu, investigare contentendentes, aut rei difficultate perterriti propositum penitus abdicarunt, aut saltem in falsa & incerta fundamenta se coniecêrunt. Côttra communia hæc antiquorum placita defendendum hîc suscipio, variationem prædictam Pixidis nauticæ e talibus polis magneticis haud perfectam esse, neq; tales omninò polos inventos unquam fuisse sanioribus cosmographis. Quod ut efficiam dexterius, primò eorum dogma diagrammate quodam lineari proponam, tum postea talem structuram cum observationibus geographicis & nauticis stare non posse, luculenter ostendam. Sit itaque circulus telluris spæram describens E A F, circulus horizontis E H F, polus Arcticus A, Antarcticus L, polus magneticus extra polū mundi situs B. His positis constitutur cuspis magneticæ pixidis in puncto H, tendit itaque in punctum B, seu polum magneticum per meridianum magneticum H B, qui quoniam coincidit cum merdiano vero H A, nulla erit variatio seu acūs magneticæ deflexio à vero mundi meridiano. Moveatur iam acus magnetica in aliud horizontis punctum, nimirum in D, certum erit ex eorum principiis cuspi-



dem tendere in polum magneticum B, per meridianum magneticum DB, non itaq; vergit in mundi polum A, sed in punctum ab illo distantem C, quoniam DB & BC in eandem rectam coalescunt. Hinc statuunt trajicientibus per Azores insulas nullam omnino inventam esse variationem, quoniam in illis meridianus magneticus concurret in eadem rectâ cum vero mundi meridiano: in reliquis verò locis omnibus inventam esse variationem quandam aut majorem aut minorem pro aliâ atq; aliâ, distantia ab illo primo. Ex quo nonnulli coniecturam fecerunt, primi meridiani

arbitrium deprehensum esse in illis insulis, ut non tam ex hominum arbitrio, quam ex natura ipsa originem traxisse videretur. Plausibilis admodum opinio, & quæ miras in Cosinographiâ utilitates peperisset, præsertim in locorum longitudine notandâ, si observationes nautarum principis hîsce aliquo modo quadrassent. At quod non quadrent omnino unâ vel alterâ observatione conficiam. Si talis variatio iuxta horum principia, esset à parvis, tunc arcus variationis immutaretur, æqualiter pro locorum distantis. Exempli causa, si variationis arcus immutatus esset unico gradu in itinere centum miliarium, centum miliaria sequenti, similiter unum alium, varientur gradum aut diminutione, aut augmento. At hoc falsum esse dicat navigantium experientia. Nam à Sorlingis insulis ad terram novam quum exarsq; progressum fuerit, ut in verum polum magnetica sit directio, tum procedenti navi primâ viâ variatio crescit in Borolybicum, sed obscurâ admodum, & minori differentia: inde verò augetur arcus pari intervallo, minore proportionem, donec non longe nobis distiterit à continenti, tunc autem variatio est maxima, attamen antequam navis terram attingit, variatio diminuitur. Quibus adungi possunt observationes haud paucæ a-

pod philosophos magneticos & tantas pertissimos. Ex quibus evidens est iudicium variationem hanc distantis non esse proportionalem. Deinde si variatio magnetica certis in tellure polis nitoretur, tunc tot essent poli, quot meridiani magnetici. At hoc falsum. Consequentia est clara, quia cuilibet meridianus magneticus certum polum indicat, in eoq; terminatur. At non unicus ubiq; constituitur meridianus, sed pro quolibet pene loco varius. Ex quibus necessario elicitur, plures etiam polos quam duos esse admittendos, per quos hi meridiani transirent. At plures polos quam duos nemo, quod sciam, unquam asseruit ex illis qui hanc partem suscipiunt. Quare ut genuinam huius variationis causam aperiam, satius est statuere cum magneticis Philosophis certas esse in tellure eminentias magneticas, quæ cuspidem pixidis nauticæ à verò suo situ divertunt. Istæ autem eminentiæ cum aliis atq; aliis locis aliæ atq; aliæ reperiuntur; hinc fit, ut non eadem semper sit variatio ubiq; locorum. Acus enim magnetica in versorio suo constituta, licet inclinet semper ad mundi polū, tamen à particulari quâdam magneticæ virtutis in terræ parte eminentiori se deflectit. Hujus inequalis in terra eminentiæ specimen sit huiusmodi.

di. Sit A polus mundi, locus variationis B, regiones robustiores C, versus Horizontale in B variabitur à polo A, versus C, & ita apparet modus hujus variationis: quum; nimirum stilus à vero suo meridiano, & polo, aliquando se deflectat, ob fortiorem impetum hujus emittentiz magneticæ.



## DECAD. III.

## EXERCITATIO VII.

*Logica secundum triplicem mentis operationem non rectè distribuitur.*

**I**NTER multiplices logicæ partitiones quæ passim in Scholis venditantur, illa hodie celebratur tanquam perfectior, quæ è triplici mentis operatione profecta est. Statuunt enim logicæ in tres partes distributæ primam esse, quæ Simplicium Apprehensionem dirigit; secundam, quæ Compositionem & Divisionem terminorum instituit; tertiam deniq; quæ in discursu

discursu tam illativo, quam ordinativo occupatur. Hanc tamen partitionem rei veritatem non planè attigisse tam è logicæ subiecto, quam ex obiecto & fine demonstrandum suscipiemus. Quod ut efficiam inprimis statui-  
mus logicam non nisi collativam mentis operationem suscipere informandam, ac proinde simplicium apprehensionem, quam præponunt cæteris, reliquis scientiis realibus esse relinquentiam. Vt ab ipso subiecto auspicemur, sic arguimus, non posse sub se omnes operationes complecti: subiectum (quod & aliis obiectum informationis nuncupatur) apud omnes statuitur intellectus. Singulæ autem eius eminentiæ & operationes quod à logicâ non dirigantur confirmabitur: Si singulæ eius operationes à logicâ susciperentur, tum frustaneæ essent reliquæ Philosophiæ partes. At hoc absurdissimum. Quare & illud. Consequentia videtur evidens, quia reliquæ partes non alium præ se ferunt usum & fructum, quam ut dirigant & informant intellectum. Quare si singulæ intellectus operationes à logicâ dirigantur, non opus esset reliquis illis Philosophiæ partibus, quibus informaretur. In promptu est responsio apud Peripateticos, tam logicam quam reliquas disciplinas intellectum instituere & informare, sed aliam atq;  
alium

alium esse informandi modum ; ita ut una &  
 eadē animi operatio à diversis informari pos-  
 sit, licet non eodem modo. Hinc distinguunt  
 inter Logicam & Reales scientias , quod hæ  
 intellectū informant (ut loquuntur) obiectivè,  
 illa verò directivè. At multis modis refellitur  
 hæc responsio, primò, quia istæ dictiones vi-  
 dentur coincidere. Si quid enim ego assequar  
 obiectivè res dicitur intellectum informare,  
 quum ab ipso tanquam res scibilis concipiat-  
 tur: directivè verò quum tanquā instrumen-  
 tum ad aliud cognoscendum conducit. At hoc  
 sensu & logica erit tam obiectiva, quàm di-  
 rectiva. Obiectiva nimirū, quum ipsa simpli-  
 citer in se concipitur & intelligitur, siquidem  
 obiectū esse possit intellectus: Directiva verò  
 quatenus usui applicatur, & ad alias discipli-  
 nas capescendas confert. Eadē lege & phi-  
 losophia realis & obiectiva dici potest & di-  
 rectiva. Obiectiva quatenus movet; Directi-  
 va quatenus instituit ac docet intellectum. At  
 curiosius forsitan distinguunt istos terminos; vi-  
 deamus itaq; quid apponant in secunda ratio-  
 ne. Secundo, intellectum dirigere seu directi-  
 vè informare duplici occurrit sensu. Velenim  
 illud dicitur dirigere, quod intellectus appre-  
 hensioni tanquam res scibilis obicitur, vel  
 quod ita intelligitur, ut tanquam instrumen-  
 tum

tum conferret ad aliud cognoscendum. Aliū ego sensum non possum capere. Priori modo si accipiant, nullum omnino discrimen agnoscunt inter Speculativas seu reales disciplinas, & Logicam, quam operatricem esse statuunt. Nam & ista scientia tanquam objecta ab ipso intellectu percipiuntur, & hoc modo illum instituunt & informant, ut voluit superior illa ratio. Nulla itaque hīc diversitas in modo informandi. Posteriori modo si intelligant, non contradicunt, sed nostras partes confirmant. Quod enim ita concipitur ut sit instrumentum ad alia inveniendum, non simplici, sed collativæ mentis operationi subiicitur. Nam qui concipit & intelligit aliquid sub ratione instrumenti, seu directorii, oportet necessario ut hæc tria cognoscat: Primò ipsius instrumenti naturam instrumentalem, seu habitudinem quam habet ad alium. Secundò, illud ad quod dirigit, seu ad quod illius instrumenti usus spectat, quum enim instrumentum sit de genere relatorum, non potest intelligi sine cognitione sui correlati, saltem confuse & generaliter accepti. Tertio habitudinem seu nexū inter instrumentum & illud cuius est instrumentum, qui nihil est aliud quam relatio. Hæc tria quomodo sine collativâ terminorū comparisonē intelligi possint, non omnino percipio.



cipio. Nam simplici mentis apprehensione concipiuntur absoluta tantum, ut sunt res seu entia, quatenus verò instrumentalem habitudinem intuemur, terminos inter se comparamus. At hæc uberiùs persequemur in sequentibus. Tertiò si intellectus una eademq; operatio, nimirum apprehensio simplicium, diversimodè informaretur (uti docent ex hac responsione) tum intellectus tali operatione vel ageret vel pateretur. Si agens sit, tum vel Agens liberum, vel agens naturale. Non Agens liberum, hoc enim semper supponit voluntatis actum. At apprehensio simplicium præcedit omnem actum voluntatis. Quod autem præcedit, non supponit tanquam prius illud quod præcedit. Si sit tanquam Agens naturale, tum agit semper quoad ultimum. Omne enim agens naturale non impeditum totas suas vires primo suo impetu effundit. Nullum autem impedimentum aut obstaculum invenitur in intellectu. Quum itaq; agat primò quoad ultimum non potest informari aut corrigi, ut agat perfectius, Correctio enim & directorium huc tantum spectat, ut illud, quod antea imperfectiori modo ageret, nunc agat perfectius. Quare hoc modo non opus esset logicam informatrice, quod hi contendunt. Denique si statuitur intellectus patiens in Apprehensione simplici

simplicium, non potest sustinere diversos informandi modos. Primò quia ex these statuitur una eademq; simplex operatio. Quòd si multiplices pateretur informandi modos, non simplex esset sed composita. Secundò si intellectus sic patièdo diversimodè informaretur, tum hæc informationis diversitas esset vel penes res scibiles, vel penes intellectum. Non penes res, quia aliæ atq; aliæ res inter se multum dissimiles possunt eisdem notionibus logicis vesti, & proinde eodè modo intellectum dirigere. Ea autem intelliguntur mentem eodem modo dirigere, quæ sub eisdem notionibus secundis intellectui obii-ciuntur. Non penes intellectum quia unum idemq; simplex patiens eodem modo dispositum eodem semper modo agit. Nulla autem hæc dispositionis diversitas, quæ diversum illi informandi modum antecedit. Quare concludimus, unam eademq; mentis operationem talem informationis diversitatem pati non posse. Quod si hoc admitteretur, non amplius una sed duæ essent operationes, quod non concedendū. Secundò sic arguimus. Si omnes operationes intellectus à logica informandæ suscipiantur, tunc operatio theoretica, practica, & poëtica. Non theoretica, quia sic in scientiarū speculativarū fines inumperet, & ita esset vel metaphysica,

## EXERCITAT. VII. 319

metaphysica, vel physica, vel mathematica. Omnes enim scientias speculativas huc referunt. Non practica; quia sic non tantum intellectum practicum dirigeret logica, sed & voluntatem, & ita moralis philosophiæ fines invaderet. Relinquitur ergo, Logicam solam *Poëticam* seu effectivam mentis operationē dirigere posse. At hæc operatio non est simplicium apprehensio, sed tota in collatione terminorum occupatur: hoc est, vel in compositione vel divisione, vel in discursu, & deductivā notitiā: operatio autem collativa excludit solam simplicium apprehensionem, quæ Aristotelicis primæ logicæ parti destinatur: Quod verò simplex illa operatio dici nullo modo possit effectiva seu poëtica, demonstratur primo, quia effectio omnis seu *molns* ali- quod opus post se relinquit. At simplici illi operationi non est opus aliquod relictum. Non enim facit quicquam dum apprehendit. Secundo omnis effectio intellectus est vel compositio vel divisio, vel discursus. Mens enim non producit res quas cognoscit, sed res mediantibus notionibus aut connectit, aut distinguit, aut aliud ex alio deducit: alium ego effectiois modum in intellectu non possum capere, vel enim intellectus res simpliciter concipit, vel componit, distinguit, aut comparat  
cum

cum aliis. Si tantum simpliciter concipiat, non agit, sed potius patitur ab obiecto: & si agat, non tamen efficit, aut opus aliquod post se relinquit. Si intellectus compareret, & componat terminos, non est quod collativam illi operationem hoc consummato opere denegemus. 3°. Sic arguitur; operationem illam primam, quam Apprehensionem vocant, à Logica non dirigendam, idque multiplici ratiocinio. Primò, quia ubi nullus error, ibi nulla potest esse directio. At in prædicta illa operatione nullus est error. Maior est clara, quia omnis directio est alicuius erroris remedium. Frustrà autem adhibetur erroris remedium, ubi error non est inventus. Minor confirmatur; primò, quia ubi non est veritas, aut falsitas, ibi non est error. At in simplicium apprehensione non est veritas aut falsitas. Maior iterum in apriko statuitur, quia falsitas aut idem est cum errore, aut saltem illi necessario conjuncta. Minor est extra controversia aleam. Quod si dicant, veritatem esse Simplicem, non Compositam: Regerimus; primò veritatem & falsitatem simplicem esse metaphysicam, non logicam, & proinde à logica non suscipiendam. Nec deficit intellectus hac ex parte. ideoq; non corrigendus: Quicumq; enim concipit rem (iuxta Aristotelem) concipit eodem modo quo est, quam

quum talis veritas sit comes essentia perpetua. Verum itaq; semper concipit, nec falsitas aut error oriri potest à logica corrigendus. Deinde veritas illa Metaphysica non opponitur errori sed potius non entitati seu non existentia. Secundo, si erremus in apprehensione simplicium, tum vel quia non omnino apprehendimus, vel quia malè: si non apprehendimus, non erramus: quomodo enim fieri potest, ut erremus in iis apprehendendis quæ non omnino apprehendimus? Si erremus malè apprehendendo, tum quia omnes rei modos, & circumstantias non comprehendimus. At resolutio rei in suos modos & circumstantias, non est simplicis apprehensionis, nec sine interventu collativæ operationis absolvitur: siquidem rem in suos modos resolvere non potest intellectus sine actu reflexivo: Talis verò actus nihil aliud est quam discursus animi & deductiva quædam operatio. Quare si error hoc modo contingat, non est ascribendus simplici termini apprehensioni sed potius discursui. Secundo si hæc simplicium apprehensio à logica dirigatur, tum vel Immediate in se, vel Medianti discursu, seu actu intellectus composito & collativo. Non prius, quia rusticus & bubulcus obiectum nullo antea discursu præparatum & explicatum æquè apprehen-

dit ac doctus & logicus secundum simplicem illam operationem. Nam prima illa mentis operatio, quæ nullum ante se discursum præsupponit, ex acrimoniâ sensûs pendet, non ex arte. Nam duplex in anima est operatio, alia prima & imperfecta, quæ omnem discursum antecedit, alia secundaria & perfectior, quæ discursum sequitur: illa naturalis est, & nullo gaudet directorio: hæc artificialis. At hæc non in ipsa simplici apprehensione sita est (ut dixi) sed in discursu. Posterius si affirmant, logicam nimirum perficere simplicem illam apprehensionem mediante discursu, non contradicunt. Nihil enim aliud contendunt quàm logicam primario referri ad Collativam mentis partem & discursum: Apprehensionem verò simplicium non suscipere nisi ex consequenti: quatenus nimirum res logico in primis artificio & molimine dispositæ & preparatæ perfectius in scientiis doceantur. Scientiæ enim omnes methodo dispositæ, ante se supponunt logicam veluti formatricem. At dices: Si simplex hæc rerum Apprehensio tantum realibus scientiis sit relicta, tum nihil traderent istæ scientiæ præter terminos simplices, & ita Propositiones Syllogismi & Demonstrationes excluderentur, quod videtur ridiculum. Ad hoc respondemus: Primò, consequentiam non

non esse veram. Nam aliud est syllogismos & propositiones fabricandas proponere & componere; aliud verò jam confectos & intelligendos exhibere. Scientiæ reales non actu componunt illa instrumenta, sed syllogismos & propositiones jam à logicâ confectas proponunt. Hinc videri licet, quanta sit logicæ necessitas, quæ singulis disciplinis suggerit & modum & methodum. Quod si scientiæ hæc omnia sibi suo jure vendicarent, & Dialecticâ se priorem non agnoscerent, non tanta eius esset necessitas, quanta hodiè in scholis celebratur. Scientiæ enim Reales ex se non nisi ossa & carnes pollicentur, logica verò nervos & cartilagine administrat. Secundo, objectum alicujus disciplinæ duplex est, aliud Suppositum, aliud verò Explicatum. Suppositum sunt res ipsæ scientiis subiectæ, quatenus in se sub proprio conceptu & ratione percipiuntur; quo sensu pro subiectis Suppositis habent, Metaphysica Ens, Physica Corpus, Mathematica Quantitatem. Objectum explicatum sunt illæ ipsæmet res, sed quatenus in modis suis, principiis nimirum & affectionibus, exponuntur & declarantur. Res ipsæ reverâ, quatenus ad scientiam supponuntur, non nisi simplici mentis operationi subiiciuntur, quatenus verò explicatæ cæterarum operationû commercium

cium exposcunt. At hoc acceptum referunt logica quæ manū illis porrigit auxiliatricem. Operatio itaq; quā sibi suscipit logica est potētica & effectiva, in reliquis est passiva & theoretica. Hæc enim imbibit & imprimit, quæ illa prius præparaverat & disposuerat. Tertiò hæc occurrit ratio, quam in superioribus tetigimus. Illa tantum operatio est à logica dirigenda, quæ libera est, simplicium verò apprehensio non est libera. Major est clara, quia quod naturale est semper agit quoad ultimas vires, nec artificio alicui intendi, remitti, corrigi, aut informari potest. Necessariò enim agit, nec suam actionem potest perfectiorem reddere. Minor confirmatur, operationem hanc primam non esse liberam seu voluntariam. Primò quia præcedit voluntatis actum omnem. Quare à voluntate non proficiscitur. Secundò quia (ut antea innuimus) rusticus & doctus primā rei apprehensione a quæ rem concipiunt: quin & fieri potest ut rem perfectius concipiat, si sensu acutiori gaudeat. Quartò, huc etiam referri possunt rationes convenientiæ. Quum enim metaphysica & logica eadem sæpè tractent, & in eisdem terminis versentur, utriusque admodum videtur certos terminos & huic & illi præfigere, nisi recurramus ad hanc diversitatem operationum, quas



quas utraq; informandas & perficiendas sus-  
 cipit. Hâc operâ multæ difficultates amputari  
 possunt, quæ methodi studiosum turbare & ex-  
 cruciare solent. Hæ sunt rationes, quæ à sub-  
 jecto logicæ desumuntur, haud minores sunt  
 difficultates, quæ objectum attingunt. Si ob-  
 iectum logicæ tale sit, quod simplici mentis  
 operationi non subjiçatur, tunc partitio illa  
 ex triplici intellectûs operatione non est ap-  
 probanda. At verum prius: Ergo & posterius.  
 Major propositio ostenditur, quia omnes  
 hujus sectæ logici statuunt hanc divisionem  
 esse ex obiecto, adeo ut singulis obiecti divi-  
 sionibus singulæ logicæ partes respondeant:  
 nec non inter obiectum & subiectum certa  
 quædam intercedat proportio, & convenien-  
 tia. Assumptio confirmatur: Qui primam lo-  
 gicæ partem contendunt in simplicibus ter-  
 minis tanquam obiecto versari, hi intelligant  
 necesse est vel obiectum internum & posses-  
 sionis, (uti appellare solent) aut externum &  
 operationis; at neutrum est verum. Non pri-  
 us, quia obiectum internum seu possessionis  
 sunt notiones illæ secundæ, quas instrumenta  
 logicæ appellant. At quod notiones istæ non  
 sunt termini simplices sed collativi facîle sua-  
 detur. Relationes nō sunt termini simplices:  
 At omnes istæ notiones sunt relationes seu

termini relativi. Maior est evidens, quia ea quæ non sine comparativo mentis actu concipiuntur, termini sunt collativi, & non simplices. Siquidem omnis terminus simplex simplici mentis actu apprehenditur. Assumptum probatur instantiis; quia nemo potest concipere patrem, quatenus talis est, sine conceptu filii, aut maritum sine uxore: Conceptum autem Relationis simplicem statuere & præscindere à fundamento & termino, quid aliud esset quam somnium sine somno cogitare, quàm relatio, quæ talis, non nisi in comparatione plurium intelligatur: Quo etiam sensu eius essentia definitur apud Philosophum. Quod si reponant hos terminos simplices quidem esse in se, & potius ordinem tantum dicere ad aliud quam compositionem cum aliis, regerimus, ordinem istum esse veram terminorum compositionem. Duo enim (ut supra innuimus) ad compositionem requiruntur in intellectu, primo Cognitio ipsorum terminorum, deinde cognitio affectionis, seu terminorum habitudinis ad se invicem. Vtrumque autem sub isto ordine concipi necesse est. Nec enim refert: utrum propositionem aliquam *οὐκ ἐξωτερικὴν* & expresse exteriori ore proferat, modo eam tacite in mente imperceptibili intellectus operatione componat; perniciosissimæ enim

enim celeritatis est intellectus humanus, nobis vix sentientibus, componens & distinguens terminos. Nec prius cogitare possumus Aristotelem Nichomachi filium esse, quam hanc intellectus sibi suggerat propositionem: Aristoteles est Nichomachi filius. Ita rata videtur maior propositio, terminos omnes relativos esse comparativos & compositos, & proprios simplici intellectus operationi non subiectis. Iam quod notiones logice, quas secundum vocant, huius sunt rationis, minimo negotio ostenditur. Omnes enim secundæ notiones sunt aut Negationes, aut Privationes, aut Relationes. At omnes logicas has notiones aut negationes esse aut privationes non affirmabunt. Quare erunt relationes. Hinc elicitur obiectum internum logicæ non subiecti simplici illi mentis operationi. Tandem, si asserat Operationis obiectum esse quod simplici operationi subicitur, hallucinantur multis modis: primò ubi dicunt obiectum operationis posse subiecti simplici operationi mentis, intelligant necesse est alterum è duobus, vel nimirum, obiectum ipsum esse Terminum Simplicem, vel saltem Logicam, quatenus dirigit & informat simplicem animi operationem, posse versari circa hoc obiectum. Prius si affirmant, nihil aliud dicunt, quam obiecta reliquarum scientiarum

tiarum logicæ imperio subiici quoad dispositionem & directionem : siquidem res quæ in scientiis tractantur sunt termini simplices, qui logico artificio disponuntur & digeruntur. At hoc non probat logicā primariō & immediatē spectare simplices terminos (quod hic contendunt) sed logicam collativo & compositivo mentis actui insistentem, cumq; dirigentem notiones quasdam sibi fabricare, quibus tanquam instrumentis uti possit in simplicibus aliarum scientiarum subiectis limandis & disponendis. Aliud est autem simplicem mentis operationem dirigere & informare, aliud verò intellectus componentis auxilio instrumenta fabricare ad simplices terminos in aliis scientiis explicandum. Deinde parum hic est fundamenti ad trimembrē illam logicæ partitionem stabiliendam. Partitio enim sumi solet non ex externo obiecto, sed interno. Si ad posterius se divertant & dicant, logicam, quatenus simplicem animi operationem dirigit & informat, obiecta hæc completi, recurrunt superiores difficultates illam operationem à logicā dirigi non posse. Secundo, ut apertius loquar, obiectum illud, quod primæ illi operationi mentis, & primæ parti logicæ subiici intelligitur, vel in logicā tractabitur ratione Thematidis, vel saltē ad logicæ usum

usum supponetur . Prius si dicant, non amplius erit terminus simplex, sed collativus, quia erit relativus . Thema enim & argumentum sunt relatum & correlatum , quum thema sit quod arguitur , argumentum quod ad arguendum effectum est . Posterius si statuant, relabuntur in superius, & nihil aliud dicunt quā logicam falcem suam immittere in obiecta reliquarum scientiarum, quæ possint esse simplices termini: at interim in his alia est operatio logica, alia verò illa , quæ earum scientiarum est propria . Scientiæ enim solummodò proponunt simplices terminos prima intellectus operatione apprehensos ; Logica verò collativā & discursivā mētis operatione nixa terminos illos simplices disponit & ordinat; operationes verò istæ, utcunq; in usu logicæ, quatenus in externo obiecto occupatur, coniungi videntur, non ita tamen confunduntur, quin & logica suum, & Philosophia suum sibi vendicet peculium . Tertiò quod hi termini simplices nullo modo constitui possunt logicæ obiectum : vulgari admodum ratione constabit . Nam omnibus penè logicis in ore est perpetuum, logicam sibi suam fabricare subiectum : At hoc ergò intelligi volunt vel de Rebus ipsis , in quibus usus logicæ versatur, aut de Notionibus è compositione & collatione

one terminorum ortis. Non prius, qui res ipsæ ab intellectu non fabricantur, neq; aliquid perfectionis hauriunt ab ipso, sed potius intellectus è rebus. Tota ergo operatio & fabrica, quam sibi proponit logica, est in terminorū connexionē & collatione, & per consequens, simplicem rei apprehensionē non attingit, nisi (ut antea apperui) ex consequenti. Quarto è vulgari loquendi formulâ desumi videtur argumentum, Finis enim & scopus logicę videtur poni in usu rationis, quem per vocem differendi nonnulli exprimunt: At ratiocinari propriè non est tantum terminum simplicem apprehendere; quòd hoc æquè forsan stultis ac idiotis concedatur ac sapientibus: Sed terminos inter se conferre & disponere ad veritatem investigandam. Quòd si dicant ultimum quidem rationis actum in his terminis simplicibus non esse terminatum, hanc tamen notitiam esse præviam, & quasi præparatoriam ad completum rationis actum. Respondemus ex illis quæ diximus, terminos simplices ut absolute sumptos non spectare ad logicam, sed è Realibus scientiis petendos esse: Relati verò seu comparatè acceptos terminos esse compositos licet non ex aliis, tamē cum aliis, quia semper respiciunt correlatos. Quicquid autem ad logicam supponitur, tanquàm necessarium

farium hūc propriè non spectat. Quintò ex  
 explicatâ naturâ logicæ liquebit quid de eius  
 operationibus sentiendum sit. Quælibet logi-  
 cæ pars proponit sibi thema aliquod aut Ex-  
 plicandum, aut demonstrandum, aut Ordinân-  
 dum. In his tribus continetur totum Diale-  
 cticæ artificium. At neq; thematis explicatio,  
 neq; approbatio, neq; ordinatio sita est in sim-  
 plici terminorum Apprehensione, licet reve-  
 rà talis simplex Apprehensio supponatur ad  
 singulos: (supponatur inquam) remotè, & tan-  
 quàm alienum, ex aliis potendum, non proxi-  
 mè & immediatè tanquàm huius disciplinæ  
 proprium. Assumptum per singulas partes  
 exponetur. Primò enim explicare thema aut  
 materiam aliquam, non est thema illud sim-  
 plicitè apprehendere, sed primò argumenta  
 tanquàm terminos themati correlatos inve-  
 stigare, Secundò terminorum inter se connex-  
 ionem, & habitudinem explicare, ut tandem  
 integra evadat propositio. Ita in secundo Pro-  
 batio supponit, præter thema probandū, quod  
 semper est propositio, Primò, Inventionem  
 medii termini seu tertii argumenti, eiusdèq;  
 ad quæstionem habitudinem consentaneam,  
 vel dissentaneam. Secundò, Connexionem &  
 Dispositionem syllogisticare. Ex quo facilè a-  
 peritur eorum Logicorum error, qui existi-  
 mant

mant usum secundæ partis logicæ positum esse in explicatione terminorum, subiecti nimirum & prædicati : qui enim subiectum & prædicatum solummodo explicat, distinguit, & interpretatur, is primam tantum logicæ partem ad usum deducit. In secundâ verò docemur connexionem & coherrentiam inter has partes, quæ nititur Argumento tertio seu medio termino. Huius enim operatio non est explicatio, sed probatio, In tertio deniq; opere (posito simul themate ordinando) præstamus duo: primò propositiones & conclusiones scientificas scientiâ aut methodo digerendas & ordinandas. Secundò, formam methodi seu ordinis, quâ has conclusiones disponimus: istis iactis fundamentis logicæ distributionem sic instituimus. Partes logicæ duæ sunt, Synthetica & Dianoëtica. Synthetica, quæ mentis actum collativum, compositivum nimirum & divisivum dirigit. cuius pars quælibet, licet compositionem actualem præ se ferre non videtur, terminos tamen ad compositionem proximè ordinatos tradit. Thema quod huic parti subternitur, erit terminus quidam, qui in se, ut supponitur, simplex est, quatenus tamen explicandum proponitur, notionis secundæ rationē inluit, & tanquam instrumentum logicum tractatur. Huius thematis in primâ



ma logicę parte duo spectanda sunt, constitutio nimirum, & explicatio seu tractatio. Constitutio cernitur in doctrinâ categoriarum, ubi singula thematum genera explorantur. Tractatio seu explicatio duo præstat. Primò, argumentorum Inventionem. Secundò, Dispositionē. Inventio in locis topicis erit conspicua: Dispositio in propositionis fabricâ, & ita primam logicę partem habetis delineatam. Secunda logicę pars, nimirum Dianoëtica, erit vel Illativa, vel Ordinativa. Illativę parti subternitur, thematis vice, Quæstio, quæ semper est propositio quædam, quæ, ut fit, dubia quæstio nuncupatur. Huius quæstionis duo sunt exponenda, Constitutio nimirum, & Demonstratio seu probatio. In constitutione pollicemur omnia quæstionum syllogisticarum genera. Demonstratio seu probatio duo præstat, primò Inventionem mediî termini, secundò dispositionem & formam syllogisticam. Et ita absoluta suis finibus erit hæc pars logicę: ordinativæ verò logicę parti offertur obiectum methodo disponendum. In quo similiter duo sunt pensitanda, Constitutio & Ordinatio. Constitutio tradit omnia genera thematum methodo disponendorum, ut sunt speculativa, practica, naturalia, artificialia, & reliqua. Ordinatio duobus ponitur, primò in inveniendis &

& explorandis conclusionibus & propositionibus scientificis in scientiâ disponendis. Secundò, in formâ methodi, quæ ut ultima, ita maxima logicæ pars censi debet.

## DECAD. III.

## EXERCITATIO VIII.

*Nullum Accidens propriè inhaeret  
in subiecto.*

**S**Tatuunt Peripatetici nostri omne accidēs inhaerere in suo Subiecto: Ego verò nullum. Suspendite iudicium, & tollite præiudicium. Non diu defixos hic hære sinam. Conveniat primo inter nos & Philosophos nostros de nomine & acceptione Inherentiæ, ut non sine fundamento certo eorum convellam placita. Postulamus itaq; primò *Inherentiam esse quendam Inessendi modum quo aliquid imprimitur in subiecto*. Ponimus secundò tanquam fundamentum apud Aristotelicos certissimum: *Inherentiam hanc præcisè per se sumptam distinguì ab illo Inessendi modo quo effectus dependet à suâ causâ*: Hoc principium si quis in controversiam vocaverit, multiplici confirmatur ratiocinio. Primò, quia apud omnes

## EXERCITAT. VIII. 335

nes Logicos & Metaphysicos dependentia  
 subiectiva à causali distinguitur, & locus à  
 causâ & effectu distinguitur à locis subiecti  
 & adiuncti. Secundò, Effectus in suâ causâ nō  
 est actu & formalitèr, sed potentiâ & virtua-  
 litèr. Accidens verò statuitur esse in suo sub-  
 iecto actu & formalitèr. 3. Si accidens sit in  
 subiecto suo tanquàm effectum in causâ; tunc  
 vel tanquàm in causâ Efficienti, vel tanquàm  
 Finali, vel tanquàm Formali, vel Materiali. Non  
 est in subiecto, tanquam in causâ efficiente,  
 (iuxta Aristotelicos) 1. Quia effectus non di-  
 citur esse in efficiente actu, sed potius ab effi-  
 ciènte. 2. Efficiens, quâ efficiens, producit rem:  
 Subiectum tantum sustinet, aliquando aliundè  
 productum. Non est in subiecto, tanquam in  
 causâ finali, 1. Quia finis, quâ finis, non susti-  
 net. At subiectum sustinet accidens. 2. Finis  
 est causâ, propter quam res est. At Accidens  
 est propter subiectum, non subiectum prop-  
 ter Accidens. Deinde non inest tanquam in  
 causâ materiali. 1. Quia res non in materiâ;  
 sed ex materiâ constare dicitur. 2. Materiæ,  
 quatenus propriè sumitur pro materiali cau-  
 sâ, pro effectu respondet materiatur. At sub-  
 iecto, quatenus materialis causâ statuitur ac-  
 cidentis, nullum respondet materiatur.  
 Maior est clarissima; quia causâ & causatum  
 se

se mutuò ponunt & tollunt. Minor confirmatur, vel enim materiatum hoc eiset accidens ipsum, vel aggregatum ex subiecto & accidenti. Non est accidens ipsum, quia sic subiectum eiset pars essentialis sui accidentis, quod absurdum. Nam sic accidens & substantia eiusdem essent prædicamenti. Consequentia prioris demonstratur. Nam causi materialis est essentialis eius rei cuius est materia. Non est aggregatum ex subiecto & accidenti. Primò, quia aggregatum non est aliquid unum distinctum à subiecto & accidente. At verò materiatum à materiâ distinguitur. Secundò, si totum illud aggregatum sit materiatum, tum subiectum non verè diceretur materiâ sui accidentis, sed potius totius illius collectivi. Denique subiectum non est forma accidentis. Primò, quia nihil dicitur esse in suâ formâ: At accidens dicitur esse in suo subiecto: Secundò, forma est pars quædâ essentialis formati. At subiectum non est pars essentialis sui accidentis. Ex his liquet inhaerentiam esse modum quandam inessendi apud Peripateticos, quo accidens dependet à suo subiecto dependentiæ genere à causali distincto. Quod sic strictius colligemus. Aut accidens inhaerendo dependet à suo subiecto aut non: Si non dependeat, tum sine subiecto esse

esse potest: Si dependeat, tum vel tanquam à causâ, vel tanquam aliquo à causa distincto. Non prius, uti superius demonstravimus: Ergo posterius. His prius explicatis & demonstratis, duo conficiemus: primò talem Dependētiā per naturam dari non posse. Secundò specialiter nulli accidenti competere. Primū sic stabilitur. Omne dependens accidens est à causa, aut non: causa: At neutrum est verum. Ergo. Divisio maioris est clarissima ex oppositione contradicentium terminorum, qui non admittunt medium. Minor probatur quoad utramq; partem, Non est hæc dependentia accidentis tanquam à causa, quia hoc contra hypothēsim. Non est tanquam à non-causa. Primò quia sic accidens à subiecto dependeret, vel secundum suam productionem, vel secundum constitutionem, vel saltem secundū conservationem. At omnes hæ dependentiæ sunt à causa. Ergo Nulla est omnino quæ non est causalis. Partes singulæ sunt apertissimæ, quia productio & constitutio à causis dependent: illa à productivis, hæc à constitutivis. Conservatio etiam est causæ conservantis actus: Conservans autem causa inter efficientes enumeratur. Quare dependentiam separare à causis est idem seponere à seipso. Deinde alteram partem confirmabimus, accidens non in-

Y

hære,

herere, sed potius esse à subjecto suo tanquam à causa efficienti, ut non opus sit novum dependentiæ genus constituere. Si Accidens emanet à suo subjecto, tum subjectum est ejus causa efficiens: At accidens emanat à subjecto. Consequentia est clarissima, quia illud à quo fit emanatio, est causa ejus rei quæ emanat. Nam efficiens apud Logicos & Metaphysicos distribuitur in efficientem per Emanationem, & efficientem per Transmutationem: Quod ulterius confirmatur: Omnis actio & operatio est à causa. Nam operari & agere est causæ actus. At emanatio est operatio. Minor superioris syllogismi confirmatur, quia apud Aristotelicos accidens educitur è materiâ. At hæceductio nihil est aliud quam Emanatio. At dicent (opinor) hanc educatione è materia non esse per fluxum aliquem continuum è subiecto tanquam à causa efficienti, sed quandam esse Resultantiam & concomitantiam, ut quidam exponunt. Sequar ego adversarium. Vel hæc qualiscunq; resultantia formæ accidentalis est in momento, vel in tempore. Non in momento, quia omne accidens producit per motum: Nullus autem motus est in instanti. Deinde si productum sit accidens huiusmodi in instanti, tum vel omne Accidens, vel aliquod tantum: Non omne accidens,

cidens, quia multa sunt accidentia in fieri & fluxu, quæ continuè generantur. Nam primò exempli causâ *Actio*, quæ omnium calculo est accidens, in subiecto inherere non deprehenditur: vel enim inhaeret prout fuit ab agenti, vel ut in patienti imprimitur. Non prius, quia sic vel esset in agenti, vel in patienti, vel in medio. Non in agenti, quia ab hoc est, non in hoc. Quod si esset, non esset in eo formaliter, sed virtualitèr. At omne accidens suum subiectû formaliter afficere creditur. Deinde nō in patienti, quia sic in patienti imprimetur. At hoc contra thesin, quia concipimus hic Actionē, quatenus est in fluxu. Consequentia patet, quia inherere propriè est alicui subiecto imprimi. Deinde non est in medio, quia quùm agens & patiens sint contigua, mediû non admittunt. Tandem actio, quatenus imprimitur, si dicatur patienti inhaerere, dicimus non ampliùs actionem esse, sed Qualitatem. Nam calefactio, quùm iam in subiecto imprimitur, calor est. Actio namq; non inhaeret in subiecto. Quod etiam de singulis illis fluentibus iudicandum. Quippe nihil sunt aliud quàm certus agentis effluxus & operatio, quæ propriè non inhaeret, sed à subiecto tanquàm causa procedit. Quid obstat autem talem singulias accidentibus inesse naturam, ut tota in sui ra-

tionē habeant in fluxu constitutam? Vel enim oppositum colligimus intellectu aut sensu. Si ab intellectu, tunc proculdubio prius illud sensui subiiceretur iuxta Aristotelē, qui nihil intellectui subesse voluit, quod non prius erat sub sensu. Non sensu; quia fluxus & permanētia non sunt proprium sensus obiectum. Deinde effluxus à subiecto, quum in tempore absolvatur imperceptibili, quis ita acutus, ut motum eius persentiscat? Lumen è sole ad terram radiis emissū oculo sentimus. Eius tamen motum instantaneū quis unquam animadvertit? Equis est igitur, qui lumen astrueret esse accidens in aëre permanens & impressum? Haud absimili ratione colores corporum superficie apparētes visu percipimus, at successivum eorum motum à centro in illam superficiem ob temporis pernicietatem aut cōtinuitatem eius qualitatis sic perpetuò scaturientis sentire penitus est impossibile. Quod autem colores sint fluores perpetui faciliè demonstratur ex varietate florum. Experimur enim flores primo colore viridiori indui, deinde paulatim magis magisque in alium colorem, videlicet flavum rubicundum, aut cœruleum degenerare. Hac autem colorum mutatio est vel ab Extrinsicco principio, vel ab Intrinseco. Non ab extrinsicco, quia varietas hæc est



est naturalis florum affectio. Naturalis autem affectio omnis ab intrinseco principio oritur: Si ab intrinseco, sit necessario ob id, quod perpetuo effluit ab intrinsecâ eius formâ: mutatâ autem forma intrinsecâ, adeoque temperamenti formâ, colores mutantur, ut non iidem sint penitus cum illis prioribus, sed pro ratione materiæ variati. Quod si color permanens esset in subiecto colorato, nihil omnino obstarret, quominus colores illi primi permanerent & reliquos de novo ortos impedirēt. Obiicerent hîc, corpus coloratum esse densius quàm ut, effluentes à centro colores transmittere possit. Respondemus quidē subiecti Densitatem radios Externos & Ingrediētes inhibere & impedire, non quidem Exeuntes: quia omne impedimentum est in superficie densa: at quàm omnes partes corporis lucidi sint Homogeneæ & uniformes, suâ continue unitate nulla erit superficies. Ex his liquet nonnulla saltem accidentia esse fluentia, & non in subiecto esse, sed à subiecto. Nec impedit aliqua causa, quin hoc omnibus aliis ascribamus. Certas enim Emanationes ponimus esse, quæ ab agenti & causâ dependent, at in nullo subiecto ita sunt impressæ & fixæ, ut inharere dicantur. Nam inharere iuxta nomen significat aliquid desigi & imprimi, ut fluentibus sine absurdo ea vox quadrare non possit.

## EXERCITATIO IX.

*Unius corporis simplicis non est unicus  
simplex motus.*

**N**IHIL novi in toto Philosophiæ syntagmate quod minori difficultate diglutiunt Peripatetici, quàm hoc Aristotelis Axioma: *Unius corporis simplicis unicum esse simplicem Motum.* Ex hoc enim tanquàm ex fundamento certissimo eruere conantur Numerum, tum elementorum, tum cœlestium orbium. At quàm fragili fundamento enixa est vulgaris hæc Philosophia, facilè intelligent perspicatiores, ubi Recentiorum experimènta paulò diligentius introspexerint. Si enim (quod prædicant) pro comperto habeant unius corporis simplicis unicum simplicem esse Motû, tum vel Sensus & Experientia deprehendit rem sic esse, aut saltem Ratio dicat Ré aliter se habere non posse: quicquid enim à nobis cognoscitur id se prodet potissimum Inductione vel Demonstratione: Quarum illa à Sensibilibus ad Intelligibilia: hoc ex Intelligibilibus descendit ad sensibilia. At unius simplicis

plicis unicum simplicem esse motum, nec Inductioratum facit nec Demonstratio: Si enim tale quippiam diceret experientia, radices agat hac Inductio, vel in corporibus *Simplicibus* vel saltem in corporibus *Mixtis*, quæ ex simplicibus componuntur. Non in Corporibus simplicibus: sic enim vel in cœlestibus, vel subcœlestibus seu elementis: At verò in cœlestibus nullum suppetit experimentum ex quo talis Affectio demonstretur. 1. Quia si plures in cœlis uniûs corporis simplicis motus non inveniâtur, nihil tamen impedit quominus plures esse possint: cum motus cœlestium corporum plurimi, tam ob maximam & ingentem magnitudinis molem, quam ob immanem à nobis distantiam sese nobis non produnt. Nulla itaq; firma hîc consequentia: Vnius cœlestis corporis simplicis unicus tantum motus simplex à nobis sentitur: Ergo plures illiûs motus per Naturam, aut non sunt aut non possunt esse. 2. Experientia dicitur uniûs simplicis Multiplicem esse motum; Primo enim, fatente vulgarium Philosophorum Scholâ, cœli stelliferi seu Firmamenti multiplex esse motus deprehenditur: gaudet enim juxta illorum principia. 1. *Motu Diurno* ab ortu in occasum. 2. *Motu tardissimo* ab occasu in ortum. 3. *Motu Trepidationis* ab Austro

in septentrionem, & è converfo: 4. Huius vice Recentiores alium superinducentes orbem duplicem introduxerunt motum *Librationis*: Ita ut in uno orbe quatuor distincti motus reperiantur: Peripatetici hæc omnia diffilare se posse arbitrantur, modò statuant motuum plurium in eodem orbe inventorum unum solummodò esse *Proprium & Naturalem*: respectu huius orbis reliquos omnes esse *Mutuos* seu *Ascitios* à superioribus orbibus communicatos: At hæc responsio nec principiis suis, nec aliorum quasitis satisfaciat. 1. Quia supponunt orbium realium se mutuo pellentium concamerationem multiplicem & infra & supra sit mamentum dispositorum, quarum omnium absurditatem inferius in aliâ Exercitatione aperiemus. ut non sit opus novâ quâdam repetitione. 2. Ex concessis adversariorum recentiorum iunctis experientie non difficile est demonstrare in eodem corpore simplici cœlesti multiplicem inveniri motum, idq; in planetis illis tribus Iovis, Solis, & Lunæ. Non negabunt enim Peripatetici singulis hisce planetis motû quendam competere circulare quo progredientibus ipsorum centrâ tota Tellus ambiatur: At præter motum istum centrorum in Iovis & Solis Planetis, alium Motum adinvenierunt Recentiores

ores Astronomi, quo stelle ipse super suis propriis Polis ac Axibus circumgyrentur: Cuius inventioni facem prætulit admirandum illud perspicillum non ita pridem inventum à Galilæo. Tantum autem abest ut de veritate huius experimenti dubitent, ut certum huic motui calculum & periodos assignare non vereantur: quæro hinc, utrum motus iste Planetæ circa suos Polos & Axem sit per se & Naturalis, vel Communicatus & per Accidens. Si dicant esse proprium, nostras agunt partes, & dicant necesse est unius corporis simplicis non unicum esse motum simplicem, sed plures: Quippe motus centri circa terram & motus stellæ circa suum centrum non unicus sed plures sunt motus. Si aliunde Communicatus sit motus iste, Communicabitur proculdubio vel ab orbe superiori, vel ab orbe suo in quo defigitur: Non superiori, 1. Quia si talis omnino daretur orbis realis, qualem hic supponunt, talē motum in se non habet: orbis autem omnis non communicat motum nisi suum. 2. Diverso gaudent centro stellæ istæ Iovis & Solis, ab orbibus istis à quibus motus iste est communicandus: Quare somnari non potest, quomodo talis fieri possit comunicatio. Non habet talem motum Sol & Iupiter à suo orbe: quia hoc modo iuxta principia communia non moveretur


moveretur nisi ad motum sui orbis: At motus ille totius orbis non potest esse idem quo stella ipsa super suis polis movetur: Quare admittamus necesse est duplicem hunc motum, alterum quo centrum stellæ motu suo totam telluris sphaeram circumambiat: alterum quo Planeta ipse circa suam Axem convertatur: Idem observare licet in Lunâ ipsa; quod ratione sic facile colligitur. Videmus ex eisdem Lunæ maculis nobis semper obversis eandem Lunæ faciem & medietatem Telluris incolis semper obverti. At hoc fieri nullo modo potest admissis vulgarium Astronomorum principiis nisi Motum Lunæ largiamur convertibilem, quo poli eius situm suum permutent. Statuunt enim Astronomi ferè omnes Lunæ stellam præter circulum quem circa Tellurum conficit, certum sibi vindicare Epicyclū quo modo ascendat altius, modo infra deprimatur. At hoc posito, nisi alio motu convertibilis sit fieri non poterit, ut eandem semper nobis faciem obvertat, sed aliam atq; aliam: At easdem semper Lunæ maculas intuemur sive Luna in Apogæo constituatur, sive in Perigæo: Quare præter motum totius Lunaris orbis, & motum Epicycli specialem, admittant necesse est alium quendam motum seu Affectionem Poli Lunaris convertibilem, ex quo

quo fit ut Luna Terrestrem orbem eodem  
semper vultu respiciat. Vnde concludimus in  
cœlestibus corporibus non confirmata veri-  
tatis esse hoc principium Peripateticū; Vnius  
corporis simplicis unicum esse motum sim-  
plicem. Locus exigit secundus ut deficere de-  
monstremus hanc propositionē in elementis  
adeo ut in uno plures motus inveniatur. In-  
stantiam nobis largiantur duo elementa *Aë-  
ris & Aqua*: Aër enim præter motum illum  
quem adscribunt illi Ascensus, motum sibi  
vendicant multiplicem. ut modo descendat ad  
puteum aut fossam implendum, modo in ob-  
liquum seu transversam partem torqueatur,  
ut cum per foramen aut Fenestras alicujus  
domus intromittatur: Quæro hic utrum mo-  
tus iste Violentus sit aut Naturalis? Motum  
*Descensus* non esse violentum sed Naturalem  
suprà speciali quâdam exercitatione demon-  
stravimus, ut non opus sit eiusdē repetitione.  
De motu Aëris in obliquum idem penitus e-  
rit iudicium, cum non occurrat Agens aliquod  
Externum à quo urgeatur: Quod si fateantur  
adversarii motus hosce esse Naturales, cedant  
nobis (opinor) eiusdem simplicis Aëris plures  
esse motus, quod contendimus. Deinde in A-  
quâ, Elementorū altero, plures inveniri mo-  
tus non difficile est demonstrare: De *Fluxu &  
Reflexu*

*Reflexu* Maris nihil dicam, quia motum hunc externis causis ascribunt Philosophi: quorum placita refellere non possum nisi novam ingrediar provinciam; eamque multò ampliorem quàm postulet exercitatio: puto tamen illos Philosophos in minores coniici angustias, qui motum istum Maris Reciprocum volunt esse Naturalem & proprium; quàm qui huiusce causas in externa retulêrunt. Deinde in alium locum remitto motum illum Maris circularem. Quem Nautæ peritissimi ex variis experimentis adinvenêrunt: tum quòd experimenta varia sint & incerta; tum quòd causa externæ, nimirum primò mobili, adscribunt: Interim præter prædictos istos motus, tres in Aquâ motus clarissimè se produnt: Primus est motus ad centrum seu deorsum, quem omnes uno ore Peripatetici profitentur: Secundus est motus conformitatis, quo guttulæ in arenam incidentes, ad rotunditatē se conformant & conglobantur: quem motum Naturalem esse & non violentum, in superiori quâdam exercitatione demonstravimus. Tertius accedit motus diffusionis quâ Aqua in planum illapsa undique in orbem se diffundit. Quis enim non sensu experitur Aquam in tabulam quandam planam fusam, sese in latum non ampliare & diffundere orbicularitèr in omnem



omnem partem. Supponamus enim, exempli causa, Tabulæ planæ impositum esse aquæ



sphæram, cuius Diameter sit  $ER$ , necessarium est ut hæc sphæra se diffundat in latum ut amplietur: vel enim sine motu aliquo consistet hæc sphæra, vel saltem movebitur: Non quiescet & consistet omnino sine motu. 1. Quia hoc modo Aqua non semper petet decliviorē locum: quod contra illorum placitum, qui volunt Aquam remotis omnibus impedimentis semper descendere. 2. Si sic sphæra aquea quiesceret: consisteret in puncto: Circulus enim & sphæra non nisi in puncto tangunt planum aut rectum. 3. Experientia testatur satis Aquam sic mensæ impositam non consistere, sed ad aliquos limites se extendere. Tandem si moveatur hæc sphæra aquea, tum vel omnino perpendicularitèr, vel in obliquā partem. Prius non est admittendum: descenderet enim perpendicularitèr vel pars media vel extremi termini: Media pars non descendit

dit, sic enim concederetur vel Penetratio vel Cessio localis: cum enim totum spatium inter E & R, Aquâ plenum sit, oportet necessario ut vel aqua superior invadat inferiorem & ita sit penetratio, aut saltem Aqua inferior cedat superiori. Non prius: quia Penetratio corporum apud omnes negatur: Si detur cessio tunc aquæ pars inferior se diffundit in latum, aut saltem condensatur: Si diffundat se, erit talis diffusionis motus qualem astruimus: Non condensatur, 1. Quia talem condensationem nusquam experimur. 2. Quia condensatio fit ab externo Agenti discreto & disjuncto: At Aqua superior cum inferiori cedit in unum continuum. Quare impossibile est, ut centrû sphaeræ sic descendat. Deinde si dicant extremas partes descendere perpēdicularitèr, non minores difficultates consequuntur; 1. Quia sic figura aquæ, sic in Tabulâ se dilantis, esset mixta ex Rectilineâ & Curvilineâ: ut partes à latere utroq; essent planæ, suprâ sphaericæ: At contrâ affirmant omnes Peripatetici, figuram Aquæ per se consistentis esse sphaericâ. 2. Experientia nihil tale testatur. Relinquitur ergò motum esse quendam Aquæ quo in obliquum se diffundat. Quæro iam utrum Motus iste Aquæ sit Naturalis vel violentus: si Naturalis, tum est idem cum Descensu vel diversus:

fus: Non est idem quia motus isti duo sunt ad  
 diverſos terminos, & diverſis Lincis mentu-  
 rantur. Si diverſis, ergo duo erunt aquæ mo-  
 tus Naturales, alter *Deſcenſus*, alter *Diffuſio-*  
*nis* in obliquum, & ita uniûs corporis ſimpli-  
 cis plures erunt diſtincti motus, quod hi ne-  
 gant & nos contendimus. Deinde non eſt mo-  
 tus iſte violentus. 1. quia nulla huius motûs  
 violenti cauſa externa aſſignari poteſt: vel e-  
 nim eſſet ab Aëre, vel ſaltem Aquæ illius pars  
 ſuperior vim exerceret in Inferiorem, vel à  
 Tabulâ planâ in quam illabitur: Nihil enim  
 aliud eſt quod cōtactu ſuo vim inferat Aquæ:  
 Non eſt viſ hæc ab Aëre. 1. quia improbabi-  
 le eſt Aërem cū corpus ſit admodum tenue  
 vim exercere poſſe in Aquam, quæ corpus eſt  
 multò ſolidius. 2. Si Aër pelleret Aquam ut  
 deſcenderet & ſe diſſunderet, tunc aër neces-  
 ſariò deſcēderet. At omnes Peripatetici, cū  
 ſtatuant Aëra eſſe levem, negant naturalitèr  
 deſcendere. Deinde Aquæ ſuperior pars non  
 vim infert inferiori. 1. quia nullum Agens  
 Naturale vim infert ſibiipſi, cū nihil molia-  
 tur ſui interitum ſed potius conſervationem  
 meditatür: partes autem hæ Aquæ, cū con-  
 tinuæ ſunt, in unum homogeneous coaleſcunt.  
 2. quia omne Agens violentum debet eſſe a-  
 liquod externum & à patienti diſjunctum:  
 quare

Quare non potest esse aqua illa superior: Deniq; non potest esse à mensa. 1. Quòd mensa illam aquæ partem non tangit. 2. Tantùm aquæ sic diffusæ passivè se subiicit & non agit & si quicquam agat, agit aquam retundendo & reverberando, ut diffusionem talem non omninò moliatur. Quare concedant nobis adversarii necesse est, hunc motum esse naturalem & non violentum. Et per consequens eiusdem Aquæ plures esse motus Naturales: At obijciant forsan hîc adversarii ex sententiâ nostrâ in exercitatione quartâ de figurâ Aquæ motum hunc esse violentum & non naturalem. Respondemus ut antea; duplicem esse naturæ Intentionem, primariam & secundariam. Ex priori naturæ Intentione Aqua descendit ad Centrum, per lineam perpendicularem seu Circuli radium. Sed cùm ita sit à Naturâ comparatum, ut omnes partes per rectam descendere non possint, faciunt id quod possunt. Quare fit, ex secundariâ Naturæ Intentione, ut paulatim se diffundant partes Aquæ, ut hoc modo centrum suum & viam convenientius assequantur. Nihil itaq; impedit quominus motus iste ex secundario Naturæ scopo dicatur naturalis. Ex his liquet nullum occurrere experimētum in Simplicibus corporibus quominus eiusdem plures admittantur motus.

motus. Sed ex alterâ parte multa suffragari  
 quæ nostras partes confirment: superest jam  
 ut demonstremus ex Mixti constitutione plu-  
 res unius simplicis formæ motus esse conce-  
 dendos. Inter Mixta occurrit Magnes corpo-  
 rum omnium Epitome, & quasi totius Natu-  
 ræ compendium. In quo plures motus inve-  
 niamus, alios elementares, alios (ut appellant)  
 magneticos. Ex quibus suppositis sic licet ar-  
 gumentari: Si forma aliqua simplex Causa ef-  
 fe possit diversorum motuum tum nihil im-  
 pedit quominus Corpus aliquod simplex esse  
 possit diversorum motuum subiectum: Ratio  
 enim quare negant eidem simplici corpori  
 diversos motus, est quia existimant omnem  
 formam simplicem ad unum motum esse de-  
 finitam. Siquidem formæ simplicitatem ex  
 motûs simplicitate solent deducere: At ve-  
 rò forma in Magnete simplex, causa est pluri-  
 tum motuum: Hoc enim si negatur, dicant ne-  
 cessariò aliquid horum trium: vel plures om-  
 ninò non dari: motus vel saltem horum cau-  
 sam non esse Magnetis formam: vel saltem  
 formam magneticam ex quâ procedunt tales  
 motus non esse simplicem. Primum non di-  
 cent, quia experientia monstrat plures mag-  
 netis esse motus. Primò enim, descendit ad  
 ductum prædominantis elementi; deinde mo-

tum sibi vendicat *Coitionis, Directionis, Variationis, Declinationis, & Revolutionis*: De quibus suprà egimus. Porro non dicent hos motus non procedere à Forma Magnetis; quia omnes prædicant motus istos esse Naturales. Omnis autem à forma procedit Naturalis motus. Vitimò, si dicant motus istos Magneticos procedere non à formâ aliquâ simplici, sed à formâ Mixti, haud minores difficultates contraveniunt. 1. Quia mixta omnia iuxta Aristotelem & eius Interpretes sequuntur motum prædominantis elemēti, ut nullus omninò sit motus mixti nisi illius Corporis quod prævalet: omnis itaq; motus huiusmodi erit, vel sursum ad ductum Aëris & Ignis, vel deorsum vincenti Aquâ vel Terrâ: At nihil tale experimur in motibus Magneticis, ut præ cæteris apparet, in motu Directionis Magneticæ, in quo Acus Magnetica non sursum aut Deorsum tēdit, sed ex alterâ parte in Boream ex alterâ verò in Austrum. 2. Huiusmodi motus iuxta Doctrinam Aristotelis non possunt dici mixti: Mixtus enim motus componitur ex prædictis simplicibus motibus, nimirū *A medio, Ad medium & Circa medium*; at talis motus cum hisce Magneticis nullo modo potest coire. Vel enim hoc modo motus rectus, concurrat cum recto; ut motus sursum

sum cum motu deorsum; aut saltem motus rectus cum circulari. Non prius; quia sic aut uterq; motus esset eiusdem impetus, aut alter alteri præponderaret. Si prius contingeret, nõ esset motus sed quies; cum nulla ratio assignari possit, quare corpus illud mixtum superius quam inferius moveretur: si alter vinceret, tum moveretur vel sursum, vel deorsum, & ita ductum sequeretur predominantis elementi: At talis (ut dixi) non concidit cū motu aliquo Magnetico. Non potest esse concursus recti cum circulari; quia quæ concurrunt ad constitutionem magnetis sunt tantum corpora elementaria & non cœlestia: At motus circularis circulo mensuratus proprio cœlorum est Affectio. 2. Circulus cum recta non miscetur; neq; communi aliquā proportionē gaudet, cum in solo puncto se possint tangere; prout tradunt Geometræ: Quare talis motus Magneticus ex Aristotelicis principiis non potest dici mixtus. Interim non negamus multos hos motus dici posse, quatenus in corpore mixto sunt tanquam in subiecto; à formâ tamen multi non procedunt; utpote quæ non ex crassi quatuor elementorū oriuntur, sed ex universali corporum Magneticorum quasi Animâ, quæ reverà simplex est. Nihil minus tam corporum mixtorum est domina quam

Z 2

simplicium

simplicium, quod ex multis cœli motibus constabit, qui Magnetici esse à Doctissimis prædicantur. Ex his liquet ex sensu & experientia demonstrari, potius plures concedendos esse motus corporis simplicis quàm unicum. Superest iam, ut discutiamus utrùm ratio aliqua dicat oppositum, nimirum simplicium unicum esse motum. At rationem contra nos non stare, sed potius nostras tueri partes confirmabimus. Quia ratio omnis debet sequi ductum experientia, cum res sint mensura Intellectus: Intellectus autem minimè rebus ipsis dominetur: At experientiam nobis suffragari in superioribus ostēdimus, ut non habeat ratio aut syllogismus quod opponat, præter jejunas quasdam argutias, ex notionibus anticipatis Intellectuq; illaqueato editas.

2. Si ratio aliqua nobis hâc ex parte contradicat, tum fundamentum habebit, vel in causa horum motuum, vel in subiecto (hoc est, quia simplex forma non potest multos motus edere) vel quia simplex corpus, ut subiectum, nō potest sustinere: At neutrum constat: si enim una forma statuatur unicum solūmodò motū producere; dicimus, 1. Hoc nobis innotescere vel à priori, vel à posteriori: non à priori; quia formæ ipsæ non nisi ex effectibus, & à posteriori nobis innotescunt. Omnia enim cognoscuntur



cuntur primùm à sensu: non à posteriori; quia (ut ostendimus) in plerisq; experientia dicitur contrarium. 2. Simplicitas hæc formæ non plurium motuū obsistit multiplicitati. 1. Quia formæ elementorum formis multò simpliciores, ut Animæ, producant plures motus: Ergo motuum multiplicati non contradicit formæ simplicitas. 2. Certissimum est formam simplicis corporis producere plures motus alterius generis, ut constat ex Aquâ quæ frigidificat & humectat: quid igitur obstat quominus plures producat motus locales, præsertim cum minori molimine ex formâ producantur duo motus locales, quam reliqui motus, cum hi motum localem necessario supponant: Hic verò reliquos non requirit. Deniq; nihil impedit quominus corpus simplex ut subiectum sustineat plures motus. Si enim nō sustineat, hoc fieri necessario, vel quia prorsus sunt oppositi, vel quia ita incompatibiles sint, ut simul non possint consistere: At neutrum obtinet. 1. Ad multiplicatam motuum in uno corpore simplici non necesse est ut dicamus hos motus esse oppositos, possunt enim esse subordinati. 2. Si oppositi statuuntur, nihil tamen impedit quominus in eodem subiecto sint, modo sit in diverso tempore. Nihil enim obstat unum & idem corpus in diverso

tempore esse calidum & frigidum, multò minùs diverso tempore diversos & oppositos motus sustinere. Tandem nihil repugnat quò minùs duo diversi motus, modo non sint oppositi consistant simul in eodem subiecto: hec enim incòpatibilitas oriretur vel ex luctà motuum inter se, vel ex habitudine subiecti: prius non est admittendù; quia ex These non sunt oppositi sed diversi: Lucta autè inter opposita solummodo conspicitur. Non ratione subiecti, quia utriùsq; capax est motùs per Naturam, quum forma (ut diximus) illud largiatur. Quare concludimus; *Unius corporis simplicis plures esse motus*, experientiam confirmare, & huic Rationem nullatenùs contradicere.

## DECAD. III.

## EXERCITATIO X.

*Phænomena Cælestia reiectis orbium Hypothesibus sex tantum circulis  
salvantur.*

**R**ecentiorum Astronomia orbium feracissima: seculi certè est hoc nostri, ut ad multiplicandù entium genera sunt paratiores  
quàm

Quàm ad investigandum: ut ubi salvandis observationibus deficiant hypotheses, ibi intellectus de suo expromat gazophylacio, & quàm non invenit, fingat in rebus harmoniam. Hinc orbium cœlestium numerus Aristoteli & Antiquioribus, quam natura dederit, locupletior, curiosâ nimis recentiorum vanitate quotannis evadit auctior, ut ex octo tantum relictis ab Antiquioribus undecim Neotericis producatur: & adhuc multo verendum est, ne numerus iste progressu temporis in infinitum excrescat, si veterum sine mutatione Hypotheses admittantur. Ego certè ut multiplices illas orbium concamerationes, non tam directoria, quàm ingeniorum carnificinas amputem, statuo Antiquioribus non tantum numerum orbium plus quàm par est abundasse, sed & ordinem quo minus recentioribus satisfaceret apparentiis, defecisse. Quare contentam sex tantum admittendos esse in cœlo orbes, ex quibus melius satisfactum iri credo Phænomenis, quàm ab illis qui plures introducerent; in quo præstare conabor duo: primo demonstrabo, *Absurdas esse & falsas illas quibus vulgares usi sunt Astronomi Hypotheses*. Secundo, nostræ Diatyposeôs partes tam in numero quam ordine orbium explicabo. Primum ut aggrediar, duo sese nobis offerunt inventa ab Astronomis cœlestis ma-


china syntagmata, Ptolomaicum & Novum: Ptolomaicum appello vulgare illud ex ruderebus Aristotelicis primò inventum, opere postea Ptolomei, Alphonsi, Clavii, & Magini auctius, in quo Terram constituit centrum fixum & prorsus Immobile. Inter terram verò & cœlum duo elementa Aëris & Ignis collocant: tum planetas septem, videlicet Lunam Mercurium, Venerem, Solem, Iovem, & Saturnum destinatis suis orbibus constituunt, qui terram circumambiant. Supra septem verò istos planetas stellis fixis assignant locum, quibus alium orbem destinant. Hucusq; progressus est Aristoteles, in quibus non dissentit ab hisce predictis recentioribus, nisi quòd Soli locum immediatè supra lunam concesserit, quem hi omnes in medio Planetarum collocant. Hisce Ptolomeus (ut ex ejus scriptis colligunt Astronomi, licet non expressè) orbem adjecit nonum: hisce postea Alphonsus Decimum adjunxit, Clavius & Maginus undecimum: Quantæ verò absurditatis conscia sint hæ Hypotheses paucis ostendam, idq; non tam ex Mathematicis, (in quibus fateor inscientiam) quàm ex ipsis naturæ principiis. Inprimis itaq; supponant necesse est, cœlum esse corpus aliquod durum & instar Chrystalli solidum, in multos orbis scissum: Per hos autem

rem orbes non circulos intelligunt imaginarios, in quibus cursum suum conficiunt stellæ, sed materiales, reales, & cœli partes, quarum partes ipsæ densiores sunt stellæ, quæ ex materiæ coactione & constipatione fieri intelliguntur. Iam tales orbes materiales & reales in cœlis nõ esse admittendos multiplici confirmabimus ratiocinio. Nam primò: Si stellæ in suo fixæ orbe moveantur, fieri non potest, ut modò sint celsiores modò humiliores, modò maiores appareant, modò minores, sed ubiq; aspicerentur æqualis distantie & apparentiæ: quælibet enim pars in orbe fixa, ad motum illius orbis movetur æquabiliter, ut suum in orbe situm permutare non possit. Planetas verò omnes ascendere & descendere, ut modò in Apogæo sint, modò in Perigæo, quis Astronomorum non experitur? Astronomis hæc vulgatis in promptu est respõsio, singulos planetarum orbes in certos dissectos esse orbes *Excentricos* & *Epicyclos*, ex quibus probabiliter reddi potest causa cur planetæ ascendunt & descendunt. At hæc responsione difficultatem non tollunt. Primò, quia utcunq; statu-ant stellam altiùs ascendere & descendere ratione sui orbis excentrici, non tamen hinc evincunt extra suum orbẽ totalem evagari, ut invadat alterius pomeria. Orbes enim omnes

nes Excentricos & Epicyclos nihil aliud esse volunt quàm orbis totalis partes illiùs limitibus interclusas. At certum est ex observatìonibus peritissimorum Altronomorum Planetas aliquando commutare locum, ut altitudine suâ se superent mutuò & superètur, quod liquidò constat ex Tichonis Braheï experimentis, qui Martis stellam modò suprâ modò infra Solem collocatam deprehenderit: quod etiam de Venere, & Mercurio observârunt alii: Vnde Copernicani circa Solē moveri statuerunt. Secundò, tales orbis Excentricos & Epicyclos, modò reales & materiales in cœlis statuuntur, improbabilis esse, & penè impossibiles, demonstrare non est difficile. Ex Theoriâ Solis tanquàm ex notiori incipiam. Huic tres assignant orbis partiales, medium excentricum simpliciter, duos verò excentricos (ut vocant) secundum quid: singulis autem suum peculiarem assignant motum: quæro hîc utrum extremi illi orbis excentrici eodem motu moveantur *Æqualiter*, aut *Inæqualiter* & diverso motu. Non inæqualiter moventur. Hoc enim fieri non potest sine corporum penetratione. Consequentia est clarissima: quia in utroq; orbe alteram partem statuunt esse spissiorē alteram verò rariorem: unde in motu parti alterius crassiori respondeat pars alterius

rius

rius rarior : quod si inæqualis esset iste motus fieri non potest ; quia Spissitudo huius illius crassitiem invaderet, & ita duorum corporum ex These solidorum mutua esset penetratio; quod à naturà alienissimum . Non moventur eodem & æquabili motu: sic enim *Excentricus secundum quid* supremus suum inferioribus motum communicaret, vel saltem ipsi motum per se vendicant & motum suum à superioribus non accipiunt, si communicetur motus superioris inferioribus, tunc communicetur necesse est prius medio seu *Excentrico simpliciter*, quam *infimo*: Omne enim Agens prius agit in medium, quàm extremum, medium autē orbis talis motus non est particeps; 1. Quia cum præter motum istum à superiori communicatum, alterum sibi proprium vendicet, certum est orbem istum duos habere motus : quæro hinc utrum motus isti tanquam duo distincti maneant in hoc Orbe, vel saltem in unum tertium & Mixtum coalescant? Non prius : quia cum motus isti duo statuatur esse ad eundem Terminum, erunt ad eundem Terminum motus duo, quorum alter sit velocior, alter tardior simul in eodem orbe, quod penitus est impossibile: sit enim Exempli causa orbis in quo absolvendi sunt duo isti motus A B C D, Supponamus Doctrinæ causâ



causa motum alterum altero duplo esse velo-  
 ciores. Deinde supponamus punctum A u-  
 troq; simul motu esse motum: moveatur ergo  
 priori motu, utpote tardiori, A in B: movebi-  
 tur ergo ex these motu velociori in C, utpote  
 qui duplo superet motum illum tardio-  
 rem: quare hoc supposito, duos distinctos manere  
 motus, necesse concludetur punctum A esse  
 eodem tempore in B & in C, & ita idem pun-  
 ctum esse simul in duobus locis, quod penitus  
 impossibile: quare duo isti motus distincti in  
 eodem



eodem admitti nullo modo possunt. Iam si ad alteram partem se divertant, & dicant duos hosce motus, in unum mistum coire non deest quod reponamus. Regerimus enim i. fieri non posse ut duo isti motus coeant in unum mistum: motus enim illi solummodo miscentur, qui fiunt super eodem centro & polis, & ad eundem Terminum: At duo isti motus utcunque; ad eundem Terminum dirigantur, non eodem tamen nituntur centro: orbis enim ille intermedius in quo corpus solare circumvehitur qui *Excentricus simpliciter* dicitur quoad utramque superficiem tam convexam quam concavam *Excentricus* est. Reliqui vero duo, ratione utriusque superficiem non idem habent centrum, siquidem alteram Terræ sive totius mundi respiciunt Centrum, alteram suum proprium. 2. quæro, utrum proprius motus medii illius orbis *Excentrici* sit mensura Anni Solaris vel non. Posterius non dicent, quia apud omnes Annus solaris creari intelligitur à circuitu solis per *Excentricum* illum intermedium, in quo linea *Ecliptica* intelligitur. Si proprius iste motus *excentrici simpliciter* sit mensura Anni, quæro rursus, utrum ab adventitio & communicato superioris orbis motu augeatur & intendatur, vel maneat idem qui antea? Non manet idem; quia duo Motus super eodem  
centro

centro ad eundem Terminum simul additi faciunt totum velociorem, *Vis enim unita fortior*: Si intendatur iste motus, adeo ut argumēto isto sit velocior, tum Anni Solaris quantitas exerceat ultra Terminum ab Astronomis praescriptum. Siquidem Anni quantitatem non ex motu isto mixto ex proprio & communicato, sed solummodo ex proprio motu orbis illius medi, quem excentricum simpliciter appellant, metiuntur. 3. quæro utrum motus superioris huius excentrici infimo per orbem intermedium communicetur vel non? posterius forsan non dicent, quia nulla ratio assignari potest, quare primum illud mobile (apud vulgares Astronomos) inferiores & sibi subiectos orbes magis commoveret quam excentricus iste superior inferiorem, ut infra demonstrabimus. Si autem communicet inferiori, tunc proculdubio inferioris illius intendit motum: At non, 1. quia motus isti duo ex These statuuntur æquales ut alter altero non sit velocior aut tardior. 2. Tantum abest ut motus inferioris communicato superioris motu augeatur, ut potius minuatur. Supponant enim necesse est utrumque motum eodem temporis articulo absolvi, quare motus erit velocior illius, cuius circulus est maior: circulum autem excentrici illius superioris in sole inferiori

inferiori maiorem esse quis non fatebitur? Iam si dicant supremum illum excentricum in solis orbe motum suum nullatenus communicare: suis haud minus principiis obstant; Quæ enim causa assignari potest (ut diximus) quare reliqui orbes superiores potius inferiores sibi subiectos commoverent, quam Excentricus solis orbis Excentricum inferiorem? cum eodem penitus modo se invicem respiciant: 2. Solem in Orbe excentrico non moveri tali conficitur demonstratione. Si Excentricus orbis in sole admittatur, cuius punctum alterum recedat maximè à Terrâ seu mundi centro, alterum verò ad prædictam Terram maximè appropinquet, describat necesse est sol in puncto illo remotiori existens parallelum motu suo diurno magis ab æquatore distantem quam punctum illud proximum: unde sequetur maximas solis Declinationes inter se non æquales esse, adeò ut Septentrionalis ubi Aux seu punctum remotissimum existit, maior sit quam meridionalis ubi oppositum Augis seu punctum Terræ proximum reperitur: At omnes Astronomi uno consensu fatentur maximam solis Declinationem in Septentrione æqualem esse Australi: Item in sphaerâ obliquâ, cū sol collocetur in Auge nempe in Cancro, Arcus Diurnus maior esset Arcu Nocturno eodem

eodem existente in opposito Augis, hoc est. in Capricorno: Hoc autem communem oppugnat experientiam. Sole enim in gradibus Eclipticę oppositis exisienti, duo describentur paralleli, quorum alterius Arcus Diurnus Arcui alterius Nocturno æquatur: Respondebunt hinc forsan, hoc nihil concludere in sole: cum enim sol tantam Distantiam habeat à terrâ, fit ut nullam aspectûs diversitatem admittat. At hæc claudicat responsio, 1. Quia utcunq; magna fit Distantia solis à Terrâ, parallaxim tamen Sensibilē admittere à magnis Astronomisprehenditur. 2. Aut admittenda est sensibilis illa diversitas aspectûs in sole, aut rationes Ptolomei, quibus probare nititur Terram esse in Centro, nihil concludunt: consequentia probatur: quia sumuntur ferè omnes ab æquali sectione horizontalis circuli: quæ ratio nihil obtineret si aspectûs diversitas sensibilis non admitteretur. Contra Epicyclos autem non minus est quod reponamus: transibimus plurima, & unicam solummodò à Lunâ tanquam à notiori derivabimus instantiam. Si Luna in Epicyclo circumvehatur, non semper eandem Lunæ medietatem videbimus, sed quando est in parte Epicycli superiori unam, quando in inferiori aliam conspiciemus: hoc autē vulgari experientiæad ver-

fatur

fatetur quia easdem semper Lunæ maculas intuemur; quod certissimum est indicium, eandem semper nobis faciem & medietatē obvertere. Respondent hīc vulgares Astronomi, Lunam præter motum suum, quem habet in suo Epicyclo, proprium habere motum circa proprium Centrum, ex quo motu consequitur, ut eandem semper nobis faciem commaculatam ostendat. Rem ipsam non inficior: At hinc tamen evincimus, tales Astronomos sui ipsius Aristotelicæ Philosophiæ principia funditus evertere, quibus talem corporum cœlestium machinam superstruxerint. 1. Quod Aristoteles stellis ipsis nullū omnino motum concesserit, nisi quem à suis orbibus acceperint; quare Luna hac ratione circa suum centrum non convertetur. 2. Luna si supra suum centrum convertatur, tam ut corpus aliquod à suo Epicyclo distinctum, vel ut eiusdem pars: Non prius: quia iuxta Aristotelem stella omnis est densior pars sui orbis; quare non ut corpus aliquod ab orbe suo distinctum. Si ut pars, ergo per se non movetur nisi ad motum sui orbis: partes enim non moventur nisi in suo toto. Hoc posito corrueret aliud principium peripateticum: *Unius corporis simplicis unicum esse motum simplicem*. Quippe in Luna in hoc statu præter reliquos motus plurimos aliunde

derivatos, duos saltem sibi vindicabit proprios & Naturales; Alterum ad motum sui Epicycli, alterum verò circa polos proprios, quo faciem suam Terræ perpetuò obvertat. Hūc accedit tanquam non minimi momenti argumentum; quod Natura compendii mater multiplicitem illam orbiculorum *Excentricorū* & *Epicyclorum* non sine iniuriā patiatur, præsertim cū talia in cœlis monstra nec *Experientia* unquam invenerit, nec necessitas introduxerit: fieri enim potest (ut in sequētibz aperiemus) ut explosis hisce hypothēsibus, salva tamen & illæsa maneat *Astronomia*, ut maiori certè quàm hodiè doceatur facilitate & certitudine: quare concludimus *Excentricos* hosce & *Epicyclos* ad salvandam stellaris altitudinis in Cœlis inæqualitatem inventos, nec satisfacere Naturæ legibus, nec discentiū captui, utpote quæ *Artis Astronomicæ* progressum impediunt magis quam promoveant. Secundam *Rationem* desumere possumus ex *Irregularitate* motus cœlestis, præsertim solis, quæ tales *Hypotheses* necessariò consequuntur: Soli enim duplicem adscribunt motū vulgares *Astronomi*, alterum *Diurnum*, alterum *periodicum*: quorum hic *Ecclepticā*, ille æquatore mensuratur: certum est autem solem in quolibet *Ecclepticæ* puncto positum  
motu

motu suo diurno parallelum describere quo-  
ad sensum: parallelli autem cum sint majores  
& minores, eodem tamen temporis spatio à  
sole transcendendi, necesse est ut sol nunc velo-  
cius, nunc tardius moveatur, ut motus iste mi-  
nimè sit regularis: velocior enim requiritur  
motus Solis in *Æquatore* quàm in *Tropicis*,  
ut superiori quâdâ exercitatione docuimus.  
Tertiò, ad id angustiarum adigere possumus  
adversarios in hac causâ, ut vel multiplices il-  
las orbium contignationes excludant, vel fa-  
teantur omnimodam in Rebus Astronomicis  
Incertitudinem. Si enim multi orbes hujus-  
modi admittantur multiplicem admitti ne-  
cesse est superficiem. Multitudo verò superfi-  
cierum juxta principia optica, multiplicem  
introducitur *refractionem*, quæ autem refractæ à  
nobis videntur, videntur extra proprium suum  
locum: quod rorèrâ in omnibus observationi-  
bus coelestibus tandem introducet incertitu-  
dinem, quanta nullâ hominis industria aut ar-  
te refartitur: Vulgare (sæpe) est hoc argu-  
mentum: at interim expecto quid adversarii re-  
spondeant; dicant fortasse hæc nobis restitui  
certitudinem; ubi stellæ in puncto verticali  
observantur, in quo nulla est *refractio*. Radius  
enim perpendicularis juxta Opticos non re-  
fringitur. At hinc parùm obtinent; quia maxima

stellarum pars, quæ Astronomicis observati-  
onibus subiiciuntur; *Zenith* nostrum non at-  
tingunt. Dicant fortasse cum *Uitellione* con-  
tinuitatem esse in orbibus, licet non *Corporum*  
& *Quantitatis*, tamen *Diaphanietatis*. At hæc  
responsio nõ minus in *Optica* impingit prin-  
cipia: Primò, quia multitudo superficierum,  
utrunq; æqualis *Diaphanietatis*, multiplicem  
introducitur refractionem: Refractio enim in  
superficie fit non in solido: unde refractionem  
impedire non potest ipsius corporis *Diapha-  
nietas*, ubi diversa superficies admittitur.  
Quod dilucido constabit experimento: Vi-  
trum aut ChrySTALLUM quis non fatebitur esse  
corpus *Diaphanum*? Vbi verò contritum fu-  
erit in minutissimas partes, *Diaphanietatem*  
esset, & statim induit opacitatem: Quæro  
hinc à quo receperit hanc opacitatem? Non à  
diversitate *Diaphanietatis*: Qui partes in se  
singulæ æqualis sunt *Diaphanietatis*, ex The-  
se: acum eiusdem ChrySTALLI contracti partes  
sunt. Accipiet itaq; à superficierum multipli-  
citate, quæ multiplicem refractionem intro-  
ducit & *Diaphanietati* iniicit impedimētum.  
Secundò ubi dicunt omnes othes eiusdem vel  
æqualis esse *Diaphanietatis*, dicunt solummò-  
do non probant. Affirmanti autem incumbit  
probatio. Quartò supponat exhibere Hypo-  
thesibus



thesibus nonnullos orbes esse sine stellis: quales sunt illi quos supra firmamentum stellarum collocant, & quos in planetis ad deferendum *Augem & Oppositum Augis* constituunt. At orbes totidem in cœlis suis stellis destitui, videtur naturæ absurdissimum. Certum est enim apud omnes, orbes omnes propter stellas creari, ut essent earum vehicula. Respondent forsan adversarii, orbē stellis inservire, non quod semper circumvehit in se stellam, sed quod motu suo inferioribus communicato regulet ac disponat. Esto. At hęc responsione nihil obtinent. 1. superiores orbes ad movendum inferiores admittunt nullam aliam ob causam, nisi quod unius corporis simplicis plures motus concedere vereantur. Interim tamen in aliis iste non urget sciupulus. In Luna enim, Sole, & Iove, plures motus naturales fateantur necesse est, idq; ex suis principiis, alterum Planetarum circa proprium centrum, alterum in quo centrū ipsum movetur. Quidni igitur idem de omnibus iudicemus, ut quorum hac in causa similis omnino sit ratio. 2. Quomodo superiores illi orbes inferiores complexu suo promoveant & secum circumrapiant, res est difficultate plena: vel enim orbis superior circumtotando inferiorem, operatur contactu quodam corporali, vel Influxu &

magnetico tantum utriusque orbis concursu & mutuâ ad se invicem inclinâtione. Non prius: Primò quia omnis contactus corporalis supponit actionem transmutativam: quippe tangere est in aliud agere. Tangi autem est hanc actionem in se tanquam novam formam recipere. At tales in cœlis passionēs non admittuntur. Actiones autem transmutativæ supponunt luctam & corruptibilem subiecti naturam: quod Peripatetici averſantur. Nec respondere hîc possunt actionem hanc & passionem esse sine omni resistantiâ, adeoque perfectivam esse non corruptivam; quia motus ille externus qui corpus aliquod mobile torquet à proprio suo cursu in obliquam, & penè in oppositam partem sine luctâ & resistantia non potest concipi. Quod in sequentibus ulterius persequemur. Quod si dicant superiorem non vim aliquam inferre inferiori, sed mutuos orbis conspirare magneticâ quadam inclinatione, ut simul æquali motu mutantur: hâc ratione concedant necesse est, motum istum quem dicunt communicatum, esse naturalem: quare cum præter motum istum aliquem sibi vendicet naturalem, erunt unius corporis simplicis plures motus simplices: Magnetica enim conspiratio duorum corporum ad se invicem, non supponit vim à iquam ab altero in alterum impressam,


inpressam, sed similem formarum utriusq;  
inclinationem ad eundem motum, quæ non  
potest esse violenta sed naturalis. Secundò,  
hoc admissò non opus esset orbe aliquo supe-  
riori, cum orbis in se inferior tali polleat mo-  
vendi aptitudine, ut alterius adminiculo non  
indigeat. Tertiò orbis inferior hâc ratione nõ  
magis à superiori moveri dicitur quàm supe-  
rior ab inferiori, cum simili gaudeat inclinati-  
one. Quartò nullos penè invenio apud vulga-  
tos Astronomos, qui dicunt orbem inferiore  
à superiori moveri hoc modo, sed potius con-  
tactu corporali. Secundò, fundamentum istud  
vulgarium Astronomorum asserentium supe-  
riores orbes secum circumrapere inferiores  
duplici laborat difficultate. Nam primò, in  
orbibus inferioribus motuum introducunt  
multiplicitatem incredibilem. Secundò, talẽ  
motuum istorum contrarietatem, quam nec  
natura ferre, nec intellectus capere possit.  
Hoc enim posito fundamento, orbes omnes  
superiores suum motũ inferioribus communi-  
care (cui assentiunt vulgares Astronomi) ex-  
ploremus tandẽ quot in orbe Lune, qui infini-  
tus statuitur, motus varii experiantur, Inve-  
niant necesse est in hoc unico orbe, 1. motum  
diurnum quo à primo mobili ab ortu in occa-  
sum quotidie rapi intelligitur. 2. Duos mo-

tus Librationis à Clavio & Magino introductos, quorum altero à septentrione in meridiem & retrò agitur, altero ab ortu in occasum & contrà. 3. Motum tardissimum, & non nisi 49000 annis completum. 4. Motus omnium sex Planetarum qui supra lunam collocantur. 5. Motum suum proprium. Vt omnes isti motus si computentur, sint duodecem. Hùc si accedat numerus motuum omnium specialium orbium partialium, qui non in aliquâ tantum Planetarum, sed etiam in ipsa Lunæ spherâ inveniuntur, motuum animadvertemus multiplicitem & confusionem, cuius natura unquam conscia apud candidiora ingenia nusquam existimetur. Certè argumentum mihi satis solidum suppetit, motuum in uno orbe admissorum numerus & multiplicitas ad talium Hypothesium vanitatem oppugnandam. At quàm benè cohæreant & consistant inter se isti motus suâ confusione aut oppositione, si pensitemus, plura invenimus monstra, quàm in ipsa motuû varietate. Supponunt enim 2<sup>o</sup> Ex hisce Hypothesibus unus corporis plures esse motus ad eundem terminum, super eodem centro; ita ut alii tardiores, alii velociores reperiantur: quam absurditatem tanquam à naturâ alienam suprâ expressimus. 2. Orbes plurimos incitantibus

& velocius moveri motu violento, raptu primi mobilis quàm naturali, quasi natura in illis plus cederet & pateretur quàm ageret. 3. Inverti naturæ ordinem: Animadvertitur enim communiter orbes quo superiores fuerint, eò motus sui periodum maiori temporis intervallo claudere: inferiores autè velociori spatio cursum suum absolvere, quod ex inductione motuum planetarum facile colligitur. Hi interim primo mobili, omnium maximo & immensæ vastitatis corpori, motum largiuntur omnium celerrimum, utpote qui diurno spatio conficiatur. 4. Contra Aristotelis sui principia statuunt, unum & eundem motum naturalem esse ad duos contrarios terminos: ut in duobus illis librationum motibus: quorum altero ab Austro in Septentrionem vergere, & à Septentrione rursus in Austrum regredi intelligitur: altero similiter ab occasu in ortum, & rursus ab ortu in occasum. At hoc non ferendum in Philosophiâ Peripateticâ, quæ statuit 1. omnem motum naturalem esse ad unum terminum definitum, à quo suam accipiat unitatem. 2. Omne agens naturale semper agere quoad ultimas vires, ut actionem suspendere, remittere, aut immutare non possit. 5. Supponunt plures motus ita inter se oppositos ut se mutuò non patiantur

patiantur. Inter reliquos duos tantum motus  
selegemus, alterum *Diurnum* ab ortu in occa-  
sum, alterum verò *Periodicum* ab occasu in  
ortum. Qui duo motus oppositi in eodem or-  
be reperiuntur. Quæro hic quomodo duo isti  
motus oppositi simul possint consistere? Op-  
timè respondebit Peripateticus, qui cum mo-  
tus isti duo non sint super eisdem polis, sed al-  
ter super polis mundi, alter super polis ecclip-  
ticæ non censendi sunt motus inter se contra-  
rii. Siquidem motus verè contrarii oppositos  
recipiant terminos, ita tamen ut eodem sem-  
per nitantur centro. At responsio ista non tol-  
lit difficultatem. Quæro enim rursus, utrum  
duo isti motus, Diurnus nimirum & Periodi-  
cus, maneat duo diversi motus in Sole, Lunâ  
vel alio, vel saltem in unum medium coales-  
cant? non manent duo diversi & distincti mo-  
tus; quia ex hoc sequetur, idem orbis mobi-  
lis punctum motum simul esse in diversis  
locis, quod penitus impossibile. Statuatur e-  
nim exempli causâ in puncto *Æquinoctii*  
vernali ut exinde moveatur, quæro, utrum in  
motu suo recedat ab *Eclipticâ* lineâ vel non:  
Non recedit, quia hoc omnes Astronomi uno  
ore negant: si non recedat manentibus duo-  
bus motibus Diurno scilicet & Periodico,  
ex These distinctis erit unum idemque solare  
centrum

centrum simul in diversis punctis: quippe Diurno suo motu procedet directè in lineâ *Æ*-quinoctiali ab ortu versus occasum, unde non alibi quam in illa lineâ inveniatur: Motu verò suo Periodico movebitur in eclipticâ ab occasu versus ortum, extra *Æ*quatorem cum bis solummodò in anno illum secare apprehendatur: erit itaq; hoc modò solis centrum (modò motus isti non misceantur, sed distincti maneant) simul in diversis punctis, ut in ortu simul & occasu, deinde in *Æ*quatorè simul & extra *Æ*quatorem, ut facillimû est colligere ex isto Schemate huic affino: constituatur enim Sol



in C, movebitur ergo motu suo Diurno in eadẽ *Æ*quatoris lineâ versus occasum, motu verò Periodico transversim gradietur, in Eclipticâ versus ortum extra *Æ*quatorem, ut in eodem

eodē semper puncto invenire sit prorsus im-  
 possibile, nisi duo isti motus concurrere sta-  
 tuantur & in unum mistum coalescere. Si ve-  
 rò duo isti motus in unum concurrant me-  
 dium & mistum, oportet necessario, ut cum  
 Neotericis quibusdam lineam quandam ad-  
 mittant *Spiralem*, quæ istum motum metia-  
 tur; siquidem omnem motum linea quædam  
 mensurat: linea autem alia hic somnari non  
 potest in quâ utriq; motus isti inter se con-  
 currant mixtum nisi spiralis: At ex principiis  
 Aristotelicis minimè ferendum esse talem in  
 cælis motum, qui Spirali lineâ conficiatur, nō  
 difficile est demonstrare. 1. Quia omnis Na-  
 turalis causa ad unum solummodò definitur,  
 ut unicum solummodò respiciat terminum,  
 non plures? Motus autem iste Spirali lineâ  
 confectus varius est & multiplex, ut indies al-  
 lium atq; alium acquirat terminum. 2. Sol in  
 istâ lineâ Spirali promotus cū Tropicum  
 appulerit, revertetur: Quæro à quo Agente?  
 Non à Libero; quia cælum est corpus Inani-  
 matum, quod naturâ agit non consilio. Non à  
 necessario, quia hoc semper agit quoad ulti-  
 mum, nec suspendere, aut remittere potest su-  
 am actionem, ut Tropicum appellens iterum  
 regrediatur: Regredi enim est Agentis liberi  
 non Naturalis, cum tantum in remissâ sit agē-  
 tis



tis facultate; aut saltem in agentis consilio a i-  
ter dirigenti. 3. Motus cœlestis est semper  
simplex iuxta Aristotelem, & ad unum termi-  
num definitus, qui integrum circulum confri-  
cit. Hinc iuxta Aristotelis sententiam, motus  
iste Spiralís nullo modo est admittendus, ut  
qui in completo & perfecto circulo minimè  
concipiatur. Ex his colligimus, motus illos  
contrarios, adhuc consistere non posse, siue  
duo maneant, siue coalescant in unum tertium  
& mixtum. Hanc difficultatem animadver-  
tens Clavius, aliam procudit distinguendam  
lesiurâ dignam: Motus (inquit) cœli ab occa-  
su in ortum non est simpliciter, sed secundum  
quid: simpliciter enim motu captus incitatur  
etelum ab ortu in occasum: Secundum quid  
verò, in ortum ab occasu quia, rapitur in ori-  
entalia signa: cum Zodiaco primi mobilis  
Zodiacus non sphaeræ directè sit suppositus.  
Athæc mihi responsio minùs quidem sa-  
tisfacit quam altera: 1. Quia superiores om-  
nes difficultates recurrunt: utrum motus isti  
diversi maneant, vel in eundem coalescant.  
2. Hinc sequitur dari aliquod mobile quod  
secundum quid motu proprio, simpliciter au-  
tem violento & accidentario incitatur, quod  
videtur rationi absolum. 3. Vbi dicunt no-  
nam sphaeram & ita inferiores illi subiectas  
motu

motu suo consequi signa Orientalia, quæro, utrum duo signa alterum superioris, alterum inferioris Zodiaci moveantur motu æquali vel non? Si æquali motu, tunc signum illud inferioris Zodiaci illud superioris nunquam consequetur: quod Hi contendunt: quantum enim motus altero fuit consequutum, tantum altero minuetur: Si inæqualis, tunc motus superioris signi erit celerior motu inferioris aut contrā: Si prius, movebuntur ambo ab ortu in occasum: si posterius, movebuntur ambo à parte occidentis in ortum. Superior enim secum rapit inferiorem, ut diximus. Adversarii hîc ut aliquam præ se ferant probabilitatis speciem simili conantur illustrare quod in se suscipiunt. Sit Navis (inquiunt) quæ ab ortu in occasum moveatur. Interea in illâ ambulet Nauta ab occasu in ortum: At similitudo ista nihil obtinet, 1. Quia nauta in nave supponitur esse mobilis, ab eaq; separabilis: Sol verò in suo orbe infixus esse creditur. 2. Vbi nave in ortum tendente nauta in ipsa versus occidentem vergit: Quæro utrum Navis motus sit illi nautæ Æqualis vel celerior vel tardior: Si æqualis nautæ & navis motus fuerit, nec in ortum, nec in occasum movebitur, sed eundem semper servabit meridianum: Si celerior sit ipsius navis motus, movebitur  
nauta

nauta in ortum ab illo meridiano: si tardior  
retrocedet ab illo in occasum. Huc accedit  
ultimo loco argumenti Authoritas Sacrae Pa-  
ginae, quæ testatur Deum in primâ creatione  
Aguas supercœlestes à subcœlestibus secre-  
visse. Hic per aquas supercœlestes necessariò  
intelligent necesse est, vel nubes vel vapores  
in media aëris regione, vel saltem Ætherem  
corpus liquidum supra Firmamentû: non  
prius possunt intelligere: quia dicuntur aquæ  
suprà Firmamentum: per Firmamentum au-  
tem intelligit Expansionem illam quæ concipitur  
tanquam duarum illarum aquarum in-  
terstitium. Si posterius affirmant, fateantur  
necesse est cœlum esse corpus liquidum non so-  
lidum, ideoq; talibus orbium scissuris non esse  
dividuum. Hæc omnia quæ diximus ut unico  
cōpingam fasciculo, statuo Delineationē cœli  
Ptolomaicam penitus reiiciendā esse. 1. Quia  
necessariò supponit orbes Reales quorū Va-  
nitate & Falsitatem superius perstrinximus;  
2. Modus iste cœlorum Compagem & motus  
exprimendi ob multiplicem circularum con-  
fusionem suprà modum discentibus onerosus  
& sollicitas invenitur, ut Intellectum plùs  
involvat & turbet quàm doceat & dirigat.  
3. Quod Hypotheses istæ utcunq; à recentio-  
ribus emendatæ & purgatæ Phænomenis ta-  
men

men minimè satisfaciant ut Intellectus nihil penè certi habeat in quo conqueſcat : impereſt itaq; ut reiectis & amputatis his orbium Hypotheſibus, novum quoddam cœlorum ſynagoga meditemur. Triplicem hîc invenimus cœli delineandi modum Copernicanum, Tichomanum, & Keplerianum: è quibus ſi non ſingulis, ſaltem omnibus, veritatem eruere non videtur difficile. De ſingulis integrum ſit loqui quę ſentiam, nō quod doctiſſimis Mathematicis in minimis me comparem, ſed ut doctiorum examini ſubiiciam quid ipſe cogitem. In primis itaq; non omni ex parte æridet Systema Copernicanum ob has rationes. 1. Quia ſupponit Terram triplici donatam Motu : quod videtur abſurdum. Terram quidem ſuper ſuis polis circumvolvi in ſuperioribus defendimus, tanquàm probabile: Multiplicem tamen illi motum largiri non ita ſanum duximus: Quippe neceſſe eſt ut duos ex illis motibus, Diurnum ſcilicet, & illū quo poli convertuntur, ad unum medium & mixtum reducat, aut ſaltem in omnes difficultates prius à nobis patefactas incidat : utriuſq; incongruitatem ſuprà oſtendimus. 2. Hac Theſis videtur ſacris litteris oppoſita, quę teſtantur locis haud paucis Solē movere & Terrā quieſcere: At Copernicus ſtatuit Solē  
lem

Iem omnimodo quiescere in centro, Terram  
verò omnimodo moveri, ut non inveniatur  
modus quo aut illi motum, aut huic quietem,  
ad salvandam Sacre Scripturæ Authoritatem,  
largiamur; quod homini Christiano absolum.

3. Videtur non satis probabile Terram move-  
ri circa Solem tantillâ distantia, quia respectu  
Fixarum nullam omnino quantitatem sibi  
vendicare deprehenditur, sed instar punctuli  
in Nihilum evanescere: quare probabilius illi  
assignatur locus à Fixis remotior quàm à Co-  
pernico statuitur. Postulet enim necesse est  
totum orbem seu circulum, in quo Tellus circa  
Solem circumvehitur nullam habere propor-  
tionem sensibilem respectu fixarum: Nam a-  
liàs Sol haberet Parallaxin notabilem, quod  
tamen pleriq; Astronomorum negant 4. Non  
minus est improbabile quod Fixis stellis nul-  
lum omnino largitur motum, cum hoc & Na-  
tura sphericorum ferè omnium postulet, &  
Astronomi omnes antiquiores posuerint. Si-  
quidem non magis videtur absurdum Fixis  
negare, quàm Planetis: At Planetæ omnes  
(excepto Sole) iuxta illum variis incitantur  
motibus: Fixæ autem (inquit) eodem & æ-  
quabili incitari videntur motu, ut in eodem  
orbe sitæ intelligantur. Probabilius itaque  
astruitur illas quiescere: At hinc sumatur mo-


tus *Æqualitas* non *Quies*: Deinde ex *Philosophiæ Peripateticæ* principiis nullum omnino erit corpus *Naturale*, cui aliquis saltē motus non quadrat. Nullum enim in corporibus manū *Naturæ* indicium invenitur, quā *Motus*: Non verisimile est itaque corpora hæc splendidissima communi *Naturæ* privilegio spoliari, quo reliqua donantur omnia. Deinde in *Systemate Kepleriano*, licet ad *Phænomena cœlestia* salvanda satis sufficienti, non minus est quod excipiam ex ipsius *Naturæ* principiis. 1. Quia *Hypotheses* suas absolvit predictus author, non integris circulis, sed *Lineis Ellipticis* quas *ovales* vocāt. At de maximis hisce *Naturæ* operibus cogitare non didici nisi optimum: Vnde probabilius videatur citius stellarum circulis integris & perfectis metiri, quā *Imperfectis*, quæ tantum à *Naturæ* recedunt integritate, quantum à *rotunditate* deficiunt. 2. *Motus* omnes talibus mensurati *lineis* non possunt esse simplices sed *mixti* & *compositi*: siquidē omnes *motus* simplices sunt aut absolute *Recti*, aut absolute *circulares* iuxta *saniores Philosophos*: At *motus* *compositi* & *mixti* cœlo non possunt competere, quod omnium corporum cēsetur esse simplicissimum. Vltimò accedit *Schema Tichonianum*, quod licet quā proximē ad veritatem

veritatem accesserit, habet tamen in quibus  
 limam patitur. 1. Quod ad delineandam So-  
 lis viam in Eclipticâ, confugere coactus est ad  
 lineam Spiralem quam cœlorum Naturæ ad-  
 versariam esse, probabiliter in superioribus  
 ostendimus. 2. Quod Terræ corpori Sphærico,  
 & Naturæ (uti docuimus) ad motum satis ido-  
 neo, nullum omnino motum circularem con-  
 cesserit, sed in loco Immobilem penitus &  
 Fixum statuerit: nobis tale sit cœlorum syn-  
 tagma, quale in Diagrammate hoc affixo ex-  
 primitur, quod (uti spero) nec multiplici cir-  
 culorum confusione discentibus iniiciet tadi-  
 um nec suâ sterilitate salvandis hypothesibus  
 deficiet. Aliquid me in arduis his Naturæ  
 mysteriis assequutum putabo, si quàm prox-  
 imè ad veritatem accessero, quam acutè tigi-  
 se paucissimi glorièntur. Centrum seu Medi-  
 um in hoc nostro Schemate Telluri assignavi-  
 mus, quam motu donamus unico circulari,  
 nimirum ab occasu in ortum super suis polis  
 24 horarum spatio, qui motus Diurnus ap-  
 pellatur & primo mobili, iuxta vulgares A-  
 stronomos, inesse creditur: ex hoc motu dies  
 Naturalis mensuratur. Circa Terram seu cen-  
 trum totius mundi Luna circulo suo circum-  
 gyrari statuitur, ut quæ inter omnes Planetas  
 Sphæram Terrestrè proximò situ fortassis

& naturâ respiciat: Hinc succedit Sol Planetarum Coriphæus, qui motu suo Annuo circa Terram circumvolutus, describit Eclipticâ circa Solem verò, tanquàm centrum, Planetæ moventur omnes, exceptâ Lunâ: Proximi solis comites, qui à latere comitantur, sunt duo planete illi Veneris & Mercurii, qui solē tanquàm centrum immediatè ambiunt. Reliqui tres Planetæ ut sunt Martis, Iovis, & Saturni, utcunq; Solem tanquàm centrum suum ambiunt, ita tamen ut circuitu suo & ipsam Terram complectantur: Martis verò stella, quoniam modò infra, modò supra Solem moveri deprehenditur, in circulo quodam circumferri intelligitur, qui ex adverso Solis loco interfecet Solis circulum: Non verendum itaque ne Mars & Sol in eodem puncto se mutuo impediant in movendo: cum enim Mars circa Solem, tanquàm centrum suum, circumferatur, æqualemq; ab ipso ubiq; observet distantiam, fieri non potest ut mutuo sibi viam obstruant; nec unquam infra Solem deprehenditur, nisi cum propè accedit ad oppositionē aut parum recedit ab ipsâ: unde causa assignatur, quare Martis stella in oppositione semper apparet maxima, quod & experientia & Astronomorū consensus ratum facit. Hi Planetæ quinq; nimirum Saturni, Martis, Iovis, Veneris



Veneris, & Mercurii, duplicem sibi motum vendicant: Alterum Proprium & Naturalem quo circa Solem tanquàm proprium incitantur centrum: Alterum secundarium & veluti ex Consequenti, quo nimirum planetæ isti ad ductum Solis, velut Ducis, circa Terram circumrotantur: Sol enim in Eclipticâ constitutus ita circumambit Terram, ut omnes secum



planetas reliquos, tanquàm satellites rapiunt:  
 Motus autem iste non est propriè horum planetarum

netarum sed Solis cui planetæ isti famulantur: moto enim Sole in eclipticâ, moveri intelliguntur Epicycli omnes in quibus planetæ isti circa solem agitantur: ut motus istorum circa Terram sit tantum ex consequenti Difformis & Irregularis cui omnes illi sunt penitus excentrici. Planetæ enim quinque prædicti, licet eadem materiâ continua soli non uniuntur, eadem tamen Naturâ & communione magneticâ ita solem respiciunt, ut sol cum hisce suis comitibus tanquam unum continuum & Homogeneum Telluris globum circumambulet. Vnde horum motus talis est habendus, quali partes ad motum totius sui incitantur. Supra planetas omnes collocamus cælum Stelliferum seu Firmamentum Telluris orbi prorsus concentricum, cuius motus sit tardissimus, non nisi multorum annorum millibus absolvendus, super polis Eclipticæ, ut Astronomi probabiliter conjectant. Hujus motum Aristoteles voluit esse velocissimum, eo quod hunc orbem primum Mobile statueret, cui motum Diurnum tribueret. At hunc motum nos cælo eximimus, & Terrestri orbi ascribimus, juxta genuinum Naturæ ordinem, quæ sphaeris superioribus & majoribus majorem temporis intercapedinem, minoribus vero & inferioribus minorem concesserit, ad suas Periodos

riodos absolvendum. Superest ultimò ut demonstramus, ex hisce Hypothesibus nostris probabilius salvari Phænomena omnia cœlestia, quàm ex vulgaribus illis quæ passim venditantur. Phænomena præcipuè quæ nobis salvanda proponuntur, vel respiciunt Motû cœlestium corporum, vel Locum & Situm. Reliqua omnia aut minoris sunt momenti, aut saltem hîc revocantur tanquam ad veras suas radices & principia. Motus omnis qui in cœlestibus corporibus deprehendi existimatur, est vel Diurnus vel Periodicus: Diurnum tribuimus orbi Terrestri, qui ex nostris principis super suis polis 24 horarum spatio ab occasu in ortum moveri statuitur: ut respondeat motui illi Primi Mobilis apud Aristotelem qui ab ortu in occasum fieri existimaretur. Motus Periodicus est aut Motus tardior multorum annorû millibus absolvendus, aut motus Planetarum concitior: Motum istum tardissimum volunt esse duplicem; Alium ab occasu in ortum super polis Eclipticæ: Alium (uti vocant) Trepidationis ab Austro in Septentrionem & retrò: Duobus hisce motibus satisfaciet unicus, fixarum stellarum orbi concessus, seu Firmamento quod super polis circuli Ecliptici motu quodam tardissimo incitari intelligitur. At hîc forsan objiciant duos

hic esse distinctos motus, ut ad unum revocari non possint: observarunt enim primò stellas figuri, ut Arietis & Tauri, in eisdem hodiè non apparere punctis Zodiaci, quibus antiquitus deprehendebantur; sed quibusdam gradibus promotas esse ab occasu in ortum: unde evinci videatur motus iste ab occasu in ortum. Secundò, non minori constabit experimento, stellas quasdam aut omnes ab Austro provectas esse in septentrionem: ut omit-  
tamus ceteras, stella Polaris (quæ vulgò Cynosura nuncupatur) Hyparchi tempore distare deprehensa est circiter gradus duodecim, quæ hodiè gradus propè tres attingit: quòd si duo isti motus ad unum reducerentur, Astronomorum calculus deficeret. Ad hoc respondemus, nihilominus unicum est motum super polis Eclipticæ, quo fit ut non tantum stellæ istæ ab occasu in ortum promoveantur sed etiam ob Eclipticæ obliquitatem magis magisque vergant ad mundi polum, ex quo postea regrediantur, pro sui circuitûs ratione: siquidem movetur ab occasu in ortum tanquam per se, circulo quodam Eclipticæ Parallelo: ab Austro verò in septentrionem veluti per Accidens, quia ex hoc motu fieri non potest quin inclinet vel declinet magis magisque à verò mundi polo: ubi verò obijciunt motum

tum talem non omnibus Phænomenis satisfacere, quod non ratâ semper proportionem progrediatur, ut eodem temporis interstitio modo tardius, modo celerius stelle iste agitari inveniuntur: Respondemus tantillâ esse hanc discrepantiam ut observantium Imperitiæ, aut saltem negligentie, citius imputandum sentiant Doctiores Astronomi, quam motuum diversitati. Quis enim non palam experitur Astronomos nostros hodiernos, eodem temporis momento eandem observantes stellam, inter se non parum dissentire: quibus tamen, & Instrumentorum antea non inventorum copia suppetit, & scientia antiquiorum inventis auctior. Quid de iis igitur iudicandum, qui magno annorum intervallo dissiti instrumentis autem planè dissimilibus usi, tantillis inter se minutiis dissentirent? præsertim in inveniendâ tardissimi huius motus periodo & quantitate; qui ob summanam suam tarditatem, ex quo primum innotuit mortalibus, ne decimâ quidem quintam circuli partem absolverit. Certè credâ ego citius errasse antiquiores in verâ huius motus periodo, quam orbes quam par est plures introducâ. 1. Quod differentia hæc (ut diximus) in minimis admodum minutiis posita sit, quas peritissimorum sæpè industria negligit. 2. Quod facile patet ex historiis

storiis Astronomicis quibus demum usi fuerint hi Astronomi instrumentis ad hæc investigandum. Hæc enim Instrumenta rudiora & ineptiora visâ sunt Recētoribus Astronomi quàm ut tales nobis minutias & subtilitates aperirent. Quare satius hîc duximus Naturæ principiis consentire quàm incertissimis taliû observationû fundamentis temerè confidere. Motus in cœlis concitatiores sunt septē planetarum, quorum singulis proprii circuitus destinantur, ut ad Numerum motuû nihil amplius desideres. Deniq; ratio hîc sine difficultate reddi potest earum apparentiarum quæ situm Planetarum respiciunt. Quinque enim Planetę circa Solem suos cursus conficere statuuntur: quo fit ut distantiam à Terrâ observent Inæqualem, ut modò ascendant altius modò infrâ deprimantur. At contra nos obijciunt forsan, Solem & Lunam, iuxta schema hoc appositum, Terræ statui concentricos; unde ratio non reddi potest, cur Sol & Luna nonnunquam ascendant & descendant, ut modò in Apogæo, modò verò in Perigæo constituantur: Respondemus ex nostrâ sententiâ Solem & Lunâ non statui Telluris orbi penitus Cōcentricos, sed Excētricos: ita tamen à nobis non signari in Diagrāmate, quod nostri nō sit instituti ad minutias descendere omnes Astro-

astronomicas, sed tantum generalia perstringere: Minutulas vero hasce differentias in generali totius syntagmatis cœlestis delineatione Astronomi penè omnes negligunt: Nec certè suscipi in me unquam, ut perfectam & absolutam cœli depingerem & exhiberem *Diatyposin*, (opus quidem meis impar viribus) sed ut viam aperirem faciliorem, quàm ex Hypothesibus paucioribus, iisque, quàm in vulgari modo, explicatioribus, habeat Astronomiæ studiosus quod reponat, ad Phænomenis, si non melius, saltem æquè, satisfaciendum. Si quàm urgeatur difficultate, cogitet, hoc Astronomorum omnium commune esse infortunium, ut semper habeant quod quærant, nec inveniant fortassis unquam in quo aut sibi, aut aliis perfectè satisficiant. Interim affirmare auserim (quod in initio proposui) sex tantum circulis melius & dexterius satisfactum esse Phænomenis cœlestibus, quàm ab iis qui scissuras orbium solidorum multiplices introducerent.

LAVS DEO.